



# Ko'ha dunyo

Odil YOQUBOV



YANGI ASR AVLODI

Toshkent 2015

**UO‘K: 821.512.133(092)**

**KBK: 84(50‘)6**

**Yo – 93**

**Yoqubov, Odil**

Ko‘hna dunyo: roman / Odil Yoqubov. – Toshkent: Yangi asr avlodi, 2015. – 480 b.

ISBN 978-9943-27-564-5

Odil Yoqubovning ushbu asari 1982-yilda yozilgan. Oradan o‘ttiz uch yil o‘tib, uni qayta nashr etishimizdan maqsad – ulug‘ allomalarimiz Al-Beruniy hamda Ibn Sino hayoti va faoliyatini bugungi kun o‘quvchisiga tanishtirish, ulardan hayotiy va ma‘naviy saboq olishga qaratilgan.

Adib asarda ikki buyuk olimning bolaligi, ijtimoiy muhit, yoshlik yillari, ilk sevgisidan tortib, daho ijodkorga aylanguncha bo‘lgan davrni jonli va rangli bo‘yoqlarda tasvirleydi. Ularning ilm-fan taraqqiyotiga qo‘shgan buyuk ishlarini umumlashtirishga harakat qiladi. Har ikki ulug‘ ajdodimizning hayoti va fojiali taqdiri bugungi kun o‘quvchisini befarq qoldirmaydi, degan umiddamiz.

**UO‘K: 821.512.133(092)**

**KBK: 84(50‘)6**

ISBN 978-9943-27-546-5

© Odil Yoqubov, «Ko‘hna dunyo». «Yangi asr avlodi», 2015-yil.

## BIRINCHI BOB

Shoirning asli ismi – Qutlug‘qadam. Ammo hech kim buni bilmaydi. G‘aznada u Malik ash-sharob, avomchasiga esa Malik ul-sharob, ya‘niki g‘arib mayxo‘rlar sultoni degan nom bilan ma‘lum va mashhur.

G‘arib kulbasi esa garchi sulton Mahmud G‘aznaviy qasrlari bilan tenglasha olmasa ham, dovrug‘i butun dorus-saltanatga<sup>1</sup> ketgan. Shoirning kulbayi vayronasi shaharning eng chekkasida, Bog‘i Firuz va Bog‘i Mahmud kabi ko‘rkam bog‘lar, Osmon malikasi kabi marmar qasrlar, Ko‘shki davlat va Ko‘shki ma‘mur kabi tillakori saroylar, lojuvard gumbazli muhtasham masjid va minoralar, sershovqin bozorlar, karvonsaroylar, bir-biriga tutashib ketgan obod rastalar, kumush favvoralar o‘rnatilgan gulzor va maydonlardan yiroqda, gadolar va yo‘qsillar makoni bo‘lmish Afshon shol<sup>2</sup> dahasining xilvat bir burchagida joylashgan. Lekin bu qashshoq kulbaning o‘ziga xos ohanrabosi bor – u mulla mirquruq shoirlar, «chiqitga chiqqan» xonanda va sozandalar, saroylardan quvilgan munajjimlar, amirlar qahriga yo‘liqqan sarbozlar, qochqin g‘ulomlarning suyuqli makoniga aylangan.

---

<sup>1</sup> Dorus-saltanat – poytaxt.

<sup>2</sup> Afshon shol – qadimiy G‘azna mahallalaridan biri.

Kechalari bu makonga oqib keladigan faqir-u haqirlar garchi cho'ntagida sariq chaqasi bo'lmasa ham, o'z dovrug'i, o'z g'ururiga ega. Mashshoqlar davrasidagi setorchi, shunchaki setorchi emas, balki Bobo Setoriy deb chaqiriladi, g'ijjakchisi oddiy g'ijjakchi emas, Piri G'ijjakiy, hofizi shunchaki hofiz emas, Bobo Hofiz, Bulbuliy, shoir bo'lsa nazm ahlining sultoni yoxud malikul kalom, deb ataladi. Hatto, nay bobida ustasi farangi gurganjlik<sup>1</sup> bukri attor ham oddiy bukri emas, balki Piri Bukriy nomi bilan dong chiqargan.

Muzaffar amir Sabuqteginning sodiq nadimi Qorag'ulomdan qolgan.

Malik ul-sharobning o'zi ham yoshligida sultonning suyuqli nadimi bo'lgan, ammo o'n to'rt yashar bir malak vajidan o'smirlik chog'laridayoq oralari buzilgan. Agar o'sha ofatijon sanam bo'lmaganida, hozir, ehtimol, sultonning suyangan tog'i yoxud eng yaqin lashkarboshisi bo'larmidi? Xo'sh, shunda nima yutardi? Boshi osmonga yetarmidi? U bu noraso dunyoning ustuni bo'larmidi? Undan ko'ra hozirgiday mayini ichib, ko'nglini xushlab yurgani ming chandon yaxshi emasmi?

Malik ul-sharob sharbat va may qilish hunarini hirotlik kekxa bir bog'bondan o'rgangan. Yillar o'tib, bu ishda shundan ustasi farang bo'ldiki, uning sharbatini ichgani nafaqat yupun shoir-lar va yo'qsillar kelishadi, ba'zan manman degan bek va bekdodalar, hatto, Abu Rayhon Beruniy kabi allomalar, gohi-gohi esa sultonning suyuqli madhiyabozi, shoir Unsuriy ham qadam ranjida qiladi, hatto, amir al-mo'minning erkatoiy vaziri, mayparastlik va fohishabozlikda yagona

---

<sup>1</sup> Gurganch – qadimiy Xorazm poytaxti.

bo'lmish Abul Hasanakning o'zi ham uning mayiga pinhona odam yuboradi...

Rost, ba'zan bozor mutasaddilari, ayniqsa, Mozori kalon shayxlari uni shakkoklikda ayblab, G'aznadan quvmoqchi ham bo'lishadi, biroq Qutlug'qadamning baxtiga bundan qirq besh yil muqaddam, o'sha, o'n to'rt yashar sohibjamol sabab yosh Mahmud sodiq g'ulomini saroydan haydaganida, unga «boshqa jazo berilmasin», deb amr-u farmon qilgan. Shu farmon sabab sobiq qulbachcha Malik ul-sharob har safar jon saqlab qoladi.

Malik ul-sharobning kulbasidagi suhbatlar, odatda, shomi g'aribonda boshlanadi.

Bugun mayxo'rlar barvaqt oqib kela boshlashdi. Poygak joylarni, odatga ko'ra, nashavand gadolar, juldurvoqi mayib-majruhlar, serjahl darveshlar egallashdi. Ulardan yuqoriroqda nazm shaydolari bo'lmish bir guruh tolibnilmlar joylashishdi. To'rga esa qaysi bir shahardan kelgan ikki sayyoh taklif qilindi. Sayyohlarning biri yoshi elliklarga borib qolgan, mosh-guruch soqol-mo'ylovi o'ziga xo'p yarashgan, egnidagi ko'k movut to'ni ustidan oq rido kiyib, boshidagi mo'risimon ko'k qalpoqchasi ustidan oppoq simobiy salla o'rab olgan allomana-mo bir kimsa, ikkinchisi esa darvesh qiyofasidagi xushsurat yigitcha edi.

Ko'p o'tmay, mayxonaning sodiq mayxo'rlari – gijjak va setorlarini qo'ltiqlab olgan Bobo Setoriy bilan Piri G'ijjakiy paydo bo'lishdi. Ulardan keyin qarib qolgan bo'lsa ham, soqol-mo'ylovlarini bo'yab yuradigan Bobo Hofiz Bulbuliy bilan Piri Bukriy degan, o'zi pakanagina bo'lsa ham boshi xumday, nimasi bilandir katta qora o'rgimchakka o'xshab ketadigan kekxa naychi kirib kelishdi.

Ovloq Xorazmdan, Abu Rayhon Beruniy yuridan kelgan Piri Bukriy G'aznada attorlik qiladi. Afshon shol bozoridagi attorlik rastasida uning o'z do'koni bor. Bu majruh naychi to'g'risida shaharda har xil mishmishlar yuradi. Go'yo u o'g'rilik mol-lar, oltin va javohirlarni sotib olar emish, o'ziyam behisob boyliklar sohibi emish, degan gaplar bor. Bu mishmishlarning qaysisi chin, qaysisi yolg'on – yolg'iz Allohga ayon. Harqalay, Malik ul-sharob bu mishmishlarning hech biriga ishonmaydi, bil'aks, uni «Xudo urgan, payg'ambar esa aso bilan turtgan» bir bandayi nogiron, deb biladi va unga rahm qiladi. Piri Bukriy ham uning bu mehri saxovati-ni yaxshi qadrlaydi. Harqalay, taqdir taqozosi bilan Gurganjdan kelibdiki, Malik ul-sharob bilan birodarlik qiladi, salkam o'n besh yildan beri har oqshom uning mayxonasiga kelib, nay chaladi, shunday chaladiki, ba'zan o'zi ham yig'lab, boshqalarni ham yig'latadi. Shunday paytlarda kekxa attorning qalbi allaqanday tizginsiz dardlarga to'la ekani ayon bo'ladi-yu, odamlar u to'g'ridagi mud-hish mishmishlarni unutishadi...

Bundan yaqin bir oy avval Piri Bukriy Malik ul-sharobga nozik bir iltimos bilan murojaat qilgan. Malik ul-sharob esa iltimosning nozikligi sabab unga rad javobini berishdan boshqa chora topmagan edi. Shundan beri Piri Bukriy mayxonadan oyog'ini tortib qolgan, Malik ul-sharob bo'lsa, eski qadrdonini ranjitib qo'ygani-dan pinhona ezilib yurardi. Bugun uning Hofiz Bulbuliy bilan birga kirib kelganini ko'rib, shunday quvonib ketdiki, yer-to'ladan o'n yillik sharbat solingan katta bir xumni ko'tarib chiqishlarini shogirdlariga buyurdi. Bu gapni eshitgan faqirlar:

– Omad yor bo'lsin Malik ul-sharobga!

– Biri o'n bo'lsin Malik ul-sharobning! – degan xitoblar bilan g'ira-shira musofirxonani boshlariga ko'tarishdi.

Bir mahallar may ichishda hech kim Malik ul-sharobga bas kelolmas edi. Biroq so'nggi yillarda yoshi oltmishdan oshib, ko'zidan nuri, belidan quvvati keta boshlagandan beri Malik ul-sharob kam ichar, u ko'proq boshqalarni mehmon qilib, gulgun suhbatlar qurishdan zavq olardi. Yaxshi g'azal o'qigan, yaxshi kuy chalgan yoki qiziq hangoma so'zlab bergan kimsa bir kosa tekin sharbat bilan taqdir lanar, bu esa mushoirani zavq-shavqqa to'ldirib yuborardi. Lekin bugun nima ham bo'ldi-yu, Malik ul-sharobning o'zi ham bir ho'plam, yarim ho'plamdan olib o'tirib, shirakayf bo'lganini sezmay qoldi. Avvalambor, bir oydan beri arazlab yurgan eski qadrdoni Piri Bukriy o'z oyog'i bilan kirib keldi, keldi-yu, Piri G'ijjakiyga jo'r bo'lib, nayda shunday bir kuy chaldi-ki, sharbatxonada yig'lamagan bir kimsa qolmadi. Qolaversa, mehmon bo'lib kelgan ikki sayyoh Xurosondan, nazm ahlining sultoni Abulqosim Firdavsiy yurtidan ekan, gap aylanib «Shohnoma»ga borib taqaldi. «Shohnoma»dan Mahmud G'aznaviyga, undan shoirning sulton haqidagi mashhur hajviga o'tdi-yu, suhbat go'yo shabada tekkan gulxanday lovillab ketdi. Birov shoirga hamd-u sanolar o'qib, «Shohnoma»ni ko'klarga ko'tarib maqtasa, birov aksincha: «Agar Abulqosim Firdavsiy dono bo'lsa, nechun ijodining gultoji bo'lmish «Shohnoma»ni o'zi suymagan sultonga in'om etdi?» deb ta'na qildi. Yana birov esa shakkok gaplardan cho'chib, o'zini chetga

oldi, hatto, sekin tisarilib, kulbani sharpasizgina tark etganlar ham bo'ldi.

Malik ul-sharob, boshida kulohsimon eski qalpoq, egnida eski bo'lsa ham gard yuqmagani toza bo'z yaktak, shoirona to'zg'igan soqol-mo'ylovlari tutamlab, mayxona ahlining betartib bahs-munozaralariga jimgina quloq solib o'tirarkan, ko'z oldida lop etib ustod Abulqosim Firdavsiy keldi.

Yodida bor: Abulqosim Firdavsiy, – Alloh undan rozi bo'lg'ay! – G'aznani tark etishdan avval uning kulbayi vayronasiga tashrif buyurgan edilar. Tashrif buyurishlaridan bir kun avval esa shaharda ajib bir gap tarqalgan edi. Birov sulton Mahmud ul nazm sultoniga katta lutf-u ehson ko'rsatib, «Shohnoma»ning har misrasiga bir til-ladan haq to'labdi, desa boshqa birovlar, bil'aks, sulton buyuk shoirning qadriga yetmabdi, hatto, egniga sarupo ham yopmabdi, degan gaplarni topib kelgan edi. Ustod esa go'yo sulton bergan yo'lni cho'ntagiga solib, to'g'ri hammomga borgan emishlar, hammomdan chiqqach, bor aqchasini gadolarga ulashib, o'zlari sultonga hajv bitgan emishlar!

Malik ul-sharob bu mishmishlarni haqiqat qilib ulgurmasdanoq ustod o'zlari uni yo'qlab kelib qoldilar. Ustod kekxa bo'lsalar ham, bo'y-bastlari kelishgan, oppoq soqollari ko'ksiga tushgan, tiyrak ko'zlari-yu, o'tkir so'zlariga hech kim dosh berolmaydigan, tili achchiq, qaysar odam edilar. U kishi goho-goho may istab kelganlarida kayflari chog' bo'lsa «Shohnoma»dan hikoyatlar o'qib berar, donolar bisotidan rivoyatlar aytib, hamma-ni xushnud qilar, mabodo kayflari buzuq bo'lsa, qalang'i-qasang'i mayxo'rlar bilan o'tirishni ista-



may, tikka turganlaricha bir piyola may ichardilar-da, o'z yo'llariga ravona bo'lardilar.

O'shanda, so'nggi marta kelganida, ustod, xuddi besabab qamchi yegan asov tulporday betoqat edilar. Soch-soqollari to'zg'igan, yuzlari bo'g'riqqan, oppoq qoshlari tagidagi tiyrak ko'zlari allaqanday ichki bir alamdand yonar, o'zlariyam odatdagi kimxob to'n o'rniga odmigina qora chakmon kiyib, boshlariga eski qalpoqni qo'ndirib olgan, qo'llarida aso, yelkalarida xurjun, tarki dunyo qilgan bir zohidga o'xshar edilar.

– Malik ul-sharob! – dedilar ustod o'shanda, poygakda to'xtab. – Faqir-u haqir sen bilgan nazm sultoni Abulqosim Firdavsiy emas, cho'ntagida hech vaqosi yo'q bir gadomen. Alloh yo'liga bir piyola sharbat tutsang, dilimda senga hamd-u sano o'qib ichamen, bermasang... labimda kulgu, ichimda duoyi bad qilib, mayxonangni tark etamen!..

Ustod Malik ul-sharob turgan bir kosa sharbatni bir sipqarishda bo'shatib, kosani qaytarib berarkanlar:

– Yo'q! – deb xitob qildilar. – Yo'q, Malik ul-sharob! Faqir qornimga emas, qadrimga yig'laymen!.. Shu boisdan, bu gumroh sulton G'aznaviy bergan barcha in'omlarni gadolar va yo'qsillarga ulashdim! Bir mirini qoldirmay ulashdim-u mana endi, farishtaday ma'sum, go'dakday qipyalang'och, o'z yurtimga otlandim!.. E voh! Bu gumroh shohlar oldida bizday faqir shoirlar qismati shu ekan! Ne chora? Ayb o'zimda! Bil'aks, insof va adolatni kuylab, odil shohlar tarixini bitgan shoir, kelib-kelib shu mustabid sulton-dan haqiqat qidirib kelurmenmi? O, gumrohlar,

gumrohlar! Kamina go'yokim Eron bilan Turonni bir-biriga qarshi qo'yg'an emishmen! Go'yokim forsiy shohlarni ulug'lab, turkiylarni kamsitibmen!.. Yo'q! – dedilar u kishi to'satdan kulohli boshlarini baland ko'tarib, – bir elni boshqa bir elga qarshi qo'ymoq – donolar ishi emas! Bu – shohlar va sultonlar ishi! Kamina o'z asarimda faqat haqiqatni yozdim! O'lim haq! Vaqtiki kelib faqir ham bu olamni tark eturmen. Ammo, inshoollo, «Shohnoma» toabad qolur! Kim haq, kim nohaq, har kim o'zi o'qib olur, o'zi bilib olur, Malik ul-sharob!

Ustod shunday dedilar-da, ikkinchi kosani ichishdan bosh tortib, musofirxonani tark etdilar.

...Malik ul-sharobning xayolini sharbatxo'rlarining jo'r qiyqirig'i bo'lib yubordi.

Uning ro'parasida kir-chir soqoli ko'ksiga tushgan juldurvoqi bir mo'ysafid bo'sh kosani cho'zib turar, kulbaga yig'ilgan g'arib-u g'urabo mo'ysafidni qurshab olgan, hammaning ko'zi Malik ul-sharobda edi.

Malik ul-sharob bu mo'ysafidni yaxshi tanirdi. Ko'plar uning nasl-nasabini bilmasa ham, o'zini hamma tanir, birovlar uni Bobo Xurmo deb chaqirsa, birovlar Bobo Savdoyi deyishadi.

Odamlarning aytishicha, bir mahallar hozirgi Bog'i Firuz o'rnida mo'ysafidning katta xurmozori bo'lgan. Bundan yigirma yil muqaddam, sulton Mahmud Bog'i Firuz uchun joy tanlaganda mo'ysafidning xurmozori ma'qul tushib, uni o'z mulkiga qo'shib olgan-u, suyukli bog'idan ayrilgan kessa bog'bon xiyol savdoyi bo'lib qolgan. Shu-shu, ko'chama-ko'cha yurib tilamchilik qiladi.

Bobo Xurmoning kechmishini bilgan odamlar unga rahm qilishar, Afshon shol dahasining

churvaqalari esa uni jonlaridan ham yaxshi ko'rishar, doim:

*Bobo Xurmo!*  
*Qilg'il duo,*  
*Bergil xurmo! –*

deya chug'ur-chug'ur qilishib, cholning orqasidan ergashib yurishardi.

Hozir ana shu Bobo Xurmo Malik ul-sharobning oldida nechundir kulimsirab, tavoze bilan qo'l qovushtirib turardi.

– Afv et, Malik ul-sharob! Bu suhbat gulgunda yaxshi shoh-u yomon shohlar haqida bahs ketdi. Ijizat etsang, kamina shu to'g'rida bir rivoyat so'zlasam!

– So'zla, Bobo Xurmo!

– So'zlayman, ammo so'zim haqini kim to'laydi, Malik ul-sharob?

Kulba gado va yo'qsillarning jo'r qiyqirig'idan larzaga keldi:

– So'zlayver, Bobo Xurmo! Bir piyola emas, o'n piyola sharbat desang ham yo'q demaydi Malik ul-sharob!

– Og'zingni och, xumi bilan quyadi!

Malik ul-sharob kulimsirab, Piri Bukriyga yuzlandi:

– Quyib ber, to'yguncha ichsin!

Bobo Xurmo, kipriksiz ko'zlarini mastona o'ynatib, bir emas, ikki kosa sharbatni ust-ustiga sipqardi-da, g'ala-g'ovur bosilishini kutib, hi-koyasini boshladi:

– Shundaykim, qadim zamonlarda ikki xesh, ikki birodar safarga chiqmish. Yo'l yursa ham

mo'1 yurib, sahroda o'sgan bir sada tagiga borib qo'nmish. Topgan-tutganlarini baham ko'rib, suhbat qurmish. Shunda bir do'st ikkinchisidan: agar senga saodat yor bo'lib, poshsho bo'lsang nima qilar eding, deb so'ramish.

– Agarchand, – demish birinchi sayyoh, – saodat yor bo'lib, poshsho bo'lsam, yurtimda insof-u adolat o'rnatar edim. Odamlar nimayiki orzu qilsa, hammasini ro'yobga chiqarar edim!

– Kamina poshsho bo'lsam, – demish ikkinchi sayyoh. – Bani odam atalmish bu nodonlarni tavbasiga tayantirar edim. Qashlashga tirnoq ham qoldirmay, kafangado qilardim bularni!

– Sabab?

– Sababi – na yaxshilikni biladi bu gumrohlar, na yomonlikni!

Ertasiga ikki sayyoh yo'llarida davom etmish. Yo'1 yurib, yo'1 yursa ham mo'1 yurib, bir shahri azimga yetib bormish. Qarasalar, ark oldidagi maydonda odam tirband, hammaning qo'lida bir parcha go'sht, osmondagi qushga tikilar emish. Ma'lum bo'lishicha, bir kun avval shahar hokimi olamdan o'tgan, hokim befarzand bo'lib, taxt vorisi yo'q emish. Shu boisdan, shahar donishlari yig'ilib, poshshoning qari burgutini uchirmoqqa ahd qilmish, toki burgut kimning boshiga qo'nsa, o'sha odam poshsho bo'lsin! Burgut esa falakning gardishi bilan bemehr sayyohning boshiga kelib qo'nmish.

Shahar donishlari sayyohning musofir ekanini eshitib, burgutni qayta uchirmish. Burgut maydon uzra uchib yurib, yana o'sha sayyohning boshiga qo'nmish. Shu yo'sin uch marotaba uchirilib, uch marotaba sayyohning boshiga qo'ngandan so'ng shahar ahli uni taxtga o'tqazmish.

Sayyoh esa taxtga o'tirgan hamon, o'z aytganini qilmish: mamlakat ahlini zir titratmish, behisob boj-u xiroj solib, hammani kafangado qilmish. Shunda odamlar poshsho bo'lgan sayyohning do'stini qidirib topmish, poshsho ustidan arz qilib, undan najot so'ramish. Faqir sayyoh poshsho bo'lgan do'stining huzuriga bormish. Poshsho uni shod-xurramlik bilan kutib olmish, ammo so'zini eshitib: «Sen bu ishga aralashma, – deb tanbeh bermish. – Agar men bu odamlarga zulm qilgan bo'lsam, gumrohligi va nodonligi uchun shunday qildim. Agar bular nodon bo'lmasa, Xudoning aqlsiz bir maxluqiga inonib, kaminani taxtga ko'tarishmas edi! Beaqil maxluqqa inonib meni poshsho qilishgan ekan, rahm-shafqat ne darkor bularga? Dono poshsho donolarga lo-yiqdur! Nodonlarga nodon poshsho yarashur!»

Kulba jo'r kulgu va qiyqiriqlardan larzaga keldi.

– Bu rivoyatdan maqsading ne, Bobo Xurmo?

– Maqsadi ayon! Senday nodonlarga sulton Mahmudday zolim poshsho yarashur, demoqchi Bobo Savdoyi!

– O'z so'zi emas, sultonning g'animi imom Ismoil so'zi bu!

– Ofarin! Betavfiq isyonchilar makoniga aylanmish bu makon!

– Og'zingni yum! Sulton eshitsin bu so'zlarni, oyo'g'ingdan dorga osib, ostingdan o't qo'yadi, ahmoq!

– Vo ajabo! Sultonning ayg'oqchilari qayda?

– Ko'rsat menga o'shal ayg'oqchingni! O'zim dorga tortamen uni!

Malik ul-sharob qo'lini ko'tarib, g'ala-g'ovurni arang bosdi-yu, Bobo Xurmoga yana bir piyola sharbat tutishni buyurdi.

Shundan keyin nima bo'ldi, suhbat davom etdimi, yo navbat mashshoqlarga keldimi, Malik ul-sharob yaxshi bilolmay qoldi. Bir mahal ko'zini ochsa... ichkarida, Nargizabonuning torgina xonasida, to'g'rirog'i, xonani ikkiga bo'lgan pardaning bu tomonida yotibdi. Tepasida qo'lida miltiragan sham, Piri Bukriy turibdi.

Xonaning g'ira-shira qorong'iligida egniga qora chakmon, boshiga xorazmcha cho'girma telpak kiygan bukri chindan ham bahaybat qora o'rgamchiga o'xshab ko'rindi-yu, Malik ul-sharob seskanib ketdi, xayolidan esa: «Tag'in eski gapmi?» degan fikr o'tdi.

Bundan uch oy muqaddam Malik ul-sharob qul bozoridan o'n besh-o'n olti yashar bir joriya sotib olgan edi. Joriyaning ismi Sadaf bo'lib, o'zi Xorazmdan, ko'p yillik qadrtoni Beruniy yurtidan edi.

Sadafbibi qo'l-oyog'i chaqqongina, yoqimtoygina qiz ekan, birpasda hammaga yoqib qoldi, ko'p yillardan beri dard chekib, to'shak yozib yotgan nogiron kampiri Nargizabonuga ham juda qo'l keldi. Lekin bundan bir oy muqaddam, Sadafbibini ko'rib, u bilan suhbatlashib qolgan birodari Abu Rayhon: «Joriyangni menga ber, mening uyimda xizmat qilsin, juda pok qiz ekan, bu shilqim mayxo'rlar orasida unga jabr bo'libdi», deb qoldi.

Malik ul-sharob boshda Abu Rayhonga ham rad javob berdi, biroq keyin o'ylab ko'rib, uning haq ekaniga iqror bo'ldi-yu, Sadafbibini unga berishga rozi bo'ldi. Aksiga olib, xuddi o'sha kunlari bu bukri ham Sadafbibini so'rab keldi. Malik ul-sharob Abu Rayhonga va'da berib qo'rganini aytsa ham, yalinib-yolvorib turib oldi, katta pul,

o'z narxidan o'n baravar katta pul va'da qilib, oyog'iga yiqildi...

Abu Rayhon Sadafbibini so'rab kelganida bir narsani ro'kach qilgan, ya'ni uni bibining xorazmcha chuchuk tili rom qilganini aytgan edi. Ajabo: bu bukrini ham xuddi shu narsa maftun etgan emish! Biroq maftun bo'lsin-bo'lmasin, Sadafbibini qaytarishning iloji yo'q, u Abu Rayhonning ixtiyoriga o'tgan edi. Shundan beri Piri Bukriy Malik ul-sharobdan arazlab yurardi. Nahot, bugun tag'in o'sha iltimos bilan kelgan bo'lsa?..

– Xo'sh, xizmat, azizim?

– Malik ul-sharob, – dedi Piri Bukriy shivirlab. – Boyagi ikki sayyohning biri g'avg'o ko'tarib, to'polon qiladur.

– To'polon qilsa, to'rt tomoni qibla! Ne deb to'polon qiladi?

– Joy so'raydur, shohona joy!

– Shohona joy tilasa mening kulbayi vayronamda ne qiladi? Ayt: sulton Mahmudga bor-sin! Shoyad Osmon malikasidan joy bersa?

Piri Bukriy qo'lidagi shamni balandroq ko'tarib, burchakka tutilgan parda tomon o'g'rincha bir qarab qo'ydi.

– So'zinga quloq soling, pirim! Yosh sayyoh ayta-diki, yonidagi kekxa sayyoh o'shal... hakimi davron... hazrat Abu Ali ibn Sino emish! Ul zoti sharifning hurmatini bajo keltirmoq darkor emish!..

– Ne deding? Hazrat Ibn Sino?

– Shunday, pirim. O'shal, dong'i olamga ketgan hakimi davron Abu Ali ibn Sino hazratlari emish!

Malik ul-sharob qizargan ko'zlarini katta ochib, bir zum angrayib qoldi, so'ng patak soqolini silab mastona kuldi:

– Ibn Sino hazratlari bo‘lsa... sulton Mahmudga borsin! Mana, yigirma yildirki, sulton uni topolmay dog‘da yurmish!

Piri Bukriy negadir yana burchakdagi parda tomon ko‘z tashlab:

– Pirim, – deb shivirladi. – Yosh sayyoh bir surat ko‘rsatdikim, mavlono Beruniy ko‘rsatgan suratning baayni o‘zi! Bu sayyoh bilan o‘shal suratdagi Ibn Sinoni ajratib bo‘lmas, pirim. Bamisoli bir tomchi suv!

Malik ul-sharobning yumuq ko‘zlari yarq etib ochilib ketdi. U olacha to‘nini egniga tashlab, o‘rindan tura boshladi. Biroq shu payt parda ichidan ayol kishining «mirzam», degan zaif ovozi eshitildi. Malik ul-sharob bukriга «sen boraver», degandek imo qildi-da, pardani ko‘tarib go‘shaga kirdi.

Parda orqasidagi to‘shakda... sochlari qorday oppoq, ko‘zlari katta-katta, nimjongina bir ayol o‘tirar, uning peshonasidagi moshdekkina qizil xoli ayolning hind yurtidan ekanini ko‘rsatib turardi.

Malik ul-sharob to‘shak chetiga tizza bukarikan, o‘zgacha bir muloyimlik bilan:

– Nechun uxlamaysiz? – deb so‘radi. – Yana og‘riq boshlandimi, bonu?

Nargizabonu, ikki barmog‘i kesilgan mayib qo‘li bilan to‘zg‘igan sochlarini tuzatarkan, katta-katta tim qora ko‘zlari allaqanday charaqlab:

– Bu so‘z rostmi, mirzam? – deb so‘radi. – Hazrat Ibn Sino...

– Shoyad rost bo‘lsa! – Malik ul-sharob ayolning barmoqlari yarmidan kesilgan to‘mtoq kaftini qo‘liga olib, lablariga bosdi, bosarkan, odatdagidek, yana o‘sha yiroq, ammo har eslaganda xuddi ke-



chagina ro'y bergandek vujudida titroq uyg'otuvchi unutilmas bir manzara ko'z oldiga keldi.

G'azna chekkasidagi hindlar dahasi. Dahaning eng xilvat joyidagi pinhoni bazmxona. Go'zal raqqosalar, xonanda va sozandalar bazmxonasi. Amir Sabuqteginning erka farzandi, yosh Mahmud o'zining eng yaqin g'ulomi, bolalikdan birga o'sgan tengdoshi Qutlug'qadam bilan har kecha shu xufiya bazmxonaga ravona bo'lishadi. Taqvodor otadan yashirincha, go'zal raqqosalar bazmini ko'rgani borishadi. Yo'q, hamma raqqosalar emas, ofatijon raqqosalar orasidagi eng ofatijon Nargizabonuning raqslarini tomosha qilgani borishadi. Nargizabonu endi o'n uchga to'lib, o'n to'rtga qadam qo'yan, biroq uning husni, tilla ma'budadek nozik bo'y-basti, peshonasidagi moshdek qizil xoli, ayniqsa, doim kulib turguvchi katta-katta tim qora ko'zlarini bir ko'rgan yigit toabad unutmaydi. Raqslari esa... uning raqslari ham go'dak kulgisiday ma'sum, ham bamisoli olov! Xuddi lovillab yongan olov yanglig' bu raqs tirik jon borki yondiradi, o'liklarga esa jon ato qiladi...

O'sha oqshom ham, ikki po'lat qilich qinidan chiqqan o'sha mash'um oqshom ham Nargizabonu egnida harir ipak sari, bejirim oyoqchalarida qo'sh-qo'sh tilla xol-xol, qo'llarida yoqut qadalgan qo'sh-qo'sh tilla uzuk, nozikkina yarim yalang'och tanasini ming muqom bilan qilpillatib shunday xiromon qildiki, amir Mahmud bilan uning sodiq g'ulomi Qutlug'qadam raqqosa oldi-da barobar tiz cho'kib, unga chiniy piyolalarda barobar sharbat tutishdi.

Tim qora ko'zlari yulduzday chaqnagan yosh malak, lablarida ma'sum tabassum, sersoqol sozandalar soziga mos xiromon qilganicha, ikki

mashhur mehmonga yaqinlashib bordi, so'ng tammanno bilan egilib ta'zim qildi-da, tirnoqlariga xina qo'yilgan nozik qo'llari bilan amir Mahmudning... yo'q, Mahmud emas, uning g'ulomi Qutlug'qadamning piyolasini oldi. Olishga oldi-yu, piyolaga lab tekkizishga ulgurmedi. Yosh amir, qo'lidagi sharob to'la kosani shiftga qarab qulochkashlab otdi-da, o'rnidan sapchib turib, shartta qilichini qinidan sug'urdi. Undan u yog'i bir zumda, ko'z ochib-yumguncha sodir bo'ldi: Nargizabonu qo'lini boshi uzra ko'targanicha faryod chekib, o'zini sozandalar davrasiga urdi. Biroq g'azabdan jazavasi tutgan yosh amir ikki hatlashda malakka yetib, uning boshi uzra ko'targan nozik qo'llariga qilich soldi. Qo'sh barmog'i uchib ketgan raqqosaning zorli faryodi bazmxonani zir titratdi. Bu faryoddan o'ziga kelgan Qutlug'qadam ham sakrab turib amirga tashlandi. U jonholatda qilich tig'ini changallab olgan ekan, uning qo'lidan ham tirqirab qon oqdi. Lekin u og'riqni sezmedi. Qo'lidan tirqirab oqqan qonni ham ko'rmadi. Uning ko'zi kesilgan barmoqlarda edi. Raqqosaning xina qo'yilgan nafis qoramtir barmoqlari, xuddi joni borday, yerda dik-dik sakrar, boshi uzilgan mitti qushchalarday pitirlardi!..

...Ertasiga ularni amir Sabuqtegin o'z ko'shki-ga chaqirtirdi. Keksa amir, bir yonida bosh vazir, bir yonida qarddon sarbozi Qorag'ulom, oltin taxtda qovog'ini uyib o'tirardi. U o'ziga yarashgan qalin ketmon soqolini tutamlab, ikki og'izgina va'z aytdi:

– Faqir senlarni aka-ukaday inoq, ikki do'st, ikki birodar bo'lib ketar, deb o'ylagan edim. Natomatlar bo'lg'aykim, oralaringda raqobat pay-

do bo'libdi. Raqobat bor joyda sadoqat bo'lmas!  
Shu bugundan boshlab saroyda sening qorang-  
ni ko'rmayin, Qutlug'qadam! Seni ham, Qora-  
g'ulom!.. Bilamen, sen menga salkam yigirma  
yil halol xizmat qilding. Ammo bugun men seni  
farzandingga qo'shib dargohimdan haydamoq-  
dan boshqa choram yo'q... Ayb menda emas,  
Qorag'ulom, ayb takabbur zurriyotingda! Bergan  
tuzimga rozimen, Qorag'ulom!..

Valine'mat padari Qorag'ulom, – Alloh uning  
ruhini shod etgay, – cho'yanday qop-qora,  
alpqomat odam edi. Keksa amirning bu so'zlari-  
dan battar qorayib ketdi. Biroq lom-mim dema-  
di. O'g'liga zimdan ko'z qirini tashlab: «Yur!» deb  
ishora qildi-da, indamay eshik tomon yo'naldi.

Malik ul-sharobning xayolini Nargizabonuning:  
– Sizga ne bo'ldi, mirzam? – degan ovozi bo'ldi.  
– Ko'zingizda yosh...

Malik ul-sharob chandiq qo'li bilan nam kip-  
riklarini silab, istehzoli kulimsiradi:

– Kechirgaysiz, bonu, kayfim oshib qolibdi...

Nargizabonu, xuddi go'dakka koyigan onaday  
ma'yus kulimsirab:

– O, mirzam, mirzam? – deb oppoq boshini  
sarak-sarak qildi. – Qo'ying shu may-u sharbat-  
xonangizni! Payg'ambar yoshiga bordingiz mana!..

– Afv etasiz, bonu, faqir o'zi qarisa ham, ko'ngli  
qarigani yo'q. May esa...

*May men uchun ohu ko'zli malakdur,  
Bo'sa uning jufti, jonparvaridur,  
Ohu ko'zlar porlar, nechun o'pmayin,  
Oltin sharbat chorlar, nechun ichmayin.  
Sanam yanglig'... ul xasta dil oromi...*

Nargizabonu mayib kaftini yuragiga bosib asta pichirladi:

- Boring, Ibn Sino hazratlari kutib qolmish!
- Shoyad sizning baxtingizga bu gap rost bo'lsa!
- Malik ul-sharob tokchadagi shamni qo'liga olib, turtinib-surtinib go'shadan chiqdi.

...Mayxona hamon boyagiday g'ira-shira edi. Ikki sayyohdan boshqa mayxo'rlar tarqab ketgan, faqat poygakdagi bo'ya ustida notanish bir devona yirtiq kulohini boshiga qo'yib, g'ujanak bo'lib uxlab yotardi.

Ikki sayyohning biri, soqol-mo'ylovlari o'ziga xo'p yarashgan allomanamo keksa sayyoh to'rdagi ko'rpachada, qo'sh bolishga suyanganicha pinakka ketgan, uning shogirdi esa beriroqdagi xontaxta oldida shokosaning yuzidekkina suratni Piri Bukriyga ko'rsatib, gap uqtirib o'tirardi.

Malik ul-sharob poygakda to'xtab, bir qo'sh bolishga suyanib pinakka ketgan keksa sayyohga, bir shogirdining qo'lidagi suratga ko'z tashladi... Vo darig'! Bu o'sha, aziz birodari Abu Rayhonning uyida ko'rgan hazrat Ibn Sinoning surati edi! Chiroyli mosh-guruch soqolini ko'ksiga bosib pinakka ketgan to'rdagi xushsurat sayyoh esa... suratdagi Ibn Sinoning o'zi, baayni o'zi edi!..

Yosh sayyoh eshikda paydo bo'lgan Malik ul-sharobni ko'rib, mastona chayqalib, o'rnidan turdi.

– Jumlayi jahon darveshlarining piri murshidi Malik ul-sharob hazratlari salomat bo'lsinlar!

– Tashakkur, azizim! – Malik ul-sharob mastalast mayxo'rlarni sira xushlamas edi, biroq bu yosh sayyohning sarmast qiliqlari yosh bolaning erkalanishlariday samimiy va yoqimtoy edi.

– Kechirgaysiz, pirim! Biz haqirlar sizday pirimning shuhratini eshitib, shahri Tusdan chiqib kelgan edik. Ming afsuskim, bu yerda kamina u yoqda tursin, hakimi davron... ustod Abu Ali ibn Sino hazratlari ham o'z hurmatiga munosib izzat-ikrom topmadilar!

«Shahri Tus? Abu Rayhonning aytishicha, Ibn Sino hazratlari Buxoroyi sharifda dunyoga kelgan edi chog'i?»

– Kechirgaysiz, azizim. Bu hakimi zamon hazrat Ibn Sino... shahri Tusda tavallud topganlarmi?

– Yo'q, taqsiri olam! Ibn Sino hazratlari Buxoroyi sharifda tavallud topganlar. Ammo Buxoroyi sharif ilk xonlar tasarrufiga tushibdi-ki, ular xizmatida bo'lishdan bosh tortib, shaharma-shahar, elma-el darbadar kezib yuradurlar! Ammo qayerga bormasinlar, ahli mo'min bu zoti muborakni boshlariga ko'tarib izzatladilar. Siz G'azna ahli esa hakimi hoziqning qadrini bilmadingiz! – shogirdning ovozi to'satdan qandaydir tahdid bilan yangrab ketdi-yu, keksa sayyoh cho'chib boshini yostiqdan ko'tardi. U bir mastona chayqalib turgan shogirdiga, bir hayratda qotib qolgan Piri Bukriyga, bir Malik ul-sharobga qaradi, so'ng hamma gapga tushundi chamasi:

– O, tentak, tentak! – dedi kuyinib. – Kamina senga necha marta aytdim, nomimni sotma, kimligimni oshkor qilma, deb! Necha marta aytdim...

Keksa sayyohning allaqanday ichki dard bilan aytgan bu so'zlarida, xushsurat chehrasida, serviqor nigohida kishini o'ziga rom qiluvchi shunday zo'r bir iqtidor bor ediki, Malik ul-sharob beixtiyor qo'lini ko'ksiga qo'yib, unga ta'zim qildi.

– UZR, ustod. Osiy banda g‘arib kulbanga sizday tabarruk zotning qadam ranjida qilganlaridan bexabar qolibmen! Hoy, kim bor? Darhol ichkariga joy qilinglar! Darhol!

## IKKINCHI BOB

*«Men senga sulton Mahmud G‘aznaviy yurishlari to‘g‘risida gapirgan edim. Biroq men Mahmud davrining boshqa bir buyuk vakili to‘g‘risida hali gapirmadim. Bu – al-Beruniydir. Cheksiz qirg‘inbarot va shafqatsizliklar davrida u hayotga chuqur razm solib, haqiqatning tagiga yetishga intilgan ulug‘ olim sifatida ajralib turadi...»*

*Javoharlal Neru.*

*«Jahon tarixiga bir nazar».*

*1-jild, 300-bet.*

## I

Bir haftadan beri bezgak xuruj qilib, noxush yotgan Beruniy bir lahza ko‘zi ilingan ekan, «Ustod! Ustod!» degan muloyim ovoz qulog‘iga chalinganday bo‘lib, uyg‘onib ketdi. Bu – yosh joriya Sadafbibining ovozi edi. Vaqt xuftondan oshgan bo‘lsa kerak, tokchalardagi shamlar yoqilgan, devorlariga kitob javonlari o‘rnatilgan torgina chorburchak xona kunduzgiday yorug‘ edi. Sadafbibi, chamasi, uni uyquda deb o‘ylab, javondagi kitoblarning changini artmoqda edi.

Egnida yo‘l-yo‘l ko‘k baxmal ko‘ylak, boshida qizil shoyi durra, oyog‘ida uchi egik ko‘k saxtiyon kavush, qiz eshitilar-eshitilmas tovushda qandaydir bir kuyni xirgoyi qilib, zavq bilan ishlar,

dam javon changlarini artar, dam qizil, ko'k, sariq jildli og'ir kitoblardan birini olib, hayrat bilan varaqlashga tutinar edi. Kitob varaqlaganda xirgoyi qilishdan to'xtar, kulchadekkina yumaloq yuzida taajjub va hayrat aks etar, kitobni joyiga qo'yishi bilan yana asta xirgoyisini boshlar edi.

Har safar Sadafbibining mana shu muloyim ovozini, xirgoyisining nozik ohanglarini, ayniqsa, sal chuchuk, yoqimtoy tilda so'zlashlarini eshitganda Beruniy g'alati bo'lib ketar, negadir bolalik va o'spirinlik chog'lari yodiga tushar, lop etib, Jayhun<sup>1</sup> sohillari ko'z oldiga kelardi. Bu ohang, bu qo'shiq, bu chuchuk va yoqimtoy tilni bir eshitishni orzu qilib, sog'inib yurganlariga necha zamonlar o'tdi?

Bundan bir-ikki oy muqaddam Sadafbibini Malik ul-sharob degan ko'p yillik birodarining mayxonasida ko'rib qolganida Beruniyni qizning husnidan ham burun mana shu mayin ovozi, sal chuchuk, yoqimtoy tili, ona suti bilan birga qoniga singib ketgan Xorazm lahjasida gapirishlari maftun etgan edi. Keyin surishtirsa, Sadafbibi chindan ham uning yurtidan, Gurganj bilan Qiyot<sup>2</sup> o'rtasidagi kichik qishloqdan ekan. Qaysi bir quljallob uni o'sha tomonlardan olib kelib, Afshon shol bozorida sotgan ekan!.. Beruniy bu gapni eshitdi-yu, qadrdoni Malik ul-sharobga qattiq yopishdi.

Sadafbibi kelguncha Beruniy bu uyda hindistonlik shogirdi Sabhu bilan birga turardi, Sabhu ham uy-ro'zg'or ishlarining ko'zini biladigan, qo'l-oyog'i chaqqon yigit, biroq Sadafbibi ostonani hatlab o'tgan hamon hamma narsa o'zgardi, go'yo

---

<sup>1</sup> Jayhun – Amudaryo.

<sup>2</sup> Qiyot (Qot) – Beruniy tug'ilgan qadimiy shahar.

bu uyga yosh joriya emas, mayin bahor oftobi mo'raladi-yu, hamma yoq allaqanday iliq nurga cho'milib, charaqlab ketdi!..

Ajabo, o'sha kundan beri allaqachon yigitlik davridan o'tib, keksalik manziliga qadam qo'yan Beruniyning ko'nglida ham bahor. U umrida faqat bir marta, o'n olti-o'n yetti yashar mahalida mana shunday yorug' kunlarni boshidan o'tkazgan edi. Bahorday tez kelib, tez ketgan, lekin qalbida toabad so'nmas nur qoldirgan u kunlar Rayhonabonu bilan bog'liq edi.

Yo'q, Sadafbibi Rayhonabonuga o'xshamaydi. Nasroniy dini<sup>1</sup>ga mansub mashhur Qiyot savdogarining qizi Rayhonaning ko'zlari bahor osmoniday ko'm-ko'k, cho'zinchoq yuzlari sutday oppoq, yelkasida to'liqinday mavj urgan sochlari esa bir jom cho'g'day qizg'ish edi. Sadafbibi esa qoramag'izdan kelgan, yuzlari yum-yumaloq, qosh-ko'zlari qop-qora. Lekin baribir, nimasi bilandir Rayhonabonuga o'xshab ketadi. Nimasi bilan?.. Buni Beruniyning o'zi ham aytib berolmaydi, biroq Sadafbibini ko'rish bilan, uning ovozi eshitishi bilan esiga Rayhonabonu tushadi-yu, ko'ngli suv ichganday yorishib ketadi... Mana, hozir ham...

Sadafbibi, go'yo uning tikilib qolganini sezganday, «yalt» etib qaradi, ko'zlari javdirab, bir zum tikilib turdi, so'ng asta yurib, xontaxta yoniga keldi.

– Buyurgan dorungizni olib keldim, ustod.

Xontaxtadagi sharbat to'la ko'zacha yonida ipak tasma bilan bog'langan o'rog'lik qog'oz turardi.

– Doruga kim bordi? Sabhumi?

– Yo'q, Sabhu ovqat boshlagan edi, o'zim bordim. – Sadafbibi qizil shoyi durrasining uchi bi-

---

<sup>1</sup> Nasroniy dini – xristian dini.



lan yuzini yarim to'sib, xontaxta oldiga cho'nqaydi, cho'nqayarkan, birdan ovozi o'zgarib:

– Ustod! – dedi allaqanday siniq tovushda. – Agar ijozat bersangiz... endi attorlik rastasiga bormaymen!

– Nechun?

– Anov bukri... to'nkaga o'xshagan bukri attor yo'limni to'sdi.

– Ne deydi?

– Yomon so'zlar. Siz so'ramang, men aytmayin, ustod...

Beruniyning katta, qoramtir barmoqlari beixtiyor musht bo'lib tugildi.

Kecha ertalab u dori buyurish uchun attorlik rastasiga o'zi borgan edi. Tanish attorga uchrab, uyga qaytayotgan edi, muyulishdagi do'kondan, Sadafbibi aytganidek, to'nkaga o'xshash bir kimsa otilib chiqdi-da, pildirab kelib, yo'lini to'sdi.

Bu o'sha, Malik ul-sharobning mayxonasida kechalari nay chalg'uvchi, mayxo'rlar orasida «Piri Bukriy» laqabi bilan dong chiqargan bukri attor edi. Hayot Beruniy bilan bu bukrini bundan salkam qirq yil muqaddam Qiyotda, Rayhonabonular xonadonida to'qnashtirgan edi. U mahalda bukri ham Beruniy kabi Qiyotda yashar, Rayhonaning otasiga shogird tutingan savdogar edi. Lekin ustoz hayot vaqtida ipakday muloyim, itday sadoqatli bo'lgan bu bukri savdogar jon taslim qilgan kuni kechasi uning qiziga, eri o'lib tul qolgan qizi Rayxonabonuga tajovuz qilgan, ular shu vajdan qattiq to'qnashgan edi. Shundan keyin Beruniy uni ko'rmagan edi. Taqdirning g'alati o'yinini qarangki, bu mash'um voqeadan salkam qirq yil o'tgach, hayot ularni G'aznada, to'g'rirog'i,

Malik ul-sharobning mayxonasida yana bir-biriga duch qildi. Ma'lum bo'lishicha, bukri ham falakning gardishi bilan dunyo kezib yurib, oxir-pirovardida G'aznaga kelib qolgan ekan. Bu yerda u attorlik do'koni ochgan, kechalari esa Malik ul-sharobning mayxonasida mashshoqlik qilar, Bobo Setoriy va Piri G'ijjakiylarga qo'shib nay chalar, shunday chalar emishki, har safar majlis ahlini sel qilar emish. Rost, oradan qirq yil o'tgan bo'lsa ham, Qiyotdagi mash'um voqea hamon esida turgani uchun bo'lsa kerak, Piri Bukriyning o'zi ham, nodir san'ati ham Beruniyning ko'ngliga ko'p o'tirmadi. U kecha ertalab attorlik rastasida uchrashganlarida ham gaplashishga toqati yo'q edi, biroq qaydandir paydo bo'lgan Piri Bukriy pildirab kelib, yo'lini to'sdi-da:

– Bir qoshiq qonimdan kechgaysiz, mavlono! – deb xitob qildi. – Eslik odam eskini eslamas derlar. Eski nizolarni ko'ngildan chiqaraylik, mavlono! Eshitishimcha, siz nodir toshlar borasida piri komilsiz. Falakning gardishi bilan faqirning qo'liga bir noyob tosh tushgan edi, shuni bir ko'rib bahosini aytib bersangiz, mavlono!

Yo, tavba? Piri Bukriy bilibmi, bilmaymi – Beruniyning eng nozik joyidan ushlagan edi. U ko'p yillardan beri nodir toshlar haqida katta bir asar yozishni orzu qilib, juda ko'p ilmiy ma'lumotlar va, hatto, har xil rivoyatlar yig'ib yurardi!

Beruniy indamay bukrining orqasidan ergashdi. Ular torgina, pasqamgina, ko'rimsizgina do'konga kirishdi, undan tagiga bo'ya tashlangan hujranamo bir xonaga, xonadan sichqon hidi anqigan nimqorong'i yerto'laga tushishdi. Tokchasiga bitta-yu bitta sham qadalgan g'ira-shira

yerto'la har xil katta-kichik sandiqlar, allanima-lar solingan xum va xumchalar, quti va qutichalarga to'la edi.

Piri Bukriy yerto'laning eng qorong'i burchagiga o'tib, otning kallasiday qulf osilgan og'ir temir sandiqni ochdi, uning qopqog'ini ko'tarib, uzoq timirskilangach, toshbaqaday yum-yumaloq bir temir qutichani olib, Beruniyning oldiga keldi.

– Bu qutichadagi toshni kamina bag'dodlik bir savdogardan xarid qildim, mavlono. Katta pulga xarid qildim... Ammo... olishga oldim-u hanuz ishtibohdamen<sup>1</sup>.

Piri Bukriy shunday deb, qutichaning tagidagi tugmani bosdi. Bosishi bilan quticha darang-darang ovoz chiqarib ochildi-yu, gira-shira yerto'la go'yo to'satdan o'nlarcha sham yonganday charaqlab ketdi. Qutichaning tagida.. kaptarning tuxumidek keladigan va kamalak rangida nafis tovlangan ajib bir javohir yarqirab yotardil..

Beruniy o'z ko'zlariga ishonmay qoldi. U nafis ranglarda jilolanib, nimqorong'i yerto'lani yoritib yuborgan bu nodir javohirni bir ko'rishdayoq tanisa ham, anchagacha o'z ko'zlariga ishonolmadi. Vo ajabo? Bu o'sha, bir mahallar Bag'dod xalifasi Xorun ar-Rashid xazinasida saqlangan, so'ng qayoqqadir yo'qolib, ko'p nizo va qatl-u qirg'inlarga sabab bo'lgan, tarixiy kitoblarda ta'rif va tavsif qilingan mashhur javohir edi!..

Beruniy javohirni qutichadan asta olib, kaftiga qo'ydi. Yong'oqdekkina nodir javohir uning kaftida yana ham nafisroq tovlanib, go'yo yangi ranglar kasb etgandek, yarqirab ketdi.

---

<sup>1</sup> Ishtiboh – shubha.

«Yo, tavba! Bu iblis bukri shohlar xazinasini bezab turguvchi bu nodir ziynatni qaydan oldi? Bundan chiqdi, bu makkor to'g'risida yurgan mudhish mishmishlar to'g'ri ekan-da?»

– Bu javohirning bahosi shundaykim, yarim G'aznani sotib olishga qudratingiz yetadi!

Piri Bukriy, go'yo Abu Rayhonning bu so'zidan qo'rqib ketganday, uning kaftidagi javohirni «shap» etib yulib oldi-da, shosha-pisha yumaloq qutichasiga yashirdi.

Beruniy indamay orqasiga burildi, biroq hujraga o'xshash o'rtancha xonaga chiqqanida Piri Bukriy uni quvib yetdi:

– Mavlono Abu Rayhon! Kamina sizga bir iltimosim bor!.. O'z ko'zingiz bilan ko'rdingiz: faqir ko'chada qolgan bir gado emasmen. Qancha desangiz... xoh oltin, xoh javohir... qancha desangiz oling! Sizdan yolg'iz iltimosim bor!.. – Bukrining allaqanday ma'sum ko'm-ko'k ko'zlari telbaning ko'zlariday charaqlar, iyagidagi siyrak malla soqoli dir-dir titrar edi. – Birdan-bir iltimosim... anov joriyangizni, Malik ul-sharobdan olgan anov joriyangizni kaminaga in'om etsangiz, mavlono!..

Beruniy shartta burilib ketmoqchi edi, bukri og'ir hansirab uning qo'liga yopishdi.

– Mavlono! Istasangiz anov javohirni, bahosi yarim G'aznaga teng anov nodir javohirni oling!

Piri Bukriy telbalarcha harakat qilar, tirqirab oqqan ko'z yoshlari yuzini yuvib, siyrak mallarang soqoliga quyilardi.

– Faqirga rahm qiling, mavlono, rahm!

Yo, tavba! Salkam qirq yil avval ham oralari-da xuddi shunday bir gap bo'lib o'tgan edi. Hozir ham!

– Qo'lingni ol, Piri Bukriy! Men quljallob emasmenki, bir sho'rlikni senga oltinga sotsam! – Beruniy shunday deb, bukrining temir iskanjaday qattiq, yopishqoq qo'lidan qo'lini bazo'r tortib oldi-da, tashqariga otildi.

Taqdirning ajab savdosi: unda, Qiyotda, Rayhonbonuga yopishgan edi bu iblis, endi Sadafbibiga!..

Beruniy xayol og'ushidan bazo'r qutulib, ro'parasida mung'ayib o'tirgan Sadafbibiga qaradi.

– To'g'ri so'zlading, bibim, ko'cha yumushlarini Sabhu qilsin...

Beruniyning so'zi og'zida qoldi. To'satdan tashqarida gurs-gurs qadam tovushlari eshilib, xonaga Sabhu kirdi. U nimadandir hayajonlangan, boshidagi oq qalpoqchasi bir tomonga og'ib ketgan: qo'lidagi kapkiri dir-dir titrar edi.

– Ustod! Sizni saroydan bir beka so'roqlab keldi!

– Saroydan? Beka?

– Ha, soyabon aravada keldi. Yonida bir qancha suvorilari ham bor!

Ajab hol: kunduz saroydan chopar kelgandi. Chopar ertaga saroyda o'tadigan mashvaratda hozir-u nozir bo'lishi to'g'risida amr-u farmon keltirgan edi. Endi esa...

Beruniy bir narsa deyishga ulgurmadi, eshik shitob bilan ochilib xonaga bekaning o'zi kirib keldi.

## 2

Egnida... tiriklar va g'oliblar libosi: uzun qora ipak ko'ylak va ko'ylak ustidan kiyilgan xipcha bel qora kimxob kamzul, yuzida zar sochilgan uzun qora durra, oyoqlarida uchlariga dur qadal-

gan bejirim qora kavush, xina qo'yilgan barmoqlarida yoqut ko'zli yirik oltin uzuk, beka poygakda to'xtab, nazokat bilan bosh egdi.

– Bevaqt kelganim uchun ma'zur tutasiz, mavlono!..

«Xatlibegim! Sultonning erka singlisi Xatlibegim!» – Beruniy shitob bilan qaddini rosladi, ovozi beixtiyor titrab:

– Qadamlariga hasanot, begim! – dedi. – Kamnani kechirgaysiz, sababi xastalik, istiqbolingizga chiqolmadim.

– Tashakkur! – Xatlibegim asta yurib xontaxtaga yaqinlashdi-da, xonani nafis mushk-anbar bo'yiga to'ldirib, nazokat bilan ko'rpachaga tizza bukdi, bukarkan, keskin harakat bilan yuzidagi harir qora pardani ko'tarib, yelkasiga otdi.

Beruniy chekkada haykalday qotib turgan Sadafbibiga yuzlandi:

– Sen bora ber, bibim. Sabhuga qarashib yubor...

Sadafbibi hurkak kiyikday chopqillab chiqib ketdi, Xatlibegim eshik yopilguncha uning orqasidan qarab turdi, so'ng:

– Ayol zotini afv etasiz, mavlono, – dedi. – Bu sanam kim?

– Bu sanam... faqirning joriyasi, begim.

Xatlibegimning yupqa lablariga bilinar-bilinmas kulgu yugurdi.

– Ofarin! Joriya tanlashni bilar ekansiz, mavlono!

«O, ayol zoti, ayol zoti! Zaifa deb bejiz aytmaganlar!»

Beruniy ko'nglidagi g'alayonni bosish uchun mo'risimon qalpoqchasini to'g'rilab, boshini xam

qildi. U ro'parasida o'tirgan bu ayol sultonning suyukli singlisi Xatlibegim ekaniga ham ishongisi kelar, ham ishongisi kelmas edi. Biroq bu o'sha, bundan o'n yil muqaddam Hindiston yo'lida, to'g'rirog'i, Sind viloyatidagi go'zal bir ko'l sohili-da pinhona uchrashgan Xatlibegimning o'zginasi edi! Yo'q, o'zginasi emas, unda sulton haramiga rahnamolik qilguvchi bu shaddod, o'ktam ayol xiy-la yosh, xiyla ko'hlik edi. O'n yil ichida o'zini ancha oldirib ko'yibdi. Chakka suyaklari turtib chiqqan yumaloq qoramtir yuzida, hatto, upa aralash nozik bo'yoq surtilgan yonoqlarida bilinar-bilinmas ajin nishonalari ko'zga chalinadi, biroq surma tortil-gan qiyg'os ko'zlarida, qattiq qisilgan yupqa lab-larida o'sha shiddat, og'asi amir al-mo'mininga xos o'sha sovuq bir o'ktamlik bor. Yoki bu ifoda, qiyg'os ko'zlaridagi bu sovuq shu'la yasamami? Axir o'shanda, bundan o'n yil muqaddam, go'zal ko'l sohiligiga tikilgan saropardada o'tgan pinhoni-y kechada hozir sovuq chaqnagan bu ko'zlar tamom boshqacha porlagan emasmi?..

Beruniy to'satdan toshqinday toshib kelgan g'alayonni bosish umidida shosha-pisha qo'lini chiniy ko'zaga cho'zdi. Bir zum uning ko'z oldi-ga qimmatbaho sheroziy gilamlar to'shalgan ipak saroparda keldi. Saropardaning to'rida, qat-qat shoyi to'shakda betoqat to'lg'anib yotgan yarim-yalang'och sanam nigohi oldida namoyon bo'ldi, uning issiq bo'salari, betoqat harakatlari esiga tushib, horg'in tanasidan o't chiqib ketdi. O'sha mahallarda saroy ahli orasida bu tantiq va shad-dod bekaning nomi ibrat ma'nosida tilga olinar, go'yo u erkak yuzini ko'rmaslikka qasam ichib, go'shanishinlikni ixtiyor etgan, degan gaplar yu-

rardi. Bu gaplar rostmi, yolg'onmi – buni yolg'iz Alloh biladi va lekin bu o'ktam, erkatoy beka o'shanda, ko'l sohilidagi ko'kalamzor qirlarga tikilgan qorong'i saroparda ichida unga – yosh tilmoch Abu Rayhon Beruniyga unutilmas go'zal bir oqshom in'om etgan edi!..

Beruniy sharbat to'la piyolani ta'zim bilan bekaga uzatdi, uzatarkan, uning yupqa lablarida hamon o'sha bilinar-bilinmas kulgu alomatini ko'rди. «Yo, Rab, u ham esladi!»

– Marhamat, bekam!

– Tashakkur! – Xatlibegim piyolani olish o'rniga qora kimxob kamzulining cho'ntagidan og'ir qahrabo tasbeh olib, bitta-bitta o'g'irishga tutindi. Beruniy ichida bir kulib qo'ydi: «Xayriyat, yoshlik chog'larini eslagani kelmapti, eslagani kelganida ne qilarding, sho'rlik Abu Rayhon?»

Xatlibegim qo'lidagi tasbehini xontaxtaga qo'yib, piyoladagi sharbatdan bir ho'pladi.

– Mavlono! Men sho'rlik sizni yo'qlab kelishdan murodim, xabaringiz bor, ul valine'mat davlatpanoh, – iloyo umri uzoq bo'lg'ay! – og'ir dardga chalinmish. Saroy to'la alloma, malikul kalom, dovrug'i jahon hakimlar, biroq sho'rlik og'am o'z o'tida o'zi qovurilib yotmish! Dardiga davo, ko'ngliga orom berguvchi na bir habibi bor, na bir tabibi. – Xatlibegim harir durrasining uchini ko'ziga bosib, piq-piq yig'lab yubordi. – Olampanohning dardiga davo qidirish o'rniga saroyda ig'vo, fisqi fasod! Inongan tog'lari Ali G'arib bilan Abul Hasanak bo'lsa martaba talashishdan boshqani bilmas. Davlatpanoh olamdan o'tsa, – iloyo bichgan kafanlari o'zlariga buyurg'ay! – taxtga kim o'ttiradi? Shundan boshqa tashvishlari yo'q



ularning! To'ng'ich o'g'il amir Mas'ud qolib, kichik o'g'il, aqli noraso Muhammadni taxtga ko'tarmoq rejasini tuzadurlar!

«Hammasidan boxabar! Yer tagida ilon qimir-lasa biladi bu xotin! Ammo... bu mash'um sir-as-rorni aytishdan murodi ne? Bu ig'vo, bu fisqi fa-sod ishlarga daxlim ne mening?»

Xatlibegim to'satdan durrasining uchini jahl bilan yelkasiga otib, Beruniyga tik qaradi, surma tortilgan ko'zlari allaqanday sovuq chaqnab:

– Nahot, bu dardning davosi bo'lmasa, mav-lono? – deb so'radi. – Kecha saroyda nazm ah-lining sultoni janob Unsuriy bir so'z aytmiş. Hindiston tomonda, qaysi bir nahr o'rtasidagi orolda «ne'mati ilohiy» degan g'aroyib bir da-raxt o'sar emish. Bu daraxtning mevasini tano-vul qilgan xastayi notavon tanasidagi barcha dardlaridan forig' bo'lur, chol bo'lsa qirchilla-ma yigit, kampir bo'lsa... yosh malakka aylanur emish. Janob Unsuriy bu so'zni eski kitoblarda o'z ko'zi bilan o'qigan emish. Siz o'sha yurtlarda bo'lgansiz, mavlono, ayting, maslahat bering, qanday topsa bo'lur bu «ne'mati ilohiy»ni?

Beruniy Xatlibegimning iltijo bilan javdiragan g'amgin ko'zlaridan nigohini uzib, yerga qara-di, qarashi bilan Hindistonda shaharma-shahar darbadar kezib yurgan chog'larida keksa kohin-lardan eshitgan g'alati bir rivoyat esiga tushdi...

«Hindiston muzofotlarining birida dong'i olam-ga ketgan bir poshsho bo'lgan emish. Uning go'zal bir to'tisi bo'lib, poshshoyi olam unga cheksiz mehr qo'yg'an emish. Kunlardan bir kun o'sha to'ti qa-fasda turib, poshshoyi olam bilan so'zlashar ekan. Nogahon osmonda yana bir to'ti paydo bo'libdi-yu,

ikki to‘ti so‘zlasha ketibdi. Ammo sal o‘tmay qafas ichidagi to‘ti betoqat bo‘lib qaltiray boshlabdi, so‘ng yiqilib jon taslim qilibdi. Poshshoyi olam ko‘p qayg‘u va hasrat chekib, to‘tining jasadini boqqa olib chiqib tashlabdi. To‘ti esa qafasdan qutulgan hamon uchib, daraxt shoxiga borib qo‘nibdi. Poshshoyi olam hayron bo‘lib:

– Ey, qushlarning sarvari! – debdi. – Mendan ne yomonlik ko‘rdingki, suhbatimdan qochasen?

To‘ti shakarguftorlik qilib:

– Shohim, – debdi. – Xizimating haqini unutmaymen. Ammo... men ham to‘tilar poshshosi edim. Taqdir meni senga giriftor qilib, qafasingga solgandan buyon tobelarim mening firoqimda motam tutmishlar. Yonimga kelgan bu to‘ti mening inimdir, inim aytdiki: «E, og‘am, poshshoyi olamdan bir necha kunga ruxsat ol, yor-u birodarlaring yoniga borib ul majruhlarni hijron azobidan qutqaz, so‘ng yana qaytib kelib valine‘mating xizmatini qil». Men unga: «Poshshoyi olam so‘zimga ko‘nmaydi», dedim. Inim aytdiki: «Sen o‘zingni o‘likka sol, zero, o‘lmayin qutulmaysen!» Alqissa, men shu tadbir bilan o‘zimni xalos qildim! – To‘ti shu so‘zni aytib, inisi bilan birga uchib ketdi.

Poshshoyi olam kecha-yu kunduz yig‘ida bo‘ldi. Bir necha kundan so‘ng uning visolidan umid uzib o‘ltirgan edi, qarasa, o‘sha to‘ti qayta parvoz qilib keldi. Tumshug‘ida bir daraxt niholchasi bor edi. Poshsho nihoyatda xushvaqt bo‘lib dedi: «Ey, to‘ti! Meni firoq balosiga tashlab ketgani qanday jur‘at etding?»

To‘ti aytdiki: «Bir qoshiq qonimdan keching, poshshoyi olam, zerokim, ko‘p muddatdan beri

xeshu aqrabolarimdan judo bo'lib, ko'nglim vayron edi. Bordim, ularning diydorini ko'rdim va mana qaytib, dargohingizga keldim».

Poshshoyi olam to'tini ko'p e'zozladi. So'ng: «Bu olib kelganing qanday nihol?» – deb so'radi. To'ti aytdi: «Shohim, men sizdan ketib o'z makonimga borganimda do'stlardan hazratimga munosib tuhfa tayyorlashlarini iltimos qildim. Ulardan biri: «Men falon orolda bir daraxt ko'rganmen. Mevasining xosiyati shulki, agar qari yesa darhol yigit bo'lur, xastayi notavon yesa shu zamon sihat topadur», dedi. Men: «Olamda mundan yaxshi tuhfa yo'qdir», deb mazkur daraxtdan bir niholcha olib, dargohingizga keltirdim.

Bu so'zdan mamnun bo'lgan poshshoyi olam bog'bonini chaqirib: «Bu mevasi navjuvonlik ato qilguvchi mo'jiza daraxt niholidur, uni yaxshiroq parvarish qil!» – dedi. Bog'bon niholni boqqa eltib o'tqazdi, mehr bilan parvarish qildi. Nihol tez fursatda kamolga yetib, bir necha yildan so'ng meva qildi. Ittifoqo, uning mevasidan yerga tushganini bir ilon og'ziga olib, zahar soldi. Bundan bexabar bo'lgan bog'bon mevani tovoqqa qo'yib, poshshoyi olamning oldiga keltirdi. Poshsho mevani yemoqchi bo'ldi. Uning bir vaziri bor edi, dedi: «Shohim, sizday poshshoyi olam uchun bunday narsalarni sinab ko'rmay tanovul qilmoq joiz emas!»

Alqissa bu mevani mulozimlaridan biriga yedirilar. U odam mevani yegan zamon jon taslim qildi. Poshshoyi olam ajab holatda qolib, to'tiga dedi: «Ey, badbaxt! Sen menga dushmanlik azmidan jonimga qasd qildingmi?»

To'ti harchand: «Shohim, bu ishni tekshirib haqiqat qilgil. Bu ishda bir sir-asror bor», dema-

sin, poshsho uning soʻziga quloq solmadi. Toʻtini oʻldirdilar. Poshsho daraxtni ham yiqitib, oʻtin qilishni buyurdi. Vazir aytdi: «Shohim, bunday mevayi badhazm sizday poshshoyi olam xazinasi-da boʻlmogʻi lozim. Dushmanni yoʻqotmoq uchun bundan aʻlo doru yoʻq».

Ittifoqo, bogʻbonning bir oshnasi bor edi. Qarilik yuki qomatini kamondek egib qoʻygan edi. U bogʻbonni koʻrgani kelib, bogʻni sayr qilar edi. Bogʻbon yoʻq edi. Nogoh oʻsha daraxt oldiga kelib qarasa, mevasi gʻarq pishgan. Undan bir dona tanovul qilgan edi, darhol navjuvon yigit boʻldi. Bogʻbon kelib qarasa, bir yosh yigit xiyobonda yuribdi. Dargʻazab boʻlib soʻradi:

– Seni bu boqqa kim kirgizdi?

– E, birodar, men falon doʻsting boʻlaman.

– Nomaʼqul gapni qoʻy, u keksa edi, sen qirchilama yigitsen!

– Ey, birodar! Bogʻingda bir turlik meva koʻrdim, undan tanovul qildim-u, shu sifatga kirdim, oʻzim ham hayronmen.

Alqissa, bogʻbon oʻsha mevadan bir tovoq olib, oʻz birodari bilan poshshoyi olam huzuriga ravona boʻldi. Kelib boʻlgan voqeani arz qildi. Poshsho sinab koʻrib amin boʻldiki, toʻti rost aytgan ekan. Shunda poshsho bogʻbondan: «Sen oldingi mevani daraxtdan olibmiding yoki yerdan?» – deb soʻradi. Bogʻbon yerdan olganini aytdi. Maʼlum boʻldiki, unga ilon zahar solgan. Poshsho toʻtini oʻldirganiga pushaymon chekib, butun umri qaygʻu bilan oʻtdi...»

«Gʻaroyib rivoyat! Johil hokimlarni sabr-toqat va adolatga chorlovchi ibratli rivoyat!»

Beruniy bu rivoyatni eshitgan zahotiy oq uni ko'p yillardan beri yig'ib yurgan afsonalar va rivoyatlar daftariga yozib qo'ygan, bir kun o'zining «Al-Osor al-Boqiya» degan tarixiy asariga kiritish orzusida edi. Lekin hozir... hozir bu hikoyat, har qanday xastaga sihat keltiruvchi «ne'mati ilohiy» to'g'risidagi bu hangoma shunchaki bir cho'pchak ekanini, abadiylik orzusida ojiz banda yaratgan shunchaki bir rivoyat ekanini qanday aytadi? Yaxshi bo'lsin, yomon bo'lsin, bir mahal-lar unga bir necha totli daqiqa bag'ishlagan, hozir esa mudhish haqiqat oldida undan najot so'rab kelgan bu zaifaga ne deydi? Yuz amri issiq, uning ko'nglini qanday og'ritadi?

– Begim, – dedi Beruniy, ko'zini yerdan uzmay, – ming yillarki, bani bashar siz aytgan bu «ne'mati ilohiy»ni qidiradi, ming yillarki, uni topishni orzu qiladi. Ammo uni topmoq hech bir kimsaga nasib etgan emas, begim!

Beruniyning so'zini Xatlibegimning:

– Yo, Parvardigor! – degan faryodi bo'ldi. – Nahot, hech bir najot bo'lmasa? Yetti iqlimni zabt etgan fo-tihi muzaffar, dong'i olamga ketgan poshshoyi olam bugun... jismida uqubat, ko'nglida tavahhum<sup>1</sup>, najotsiz to'lg'anib yotsa? Nahot, suronli janglar-ga chek qo'yib, endi farog'at gulshaniga yetdim deganida... nogahon yopishgan bu dardi bedavo sabab... shami shabistoni so'lsa<sup>2</sup>. Bechora og'am. Endi uning bor umidi hazrat Ibn Sinoda!

– Hazrat Ibn Sino?

– Ha, – dedi Xatlibegim. – Mana uch oydirki, davlatpanoh Ibn Sino hazratlariga elchi yo'lla-

---

<sup>1</sup> Tavahhum – vahima.

<sup>2</sup> Shami shabistoni – bu yerda umr shami ma'nosida.

mish! Ming taassufkim, hanuz darak yo‘q! Yana bir umidimiz siz bilan amir Mas‘udda! Ul shahzodayi valiahd Isfahonga yurish qilib, uni zabt etgandur. Biroq, nechundir undan ham darak yo‘q.

«Ibn Sino!..»

Bu ikki so‘z Abu Rayhonning diliga bamisoli iliq bir nur bo‘lib quyildi-yu, ko‘ngli yorishib ketdi. Yo, Rab! So‘ngbor Gurganj sarhadida, ko‘zlari-da yosh, quchoqlashib vidolashganlariga necha yil bo‘ldi? O‘n sakkiz, yo‘q, salkam o‘n to‘qqiz yil bo‘libdi! O‘n to‘qqiz yildirki, bir-birining diydoriga zor! Gurganjda, Ma‘mun ibn Ma‘mun saroyida o‘tgan qizg‘in bahs-munozaralar, dilrabo mu-shoiralar, tongotar suhbatlar qayda qoldi? Faqat ko‘ngilda! Ular xuddi tushdagi ro‘yoday o‘tdi-ketdi! Goho-goho keladigan uzuq-yuluq xabarlar, onda-sonda bo‘ladigan yozishmalardan boshqa aloqa yo‘q... Hatto, yozgan kitoblarini o‘qishga ham zor! Abu Rayhon uning dong‘i olamga ketgan «Al-Qonun» asarining faqat bir jildini o‘qishga muyassar bo‘ldi, Ibn Sino esa uning «Hindiston»-ni hali ko‘rmadi ham!

– Ha, – dedi Beruniy hushiga kelib, – Ibn Sino hazratlari kelsa ko‘p yaxshi bo‘lur. Ul hakimi davronning bilmagan dorusi, davolamagan dardi yo‘q.

Xatlibegim tasdiq ishorasida boshini irg‘adi-da:

– Xabarim bor, – dedi qovog‘ini uyib. – Ul takabbur hakim bir mahallar G‘aznaga kelishdan bosh tortib, Jurjonga qochgan. Bilishimcha, siz ul allomayi davron bilan ko‘p muloqotda bo‘lgansiz, mavlono. Baniyati shifo, yaxshi niyat qilib, hakim hazratlariga bir maktub yozib bersangiz. Tag‘in bir chopar yo‘llasak. Ul allomayi davron G‘azna saroyida xizmat qilishni tilamasa tilamas, biroq

bir bandayi ojiz dardga chalinganda uni davolamoq hakim uchun ham farz, ham qarz emasmu, mavlono? – dedi Xatlibegim, lablari titrab. – Bechora og'am! Na ko'zida uyqu bor, na ko'nglida taskin, har oqshom saroyda soya yanglig' tanho kezib chiqadi!..

Xatlibegim, go'yo o'z gapidan o'zi qo'rqib ketganday, birdan hushiga kelib, yuziga qora durrasini tortdi. Xatti-harakatlarida boyagi shiddat, gap-so'zlarida boyagi qat'iyat zohir bo'lib, shitob bilan o'rnidan turdi.

– Bu sirni men sizga inonib aytdim, mavlono! – dedi u, chamasi, ortiqcha gapirganidan pushaymon bo'lib. – Bu so'zlarni tirik bir jon bilmasligi darkor! Oftobi olamga ulug' martabalar in'om etgan Xudovandi karim, inshoollo, undan o'z mehri shafosatini darig' tutmagay! Maktubni yozib qo'ysangiz erta-buruskun odam yuboramem! Qo'zg'almang, mavlono, siz ham betob ekansiz, men o'z dardim bilan bo'lib, bilmabmen. Xayr, Allohga topshirdim sizni! – Xatlibegim boshini baland ko'targanicha, viqor bilan yurib, hujradan chiqdi. Beruniy holsizlanib, joyiga cho'zildi.

### 3

Haqiqatan ajab hol: kunduz farmoni oliy keltirgan choparlar! Oqshom esa... sulton bo'lmasa ham, o'ktamlikda sultondan qolishmaydigan bu o'ktam begimning pinhoni tashrif!..

Beruniy uchlari jingalak, qalin mosh-guruch soqolini tutamlaganicha o'yg'a toldi. Tokchadagi shamlar shu'lasida uning bir-biriga tutashgan o'siq qoshlari, cho'zinchoq qoramtir yuzi, cham-

barak qalpoqchasi tagidan bo'rtib chiqqan do'ng peshonasi, uzun qiyg'ir burni – butun qiyofasi qandaydir juda shiddatli ko'rinar, zotan, dong'i olamga ketgan allomalardan ko'ra suronli janglarda toblangan lashkarboshiga o'xshab ketardi.

Mana, bir necha oydirki, dorus-saltanat G'azna, nayinki G'azna, butun mamlakat notinch. Amir al-mo'minin atalmish sulton Mahmud G'aznaviy to'g'risidagi sovuq mishmishlarning cheki yo'q. Birov uni allaqanday davosiz dardga yo'liqqan desa birov tavahhum kasaliga giriftor bo'lib, vasvas bo'lib qolgan deydi. Bu mishmishlarning qaysi biri chin, qaysi biri yolg'on – yolg'iz Allohga ayon. Faqat shunisi rostki, hamma tahlikada, ayniqsa, hakimlar va allomalarning ahvoli og'ir.

Sulton bundan ikki oy muqaddam Beruniyini chaqirtirib, zoyicha<sup>1</sup> tuzib berishni buyurgan edi. Beruniy o'shandayoq sultonni ko'rib, qo'rqib ketgandi. Azaldan novcha, bo'ydor odam, u xuddi ichini qurt yeb, qurib qolgan ulkan terakni eslatardi. Faqat ko'zlari... o'ymoq tagidagi simobday miltiragan qisq ko'zlari yaralangan qushning ko'zlariday mungli edi. Sultonning ko'zlaridagi bu tizginsiz mung sabab. Beruniy, garchi umrida hech qachon ilmi nujum<sup>2</sup> bilan shug'ullanmasa ham, sultonning iltimosini qaytarmadi.

Saroydan qaytgach, munajjimlar yo'l-yo'rig'idan foydalanib, zoyicha tuzdi, hatto, unga jinday tuzatishlar kiritib, sultonning ko'ngliga tassalli beruvchi so'zlar yozib yubordi. Kim bilsin, ehtimol, ertaga mashvarat vaqtida sulton uni shu xususda so'roqqa tutar, ehtimol, tuzgan zoyi-

<sup>1</sup> Zoyicha – goroskop.

<sup>2</sup> Ilmi nujun – astrologiya.



chasidan biror xato topib, intiqom olar!.. Hayhot, Beruniy umrida bir marta, unda ham bir xastayi notavonning ko'ngli uchun, o'z e'tiqodidan xiyol chekingan edi, mana endi bu gunohi uchun intiqom xavfi tug'ildi...

Esida bor, o'sha uchrashuv chog'ida Beruniyning so'zlaridan tasalli topgan sulton birdan chehrasi yorishib, undan o'z ishlarini, xususan, Hindiston to'g'risidagi asarini so'rab-surishtirgan edi.

Beruniy yaxshi bilar: sulton uning bu asaridan ko'p narsa kutar, bu kitob uning Hindistonda qilgan jang-u jadallari to'g'risida, majusiy shohlar us-tidan qozongan ulug' zafarlari haqida bitilgan zo'r qasida bo'lishiga ishonar edi. Beruniy esa... Beruniy buni o'ylasa uyqusi qochadi. Har safar o'n yildan beri yozayotgan bu kitobga nuqta qo'yishni o'ylaganda, negadir Sind muzofotida bo'lgan bir mudhish qirg'in esiga tushadi. Tushadi-yu, butun fikr-xayoli ag'dar-to'ntar bo'lib ketadi...

O'shanda, Ind daryosi sohilidagi ko'rkam qal'a ichidagi muhtasham ibodatxonaga o't qo'yish to'g'risida amr-u farmon berilganida, Beruniy asir olingan hind lashkarboshilari bilan birga sulton oldiga tiz cho'kib, undan shafqat so'ragan, mahbuslarning ko'z yoshi aralash qilgan iltijolarini tarjima qilayotg'anida esa o'ziyam ko'z yoshini tiyolmagan edi! Lekin sulton shafqat qilmadi. Muazzam qal'aning to'rt tarafidan o't qo'yishni buyurdi. Qal'aga yashiringan ellik ming odam, barobar tiz cho'kib ibodat qilganicha yo'q, ibodat emas, yuraklarni tilka-pora qilguvchi mungli bir qo'shiqni aytganicha, alanga ichida kuyib kul bo'ldi... O'limga mahkum etilgan ellik ming mahbusning barobar tiz cho'kib aytgan va go'yo

mungli qo‘shiqday yangragan bu ibodati hanuz qulog‘i ostida turipti, eslasa hanuz larzaga soladi uni, go‘yo bu beshafqat qirg‘in sulton Mahmud G‘aznaviyning amri bilan emas, uning amri bilan bo‘lganday, a‘zoyi badani qaqshab ketadi. Uni Hindistonda qolishga da‘vat etgan narsa ham mana shu gunohkorlik tuyg‘usi bo‘ldi. Hindlar yurtiga jindak xizmat qilib bo‘lsa ham, ko‘nglidagi bu g‘uborini yuvish istagi bo‘ldi.

Qo‘lida aso, yelkasida xurjun, Abu Rayhon avval bir o‘zi, keyinroq esa Lohur ko‘chalaridan topib olgan yetimcha Sabhu bilan birga yarim Hindistonni aylanib chiqdi. Shaharma-shahar, qishloqma-qishloq yayov yurib, avvalambor bu xalqning tilini, so‘ng yozuvini, keyin ko‘hna ibodatxonalari kabi ko‘hna tarixini o‘rgandi. Bozorlarda, ibodatxonalar bo‘sag‘asida o‘tirib kekxa vedachi kohinlardan qadim afsonalar va rivoyatlarni eshitdi, ilmi riyoziyot va handasa haqidagi kitoblari va taqvimlari bilan tanishdi. «Mahabharata» va «Ramayana» kabi dostonlari, ertaklari, hikoyatlari, qo‘shiqlari, hayitlari, ulug‘ ayyomlari, oy va yillar haqidagi tushunchalari, hatto, ko‘hna vayronalarga bitilgan ko‘hna yozuvlarigacha yod oldi. So‘nggi bir necha yilni esa rasadxonalarda o‘tkazib, hind allomalarining falakiyot bobidagi tasavvurlarini, sayyoralar harakati to‘g‘risida tuzgan jadvallarini to‘pladi... Mana endi, hindlar yurtida to‘plangan bu ilmlarning hammasinini jamlab, «Kitob-u fi tahqiqi mo lil hind min ma‘qulatin maqbulatin fil aqli av marzulatin», ya‘niki «Hindlarning aqlga sig‘adigan va sig‘maydigan ta‘limotlarini aniqlash kitobi» degan ulkan asar yozdi. O‘zicha esa uni qisqacha qilib «Hindiston» deb ataydi.

Beruniy suyukli asarining har bir bobini tugatganida shogirdi Sabhuga ko'chirishga beradi. Abu Rayhon uni topib olganida Sabhu yetti-sakkiz yashar bir norasida edi. Mana endi nihoyatda ziyrak bir mullavachcha bo'lib yetishdi. Qarigan chog'ida unga ham do'st, ham shogird, ham yordamchi bo'ldi... Bundan bir hafta muqaddam Beruniy unga «Hindiston»ning so'ngi bobini ko'chirishga bergan, o'zi esa ko'p yillardan buyon yozishga jazm qilib yurgan «Al-Xazniy» degan ma'danlar to'g'risidagi kitobini bitishga tutingan edi. Lekin birdan xuruj qilib qolgan xashtalik o'ylagan ishining beliga tepdi. Boz ustiga, bir-biridan sovuq bu mishmishlar, telba sultonning telba-teskari farmonlari!.. Kim bilsin, vasvas dardiga duchor bo'lgan bu qahri qattiq hokim erta mashvaratda ne deydi? Uni ne savdolar kutadi?

O'lim haq! Beruniy sultonning qahri g'azabidan qo'rqmaydi. U faqat bir narsadan – niyat qilgan ishlarining chala qolishidan, yoza boshlagan asarlarining nihoyasiga yetmay qolishidan qo'rqadi, xolos!..

Beruniy, xontaxtadagi sopol ko'zachadan bir ho'plam sharbat quyib ichdi-da, yostig'i tagidan shaqildog'ini olib shaqillatdi. Darhol eshik ochilib, Sabhu kirdi. Uning katta-katta qop-qora ko'zlari bolalarcha bir samimiyat bilan porlab turardi.

– Kel, o'g'lim, o'tir!

Sabhu kavushini poygakka yechdi, yerga to'shalgan qalin jun namatni tovushsizgina odimlab, ustozining ro'parasiga kelib cho'kkaladi. Shundagina Beruniy shogirdining allaqanday ichki bir hayajon ichida to'lg'anayotganini sezib qoldi.

– Senga ne bo‘ldi, Sabhu! Kim seni ranjitdi, bolam?

– Ranjitdi? Nechun? – Sabhu ko‘z yoshi aralash jilmaydi, jilmayganda oppoq tishlari «yarq» etib, ozg‘in qoracha yuzi nur tushganday yorishib ketdi. – Men hozir... ustozimning kitobini ko‘chirib bo‘ldim, – dedi u va «qult» etib yutindi. – Buyuk kitob! Mening yurtimni butun olamga mashhur qilg‘usidir bu kitob! Uni tezroq ko‘chirmoq lozim, husnixat xattotlarga berib, ko‘p nusxada ko‘chirmoq darkor, ustod!

Beruniy indamay boshini xam qildi. U umrida juda ko‘p do‘st-u birodar, juda ko‘p shogird orttirdi, ularning yaxshilarini ham, yomonlarini ham, omad kulib boqqanda atrofida girgитton bo‘lib, omad ketganida xoinlarcha yuz o‘giranlarini ham – har xilini ko‘rdi. Lekin Lohur ko‘chasidan topib olgan bu yetimchaday sadoqatli shogirdni ko‘rmadi... Bo‘y-basti kelishgan, mo‘ylovi endigina sabza ura boshlagan, tol chiviqday nozik bu yigitchada o‘z elining hamma fazilatlarini – muloymligi, mehnatsevarligi, kamtarligi yuz foiz mujassam. Beruniy u bilan bir lahza suhbat qursa go‘yo Hindistonga qaytib borganday, bosib o‘tgan yo‘llari-yu, kezgan shaharlarida qayta kezib yurganday bo‘ladi, shunda yuragining bir burdasi o‘sha ulug‘ makonda qolganini, bu makonning zahmatkash, mo‘min-muloyim xalqi esa xuddi o‘z eldoshlariday qadr don bo‘lib qolganini his etadi. Ajabo! Nechun goho bir el ikkinchi el bilan oshno bo‘lmasdan turib yotsiraydi, faqat o‘z tilim, o‘z kuylarim va o‘z qo‘shiqlarim yaxshi deb o‘ylaydi! O‘ylaydi-yu, qatlu om qilib bo‘lsa ham, o‘z urf-odatlarini boshqa yurtlarga yoymoqchi bo‘la-

di!.. Shohlar-ku mayli! Uning o'zi ham, oq-u qora-ni tanigan Abu Rayhon Beruniyning o'zi ham bir mahallar shunday deb o'ylagan emasmidi? O'zi tug'ilib o'sgan Jayhun zaminidan yaxshi zamin, turkiy urf-odatlardan yaxshi urf-odatlar, turkiy qo'shiq va turkiy kuylardan yaxshi kuy va qo'shiq yo'q, deb o'ylamaganmidi?.. Xayriyatkim, birda Jurjon, birda Hindistonday buyuk va g'aroyib yurtlarni ko'rib ko'zi ochildi, har bir mamlakat, har bir el noyob va go'zal bir olam ekanini bildi, bilib «Hindiston»ni yozdi! Faqat... ming afsuski, bu asarini, o'n yil umri ketgan bu suyukli kitobi-ni hozircha pinhon tutishga majbur.

– Rahmat, azizim, – dedi Beruniy chuqur xo'rsinib. – Hozir bu kitobni xattotlarga topshirib, allomalarga tarqatib bo'lmas, o'g'lim.

– Sabab, ustod?

– Sababi... kamina uni, avvalambor, sulton Mahmud G'aznaviyga tortiq qilmog'im lozim!

– Tortiq qiling! Ko'p in'omlar olasiz, ustod!

Beruniy shogirdining hayrat bilan porlagan ko'zlariga tikilib, miyig'ida bir kulib qo'ydi: «Yo'q, ilmda zukko bu yigit bu dunyo yumushlari bo-bida hanuz go'dak, ona suti og'zidan ketmagan ma'sum go'dak!»

– O, bolam! Ko'p in'omlar olmoq uchun bu ki-tobda ul amir al-mo'mininga hamd-u sanolar o'qi-mog'im, sening yurtlingda qilgan qatl-u qirg'inlar-ni madhlamog'im darkor emasmu, o'g'lim?

Sabhu gunoh ish ustida tutilgan yosh boladay qizarib:

– Buni o'ylamabmen, afv eting, ustod! – dedi boshini egib.

Beruniy ko'zachadagi sharbatdan yana bir qultum ichdi-da, ko'zini yumdi. Nazarida, miyasi cho'g'dek qizib, xayoli chuvalashib ketayotgandek edi, lekin shunday bo'lsa ham, ko'nglining bir chetida yengib bo'lmas bir istak – qalbining eng tupkarisida yotgan dardlarini aytmoq istagi tobora avj olib borardi. Kim bilsin, bu telba shohning telba mashvaratidan sog'salomat qaytadimi, yo'qmi? Vasvas dardiga yo'liqqan hokimdan har narsani kutmoq mumkin!

– Bolam, Sabhu, – dedi Beruniy, boshini yostiqdand ko'tarib. – Kamina ertangi mashvarat ne maqsadda chaqirilgan – buni aytolmaymen. Shu sababdan bir narsani senga izhor etmoqni lozim ko'ramen... Yodingda bo'lsin! Faqir bu kitobni... sen mehr bilan oqqa ko'chirgan bu asarimni yozishdan murodim – sening yurting... Hindiston oldidagi gunohlarimni yuvmoq edi!..

Sabhu butun vujudi bilan oldinga talpinib:

– Siz? Gunohkor? – deb so'radi. – So'zingizni anglamadim. Hindistonni toptagan siz emas, ustod, siz emas!..

– Ha, kamina hech bir kimsaning burnini qonatganim yo'q! – dedi Beruniy. Uning isitmadan bo'g'ilgan ovozi to'satdan allaqanday ochilib, torgina chor burchak hujrani yangratib yubordi. – Qon to'ksa... amir al-mo'minin atalmish sulton G'aznaviy to'kdi, uning lashkarlari to'kdi! Shaharlarni talab, ibodatxonalarga o't qo'ydi! Hammasi to'g'ri! Va lekin... baribir, sening yurtingda mening elim to'g'risida yomon taassurot qoldi, bolam. Yo'q, ul qatl-u qirg'inlar uchun mening elim gunohkor emas! Aslo! Ammo sulton Mahmud yanglig' jahongirlar, lashkarboshilar, mus-

tabid shohlarning razolati ham shundadurki, ular faqat o'z nomlari emas, balki o'z eli nomiga ham dog' tushirishga qodirdurlar! Biz kabi ma'rifatli zotlar esa loaqal ezgu niyat va yaxshi xizmatlarimiz bilan bo'lsa ham, mazlum ellar yuragidagi bu yomon asoratni yo'qotmog'imiz darkor. Faqir sening yurting haqida, Hindiston haqidagi kitobimni shu niyatda yozganmen! Bilib qo'y, bolam!

Beruniy buning hammasini allaqanday yonib, ilhom va hayajon bilan gapirdi-yu, birdan holsizlanib boshini yostiqqa tashladi, tashlarkan, dehqonning kaftiday katta, qoramtir kaftlarida shogirdining titroq lablarini his qildi.

Beruniy ko'ngli «shig'» etib, shogirdining yelkasini asta siladi, xayolidan esa negadir: «Ko'zim tirigida bu sho'rlikni uylantirib qo'ymog'im lozim», degan fikr o'tdi. Ha, Sadafbibi ikkisini qovushtirib qo'ysa uzukning ko'ziga solingan yoqutday yarashmaydimi? Yarashadi! Bir farzandi ikki bo'ladi, u esa tinchib, bus-butun mutolaa va mushohada daryosiga sho'ng'iydi!

Beruniy ko'ngliga kelgan bu gapni shogirdiga aytmoqchi bo'ldi-yu, biroq bir zum o'ylanib qoldi. Qiziq: u endi, bu ikki yoshni qovushtirish fikri ko'ngliga kelgandagina sezdi: Sadafbibi, yurish-turishlaridan, so'zlari, hatto, olgan nafasidan ham Jayhun nafasi ufurib turgan bu yoqimtoy qiz unga juda aziz bo'lib qolgan edi! Yo'q, yigitlik davridan o'tib, keksalik manziliga qadam qo'rganida ko'ngliga erk bermoq gunohi kabirdur! Beruniy o'z tuyg'ularini jilovlay oladi. Yuragiga erk berish vaqtdan o'tgan! Albatta, jilovlay oladi! Faqat... bu gapni qo'zg'ashdan oldin Sadaf-

bibidan soʻz olmoq, uning koʻnglini bilmoq lozim emasmu?

Beruniy shu qarorga keldi-da, Sabhudan Sadafbibi chaqirib berishni iltimos qildi.

Zum oʻtmay, eshik tovushsizgina ochilib, Sadafbibi kirib keldi. Maʼyus quralay koʻzlarida allaqanday hadik, qiz harir ipak durrasi bilan yuzining bir tomonini xiyol yashirganicha Beruniyning yoniga kelib oʻtirdi... Beruniy yuragidagi hayajonni bosish uchun yana sharbat toʻla koʻzaga qoʻl choʻzdi.

– Bibim, kamina bir narsani niyat qilgan edim, shu niyatimni aytgani chaqirtirdim seni!

Sadafbibidan sado chiqmadi. U goʻyo sovuq xabar eshitishdan qoʻrqqanday rangi oʻchib, oʻtirgan joyida haykalday qotib qoldi.

– Bibim! Sen qizim boʻlsang, Sabhu mening oʻgʻlim. Mana oʻn yildirki, Sabhu faqirga xizmat qiladi. Koʻp oliyanob yaxshi yigit ul...

Beruniyning soʻzi boʻgʻzida qoldi. Sadafbibi toʻsatdan yuzini kaftlari bilan yashirib, piq-piq yigʻlab yubordi.

– Senga ne boʻldi? Nechun yigʻlaysen, bibim?

– Ustod! – dedi Sadafbibi yigʻi aralash. – Men... men shoʻrlikka rahm qiling! Diydoringizni koʻrmoq baxtidan judo qilmang meni, judo qilmang!

Sadafbibi shunday deb, boshini egdi-yu, yuzini Beruniyning kaftlariga yashirdi.

Beruniy qizning boshini silamoqchi boʻlib, qoʻlini koʻtardi, biroq bunga kuchi yetmaganday qoʻli «shilq» etib tushdi-yu, birdan holsizlanib oʻzini yostiqqa tashladi.



## UCHINCHI BOB

Amir al-mo'minin sulton Mahmud ibn Sabuqtegin G'aznaviy ko'kragi tilla tasmalar bilan ziyatlangan jangovar fil yelkasida, tepasiga ipak soyabon tutilgan oltin taxtda o'tiribdi. Fil atrofini arg'umoq o'ynatgan lashkarboshilar, amirlar, vazir-u vuzaro qurshab olgan.

Qalin chakalakzor bilan qoplangan qir etagidan keng o'zan o'tar, o'zanning u yuzidagi tepalikda atrofi baland devor bilan qurshalgan muazzam qal'a ko'rinardi. Qal'a ichida esa yuksak pesh-toqlari falakka qadalgan, uchlik qubbalari sof til-la bilan naqshlangan g'aroyib bir ibodatxona yal-yal yonib, ko'zni olar, yo'q bu ibodatxona emas, arshi a'lloga bo'y cho'zgan bir mo'jiza edi!..

Sulton turgan qir ham, pastdagi soy ham, soyning u yuzidagi tepalik ham – hamma yoq hisobsiz lashkarga to'lgan, u yoqdan-bu yoqqa ot surgan suvorilar hayqirig'i, qurol-yarog'larining sharaq-shurug'i, otlar dupuri, jangovar fillar na'rasi yer-u ko'kni larzaga solgan. Lekin sultonning qonini jo'shtirgan bu yoqimli suronni hazin qo'shiqqa o'xshash bir ovoz buzib turar, bu – qal'adagi muhtasham ibodatxonaga berkinib, ibodat qilayotgan mahbuslar ovozi edi. Yurakni zir titratguvchi bu hazin qo'shiq tobora avjga chiqib, sultonning yuragiga g'uluv solmoqda edi...

Yo, tavba! O'zanning bu yuzidagi ulkan shahar kecha bir hamla bilanoq taslim bo'lgan. Ana, qarorgoh tevaragidagi qalin chakalakzorlarda qo'llariga kishan urilgan hind sarbozlari to'p-to'p bo'lib yotibdi. Ularning qurol-yarog'lari tog'-tog' bo'lib uyulgan, jangovar fillari esa sulton qo'shin-

lariga xizmat qilmoqda, lekin bu muazzam qal'a hamon taslimdan bosh tortmoqda. Bu yurish chog'ida o'nlarcha shaharlarni bir hamla bilan zabt etgan sultonning muzaffar qo'shinlari esa bu qal'a ro'parasida ojizlik qilmoqda, ne-ne qal'a devorlariga yetgan narvonlar bu qal'aning osmon-o'par devorlariga yetmayapti, boshqa qal'alarni qog'ozday teshgan arrodalar bu qal'aning metin devorlariga «tishi» o'tmay turipti. Ulardan otilgan toshlar, qal'a devorlariga tegib, bamisoli koptokday qopchiydi... Bu ne hol? Nahot, ne-ne shaharlarni bir hamla bilan tiz cho'ktirgan sultoni muntasirning<sup>1</sup> muzaffar qo'shini bu qal'a uchun tag'in bir necha kun jang qilsa?

Sulton Mahmud erka vaziri Abul Hasanak tutgan tilla qadahni bir ko'tarishda sipqarib, yelkasi osha osmonga otdi. Oltin qadah havoda mo'jaz qushchaday yarqirab, yerga tushdi-yu, musaffo jaranglab, o'siq maysalar orasiga yumalab ketdi. Sulton novcha bo'y-bastini rostlab, hammasi bir xil qora arg'umoqlarini o'ynatib turgan lashkar-boshilarga yuzlandi, qahrli qisiq ko'zlari o'tday chaq nab:

– Amir Nushtegin! – deb na'ra tortdi.

Surmarang sallasiga amirlik nishoni qadalgan yo'g'on, chorpahil lashkarboshi ostida yer depsingan qora arg'umog'ini niqtadi. O'rgatilgan arg'umoq qasir-qusur bostirib kelib, fil ro'parasida cho'kkaladi. Amir Nushtegin esa egardan tushmay, qo'lini ko'ksiga qo'ydi:

– Oftobi olamning xizmatiga muntazirmen!

– Muntazirsen! – dedi sulton achchiq kinoya bilan. – Ikki kundirki, kichik bir qal'ani zabt etol-

---

<sup>1</sup> Sultoni muntasir – yengilmas sulton.

may ovorasen! Shahar taslim bo'lmasa ne qilmoq darkor, amir Nushtegin?

– O't qo'ymoq, oftobi olam!

– O't qo'ymoq bo'lsa nechun qo'ymaysen? Nechun?

«O't» so'zini eshitganda yaqindagi chakalakzor-da g'uj bo'lib yotgan, hammasi bir xil sariq ko'ylak, bir xil sariq ipak shalvar kiygan qora tanli hind zodagonlari orasida g'ala-g'ovur ko'tarildi. So'ng, chehrasidan allaqanday shuur yog'ilib turgan al-lomanamo bir kimsa davradan otilib chiqdi-da, oppoq boshini egib, bir nimalar deb iltijo qildi. Sulton atrofiga olazarak boqib:

– Bu majusiy ne deydi? Abu Rayhon qayda? – deb so'radi. Chakalakzor orasidagi havorang chodirdan ko'k banoras to'n kiyib, boshiga oq salla o'ragan, kaltagina uchburchak soqoli uzunchoq qoramtir yuziga yarashib tushgan novcha bir al-loma chiqib, sipolik bilan bosh egdi.

– Yaqinroq kel, Abu Rayhon! Bu g'ayridinning so'zini eshit! Arzi ne – senga so'zlasin, sen bizga so'zla!

Beruniy ot tuyoqlari ostida ezilgan qalin may-salarni ship-ship bosib, nuroniy cholning yoniga keldi, boshini osiltirganicha mo'ysafidning haya-  
jonli, palapartish so'zlarini eshitdi.

– Bu bandayi ojiz sizday amir al-mo'minidan mehri shafqat tilaydi! Deydikim, bu qasrda ellik ming g'arib-u g'urabo yig'ilgan!

– G'arib-u g'urabo! – dedi sulton ovozi momaqal-diroqday qaldirab. – G'arib-u g'urabo bo'lsa... nechun lashkari muzaffarga qarshilik qiladi? Nechun taslim bo'lmaydi?

– Oftobi olam! Qal'a ahlining aksari ojizalar emish, begunoh norasidalar emish, chollar emish, davlatpanoh!

Beruniy soʻzini tugatmagan ham ediki, boyagi nuroniy chol yuztuban yiqilib, qoʻllari bilan yer tirnashga kirishdi. Beruniy «yalt» etib yuqoriga, fil yelkasida oyoq kerib turgan sultonga qaradi, beixtiyor oldinga talpinib:

– Olampanoh! – deb xitob qildi. – Shafqat qiling, olampanoh!

Uning soʻzlarini amir al-moʻmininning:

– Amir Nushtegin! – degan betoqat hayqirigʻi bosib ketdi. – Taslimdan bosh tortgan qasrga oʻt qoʻygil, oʻt!

Chakalakzorda bir-biriga suyanib, guj boʻlib yotgan hind mahbuslari qoramtir qoʻllarini koʻkka choʻzib, uvvos solib yigʻlashdi, lekin pastga qarab ot surgan Nushtegin navkarlarining gʻolibona qiyqirigʻi mahbuslar nolasini koʻmib yubordi. Zum oʻtmay, toʻrt tomondan koʻtarilgan alanganing qizgʻish tillari muazzam ibodatxonani ajdaho yangligʻ yalab, oftobday charaqlagan oltin qubbalarini yamlab yutdi...

Alanganing mudhish tillari shunday shafqatsiz, olov ichida qolgan muazzam ibodatxonaning yarqirashi shunday... goʻzal ediki, qir yonbagʻridagi behisob lashkar, goʻyo bu manzaradan sehrlanganday qotib qoldi. Bu sovuq va ulugʻvor goʻzallikka faqat bir narsa xalaqit berar, u ham boʻlsa qalʼa ichidan, yongʻinda qolgan ibodatxona tuynuklaridan eshitilayotgan boyagi hazin kuy, yuraklarni timdalovchi boyagi mungli qoʻshiq edi! Uzoqdan kelayotgan bu hazin qoʻshiqqa endi qandaydir yomon, koʻngilni ozdiruvchi qoʻlansa hid ham qoʻshilgan edi. Ajabo: qoʻlansa hid kuchaygan sayin koʻngilni vayron qilgʻuvchi bu qoʻshiq ham avjga chiqmoqda, goʻyo yer qaʼridan kelayot-

gan o'liklar faryodiday tizginsiz mung bilan yang-ramoqda edi.

– Ey, Yaratgan egam! – dedi sulton yuragi uvishib. – Nahot, bu majusiylar tiriklayin o'tda kuyib ketadi-ki, ammo tiz cho'kmaydi? Qo'shiq aytib tiriklayin yong'uvchi elni birinchi ko'rishim!

Sultonning xayolini Beruniyning g'amgin ovozi bo'ldi.

– Yo'q, bu qo'shiq emas, amir al-mo'minin! El-lik ming begunoh bandalarning nolasi bu! Ular toat-ibodat ila Parvardigori olamga nola qilmish! Gunohimiz ne, deb yig'lamish ular!

– Bas, Abu Rayhon! Takabburlik sabab tag'in mubohasaga jazm etdingmi? Men seni ul muta-kabbir hakim... Ibn Sinoni topib kel, deb yo'llagan edim. Sen bo'lsa uni topib kelmoq o'rniga... g'animlarim yonini olib, menday amir al-mo'mininga so'z qaytarasen! – sulton shunday deb, qilichini shartta qinidan sug'urdi-da, boshi uzra ko'tardi, biroq nogahon biqiniga qadalgan sanchiqdan ing-rab yubordi-yu... uyg'onib ketdi.

Shiftdagi oltin qandillarga terilgan shamlarning ko'pchiligi so'nib qolgan, devorlariga sarg'ish ipak pardalar tutilgan katta tanobiy xona g'ira-shira, hamma yoq suv quygandek jimjit edi.

Sulton, go'yo o'z xobxonasida emas, sovuq go'rda yotganday bo'lib, jismidan sovuq ter chiqib ketdi. Yuragi qoqsuyak ko'kragini yorib chiqqudek gurs-gurs urar, ko'z oldida hanuz alanga olgan muazzam ibodatxona turar, quloqlari ostida o't ichida qolgan ellik ming mahbusning mungli qo'shig'i yangrardi...

Yo, tavba! Unga ne bo'ldi? Ne sababdan bundan ko'p yillar muqaddam o'tgan bu jang-u jadal

tushiga kirdi? Allaqachon yodidan ko'tarilgan bu voqealar nechun qayta yodiga tushdi? Nahot, amir al-mo'minindan fotihi muzaffar lashkariga bo'ysunishdan bosh tortgan g'ayridiniylarni qiron qilmoq gunoh bo'lsa?..

Sulton bezillab og'rigan biqinini silaganicha, uzoq xayolga toldi. Mana, bu dardibedavoga giriftor bo'lganiga bir necha oy bo'ldi, shundan beri ko'ngli notinch, joni behalovat, kechalari yomon tushlar ko'rib, vahima bosadi. Nechundir ezgu ishlari, qurgan qasrlari, yaratgan bog'lari, barpo qilgan masjid va maqbaralari emas, janglar suroni-yu otlar dupuri, kesilgan boshlar, dor-da chayqalgan murdalar, yong'inda qolgan shaharlar yodiga tushadi. Miyasida ilgari hech qachon o'ylamagan yomon o'ylar charx uradi...

Ha, buning hammasiga mana shu dard, uch-to'rt oydan beri yopishib olgan mana shu davosiz dard sabab. Rost, so'nggi kunlarda Chin<sup>1</sup> va Hind mamlakatlaridan keltirilgan ikki hakimning qilgan muolajasi yoqib, biqinidagi og'riq xiyol bosilgan, har oqshom yuragini chulg'ab olguvchi sovuq tavahhum sal ko'tarilgan edi. Kecha, hatto, sodiq vaziri Abul Hasanakka aytib, saroy mutriblarini chaqirtirgan va ozgina ko'ngilxushlik ham qilgan edi. Bazmdan keyin esa erkatoy vaziri Abul Hasanak yoshlik paytlarini eslab, sultonning yuragini qitiqlovchi bir gapni qo'zg'ab qoldi. Go'yo Buxoro hokimi Aliteginning suyukli kenja xotini sultonning visolini ko'rish ishqida yonib, tun-u kun motamda emish!

Sulton Aliteginning bu kenja xotini bundan uch-to'rt yil muqaddam, Buxoroga yurish qilgani-

---

<sup>1</sup> Chin – Xitoy.

da asir tushirib olib ketgan, biroq o'zini ko'rmagan, ko'rishga hushi ham yo'q, uni tutqunda saqlashdan maqsad esa – betavfiq Aliteginni cho'g'day qovurish edi, xolos. Lekin kechasi Abul Hasanak sultonning ishqida yongan bu xotinni shunday ta'rif-u tavsif qildiki, sulton ham nogahon qitig'i qo'zib, avval may buyurdi, so'ng ishq o'tida yongan malakni ko'rish istagini bildirdi.

Osmon malikasi qasrining eng xilvat burchagida sultonning maxfiy go'shasi bo'lar, go'sha devorlari «Alfiya-shalfiya»<sup>1</sup> dostonidan ko'chirilgan hayosiz suratlar, yalang'och ayol va erkak sevgisini tasvirlovchi rangdor rasmlar va hind poshsholari qasrlaridan olib chiqilgan yalang'och sanamlarning oltin haykalchalari bilan bezatilgan edi. Odatda, haram bekalari in'omga kelgan yosh ma'sumalarni hammomga solishib, pardo-andozlarini joyiga qo'ygach, shu go'shaga olib kirishar, bu hayosiz suratlar yosh go'zallarda shahvoniy hirs uyg'otib, ularni sultonning zinosiga «shay qilib» qo'yardi. Rost, so'nggi yillarda, payg'ambar yoshidan o'tib, taqvodorlikni ixtiyor etgan sulton maxfiy go'shani taqa-taq berkitgan edi. Biroq kecha uning kutilmagan istagidan quvonib ketgan haram bekalari maxfiy go'shani o'zlaricha ochtirib, Buxoro malagini shu yerga olib kelishibdi.

Qisqasi, sulton yelkasida yengil banoras to'n, beliga oltin kamar, beholgina odimlab, maxfiy go'shaga kirganida... Buxoro sanami, oppoq durkun tanasini hayosizlarcha ochib, qat-qat ipak to'shak ustida chalqancha tushib yotardi. Uning ko'zlari yumuq, harir guldor ro'moli orasidan toshib chiqqan mayin qo'ng'ir sochlari yerda-

---

<sup>1</sup> «Alfiya-shalfiya» – Sharqning mashhur erotik dostoni.

gi qirmizi gilamda betartib sochilgan, o'zi esa xuddi otash ichida qovurilayotganday to'lg'anar edi.

Sulton ostonani hatlab o'tishi bilan sanam sapchib turdi, gilamga tiz cho'kib, uning oyoqlarini quchdi-da, tizzalarini, sonlarini silashga tutindi. Sulton ham suyulgan qoni birdan ko'pirib, sanam tomon egildi. Biroq xuddi shu payt, Buxoro malagining cho'g'day issiq tanasiga qo'li tekkan payt, so'nggi kunlarda tinchib qolgan qornidagi «tipratikon» go'yo to'satdan «uyg'onib» ketdi-yu, og'riqning zo'ridan bo'kirib yubordi.

Sultonning na'rasini eshitib, avval Abul Hasanak, uning ketidan ranglari quv o'chgan haram bekalari yugurib kirishdi...

...Mana, shundan beri to'lg'anib yotibdi, yolg'iz og'riqdan emas, notinch o'ylardan, ko'rgan tushlaridan, yuragini chulg'ab olgan sovuq vahima va adolatsizlik tuyg'usidan to'lg'anib yotibdi.

Yo, Parvardigori olam! Osiy bandangni o'zing kechirgaysen! Va lekin... bu ne ko'rgilik ekankim, ojiz badang sulton Mahmud, haq va hidoyat yo'lidagi qirq yil suron solib, mashriqdan mag'ribgacha neki majusiylar va g'ayridiniylar bor, barchasini qatli om qilsa, poyqadami yetgan el borki, hamma yerda qur'oni masjid so'zini yoysa, bu yo'lda unga qirq yil zafar ustiga zafar keltirsang-u endi, rohat-farog'atda kun kechirmoq mavridi kelganda, uni bu bedavo dardga mubtalo qilsang? Hayhot! Agar bu dard chindan ham bedavo bo'lsa, unda amir al-muslimin atalmish gunohkor bandangning qirq yillik toat-u ibodatidan ne foyda? Nahot, u butkul ro'yi zaminni zabt etib, behisob boyliklar orttirganida, o'z dorus-saltanati G'aznayi munavvarani jahonda eng ko'rkam shaharga aylantirib,



unda masjidida jome yanglig' o'nlab masjidlar, go'zallikda benazir jannatmonand bog'lar yaratganida, Osmon malikasi kabi qasrlar qurib, ularni hech bir shoh ko'rmagan zeb-u ziynatlar bilan bezatganida... nahot oxir-pirovardida topgani bu bedavo dard bo'lsa? U o'z haramiga Chin va Misr, Hindiston va Rumdan husnda yagona hurliqolarini yig'dirsa, raqsda tovusdek tovlanguvchi go'zal raqqosalar, bulbul yanglig' xushovoz xonanda va sozandalar, nomi olamga ketgan malikul kalom va vohidi zamon allomalarni to'plasa!.. Bu ne'matlarning hammasini o'zing in'om etsang-u tag'in o'zing hammasidan benasib qilsang?

Yo'q, noumid shayton! Kecha nazm ahlining sultoni, saroy shoiri Unsuriy yaxshi xabar topib keldi. Bu xabarni u majusiylar tilida bitilgan eski bir risolada o'qigan emish. Mashriq mamlakatlari-dan birida, hududsiz ummonlar orasidagi mo'jaz bir orolda, «ne'mati ilohiy» atalmish mo'jiza bir daraxt o'sar emish. Kimki bu daraxtning mevasini iste'mol qilsa, hamma dardlaridan forig' bo'lib, chol bo'lsa navjuvon yigitga, kampir bo'lsa bokira qizga aylanar emish...

Risoladagi so'z chinmi, yolg'onmi? Bu yolg'iz Allohga ayon. Ammo... chin bo'lmog'i darkor! Zerokim... nahot butkul ro'yi zaminni zir titratgan sulton Mahmud yanglig' fotihi muntasir... nogahon yopishgan bir dard sabab Afshon shol dahasidagi g'arib-u g'urabolar yanglig' o'lib keta bersa? Yo'q, bunga inonib bo'lmas! Amir al-mo'minunday shohlarni yaratib, ularni «as salotin zullallohu fil arz», ya'niki «shohlar mening yerdagi soyamdur», degan ul sarvari koinot, ular uchun Unsuriy aytgan «ne'mati

ilohiy» kabi mo'jiza ne'matlar ham yaratmog'i darkor! Faqat bu ne'mat o'sgan makon qayda? Shuni bilmoq va topmoq darkor, xolos!

Sulton risolani eshitib, darhol Chin va Hind tabiblarini chaqirtirdi. Lekin ulardan ko'ngil to'ladigan bir javob ololmadi. Bu yanglig' rivoyatlarni ular ham eshitganlarini, demakkim, bunday mo'jiza daraxt borligiga iymonlari komil ekanini bayon qilishdi, ammo ul ne'mati ilohiy o'sgan makon qayda? Bu jumboqqa javob berishga o'jizlik qilishdi. Sulton, avval darg'azab bo'ldi, keyin xiyol o'ylab ko'rib, barcha allomalarni ertalabki mashvaratga chaqirtirdi. Chaqirilgan allomalar orasida hozirgina tushiga kirgan Abu Rayhon Beruniy ham bor. Kim bilsin, Unsuriy aytgan ne'mati ilohiy qayda o'sadi, balki u bilar. Axir u ko'p yillar hindlar yurtida turgan, shaharma-shahar kezgan, ularning hamma ilmlarini o'rganagan, hatto, tillarini o'rganib, qadimiy kitoblari-gacha mutolaa qilgan... Shoyad ul ne'mati ilohiy to'g'risida shu eski kitoblarda aniq bir narsa zikr qilingan bo'lsa! Harqalay, hech kim bilmasa ham, hakimi davron atalmish anov takabbur hakim... hazrat Ibn Sino bilmog'i darkor! Ne chora? Mana, uch oydirki, sultonning ikki ko'zi Xuroson yo'lida, ammo yuborgan eng sodiq mushriflaridan<sup>1</sup> hanuz darak yo'q. Birov, ul hakimi davron yo'lga chiqqan, desa birov, G'aznaga kelishni istamay boshini olib qochgan, deydi...

Attang, bundan uch oy avval, sulton ul betavfiq hakimga eng ishonchli nadimi, ariz<sup>2</sup> Abulvafo Sariqni yuborarkan, bu ishni hammadan, hatto,

---

<sup>1</sup> Mushrif – elchi, maxsus davlat nazoratchisi.

<sup>2</sup> Ariz – harbiy devon sohibi, vazir.

Xurosonga yurish qilib, shu kunlarda Isfahonda lashkar tortib turgan o'g'li amir Mas'uddan ham sir saqlashni iltimos qilgan edi. Kim bilsin, ehtimol, elchilarni Hamadon hokimi Alouddavlaga emas, hozir Isfahonda turgan shahzoda Mas'udga yo'llaganida... Yo'q... sulton unga, o'z pushtikamaridan bo'lgan zurriyotiga inonmaydi. Chunki biladi: shahzoda Mas'ud, o'zi Isfahonda bo'lsa ham, ikki qulog'i G'aznada, padari buzrukvorining o'limi to'g'risidagi xabarni kutib yotibdi! Bu bemehr zurriyoti hazrat Ibn Sinoni bu yo'ldan qaytarsa qaytaradiki, xasta padariga yubormaydi, yo'q, zinhor yubormaydi!

O'g'lini eslashi bilan sultonning ko'kragida alam aralash isyonkor bir tuyg'u «lov» etib yondi-yu, qoqsuyak qo'llarini gilamga tirab, asta o'rnidan turdi.

– Astag'firullo, astag'firullo!.. – sulton, qornidagi «tipratikon»ni uyg'otib yuborishdan qo'rqib, ko'zlarini yumganicha bir nafas qimir etmay yotdi, so'ng tokchadagi shamlardan birini olib, yo'lakka chiqdi.

Shiftdagi billur qandillarda milt-milt yongan bitta-yarimta sham shu'lasida hududsiz yo'lak bo'm-bo'sh va allaqanday sirli tuyuldi. Yo'lakning oxiri ko'rinmas, ikki tomondagi tilla tasmlar bilan qoplanib, dur va zabarjad qadalgan behisob eshiklarning hammasi berk, tiq etgan tovush eshitilmas edi. Vo darig'! Saroy ahli qayda? Uning eng inongan nadimlari, vazir-u vuzarosi, sadoqati zohir lashkarboshilari qayga gumdon bo'ldi? Bosh vaziri Ali G'arib, suyukli nadimi Abul Hasanak nechun ko'rinmaydi? U, kimsan amir al-mo'minin, bedavo bir dardga mubta-

lo bo'lib, o'z o'tida o'zi qovurilib yotsa-yu, uning saxovati ila yuksak martabalarga erishgan bu vazir-u vuzaro, uning inongan tog'lari bo'lmish bu amir-u umaro osoyishta uyquda yotsa, yoxud yosh kanizlari bilan o'z haramlarida o'ynashib, kayf-u safo qurib o'tirishsa? Yo'q! Kayf-u safo qurib o'tirishibdimi ul iblislar yoxud biror xilvatga yashirinib olib, uni toj-u taxtdan mosuvo qilmoq rejalarini tuzib yotishibdimi? Tirikligida unga kafan bichib, biror go'shada sultonga choh qazmoqdami bu betavfiqlar?

Amir al-mo'minning azaldan bir odati bor – yiroqdan bo'lsa ham xatar shabadasini sezganda g'azabi sherday jo'shib, vujudida sher kuchi uyg'onadi. Bu safar ham shunday bo'ldi-yu, bir qo'lida fil tishidan zeb berilgan arg'uvoniy aso, bir qo'lida dir-dir titragan sham, nimqorong'i yo'lak bo'ylab yurib ketdi. U bir necha qadam bosgach, asosi bilan o'ng tomondagi eshikni turtib ochdi. Xona zim-ziyo edi. Undan qandaydir sovuq bir nafas kelganday, go'shaning eng tupkarisida, zulmat ichida allaqanday bir narsa g'imirlaganday tuyuldi-yu, sulton, yuragi «shuv» etib, orqaga tisarildi. Shu-shu, boshqa eshiklarni ochishga yuragi dov bermay, besh-o'n qadam bosdi. Lekin o'ng qo'ldagi dur va sadaf terilgan ikki tavaqali zalvarli eshikni ko'rganida beixtiyor to'xtadi va bir zum ikkilanib turgach, uni asosi bilan asta turtdi. Bu – mashvaratxona edi!

Devorlari oq marmar bilan qoplangan o'rdaday keng mashvaratxonaning shiftidagi billur qandil-da bir necha sham yonar, bu shamlar shu'lasida to'rdagi suyanchiqlariga inju qadalgan oltin taxt ajib jilo sochib yarqirab turardi... Qubbasimon

lojuvard shifti sof qizil tilla bilan ziynatlangan bu xonada eng muhim mashvaratlar o'tar, davlat ahamiyatiga molik masalalar hal qilinardi. Ertaga bo'ladigan allomalar anjumani ham shu yerda o'tmog'i lozim.

Sulton yuragi allanechuk bo'lib, ichkariga kirdi. Jimjit. Tiq etgan tovush yo'q. Ana, to'rt tomondagi mehrobsimon joylarda zabt etilgan yurtlarning ko'k, sariq, oq tug'lari turipti! Mag'lub tug'lar! Mag'lub lashkarboshilarning oltin va kumush dubulg'alari, tillodan jilo berilgan sovut va qalqonlari osib qo'yilgan. Ularning yonida bandlariga la'l va zabarjad qadalgan egri qilichlar, o'q terilgan charm sadoqlar, suyak sopli xanjarlar, uzun-qisqa tig'lar... Bu qurollar, bu sovg'alarining har biri bir doston! Uning, sulton Mahmud G'aznaviyning behisob yurishlari, suronli safarlaridan hikoya qiluvchi bebaho dostonlar... Sulton bu o'ljalarning qaysi birini qo'lga olsa lop etib o'sha muzaffar jang ko'z oldiga keladi, zabun bo'lgan ne-ne lashkarboshilar, man-man degan amirlar, kalondimog' hokimlar, hatto, shahanshohlar esiga tushadi. Butkul ro'yi zamindan, hatto, Chin va Rumdan kelgan elchilar bu bebaho o'lja, rang-barang tovlangan bu mag'lub tug'larni ko'rganda damlari ichiga tushib ketadi. Mana, sof tilladan yasalib, xoshiyalariga yoqut, la'l va javohir qadalgan ulkan qalqon. Uning yonida nozik oltin halqalardan yasalgan katta sovut... Kashmir poshshosidan olingan sovg'a!.. Esida bor: haramida mingdan ortiq kanizi bo'lgan bu alp qomat, kalondimog' shoh maydonga quturgan jangovar fil minib chiqqan edi. U esa quturgan fildan tap tortmay, qora qashqa arg'umog'ini

o'ynatib, maydonga mardonavor kirib borgandi. Na quturgan filning mudhish na'rasi qulog'iga kirgan, na vahimali vajohati ko'ziga ko'ringan edi o'shanda! Sulton, qo'rquvdan osmonga sapchigan qora arg'umog'ini achchiq qamchilaganicha, jangovar fil ustiga bostirib borgan, borgan-u oyoqlarini uzangiga tirab, bir zarb bilan kalondimog' shohni fil yelkasidan uchirib yuborgandi o'shanda!

Ha, sulton Mahmud shunday mard, shunday tanti edi! U hech qachon pistirmada turib jang qilmagan, eng shafqatsiz qirg'inlarda ham o'zini lashkar panasiga olmagan! U mashriqdan mag'ribga cho'zilgan bu hududsiz saltanatini o'z salohiyati, kuch-qudrati va sher yuragi bilan orttirgan... Hayhot! Bu cheksiz davlat, bu shonshuhurat, bu hisobsiz xazina, «amir al-mo'minin» degan bu ulug' martabalardan ne foydaki, agar qarigan chog'ida bu ayanchli ahvolga tushib qolsa? Dardiga davo topolmay, kechalari to'lg'anib chiqsa? Uning, amir al-musliminning harom tukiga arzimaydigan Ibn Sino atalmish bir tabibni yo'qlasa-yu, uch oydan beri ikki ko'zi to'rt, uning yo'lga tikilib yotsa? Uning saxovati va tuznamagi bilan odam bo'lgan muqarriblari esa boshiga mushkul tushgan bu og'ir onlarda ahvoling ne deb so'ramasa? Bil'aks, pana-panada ig'vo va fisq-u fasod bilan band bo'lsa!..

Sulton, to'satdan ko'z oldi qorong'ilashib, qo'lidagi arg'uvoniy asoni qulochkashlab osmonga otdi. Fil suyagidan jilo berilgan og'ir aso oltin taxt tepasidan uchib o'tib, to'rdagi qurol-aslahalar ustiga borib tushdi. Joyidan ko'chgan sovut va qalqonlar bir-biriga tegib, o'rdaday keng mashvaratxonani daranglatib yubordi. Qo'ng'iroqdan

tiniq bu musaffo ovoz mashvaratxonaning qub-basimol lojuvard shiftida aks sado berib, uzoq yangradi-yu, asta tindi. Tingan zahoti yo'lakning ikki yonidagi behisob eshiklar sharaq-shuruq qilib ochildi, yo'lakda vahimali shivir-shivirlar-u tap-tap oyoq tovushlari eshitildi. So'ng, rangi quv o'chgan, qizil banoras to'ni ostidan oppoq lozimlari ko'rinib turgan, xushqad, xushsurat vazir Abul Hasanak ko'rindi, uning ketidan bosh vazir Ali G'aribning qip-qizil yumaloq yuzi bir zum ko'zga chalindi-da, yana g'oyib bo'ldi.

Abul Hasanak poygakka tiz cho'kib, yer o'pdi.

– Oftobi olam!..

– Oftobi olam!.. – dedi sulton, negadir lablari ayanchli titrab. – Ajalimdan besh kun burun menga kafan bichib, ig'vo yo'lga o'tdingmi, battol?

– Valine'mat!

– O'tmagan bo'lsang... qayga gumdon bo'lding? Ul meshqorin Ali G'arib qayda? Nechun inongan mushriflarimdan hanuz darak yo'q? Qachon keladi ul betavfiq Ibn Sino?

– Keladur, pushti panoh!.. Yaqin kunlarda yetib kelmog'i darkor!

– Shu hafta yetib kelmasa... dorga tortamen! Barchangni dorga tortamen. Tuzimni ichib, tuzlig'imga tupurgan nobakorlar! Uqdingmi, mur-tad? Shu hafta!..

– Uqdim, poshshoyi olam!

– Uqsang, chaqir allomalarni! Mashvaratga chaqir darhol!

## TO‘RTINCHI BOB

Beruniy ustiga yangi ko‘k baxmal to‘n kiyib, boshiga uchli olacha taqiya ustidan simobiy sal-lasini o‘rab, shogirdi yordamida otga minganida oftob endi chiqqan edi. Kechasi shivalab o‘tgan yomg‘irdan keyin havo musaffo, ariq bo‘ylaridagi giyohlar, paxsa devor va, hatto, uylarning tomlarini qoplagan maysalar yuvib qo‘yilganday yam-yashil, tiniq.

Tundagi isitma pasaygan bo‘lsa ham, Beruniy o‘zini hamon noxush sezardi. U ko‘kragini to‘ldirib-to‘ldirib nafas oldi-da, otini asta yo‘rttirib, shaharni ikkiga bo‘lgan Afshon soy sohiliga chiqib oldi. Soyning o‘ng yuzidagi keng sayhonlikni be-qiyos, behudud Bog‘i Firuza egallagan. Tungi yomg‘irdan so‘ng bog‘ ham allaqanday yashnab ketgan, har joy-har joyda to‘p-to‘p bo‘lib gullagan bodom va shaftolilar endigina kurtak chiqara boshlagan o‘rik, olma, nok va behilar orasida xuddi oq, qizil, nimpushti liboslar yopingan go‘zal malaklarni eslatadi. Hududsiz bog‘ning mashriq tomonida oppoq marmar qasr osmonga bo‘y cho‘zgan. Nimasi bilandir ulkan oq qushga o‘xshab ketadigan bu ko‘rkam qasrning nomi o‘ziga monand – Osmon malikasi! Osmon malikasining quyirog‘ida Ko‘shki davlat saroyining tillakori gumbazlari yarqiraydi, undan nariroqda esa lashkar devoni va boshqa ma‘muriy binolar saf tortgan, lekin ular Bog‘i Firuzadan quyida, soyning u yuzida.

Bu yerdan, sohil bo‘yidan pastdagi shahar kaft-day ko‘rinadi. Soy bo‘yini bora-borguncha yam-yashil tutash bog‘lar egallagan. Bu bog‘lar ichida



oq, qizg'ish, nafis havorang marmardan qurilgan ko'rkam binolar, ko'shklar, kichik-kichik saroylar ko'zga chalinadi. Bu yerda amirlar, lashkar-boshilar, devon beklari, boy tijorat ahli istiqomat qiladi. Undan yiroqroqda karvonsaroylar, bozorlar, timli rastalar, hammom gumbazlari ko'rinadi, ulardan avloroqda esa bir-biriga tutashib ketgan kulba va kulbachalar ko'zga chalinardi. Qandaydir betartib qurilgan bu kulbayi vayronalar, do'kon va do'konchalar Beruniy kelayotgan daryo sohilidan, xuddi «gardkam» deb sochib yuborilgan oshiq'larga o'xshaydi.

Uzoq-uzoqlarga cho'zilib ketgan bu beqiyos shaharning hamma daha, hamma burchaklarida behisob masjidlar qad ko'targan, ularning rang-barang koshinlar bilan bezatilgan yuksak gumbazlari, tillakori peshtoqlari oftobda ajib tovlanib, tog'lar bilan qurshalgan G'aznayi munavvaraga o'zgacha bir zeb berib turibdi.

Oldinda ikki qirg'oqni tutashtirgan ulkan ko'prik ko'rindi. Ko'prik ro'parasida uzundan-uzoq otxona binosi bo'lib, bino oldida hammasi birday qizil chakmon va qizil etik kiygan yosh g'ulomlar saf tortgan, ular har tomondan oqib kelayotgan amirlar, a'yon va boyonlarni otdan tushirib, tavoz bilan xizmat qilishmoqda.

Beruniy ko'prikka yaqinlashib qolganida, o'ng qo'ldagi bog' ko'chadan xachir qo'shilgan ikki g'ildirakli bir arava chiqdi. Aravada eski kulohini boshiga bostirib kiygan bir kimsa sekin xirgoyi qilib kelardi. Ajabo: bu kulohli darvesh u yoqda tursin, uncha-muncha asilzodalar ham yurolmaydigan bu joylarda pachaq arava nechuk adashib yuripti?

– E, e! – Beruniy arava egasini tanib, otining jilovini tortdi. – E-ha, Gʻazna faqirlarining sultoni Malik ul-sharob hazratlari! Qaysi shamol uchirdi, janoblarini?

Malik ul-sharob aravasini toʻxtatdi, rangini bilib boʻlmaydigan patak soqolini silab, gʻalati ishshaydi:

– Oʻzlaridan soʻrasak, azizim? Faqir kulbimizga nechun qadam ranjida qilmay qoʻydilar desak, eski qadrdonni tark etib, yangisini topibdilar-da, mavlonayi zamon! – u koʻzini qisib, saroy tomonga ishora qildi. – Yangi doʻst – sulton Mahmud muborak boʻlsin, mavlono!

Beruniy beixtiyor kulib yubordi.

– Malik ul-sharob atalmish sizday gʻariblar sultonini unutilib boʻlurmu? Gulgun sharbatxonangizga tashrif buyurmagan boʻlsak, sababi xastalik, azizim!

– Xasta boʻlsalar... davosi bir qultum may!

– Ofarin! Jannatiy sharobingdan jon-jon deb bir piyola sipqarar edim, ammo ne chora, hozir saroyda mashvarat boshlanur!

Malik ul-sharob, boshidagi eski kulohini bir tomonga qiyshaytirib, kallasini maʼyus likillatdi. – O, mavlono-mavlono! Nahotki, shu aql-u zakovatning bilan shohlar va sherlardan yiroq yurmoq lozimligini bilmasang?

– Ne chora?

– Ofarin! Bor, yoʻlingdan qolma, azizim, shoyad shoir Unsuriy kabi ulugʻ martabalarga musharraf boʻlsang!

Malik ul-sharob xachiriga qamchi urdi-yu, negadir yana toʻxtadi.

– Hah, esim qursin, senga aytadurg'on bir yangilik bor, mavlono!.. Kecha oqshom kulbayi vayronamga ajib bir musofir alloma tashrif buyurdilarki, ko'rsang boshing osmonga yetadi!

– Ajabo! Kim ekan ul alloma!

– Bu yog'i shunday sir-asrorkim, uni o'zimga aytishdan ham qo'rqamen! – Malik ul-sharob shunday dedi-da, xachirini qamchilab uzoqlashib ketdi.

«Sirli alloma? Uni aytishdan qo'rqamen? Yopiray. Bu darvish ne deydi? Bu so'zi rostmi yo uning ko'ngliga g'uluv solish uchun aytdimi?»

Odamlar hamon ko'prik tomon daryoday oqib borardi. Beruniy ko'prik oldida egardan tushib, otining jilovini hozir-u nozir turgan yosh g'ulomga tutqazdi. Ko'prikdan to Bog'i Firuzning darvozasigacha, hatto, bog' ichidagi Osmon malikasi qasrining marmar zinalarigacha qirmizrang ipak gilamlar to'shalgan edi.

Beruniy xiyobonning ikki yonida qilich yalang'ochlab g'oz turgan navkarlar orasidan o'tib, saroyga kirib borganida anjuman hali boshlanmagan, biroq o'rdaday keng, sutday oppoq mashvaratxonada odam tirband edi.

To'rda, naqshli suyanchiqlariga dur va javohirlar qadalgan oltin taxtning o'ng tomonida vaziri a'zam Ali G'arib boshliq saroy a'yonlari va devon beklari, chap tomonda amirlar va sarkardalar saf tortgan, devon beklarining oppoq simobiy sallalariga tig'simon tilla nishonlar qistirilgan, kimxob va movut to'nli amirlarning qunduz telpek va suvsar bo'rklariga uch qirrali oltin jig'alar qadalgan, bellaridagi serbar kamarlariga kumush g'ilofli egri qilichlar taqilgan. Ularning kumush tepki taqilgan ko'k va qizil charm etiklari

yurganda jarang-jurung ovoz chiqaradi. Taxt yonidagi vazir-u vuzaro va devon bekларidan quyiroqda Unsuriy boshliq bir guruh shoirlar ko'rinar, ulardan nariroqda esa boshiga chambarak qora qalpoqcha kiygan, iyagida to'rttagina tuk o'sgan Chin hakimi o'z tilmochiga allanimalarni bidir-bidir qilar, uning yonida sariq ipak ko'ylak va keng sariq shalvar kiygan hind tabibi kamtarona qo'l qovushtirib turardi. Chap qo'ldagi kalondimog' amir va sarkardalar bilan bir qator-da boshlariga surmarang salla o'ragan bir guruh din peshvolari saf tortgan, ulardan quyiroqda esa uch-to'rtgagina tanish allomalar ko'rinar, ularning ichida keksa mumajjim mavlono Farruxiy bilan yosh tarixchi Abulfazl Bayhakiy ham bor edi. Hammaning ko'zi to'rda, oltin taxtning ortidagi fil suyagidan jilo berilib, nozik tilla tasmalar qoqilgan ikki tavaqali o'ymakor eshikda... Yig'ilgan raiyat pichirlab gaplashar, hammaning chehrasida qandaydir tahlika va taraddud muhrlangan, go'yo hozir yomon, mudhish voqea sodir bo'lg'usi edi.

Beruniy horg'in odimlab allomalar yoniga o'tdi, ular bilan ko'risharkan, bosh devon sohibi Abu Nasr Mishkon janoblarini ko'rib qoldi. Soch-soqoli oppoq, mittigina, lekin zuvalasi pishiq Abu Nasr Mishkon janoblari ham uni ko'rib, yaqinroq keldi.

– Tag'in bezgak xuruj qildimi? Bay-bay-bay!

Beruniy bosh devon sohibi bilan ko'risharkan, nariroqda, bir guruh nazm ahli qurshovida turgan shoir Unsuriyning unga qarab qandaydir sirli jilmayib qo'ygani payqab qoldi. Unsuriy yon-veriga allanechuk viqor bilan boqar, boshqalarning yuzida tahlika va hadik alomati muhrlangan bo'lsa, uning naqsh olmaday qip-qi-

zil yuzida vaziyatga nomunosib bir mamnunlik barq urardi. Shoir eng katta mashvaratlarda ki-yadigan zarbof to'nini kiyib, surmarang sallasi-ga amir al-mo'minning bo'lakcha lutfi ehsonini bildiruvchi tilla nishonni qadab olgan, qo'lida esa zar qog'ozga o'ralgan yostiqlay kitob.

«Bu tilyog'lamachi nechun xushnud? Nechun og'zi qulog'ida?» – dedi Beruniy ichida, biroq shu payt, to'rdagi ikki tavaqali og'ir o'ymakor eshik asta g'ichirlab ochildi-yu, hamma boshlar bab-baravar o'sha tomonga o'girildi. Bo'sag'ada... egnidagi ko'k movut to'n ustidan qo'sh tasma osib, sallasi-ga nayzasimon oltin nishon qadalgan saroybon ko'rindi. U eshikda qilich yalang'ochlab turgan ikki sarboz yonidan o'tib, taxt oldiga kel-di-da, qo'lidagi oltin shaqildog'ini shaqillatdi:

– Barcha ahli mo'minning piri buzrukvori, sal-tanatimizning shoni shuhrati, toj-u taxtimizning baxti saodati, fotihi muzaffar, amir al-muslimin sulton Mahmud ibn Sabuqtegin G'aznaviy hazrat oliylari!..

Oq marmar mashvaratxonaning qubbasimon shiftlari aks sado berib, g'alati yangrab ketdi: «Sulton... G'aznaviy hazrat oliylari...»

Mashvaratxonani to'ldirgan oq, ko'k, surma-rang sallalar, qunduz va suvsar telpaklar egilib yerga tegdi. Shu payt... bir yonida qop-qora so-qol-mo'ylovi o'ziga yarashgan, xushqad, xushsu-rat Abul Hasanak, bir yonida piri murshid, Qozi imom Sayid hazratlari, sulton Mahmud G'aznaviy paydo bo'ldi.

Hamma bilan barobar egilib ta'zim qilgan Be-runiy eshik tomon o'g'rincha ko'z tashladi, tash-ladi-yu, beixtiyor seskanib ketdi. Imom Sayid

bilan Abul Hasanak o'rtasidagi sulton... Azaldan juda bo'ydor, qora, qotmadan kelgan sulton, go'yo burungidan ham cho'zilgan, go'yo yana sal cho'zilsa, tojdor boshi shiftga tegardi, keng yuzi xuddi sariq charmdan yasalgan niqobga o'xshar, faqat ko'zlari... mung to'la qisiq ko'zlari allaqanday charaqlab turardi. Biroq, ajabo: yig'ilgan izdihomni ko'rishi bilan sariq mumdan yasalgan bu haykal nechundir bir g'ijindi-yu, shitob bilan yurib taxt oldiga o'tdi, u yerda bir zum to'xtab, egilgan boshlarga, behisob qabrlarday do'ppayib turgan a'yon-u boyonlarning do'ng yelkalariga qadalib qaradi, so'ng og'ir odimlab, taxtga chiqdi.

Taxtning o'ng tomonidagi tillakori kursiga imom Sayid hazratlari o'tirdi, chap tomondagi xuddi shunday kursiga sobiq suyukli nadim, endilikda erkatoy vazir Abul Hasanak o'tirishi lozim edi. Abul Hasanak o'tirmadi. Ellikdan oshgan bo'lsa ham, hanuz yosh ko'ringan xushqad, xushsurat Abul Hasanak, go'yo raqs tushayotganday, qilpillaganicha oldinga o'tib, yig'ilgan raiyatga qarata va'z aytdi. Uning ovozi xuddi sayroqi qushning ovoziday yoqimli, suvday tiniq, baxmalday mayin edi. U Parvardigori olamdan amir al-mo'mininga sihat-salomatlik, saltanatga shon-u shavkat, toj-u taxtga baxt-u saodat tilab, va'zini davom ettirmoqchi edi, to'satdan taxtda mung'ayib o'tirgan sulton vazirning so'zini kesib:

– Ul malikul kalom Unsuriy qayda? – deb so'radi. Uning ovozi bo'g'iq, horg'in, biroq allaqanday pinhoniylahdidga to'la edi.

– Faqir oftobi olamning xizmatlariga muntazir-men! – shoir Unsuriy, yer supurgan zarbof to'ning etagiga o'ralashib borib taxt oldida tizza bukdi.

Sultonning siyrak mo'ylovli yupqa lablariga bilinar-bilinmas kulgu yugurdi, tahdidli ovozi xiyol yumshadi.

– Biz saltanatimiz shon-shuhratini madh etgunchi o'z shuaromizdan minnatdormiz! Mashvarat ahliga ayon bo'lsin! Mana, nodir salohiyat sohibi, nazm bo'stonining bog'boni, janob Unsuriy bizga izhori ixlos etmoq istagida tun-u kun kitob ko'rib, shunday bir jannatiy ne'matdan darak topmishkim, ul ne'mati ilohiyini tanovul qilgan osiy banda hamma dardlarga davo topg'usidir! Bu so'z haqiqatmi, malikul kalom?

– Filhaqiqat, davlatpanoh!

– Oltin! Og'ziga siqquncha oltin oshatilsin!

Darhol to'rdagi eshik ochilib, oltin dinor to'la barkash ko'targan tanish saroybon ko'rindi. Unsuriy hayajondan ko'zlari chaqnab yon-veriga qaradi.

– Ol, nazm bo'stonining bog'boni, to'yguningcha osha! Sening xizmatining haloldur!..

Unsuriy, go'yo oldida tilla emas, eng lazzatli taom turganday tamshanib, og'zini katta ochdi-da, barkashdagi oltin dinorlarni oshashga kirishdi. Mashvaratxonani to'ldirgan izdihom «gur» etib bir tebranib oldi.

Beruniy bunday marosimlarni, sultonning lutfi karamiga sazovor bo'lgan kishilarga oltin oshatish marosimlarini avval ham ko'rgan, hatto, oltinga tiqilib, o'lar holatga tushganlarning ayanchli ahvollariga shohid ham bo'lgan. Ammo hozirgi manzara... Yo, tavba! Shoir Unsuriy, o'ymoqdekkina og'zini katta ochib, anjirday-anjirday yum-yumaloq tilla dinorlarni xuddi eng lazzatli taomni oshayotgan och gadoday oshardi. Uning yuzlari bo'g'riqib, lunjlari pufakday shishib

ketdi, barkashga tikilgan ko'zlaridan tirqirab yosh oqa boshladi, biroq og'zi oltinga to'lsa ham, hamon oshashdan to'xtamas edi. Mashvaratxonaga yig'ilgan izdihom ham negadir Unsuriyga qo'shilib tamshanar, lablarini yalar, hamma ko'zlarda hasad uchquni chaqnar edi...

Ana, barkashdagi oltin yarimlab qoldi. Lekin shu payt nazm bo'stonining bog'boniga nimadir bo'ldi. U lablari bilan yana bir oltinni himarib, og'ziga olmoqchi bo'ldi-yu, ko'zlari kosasidan chiqquday olayib... qattiq o'qchidi. O'qchiganda bir nechta dinor og'zidan otilib chiqdi-da, darang-durung qilib yumalab ketdi.

– Ofarin, malikul kamol! Oltin qusgan shoirning qusug'i ham o'ziga doru! Terib ol oltinlarni!

Sulton gilam ustida emaklab yurgan Unsuriydan yuz o'girib o'rnidan dast turdi. Turishi bilan Beruniyning esiga yana ichini qurt yeb, qurib qolgan bahaybat terak tushdi. Biroq bu terakning vajohatidan qo'rqulik, unda kishini zir titratguvchi pinhoni bir kuch bor edi!

– Biz saltanatimiz shavkatiga shavkat, dovrug'iga dovrug' qo'shgan, muzaffar yurishlarimiz madhini olamga taratgan o'z shoirimizdan mamnun va minnatdormiz... Malikul kalom Unsuriy!

– Labbay, valine'mat.

– Agar yanglishmasam, siz aytgan ne'mati ilohiy mashriq mamlakatlarining biridadur?

– Shunday, davlatpanoh! Ehtimolkim, Chin yoxud Hind mamlakatining mashriq tomonida, ummonlar qa'ridagi orollardan biridadur. Bu risolayi muborakda shunday deyilgan! Ne chorakim, biz nazm ahli ilm hikmatdan yiroqdurmiz. Shoyad, mashvaratga yig'ilmiş allomalar-u



ulamoyi zabardastlar aniq joyini aytib bersalar, davlatpanoh!

Taxtning chap tomonida qo'l qovushtirib turgan yum-yumaloq vaziri a'zam Ali G'arib pildirab oldinga chiqdi:

– Chin hakimidan so'ramoq darkor, pushti panoh! – dedi u, tavoze bilan bosh egib. – Yana bir marotaba so'ramoq darkor!

Sulton bu so'zdan afti burishsa ham:

– Chin-mochin! – deb chaqirdi. – Tilmochlar qayda?

Chin hakimi qora chambarak qalpoqcha qo'ndirilgan mushtdekkina boshini likillatib, avval, sultonga, keyin barcha mashvarat ahliga ta'zim qildi-da, shirin iljayib, bir nimalar dedi. Tilmoch darhol tarjima qildi. U yana ilgarigi gapini ta'kidladi, ya'niki shoir Unsuriy aytgan jannatiy daraxtni Chin hakimlari ham eshitgan. Ammo, nadomatlar bo'lg'aykim, bu savolga aniq bir so'z aytishga ojizlik qiladilar.

Chin hakimidan keyin navbat yana hind tabibiga keldi. Biroq u ham eski javobini takrorlab, qandaydir rivoyatlardan so'z ochgan edi, sulton to'satdan betoqat qo'l siltab:

– Bas! – deb xitob qildi. – Tag'in mujmal javob! Tag'in safsata! Anig'ini aytadurg'on kim bor?

Beqiyos mashvaratxonaning yuksak qubbasi-mon shifti yana aks sado berib yangradi: «Anig'ini aytadurg'on kim bor? Anig'ini!»

Beruniyning nazarida, mashavaratxonani yangratib yuborgan bu aks sado sultonga qandaydir kuch va ilhom bag'ishladi. Mung to'la qiyg'os ko'zlari qahr bilan charaqlab:

– Hazar, alhazar! – deb xitob qildi. – Bu ne shua-ro, ne allomayi davron, ne ilmi urfonkim<sup>1</sup>, qirq yil tuzimni ichib, jo'n bir jumboqni yechib berolmasa. Nahot, menim saltanatimda bu sir-asrorni yechadurg'on bir donishmand bo'lmasa?.. Abu Rayhon Beruniy qayda? – to'satdan so'radi u. Lojuvard gumbaz uchinchi bor tantanali va tahdidli aks sado berdi: «Abu Rayhon Beruniy qayda?»

Qayta ko'tarila boshlagan haroratdan karaxt bo'lib turgan Beruniy bir sapchib tushdi-yu, tavoze bilan bosh egdi.

– Xizimatingizga hozirmen, davlatpanoh!

– Hozir bo'lsang, nechun sukut saqlaysen? Kim seni o'n yil Hindiston yurtida umri o'tgan allomayi vohid deydi? Hujrangda kalamushday yashirilib, yostiqday-yostiqday kitob bitasen. Va lekin, bizga lozim bo'lgan sir-asrorni yechmoqqa aqling yetmaydi?

Beruniy yuragining gurs-gurs urishiga quloq solib:

– Oftobi olam!.. – dedi sekin. – Faqir... shoir Unsuriyga bir savolim bor...

– Shoir emas, malikul kalom!

– Malikul kalom janoblari ul ne'mati ilohiy to'g'risidagi so'zni qaysi kitobda o'qiganlar?

Unsuriy, qandaydir besaranjom pitirlab, yon-veriga qaradi.

– Barcha parranda-yu darranda tilini bilgan... ul Sulaymon payg'ambar alayhissalom, – Alloh uning pokiza ruhini shod etgay! – Ul tabarruk zot haqida bitilgan ushbu muborak kitobda zikr etilgandur bu daraxt! – dedi shoir va og'ir hansirab qo'ynidagi kitobini boshi uzra ko'tardi.

<sup>1</sup> Ilmi urfon – ilm ahli. Olimlar.

– Ijzat etsalar, bu tabarruk kitobni kamina ham o'qib ko'rsam!

Unsuriy, lo'ppi yuzida zo'r hayajon, bir yonidagi sheriklariga, bir qovog'ini uyib turgan sultonga qaradi.

– Ber, o'qib ko'rsin!

Beruniy, mashvaratxonaga cho'kkan chuqur sukut ichida, qo'lma-qo'l o'tib kelgan charm jildli og'ir kitobni olib ochdi. Butun raiyat, mashvaratxonaga yig'ilgan barcha a'yon-u boyonlar, amir-u umaro, devon beklari, din peshvolari-yu, ilm ahli, hatto, allaqanday mung'ayib qolgan sultonning o'zi, ham unga qadalib qolgan edi. Mashvaratxonajim, faqat qo'l qovushtirib turgan odamlarning hansirab nafas olishlari eshitaladi, xolos.

...Yo'q, Beruniy yanglishmagan, bu o'sha, kecha Xatlibegim kelganidayoq esiga tushgan ko'hna rivoyatning o'zginasi! O'z poshshosiga yaxshilik qilish niyatida unga mo'jiza nihol in'om etib, boshidan judo bo'lgan to'tiqush to'g'risidagi ibratli cho'pchakning o'zginasi!

Yo, tavba! Sul-ton-ku, cho'kayotgan cho'pga tarmashar degandek, sababi bedavo dard, bu qadim ertakka inonsa inongandur! Ammo... nazm ahlining sultoni atalmish bu shoir, bu vazir-u vuzaro, bu amirul umaro!.. Nahot, bular ham bu cho'pchakka inonsalar? Yo, bular aqldan ozgan, yo... sababi bezgak, uning o'zi aqli hushidan ayrilgan!

– Nechun og'zingga talqon solding? So'zla, Abu Rayhon!.. «So'zla, Abu Rayhon!»

Beruniy yuksak shiftda yangragan aks sadodan seskanib ketdi-yu:

– Hayhot! – deb yuborganini o‘zi ham bilmay qoldi. – Yo‘q, bu allomalar bitgan kitob emas, davlatpanoh, cho‘pchak bu! Cho‘pchak!

...Mashvaratxonani to‘ldirgan olomon birdan harakatga kelib, «gurr» etdi-yu, darhol jim bo‘ldi. Bu mudhish jimlikdan sultonning allaqanday ayanchli, titroq ovozi eshitildi:

– Cho‘pchak?

Beruniy birdan bo‘shashib, devorga suyandi.

– Bir qoshiq qonimdan kechgaysiz, oftobi olam! Va lekin, taassuflar bo‘lsinkim, chindan ham eski cho‘pchak bu!..

U so‘zini tugatmasdanoq shoir Unsuriy, zarbof to‘ninging etaklariga o‘ralashib, qoqilib-surilgani-cha taxt ro‘parasiga borib yuztuban yiqildi.

– Oftobi olam! Bu nobakor Abu Rayhon... payg‘ambar alayhissalom... Sulaymon payg‘ambar so‘zini cho‘pchak deb yolg‘onga chiqardi! In-chunin, shakkoklik qildi bu gumroh!

– Gumroh! – dedi sulton, allaqanday cheksiz bir alam bilan. – Hammang gumroh, hammang nobakor! Qirq yil tuzimni ichib, tuzlig‘imga turgan nonko‘rlar! Boshimga musibat tushganida najot topa olmagan aqli ko‘toh allomalar! O, o‘lmagan holim mening!.. Vaziri a‘zam!..

Taxt oldida haykalday qotib turgan Ali G‘arib, xuddi birov oyoqlariga bolta urganday, mukkasidan tushib, yer o‘pdi.

– Anov betavfiq... hazrat Ibn Sino qayda?

– Davlatpanoh! Inshoollo, Xudovandi karim o‘z inoyatini darig‘ tutmas! Ul najot farishtasi Ibn Sino yo‘lga chiqmish!

– Yo‘lga chiqmish! – sulton bir yulqinishda belidagi oltin bandli egri qilichini qinidan sug‘urib

oldi. – Qayda yurmish ul hakimi mutakabbir? Qayda? Yo, darhol topasen uni, yo hammangni chopamen! Hammangni!

U yog'i nima bo'ldi – Beruniy yaxshi anglamay qoldi. Mashvaratxonani to'ldirgan izdihom birdan harakatga keldi-yu, bir-birini bosib, yanchib, ko'chaga qarab yopirildi... Bir zumda hamma yoq ostin-ustin bo'lib ketdi, kimdir yiqilgan edi, bir necha odam unga qoqilib o'mbaloq oshdi... Zum o'tmay mashvaratxonada faqat ikki odam qoldi – biri qilich yalang'ochlaganicha hamon taxtda tebranib turgan sulton, biri ko'z oldi qorong'ilashib, devorga suyanib qolgan Beruniy edi!..

## BESHINCHI BOB

«Bugun, to'rt yuz yigirma birinchi yil hijriy, rabbiul avval oyining uchinchi kuni<sup>1</sup> namozshom oldida shayxning ulkan chorxari xonasiga qirq nafar husnixat xattot yig'ildi.

Shayx<sup>2</sup> xattotlarni «Ash-Shifo» kitobining nabotot faslini ko'chirish maqsadida lutfan taklif qilgan edi, biroq namozi asrda banogoh Hamadon hokimi Alouddavla hazratlaridan qo'sh chopar kelib, shayxni saroyga olib ketdilar.

Shayx otga mina turib, saroydan qaytguncha majlis ahlini mehmon qilib turishni kaminaga topshirdi. Kamina dasturxon yozib, ularni mehmon qildim, so'ngra qog'oz-qalamlarni shaylab, shayxni kutdik.

---

<sup>1</sup> 1030-yil fevral oyining oxiriga to'g'ri keladi.

<sup>2</sup> Ibn Sinoni shayx ur-raisi, ya'ni allomalar raisi, deb ataganlar.

Shayx, odatda, to'rd a o'tirib, o'ylagan asarini o'zi yoddan aytib turar, husnixat xattotlar esa so'zma-so'z yozib borar, shu yo'sin, bir kechada o'ttiz-qirq nusxa matn tayyor bo'lardi.

Shayx «Al-Qonun»ni yozib tugatgandan keyin ham shunday qilgan, Isfahonda husnixat xattot borki, hammasini yig'ib, o'zi aytib turgan, xattotlar esa so'zma-so'z yozib borgan edi. So'ngra har bir xattot o'z yoniga yana yigirma-o'ttiz nafar tolibi ilmlardan yig'ib shayxdan yozib olgan matn ni o'qib berar, tolibi ilmlar esa buni yozib olar va shu yo'sin bir yo'la bir necha yuz nusxa kitob tayyor bo'lardi. «Al-Qonun»ning el orasida tez tarqab, tez shuhrat topganining boisi ham shundadir.

Shayx saroydan xuftondan keyin qaytdi. Ustod qattiq hayajonda edi. Xattotlar yig'ilgan xonaga kirib, majlis ahlidan uzr so'radi-da, xattotlarga ijozat berdi. Biz yolg'iz qoldik. Shayx darhol kiyim-kechak va uch-to'rt kunlik oziq-ovqat g'am-lashimni iltimos qildi. Ma'lum bo'lishicha, G'azna hokimi sulton Mahmud G'aznaviydan Hamadonga elchi kelibdi. Elchi shayxn i yerning tagidan bo'lsa ham topib, darhol G'aznada hozir-u nozir qilish to'g'risida sultondan farmon keltiribdi. Bu amr-u farmonni o'qib, kapalagi uchgan Alouddavla a'lo hazratlari shayx bilan pinhona uchrashib, uning o'ziga maslahat solibdi. Shayx G'aznaga borishdan qat'iy bosh tortibdi. Ittifoqo, elchi ketguncha shayxning biror joyga yashirini b turishini ma'qul topibdurlar.

Biz ustimizga eski chakmon, boshimizga eski kuloh kiyib, xurjunlarni ko'tarib, tun yarmida uyd an chiqdik.

Shayx qattiq iztirobda edi. Bundan besh-olti oy muqaddam, amir Mas'ud Isfahonni zabt etganda shayx undan qochib, Hamadonga kelgan edi. Bundan bir oy muqaddam esa shayxning Isfahondagi hovlisiga o't tushgani to'g'risida ko'ngilsiz xabar kelgandi. Aytishlaricha, yong'in chog'ida shayxning nodir kutubxonasi yonib ketgan. Inisi Abu Mahmud esa tirikmi, yo'qmi, bu yog'i ham hanuz qorong'i. Shayx butun topgan dunyosini shu kutubxonaga sarf qilgan, unda ustodning ko'p qo'lyozmalari, «Al-Qonun», «Ash-Shifo» kabi kitoblarining eng xushxat xattotlarga ko'chirtirilgan noyob nusxalari saqlanur edi. Ishqilib, ular ham boshqa kitoblar bilan birga yonib ketmagan bo'lsin!

So'nggi yillarda shayx Isfahonda insof va adolat haqida, odil va noodil shohlar to'g'risida «Kitob al-Insof» degan bir asar yozishga kirishgan edi. Isfahondan sovuq xabar kelganda shayx bir inisini o'ylab kuyunsa, bir kutubxonasi va shu kitobini o'ylab ezildi, sababi – bu asarning qo'lyozmasi chala qolgan edi. Endi esa Isfahondan qochgan odam, Hamadonda ham hammadan yashirinib, pinhona kun kechirishdan boshqa chora qolmadi. Yo, tavba! Keksaygan chog'ida bu ne ko'rgulik! Ustodning mutolaa va mushohadadan boshqa niyati yo'q. Sho'rlik shayx qachon bu niyatga yetadi? Qachon osoyishta kun kechiradi?»

*(Abu Ubayd al-Juzjoniyl xotiralaridan.)<sup>1</sup>*

---

<sup>1</sup> Ustoz Ibn Sinoning sodiq shogirdi, ajoyib inson Abu Ubayd al-Juzjoniyl xotiralarini biz uchun bebaho bir merosdir. Lekin, afsuski, bu bebaho xotiralar hanuzgacha to'laligicha topilgani yo'q.

## OLTINCHI BOB

Bosh vazir Ali G'arib saroydan ko'ngli g'ash bo'lib qaytdi. Tunov kungi mash'um mashvaratdan keyin sultonning ahvoli yana ham og'irlashdi, injiqlashdi, na og'zidan tuzuk bir gap chiqadi, na unga gap uqtirib bo'ladi. O'shandan beri sulton faqat bir narsa bilan qiziqadi, u ham bo'lsa hakimi davron Ibn Sino! Hazrat Ibn Sinodan darak bormi, yo'qmi – bir kunda o'n marotaba so'rab-surishtiradi, bosh vazir bilan Abul Hasanak esa ming xil yolg'on-yashiq gaplar bilan kunni kech qilishadi, biroq ertangi kunni o'ylasalar, yurak o'ynog'i tutib, tong otguncha to'lg'anib chiqishadi.

Shu boisdan Ali G'arib go'zallikda benazir, lekin shu kunlarda uning ko'ziga jahannam bo'lib ko'ringan Osmon malikasi saroyidan qaytgach, «besh kunlik dunyo», deb bor vujudi bilan aysh-ishratga sho'ng'iydi.

Vaziri a'zamning bog'i Firuza bog'i bilan, saroyi Osmon malikasi saroyi bilan raqobat qila olmasa ham, o'ziga yarasha fayzi bor. Shu kunlarda bog'da shaftoli va chillaki o'riklar qiyg'os gullagan, mayin qizil qum sepilgan xiyobonlar chetidagi xushqad sarvlar nafis mitti yaproqchalar bilan burkangan, ariq bo'ylaridagi majnuntollar esa nozik sochpopuklar yozib, go'yo suv bo'yida soch tarab o'tirgan sanamlarday ochilib ketgan, ayniqsa, shomdan keyin gulzor va xiyobonlardagi kumush favvoralar ishga tushib, tosh fonuslar yoqilganda bog' yana ham yashnab ketadi, chiroyiga chiroy, fayziga fayz qo'shiladi.



Bosh vazir, odatda, kechqurunlari saroydan qaytgach, egnidagi zarbof to'nini yechib, yengil libosga o'ranadi, boshidagi oltin nishon qadalgan surmarang sallasi o'rniga shaftoli gulli duxoba takya, oyog'iga yengil kavush kiyib, hududsiz bog'da yolg'iz sayr qilishni yaxshi ko'radi. Har biri o'z latofati, o'z ko'rki, betakror go'zalligi bilan ajralib turgan bodomzor va shaftolizorlar, xurmozor va anorzorlarni asta kezib, davlat ishlari haqida tanho o'ylashni, hovuz bo'ylariga qurilgan shinam shiyponlar, to'rt tarafi ochiq, gumbazli boloxonalarda o'tirib, eng murakkab muammolar, serjumboq yumushlarni hal qilishni, yechilmas tugunlarni yechishni ma'qul ko'radi. Serg'alva ishlar, xatarli yumushlar, yechilmas tugunlar esa kundan-kunga ko'payib bormoqda. Bu jumboqlarning eng chigali tabiiy, toj-u taxtning vorisi kim bo'ladi, sultonning o'ziday jangari, qaytmas, bir so'zli amir Mas'udmi yoxud mo'min-qobilgina shahzoda Muhammadmi, degan jumboqdir. Chunki boshqa hamma chigalliklar, arkoni harb va arkoni davlat, vazir-u vuzaro, a'yon-u boyonlar orasidagi tarafkashliklar, nizo-yu nifoqlar, fisq-u fujurlar – hammasi shu chigal muammoga borib taqaladi. Chigal muammolar esa hushyorlik va ehtiyotkorlikni taqozo etadi, chunki vaziri a'zam biladi: davlat ishlari – bu jang maydoni emas, bu ishda bor kuch bilan kamondan o'q uzib bo'lmaydi!

Durust, sultonning o'zi allaqachon kenja o'g'li shahzoda Muhammadni valiahd deb fatvo bergan. Lekin, avvalambor, bu fatvo hali xutbaga qo'shib o'qilgan emas, tor doirada, vazir-u vuzaro davrasidagina ma'lum, qolaversa, amir al-mo'minning bu qaroridan ko'plar norozi.

Ular orasida zaifa bo'lsa ham davlat yumushlariga bosh suqib, saroy ahlini yot deb yotqizib, tur deb turg'azib o'rgangan, sultonning suyukli singlisi Xatlibegimdan tortib, bo'yi mushtdekkinna bo'lsa ham, kallasi xumdek, devon sohibi Abu Nasr Mishkan janoblarigacha bor. Bosh vazir biladi – ularning hammasi amir Mas'ud bilan pinhona aloqada, har on, har daqiqa saroydagi ishlardan ko'z-quloq bo'lib, «tiq» etgan tovushga quloq solib turishibdi. Agar amir Mas'ud bu xatarli kunlarda Isfahonday ovloq joylarda jang-u jadal qilib yurmaganida sarondagi fisq-u fasodlar bundan besh battar avj olardi.

Bosh vazir, xiyobon va gulzorlarni asta aylanib, yechilmas jumboqlarni tanho yecharkan, yurishdan charchagan chog'larida hovuz bo'ylariga qurilgan shiyponlarda o'tirib orom oladi. Shiyponlarda esa hamma narsa – bejirim billur idishlarda nafis tovlangan shafaqrang may-u sharbatlardan tortib, jizillab turgan bedana kaboblargacha, tandirlardan hozirgina uzilgan issiq patirlardan tortib, pista-bodomlargacha – hamma narsa muhayyo bo'ladi. Ali G'aribning istagiga ko'ra, bir joyda hali mo'ylovi sabza urmagan yosh g'ulomlar xizmat qilsa, bir joyda harir ipak ko'ylaklari ichidan oppoq siynalari ko'rinib turgan, hali onalari o'pmagan go'zal kanizlar nazokat bilan bosh egib turishadi, bu pakanagina, yum-yumaloq odamning har bir so'zi, har bir ishorasini mahliyo bo'lib kutishadi...

Lekin bugun vaziri a'zam saroydan yuragi g'ash bo'lib qaytdi-yu, sayr qilish ham ko'ngliga sig'may, darvozadan to'g'rnikki oshyonali ko'shka o'tdi.

So'nggi paytlarda, ayniqsa, amir al-mo'minin-ning ahvoli og'irlashib, vasvas dardiga duchor bo'lganidan buyon, bosh vazir o'z ko'shkidagi barcha qimmatbaho buyumlarni, Hindistondan keltirilgan oltin ma'budalar, billur idishlar, inak gilamlar, noyob zeb-ziynatlar, quyma tillalar, xum-xum oltin qum va behisob dinorlar, fil suyagidan yasalgan nodir qutichalar, g'aroyib hayvonlar va qushlarning mo'jaz haykalchalari – hamma-hammasini xufiya joylarga yashirgan, koshona xonalarida eng oddiy jihozlargina qolgan.

Bugun bosh vazir ko'shkning huvillab qolgan xonalaridan biriga kirib, ko'rpachaga yonboshladi. U bir on ko'z ilintirib, og'ir tashvishlardan g'ovlab ketgan miyasiga jindakkina orom bermoqchi, so'ng ta'zimga kelgan tijorat ahlini, tungi suhbatga chaqirilgan xufiyalar, mushriflar, amir-u umaroni qabul qilmoqchi edi. Vazuri a'zam uyquga ketishdan avval etiklarini yechib, oyoqlarini uqalatishni yaxshi ko'rar, to'g'rirog'i, busiz ko'ziga uyqu kelmas edi. Biroq bugun to'shakka cho'zilib, endi oyoqlarini uzatganida, ko'shk og'asi kirib, Afshon shol dahasidan bir xufiya kelganini, xufiya bosh vazir janoblariga darhol izhori ixlos bildirmoq azmida betoqat bo'layotganini arz qildi. Bosh vazir, odatda birinchi galda tijorat ahlini qabul qilar, chunki ular hech qachon quruq kelmas, ayniqsa, xorijiy yurtlardan tashrif buyurgan savdogarlar katta in'omlar, qimmatbaho sovg'a-salomlar bilan kelishardi. Biroq Afshon sholdan xufiya kelganini eshitgach, tijorat ahlini ham ikkinchi galga qo'ydi.

Afshon shol – shaharning eng kambag'al, eng serg'alva dahasi. Undagi xufiyalarning xabarlari alohida ahamiyatga molik.

Ali G'arib oyog'ini uqalash uchun kirgan erka g'ulomiga ruxsat berdi-da, ayg'oqchini chaqirtirdi. Sal o'tmay, bo'sag'ada ustiga eski qora chakmon, boshiga qora ag'darma telpak kiygan bir kimsa paydo bo'ldi, paydo bo'ldi-yu, ulkan qora qurtday g'imirlab kelib, gilamga tizza bukdi.

Vaziri a'zam, negadir, ehtimol o'ziga o'xshab pildirab yurgani uchundir, bir qarashda ulkan qora qurtni eslatuvchi bu eski xufiyani ko'p xushlamas edi. Biroq Piri Bukriy degan bu kek-sa ayg'oqchi doim muhim xabarlar keltirar, Malik ul-sharob atalmish anov shakkok shoir mayxonasida bo'ladigan nojo'ya yumushlar, saltanatga qarshi qaratilgan ig'vo gaplarni oqizmay-tomizmay yetkazib turishda bebaho edi!

Bu safar ham shunday bo'ldi. Piri Bukriy qar-moqqa o'xshash qiyshiq qo'llarini ko'ksiga qo'yanicha, boshini bukri yelkasiga suqib, g'ala-ti bir gapni aytib berdi. Go'yoki, o'sha betavfiq shoir Malik ul-sharob musofirxonasida ikki sirli sayyoh paydo bo'lgan emish.

Biri yosh, ikkinchisi esa chehrasi bag'oyat nuroniy, gap-so'zlari bag'oyat ma'noli bir alloma emish. Ish sayyohning mast-alastlikda aytgan so'ziga qaraganda, yuzidan aql-zakovat yog'ilib turgan bu alloma... hakimi davron Ibn Sino hazratlari emish!..

Vaziri a'zam ikki bukilib o'tirgan Piri Bukriy-ning allaqanday ma'sum ko'zlariga tikilib, miyig'ida kuldi:

– Shu so'zga inondingmi, Piri Bukriy? Ofarin senga! Bundan chiqdi, sen... o'zlarini hazrat Ibn Sino deb, avomni aldab, pulini to'nab yurgan mug'ambirlarni eshitmabsen! Chin Ibn Sino

bo'lsa nechun ul betavfiq mayxo'arning iprindi mayxonasida ivirsib yuradur!

Piri Bukriy ko'zini yumib, boshini sarak-sarak qildi:

– Bilmam, taqsiri olam, boshda kamina ham inonmadim va lekin suratini ko'rdim?

– Ne surat?

– Anov... suratkash Abu Nasr Arroq<sup>1</sup> chizgan va qirq nusxa ko'chirtirilib, qirq yurtga yuborilgan hazrat Ibn Sino surati! Pinhona kelgan bu sayyoh o'shal suratdagi hazrat Ibn Sinoning baayni o'zi, taqsiri olam!

– Baayni o'zi? – Ali G'arib yum-yumaloq bo'y-bas-tiga zid bir chaqqonlik bilan qaddini rostlab o'tirdi. U bir nima demoqchi bo'lib og'iz juftladi, biroq shu payt yana ko'shk og'asi kirib ta'zim qildi:

– Taqsiri olam ma'zur tutsinlar. Teginoboddan<sup>2</sup> mushrif keldi!

– Teginoboddan?

– Shunday, taqsiri olam. Teginoboddan, ariz Abulvafo Sariqdan kelmish!

Vaziri a'zam bir zum ikkilanib turgach, Piri Bukriyga tashqariga chiqib kutib turishni buyurdi.

– Chaqir mushrifni!

Yo, tavba! G'alati hangoma! Hangoma ustiga hangoma!

Bir hafta egardan tushmay ot surib kelgan mushrif poygakka tiz cho'kdi-da, belidagi nosqovog'i ichidan vaziri a'zamga nos hidi ufu-rib turgan bir maktub olib berdi. Maktubdagi gaplar... vo darig'! Piri Bukriy topib kelgan xabardan ham g'alatiroq edi...

---

<sup>1</sup> Abu Nasr Arroq – Ibn Sinoning zamondoshi, rassom va tarixchi.

<sup>2</sup> Teginobod – Sabuqtegin asos solgan shahar.

Bosh vazir bilar: bundan uch oy muqaddam Ibn Sino hazratlarini yerning tagidan bo'lsa ham topib kelish sharti bilan uzoq Hamadonga yuborilgan ariz Abulpafo Sariq tarvuzi qo'ltig'idan tushib, G'aznaga quruq qaytmoqda edi. Bosh vazir bu xabarni bundan bir hafta muqaddam o'z xufiyalari orqali bilgan edi. Ma'lum bo'lishicha, Abulvafo Sariqning elchi bo'lib borayotganidan xabar topgan hazrat Ibn Sino Hamadonni tark etib, qayoqqadir bosh olib qochgan, uni, hatto, Hamadon hokimi Alouddavla ham topib berolmagan. Isfahonni zabt etib, Hamadon yaqinida lashkar tortib turgan amir Mas'ud esa bu ishda Abulvafo yordam qilish u yoqda tursin, aksincha, qarshilik ko'rsatgan. Xullas, Hamadondan ikki qo'lini burniga suqib qaytgan Abulvafo Sariq, amir al-mo'mininga ko'rinishga yuragi dov bermay, Teginobodda turib qolgan!

G'alati dunyo ekan bu dunyo! Bundan uchto'rt yil muqaddam Ali G'arib bilan bosh vazirlikni talashgan bu to'pori Abulvafo Sariq, mana endi boshi devorga borib «taq» etib urilgandan keyin yana Ali G'aribga murojaat qilgan, bir parchagi na maktubda uning nomiga ming marotaba hamd-u sanolar o'qib, yo'l-yo'riq so'ragan edi!

Battar bo'lsin! Agar bu naynov arizning aqli bo'lsa, bundan uch oy muqaddam, amir al-mo'mininning sharafli topshirig'ini oldim, deb hovliqmasdan, yo'lga chiqishdan oldin bosh vazirga bir og'iz maslahat solsa bo'lmasmidi?

O'shanda, sulton in'om etgan arg'umoqlar, eng dovyurak navkarlar, oliy yorliqlar, xurjun-xurjun oltinlardan mast bo'lib, bosh vazirdan bir og'iz yo'l-yo'riq so'ramagan bu befahm ariz endi

nechun uyalmasdan undan maslahat so'raydi? Nos hidi ufurgan xatini ko'z yoshi bilan yuvib, nechun izhori ixlos qiladi?

Abulvafoning o'zidan ham beso'naqay dastxat bilan yozilgan bu maktubning birinchi qismidagi gaplar, shu o'ylar sabab vaziri a'zamning yuragidagi eski muzni erita olmadi. Lekin xatning ikkinchi qismi!.. Ikkinchi qismidagi gaplar... bukri topib kelgan boyagi gaplardan ham g'alatiroq edi!..

Go'yokim, Abulvafo Sariq, umidlari chil-chil sinib, uzoq Hamadondan Teginobodga quruq qaytib kelgan kunlari shahar bozorida o'zini hazrat Ibn Sino deb, fuqaroni davolab yurgan bir alloma paydo bo'lgan emish. Tabobat bobida yagona bo'lmish bu hakimi davronni o'z ko'zlari bilan ko'rganlar, uning dori-darmonlaridan davo topgan bedavo xastalar son mingta emish.

Ariz Abulvafo Sariq bu xabarni eshitib, ul hakimi hoziqqa darhol chopar yuborgan emish. Ammo chopardan xabar topgan tabib darhol bor bisotini yig'ishtirib, bir kechada qaygadir gumdon bo'lgan emish?..

Burni tagidan shunday quyonni qochirib yuborgan aqli ko'toh ariz bu bema'ni xabarni yetkazar ekan, ko'z yoshi to'kib, bosh vazirdan maslahat so'ragan, maslahat orasida esa... Teginoboddan qochgan bu hakimi davron mabodo G'azna tomon yo'l olganmikin, degan mujmal bir gapni ham qistirib ketgan edi.

Vaziri a'zam befahm arizning bema'ni maktubini o'qib nihoyasiga yetmagan ham ediki, to'satdan, uning miyasida nimadir yulduzday «yarq» etib yondi-yu, o'rindan turib ketdi.

Bosh vazirning miyasida «yarq» etib yongan bu fikr... xatarli va g'aroyib edi! Shunday g'aroyib va shunday xatarli ediki, Ali G'arib, ko'shk bo'sag'asida kutib turgan mushriflar, muzofotlardan kelgan divsuvorlar<sup>1</sup>, izhori ixlos ma'nosida tashrif buyurgan savdogarlar u yoqda tursin, hatto, masjid va madrasa kavaklaridan o'rmalab chiqqan shaxsiy ayg'oqchilarini ham qabul qilmadi. Ko'shk og'asiga sharob keltirishni buyurib, ust-ustiga bir necha kosa may sipqardi.

Yigirma yillik qo'lbola sharob o'z ishini qildi. Zum o'tmay hozirgina g'aroyib tuyulgan g'aroyib fikr juda tabiiy, xatarli reja esa juda dadil va mardonavor rejaga aylandi. Vaziri a'zam, zebi ziynatlardan soqit bo'lgan xufiya go'shani asta aylanib, ko'ngilga kelgan bu fikr va rejalarni obdan pishirish niyatida edi, biroq shu payt eshik beruxsat ochilib, shaxsiy qushchisi ta'zim qilib kirib keldi.

– Afv etgaysiz, valine'mat!.. Xeshingiz Abul Hasanak janoblaridan elchi keldi. Kecha bolalagan ona kiyikni berar emishsiz!

– Ona kiyik?

– Ha, ona kiyikni bolasi bilan birga so'rab keldi!

– Vo ajabo, tun yarmida ona kiyikni ne qiladi u?

– Bilmam, taqsiri olam, elchining aytishicha, oftobi olam... ovga otlanmish!

– Oftobi olam ovga otlanmish? Bir necha oydan beri vasvas bosib, oyog'ini bazo'r sudrab yurgan davlatpanoh ovga chiqarmish! Ajab jumboq!

Amir al-mo'minin so'nggi yillarda yomon bir odat chiqargan, vaziri a'zam bir chetda qolib, eng maxfiy yumushlarni shu hezalak vaziri Abul Hasanak bilan maslahatlashadigan bo'lgan. Af-

---

<sup>1</sup> Divsuvorlar – choparlar.



tidan, ov ham shunday maxfiy yumushlardan biri edi. Ali G'arib shuni o'ylab, tirnoqlarigacha zirqirab ketdi-yu, lekin Piri Bukriyning gapi yodiga tushib, ko'ngli xiyol taskin topdi.

Mayli, ular ovda yurganida Ali G'arib bu ishni o'ylab oladi, obdan o'ylab, obdan pishitib oladi. Shu qarorga kelgan bosh vazir Piri Bukriyni chaqirtirdi.

## YETTINCHI BOB

### 1

Kechasi bir guruh navkarlar nogahon bostirib kirishganda o'zini hazrat Ibn Sino deb atagan keksa sayyoh mast uyquda edi. U dod solishga ham ulgurmadi, navkarlar uning sallasini og'ziga tiqib, qo'l-oyoqlarini bog'lashdi-da, egarga o'ngarib, qasir-qusur ot surib ketishdi.

Keksa sayyoh egarda qimiz solingan meshday chayqalib borarkan, ich-ichidan kuyinib:

«Bu kuningdan besh battar bo'l, miyasiz tentak! – dedi o'zi-o'ziga. – Kim senga o'zingni hazrat Ibn Sino deb, dovruq sol, dedi, nodon? Ajalingdan besh kun burun o'lishni tilagan bo'lsang tilagingga yetding, mana!»

Ko'kda, tariqday sochilgan yetti qaroqchi tagida yangi hilol yangi zarb qilingan oltin dinor parchasiday yarqirab turar, u negadir yangi tug'ilgan chaqaloqni eslatar, chaqaloqday ojiz, chaqaloqday nogiron edi. Kechagina bahor giyohlarining o'tkir va xushbo'y atrini sochib esgan iliq shabada bugun tanani junjiktiruvchi sovuq shamolga aylangan, bu shamol ostida yo'l bo'yidagi daraxtlar – azim chinorlar, quloch yetmas oq teraklar,

sadalar, arg'uvonlar asov daryoday shovullar, go'yo ko'kka talpingan ulkan qora qushlarday talpinar, yulqinar edi!..

Shahar mast uyquda, ko'chalar, rastalar, gularlar suv quyganday jim-jit, hatto, qorovullarning shaqildog'i ham eshitilmas, guzarlardagi toshfonuslar ham o'chgan, shahar zimiston edi!..

Qo'l-oyoqlari chandib bog'langan kekxa sayyoh ot ustida ming azob bilan tebranib borarkan, negadir Buxoro hokimi Aliteginning mudhish zindonlari ko'z oldiga kelib, vujudi qora terga tushdi.

«O, nodon shogird! Tentak shogird! Agar u o'sha kuni kechasi Malik ul-sharobning bir piyola mayidan mast bo'lib, noehtiyotlik bilan valdirab qo'ymaganida, ehtimol, bu mudhish voqea ro'y bermas edi! Shogirdning mast-alast so'zlari sabab mana endi uning hamma o'ylari, bir necha oydan beri tuzib kelgan barcha rejaları barbod bo'ldi! Barbod!»

G'aznayı munavvaraning kimsasiz ko'chalari, gular va rastalaridan dukur-dukur ot choptirib o'tgan navkarlar shahar o'rtasidagi qandaydir baland qo'rg'on oldida egardan tushishdi. Navkarlarni qarshi olgan kekxa darvozabon qo'lidagi toshfonusni ko'tarib, egar ustida bir kunda-day ko'ndalang yotgan kekxa sayyohga ko'z qirini tashladi-da, qo'rg'onga kirishga ijozat berdi.

Qo'rg'on ichi hududsiz bog' bo'lib, uning o'rtasida ikki qavatli marmar qasr oppoq oqarib turardi. Qasrning darichalarida «milt» etgan chiroq ko'rinmas, hamayoq zim-ziyo, faqat ikkinchi oshyonaning eng chekkasidagi bitta-yu bitta darichasi osmondagi yangi hilolday nogirongina miltirardi.

Hovliga kirgach, navkarlar keksa sayyohni egardan yerga tushirib oyoq-qo'llarini yechishdi-da, bo'shagan belbog' bilan ko'zlarini mahkam bog'lab, qayoqqadir sudrab ketishdi.

Keksa sayyoh xuddi boshiga gurzi tushgan odamday, kaxt bo'lib qoldi. U na qayoqqa ketayotganini o'ylar, qancha yurganini bilardi. Bir mahal sharaq-shuruq ochilgan qulflar ovozidan hushiga keldi. Dimog'ig'a «gup» etib kalamush hidi urdi. Uni qandaydir zax, sovuq bir yerto'laga sudrab kirishdi. Ketma-ket eshik taraqlab yopildi-da, yana ilinayotgan qulflarning sharaq-shurug'i eshitildi.

Keksa sayyoh ko'ziga bog'langan qalin belbog'ni yulib oldi, biroq kalamush hidi ufurgan yerto'la shunday zim-ziyo ediki, hech narsani ko'rolmadi. U oyoqlari qaltirab, turgan joyiga tiz cho'kdi-yu, alam va og'riqdan yer timdalashga tutindi.

## 2

Uning asli ismi Abu Halim edi, biroq yoshlik – beboshlik deganlaridek, yoshlikdagi sho'xliklari sabab yor-birodalari unga Abu Shilqim ibn Shahvoniy degan laqab qo'yishgan edi.

Abu Halim Buxoroyi sharifda, o'sha, hazrat Ibn Sino istiqomat qilgan Juyi Mo'liyon<sup>1</sup> dahasi-da, Buxoro hokimi Nuh ibn Mansurning suyukli tabibi Abu Faysal xonadonida tavallud topdi.

O, bu Abu Ali ibn Sino! Ibn Sino!

Abu Shilqim esini tanib, yoshlik tulporiga minibdiki, ko'ksini tizginsiz bir hasad bamisoli ochko'z kalamushday kemiradi. Bu hasad, bu raqobat qachon boshlandi – buni Abu Shilqim-

---

<sup>1</sup> Juyi mo'liyon – Buxoroda Ibn Sino yashagan mahalla.

ning o'zi ham bilmaydi. Boshda, Ibn Sinolar xonadoni Buxoroyi sharifga ko'chib kelganida, hech kim ularni nazarga ilmagan edi. Garchi, Abu Alining otasi Abu Abdulloh amir devonida mirzalik qilsa ham, Juyi Mo'liyon dahasining kazo-kazolari ularni «kelgindi», deb kalaka qilishardi. U mahalda Abu Shilqimning otasi Abu Faysal Buxoro hokimining bosh tabibi hisoblanar, dahada ularning qo'sh oshyonali ko'rkam qo'rg'oni va hududsiz bog'lari bo'lar, bu bog'lar Juyi Mo'liyon dahasining ko'rkiga ko'rk, savlatiga savlat qo'shib turardi. Ularning bog'lari va muazzam qasrlari oldida Abu Alilar hovlisi shohona to'n yonidagi darvesh jandasiday g'arib ko'rinardi.

U mahalda o'n bir-o'n ikki yoshlardagi Abu Shilqim arab zodagonlari dahasidagi madrasayi kalonda tahsil olar, zarbof liboslarda yuradigan yosh mullavachcha «kelgindi» hamsoyalarining «kelgindi» o'g'lini nazariga ham ilmas edi. Hatto, bu ozg'in, qiyg'ir burun «kelgindi» bola to'g'risida, uning aql bovar qilmas zakovati to'g'risida har xil mishmishlar tarqalganda ham yosh Abu Shilqim pinagini buzmadi. U paytlarda Abu Shilqim, boshida o'smirlikning xumo qushi, yoshlik gash-tini surar, Juyi Mo'liyon kazo-kazolarining erkatoy boyvachchalari bilan ulfatchilik qilar, gulgun bazmi jamshidlardan boshi chiqmas, bog'lar-da yashirinib, marmar hovuzlarda cho'milguvchi yalang'och sanamlarni pinhona kuzatish, yorug', oydin kechalari esa xilvat xiyobonlarda ularning yo'llarini to'sishdan qo'li tegmas edi. Abu Ali esa... Abu Alini u gohi-gohida bozorlarda, attorchilik va baqqolchilik rastalarida, faqir kitobfurushlarning g'arib do'konlarida ko'rib qolardi. Qalang'i-qa-

sang'i attorlar rastasida allaqanday giyohlarni hidlab, eski kitoblarni titib yurguvchi bu xayolparast o'spirin u paytlarda Abu Shilqimning kulgusini qistatardi, vassalom.

U mahalda Abu Shilqim va uning do'stlari saxiy Buxoro bozorlariga faqat bir maqsadda borishar, u ham bo'lsa, dong'i olamga ketgan zeb-ziynatlar rastasiga qatnaydigan malaklarning chehrayi shamslarini ko'rib, orqalaridan gap otish edi, xolos.

Shahriston ichida joylashgan bu hashamatli do'konlarda nodir zeb-ziynatlar, nafis tilla sirg'a va bilaguzuklar, sof qizil oltindan yasalgan nozik baldoqlar, shoda-shoda marjonlar, bebaho sadaflar, kimxob yostiqliklarga qadalib, oftobda ajib tovlanib turguvchi yoqut va injular, la'l va durlar, qo'yingki, yetti iqlimning hamma ganjlari topilar edi. Bu ziynatlarni ko'rgani Buxoro zodagonlarining erkatoy sanamlari kelishardi. Nozik oyoqchalaridagi nozik kavushchalaridan tortib, peshonalaridagi tillaqoshlarigacha dur va injular bilan bezalgan bu ofatijon sanamlar mashhur zargarlik rastasiga odatda soyabon aravalarda kelishardi. Ular ko'k, qizil, pushtirang parda bilan to'silgan aravachalaridan go'yo rang-barang kapalaklarday lip-lip uchib chiqishar va yuzlarini harir durralari bilan to'sishib, do'kon tomon shoshilishar, go'yo nodir zeb-ziynatlardan boshqa hech narsa qiziqtirmas edi ularni. Lekin Abu Shilqim va uning takasaltang birodarlari buning hammasi mug'ambirona bir o'yin ekanini yaxshi bilishardi. Chunki soyabon aravalardan mitti qushchalarday «par-par» uchib chiqqan bu malaklar ularning yonidan chopqillab o'tisharkan, birlari harir durralarini to'g'rilagan bo'lib,

chehrayi mohlarini bir ko'rsatib olishsa, boshqa birlari ko'z urishtirib o'tishar, bu ko'z urishtirish va imo-ishoralar goho-goho Juyi Mo'liyong bog'larining eng xilvat burchaklarida pinhona uchrashuvlar bilan tugardi!..

Kunlari mana shunday pinhoni uchrashuvlar va totli bo'salar bilan o'tgan Abu Shilqim va uning do'stlariga «xayolparast kelgindi»ning kitobfurushlar rastasida kitob titib, ivirsib yurishlari chindan ham kulgili tuyular, goho-goho ular Abu Alining yo'lini to'sib, gap qotishardi:

– Hey, birodar! Bu iprindi ishlaringni qo'yib, biz bilan yur! Ark yonidagi balxlik savdogarning kenja xotini alacha choponingga ko'zi tushib, oshiq-u beqaror bo'lib qolibdi! Istasang, kechasi guzarga chiq. Sekin olib borib qo'yniga solib qo'yamiz!..

Ular shunday deb, qah-qah otib kulishar, Abu Ali esa rangi «quv» o'chganicha, lom-mim demay yonlaridan o'tib ketardi.

Bir kun tong chog'i qaysi bir bazmdan qaytib, dong qotib uxlayotgan Abu Shilqimni kimdir tepib uyg'otdi. Ko'zini ochsa, tepasida padari buzrukvori, – Alloh uning tuprog'ini yumshoq qilg'ay! – qaqqayib turibdi. Boshidagi hakimlar kiyadigan oq taqyasi bir tomonga og'ib ketgan, ko'zlari chaqchaygan, ko'ksiga tushgan oppoq soqoli jonli maxluqday dir-dir titraydi!

– Befarosat ho'kiz! Ana, kelgindi mirzoning sen tengi farzandi davlatpanohni davolab, behisob in'omlarga sazovar bo'ldi. Sen ho'kiz bo'lsang... yotibsen, harom-xarish ishlardan boshing chiqmay!

Abu Shilqim keyin bilsa, eskifurushlar rastasida kitob titib yurguvchi bu xayolparast mul-

lavachcha tabobat ilmini shunday o'rganibdiki, Buxoro hokimi Nuh ibn Mansurning og'ir dardiga davo topib, uning katta ehsonlariga sazovor bo'libdi!..

Kim bilsin, Abu Shilqimning yuragini kalamushdek kemirgan hasad va raqobat tuyg'usi o'shanda, g'azabdan soqoli dir-dir titragan padari buzrukvorining ilk tepkisini yegan kechasi tug'ilgandir? Harqalay, xayolparast mullavachchanning tabobat bobidagi shuhrati ortgan sayin, padari buzrukvorigina emas, Abu Shilqimning ham ichi tuz ichganday achishadigan bo'ldi.

Sal o'tmay, kekxa Nuh ibn Mansur olamdan o'tdi, uning kaltabin zurriyotlari bir-birlari bilan toj-u taxt talashib, ko'hna somoniylar davlatini batamom barbod qilishdi. Faqat Buxoro va Samarqand emas, butun Movarounnahr sahronishin qoraxoniylar hukmiga bosh egdi. Kechagina sahroyilarni mazax qilib, ustlaridan kulib yurgan Buxoro zodagonlari endi serviqor turkiy beklar bilan qiz berib, qiz olishishni o'zlari uchun ulug' baxt va katta sharaf, deb biladigan bo'lishdi.

Kunlardan bir kuni padari buzrukvori Abu Faysal Abu Shilqimni otga mindirib, sahroga olib chiqib ketdi. Ular Hurmiton<sup>1</sup> bog'laridan o'tib, Afshona tomonga ravona bo'lishdi. Ilk bahor edi. Afshona ortidagi bepoyon dasht uyur-uyur yilqiga, suruv-suruv qo'y-qo'zilarga to'lib ketgan, hamma yoqda oq, qizil, jigarrang o'tovlar do'npayib turar, ularning atrofida ot o'ynatgan bo'z bolalar, boshlariga ukki patlari qadalgan qizil qalpoqcha kiyib, sochlariga kumush ziynatlar taqib olgan qiz-ke- linchaklar chopqillab yurishardi.

---

<sup>1</sup> Hurmiton – hozirgi Romiton.

Abu Faysal eng baland qirdagi eng ko'rkam oq o'tov oldida otdan tushdi. Ota-bolani boshiga oq qalpoq, egniga uzun oq chakmon kiyib, belini kumush kamar bilan bog'lab olgan, uzun bo'yli, kekxa bek kutib oldi. U, Abu Faysalni oq o'tovga boshladi, Abu Shilqim esa o'tov yonida xizmat qilib yurgan qiz-kelinchaklarni tomosha qilib, tashqarida qoldi.

Qiz-kelinchaklarning aksari qizil guldor ko'ylak kiygan, oyoqlarida qizil, ko'k, sariq saxtiyon etikcha, boshlarida esa o'sha, uchiga ukki pati qadalgan qizil chamberak qalpoqchalarni qo'ndirib olishgan. Ularning yum-yumaloq, kulcha yuzlari ochiq, quralay ko'zlari sho'x chaqnaq turar, yurganda sochlaridagi kumush ziynatlari ajib ovoz chiqarib jaranglar, bunga muloyim kulgulari qo'shilib, Abu Shilqimning yuragiga jaz-jaz tegardi.

O'sha kuni kechqurun Buxoroga qaytib ketayotganlarida otasi unga bir gap aytdi. Go'yo bu turkiy bekning davlati Buxoro hokimining davlatidan kam emas emish... Bekning o'n olti yashar bir qizi bo'lib, u betob emish. Biroq, inshoollo, tuzalib ketar, dedi otasi. Otasining bu gaplarini eshitarkan, Abu Shilqimning ko'z oldiga hozirgina ko'rgan qiz-kelinchaklar, kulcha yuzlarini yashirmay, muloyim kulib turgan sho'x sahnoshin malaklar kelib, yuragi battar jazillab ketdi...

Bir necha hafta o'tdi. Bir kun kechasi, Abu Shilqim o'z bog'larida yor-do'stlari bilan chaqchqlashib o'tirgan edi, ko'chadan otasi kirib keldi. Uning vajohatidan odam qo'rqququlik, rangi devorday oqargan, oppoq qoshlari tagidagi ko'kimtir ko'zlari qon talashgan. U sarmast odamday chayqala-chayqala shiyponga chiqdi-da, do'stlar



davrasida may ichib o'tirgan erka zurriyotining orqasiga bir tepdi. Tepkiga bir-ikki musht ham qo'shmoqchi edi, biroq, osmonga ko'targan serhasham asosi to'satdan qo'lidan tushib ketdi-yu, bir qop go'shtday lorsillagan odam, bor vujudi bilan yerga gursillab yiqildi...

Abu Shilqim keyin bilsa, otasining yo'lini tag'in o'sha kelgindi yosh tabib kesib o'tgan ekan. U bek qizining davosiz dardiga davo topib, katta in'omlar olgan, bek qizi esa yosh tabibga oshiq-u beqaror bo'lib qolgan ekan. Rost, bek bu ishdan xabar topib, mash'um ishga to'g'anoq solibdi, qizini olib, bir kechada Afshonadan ko'chib ketibdi...

Kim bilsin, Abu Shilqimning yuragini och kalamushday kemirgan raqobat tuyg'usi o'shanda uyg'ongandir!

Yosh tabibning shon-shuhratiga dosh berolmay, hasad o'tida kuyib ketgan padari buzrukvori erka zurriyotiga ikki tepki in'om etib, o'sha yerining o'zida jon taslim qildi. Shundan keyin nima bo'ldi – buni Abu Shilqimning o'zi ham bilmaydi. Chunki, «Sulaymon o'ldi, devlar qutuldi» qabilida ish tutib, padarining jismini tuproqqa berib kelgan kuniyoq ko'zini chirt yumib ayshga sho'ng'igan Abu Shilqim otasi yiqqan davlatni batamom sovurib bitirgandagina ko'zini bir ochdi. So'nggi somoniylar hukmdorining bosh tabibi Abu Fayzal janoblarning dunyosi esa behisob edi. Oldin chuqur yerto'lalardagi po'lat sandiqlar ochildi, ulardagi ganjlar, nodir oltin buyumlar ketdi, keyin zeb-ziyatlar, noyob uy jihozlari, ipak gilamlar, billur idishlar, tilla va kumush qandillar, shamdonlar, ot-aravalar bozorga chiqdi, keyin ikki oshyonali niliy qasr, qasrdan keyin xiyo-

bonlariga kumush favvoralar oʻrnatilgan behudud bogʻ, bogʻdan keyin qasr oldidagi otxonalar, otxonalardan keyin molxonalar!.. Qoʻldan ketgan bu behisob boyluk bilan birga Abu Shilqim ham yuqoridan pastga qarab yumalab tushaverdi: ikki oshyonali niliy qasrdan xizmatkorlar uyiga koʻchib oʻtdi, undan bogʻdagi shiyponga, shiypondan otxonaga, otxonadan molxonaga.. Axiyri bir kun koʻzini ochib qarasa... bogʻ etagidagi xaroba bir kulbada yotibdi? Na ichishga may qolgan, na yeyishga bir burda non! Egnida gadolar ham jirkanadigan eski chopon, tagida uvada namat, qolgan bitta-yarimta sandiq va qutichalarda hech vaqo yoʻq, mogʻorlab ketgan qandaydir giyohlar, mayda-chuyda shishachalarga solingan allaqanday sassiq suyuqliklar! Yonida na onayizori bor, na hamtovoq yor-birodarlari va na aka-ukalari. Bari uni tark etgan, toʻgʻrirogʻi, Abu Shilqim oʻzi hammasini kafangado qilib tariqday sochib yuborgan edi!

Ne chora? Boshga tushganni koʻz koʻrar ekan. Tirikchilik – tirriqchilik ekan! Abu Shilqim yigʻlab-siqtab, yor-birodarlaridan egniga bitta toʻn, boshiga bitta dastor, tagiga qirchangʻi bir eshak soʻrab oldi, otasidan qolgan-qutgan giyohlarni, suyuqliklar solingan shishachalarni xurjunga joylab, tabib Abu Halim ibn Faysal nomi bilan sahronishinlar ovullarini kezib ketdi... Shu-shu, birda och boʻlsa, birda toʻq, birda shoh-u birda gado, yillar oʻtdi. Yuziga ajin, soch-soqoliga oq oraladi. U taqdirga tan berib, boriga shukur qiladigan boʻldi. Faqat bir narsa baʻzi-baʻzida tinchini buzib, yuragini tuz sepganday achitar, u ham boʻlsa, yana oʻsha eski raqibi Abu Ali edi!

Abu Shilqim goho-goho biror sabab bilan dongdor hakimlar yoxud xorijiy sayyohlar majlisiga kirib qolgudek bo'lsa, aksar hollarda yana o'sha, bir mahallar kitobdorlar va giyohvandlar do'konlarida ivirsib yurguvchi yosh tabibning nomi tilga olinar, cheksiz hurmat va iftixor bilan tilga olinardi! Emish, go'yo bu xayolparast tabib tibbiyot bobida tengsiz alloma bo'lgan emish, ajaldan boshqa neki kasal bo'lsa, hammasiga davo topar emish! Go'yo «Qonun» degan bir kitob bitgan emishkim, bu kitobni oltinga ham topib bo'lmas emish!..

O, bu Ibn Sino! Yoshlik chog'laridayoq yuragida hasad o'tini yoqib, halovatini buzgan, tinch, beg'ubor hayotini raqobat og'ushi bilan zaharlagan Ibn Sino!

...Abu Shilqim ibn Shahvoniy peshonasi ni devorga gurs-gurs urib, yana yer tirnashga kirishdi. Shu payt to'satdan G'aznaga kelib, bu zindonga tushishga sabab bo'lgan g'aroyib bir voqea esiga tushdi, tushdi-yu, o'zi ham sezmaganda yana xayol daryosiga sho'ng'idi.

...Bu g'aroyib voqeaning sodir bo'lganiga mana, o'n yildan oshdi. Xuddi hozirgiday ilk bahor edi. Abu Shilqim, tagida xachir, egnida ko'k movut to'n, boshida yangi simobiy salla – bu mahalda u Buxoro tevaragidagi qishloqlarda ancha-muncha ixlosmandlar orttirib, qorni to'ygan, qirchangi eshagini xachirga, eski choponini ko'k movut to'nga almashtirgan edi! Hurmiton bozori qaydasen, deb yo'lda yo'rtib borardi.

Hurmiton – Buxoro asilzodalari, arkoni davlat va arkoni harb, vazir-u vuzaro, a'yon-u boyonlarining yozgi qarorgohi. Ayniqsa, qafasday tor shahar hovlilariga o'rganolmagan turkiy beklar

Hurmiton tevaragidagi bepoyon dashtlarni xush ko'rishar, ko'klam chiqishi bilan mol-mulklarini tuyalarga ortib, turnaqator bo'lib qir va adirlarga ko'chib chiqishar edi. Bu payt Hurmiton bozorlari ham gullab ketar, Xuroson-u Shosh, Tolos va Oloy tomonlardan boy karvonlar azim daryoday oqib kelardi!

O'sha kuni, turkiy beklar ovulida tabiblik qilib, xurjunining ikki ko'zini in'omlarga to'ldirib olgan Abu Shilqim xushnud kayfiyatda Hurmiton an-hori bo'yidagi bir karvonsaroyga kelib tushdi. Anhor sohili gavjum, oshxonalarda kabobpazlar kabob pishirar, somsapazlar somsa, novvoylar non yopishar, qovurilgan piyoz va go'sht, issiq non va qalampir hidi dimoqqa gup-gup urardi. Anhor bo'yidagi gilam to'shalgan so'rilarda zarbof va kimxob to'nli asilzodalar, kalondimog' tijorat ahli yonboshlab yotar, yo'qsillar, darveshlar, juldur chopon gadolar esa quyiroqdagi ko'm-ko'k o'tloqlarda to'p-to'p bo'lib o'tirishar, har kim top-ganini o'rtaga to'kkan edi... Abu Shilqim xachirini bir chetga tushovlab, zodagonlardan pastroq, gadolardan yuqoriroq bir so'ridan joy oldi-da, bir kosa qimiz bilan ikki six kabob so'radi.

U sopol kosadagi qimizni bir ko'tarishda bo'shatib, kabobga kirisharkan, quyiroqda o'tirgan, chap ko'zi ko'r bir darvesh yolg'iz ko'zini unga o'qdek qadab, tikilib-tikilib qarayotganini payqab qoldi. U nechundir yuragi «shuv» etib, ko'zini ko'r darveshdan olib qochdi. Biroq ko'r darvesh darhol o'rnidan turdi-da, ro'parasiga kelib, ta'zim bajo keltirdi:

– Assalomu alaykum, hakimi davron... Abu Ali ibn Sino hazratlari!

Abu Shilqim og'zi ochilganicha darveshning cho'g'day yongan yolg'iz ko'ziga hayrat bilan tikildi.

– Hakimi davron... Ibn Sino? Sen faqirni boshqa birovga o'xshatding, darvesh!

– Muborak nomingizni yashirmoqdan ne foyda, taqsirim? – dedi ko'r darvesh, negadir ovozi ni pasaytirib. – Bundan bir yil muqaddam kamina sizni Isfahonda, amir Alouddavla davrasida ko'rganmen. Isfahon ahli sizga sajda qilib, tabaruk jubbangiz etaklarini o'pganini o'z ko'zim bilan ko'rganmen!.. Nechun o'z eldoshlaringizni bu saodatdan benasib qilasiz, taqsirim?

«Yopiray! Bu telba darvesh ne deydi? Murodi ne buning?»

– Hozir ahli mo'minni ogoh qilamen, toki ahli iymon yaxshi doru darmonlaringizdan bahra olsin, xastalar davo topsin!

Yuragi orqasiga tortib ketgan Abu Shilqim, «hoy-hoy», deguncha bo'lmadi. Ko'r darvesh kaftlarini og'ziga karnay qilib:

– Hoy ahli iymon, yaxshilar! – deb xitob qildi. – Eshitmadim demanglar, g'aflat uyqusida qolmanglar! Allomalar mukammali va hakimlar afzali hazrat Ibn Sino tavallud topgan o'z yurtiga qadam ranjida qilmish! Kimki bu hakimi hoziqning yuksak kamoli va nurli jamolidan bahra olib, davosiz dardiga davo topmoq istasa – marhamat qilsin!

Anhor sohilini to'ldirgan «ahli iymon» birdan «gurr» etib ko'tarildi-yu, Abu Shilqim bilan ko'r darvesh tomon yopirildi. Rost, chinor soyasida so'rilarda yonboshlab yotgan serviqor asilzodalar orasida masxaraomuz kulib qo'rganlar ham bo'ldi, biroq ularning kulgusi birdan «gurr» etib ko'tarilgan olomonning shov-shuvi ostida ko'milib

ketdi. Nogahon yopirilib kelgan «ahli iymon» bir-birining gapiga quloq solmas, hamma to‘satdan «hazrat Ibn Sino»ga aylangan Abu Shilqimni ko‘rishga intilar, birov juldur kiyimini shartta yechib, irigan-chirigan oyog‘ini namoyish etar, birov yarasini, birov chaqasini degandek, birov nogiron bolasini ko‘rsatar, birov onasini! Xullas kalom, bir zumda bo‘ldi to‘polon, bo‘ldi to‘polon!

Ko‘r darvesh zudlik bilan chopib borib, xachir ustidagi xurjunni sudrab keldi. Shundan keyin Abu Shilqim ham lom-mim demay xastalarini «davolash»ga, ya‘niki xurjunidagi giyohlarni ulashishga tutindi. U og‘ziga kelgan gapni aytib giyoh ulashar, ko‘r darvesh esa yomg‘irday yog‘a boshlagan oqchani yig‘ar edi! Xurjunning ikki ko‘zini to‘ldirgan giyohlar – tuyatovon, otquloq, yovvoyi yo‘ng‘ichqa, cho‘girtikonlar talqoni, rayhon va kiyik o‘ti, bodom va tog‘yalpizi, turfa gullar aralashmasi, yantoq va shuvoq ildizlari, nasha, ko‘knori poyalarining qaynatmalari va ularning urug‘lari, qo‘yingki, Abu Shilqim keksa tabiblardan nimaniki eshitib, tog‘- u toshlardan nimaniki yig‘ib olgan bo‘lsa, hammasi ko‘z ochib-yumguncha kumush va, hatto, oltin tangalarga aylan-di... Shundan keyin ko‘r darvesh «hakimi davron» charchaganini ro‘kach qilib, kimki chorasi topilmas dard va qutulib bo‘lmas ajal balosidan qutulmoqni istasa, ertaga Hurmiton bozoriga marhamat qilishlarini tayinladi-da, yig‘ilgan «ahli iymon»ni tarqatdi... Lekin ertasiga ular Hurmiton bozori emas, sayqali ro‘yi zamin Samarqand qaydasen deb, Samarqand tomon ravona bo‘lishdi.

Shu-shu, falakning gardishi bilan hazrat «Ibn Sino»ga aylangan Abu Shilqim ibn Shahvoniy firib bobida ustasi farang ko‘r darvesh bilan birga butun



Movarounnahrni kezib chiqdi. Ular Samarqand va Shosh, O'tror va Yassi, Gurganj va Sig'noq – qo'yingchi, bormagan shahri, ko'rmagan yurti qolmadi. Asta-sekin oddiy choponlar kimxob va banoras to'nlarga, otlar soyabon aravalarga almashtirildi, mayda chaqa va kumush tangalar oltin dinorlarga aylandi. Ko'r darvesh kamlik qilib, qo'l-oyoqlari chaqqon, dasti beminnat yosh g'ulomlar xizmatga olindi. Ular endi yo'lga chiqsa eng badavlat tijorat ahli bilan, katta karvonlar bilan birga chiqishar, shaharlarga borganda eng boy karvonsaroylarini tanlashar, eng ko'rkam, eng ziynatli xonalarga tushishardi. Ertasiga, egniga g'aroyib janda, boshiga g'aroyib telpak kiyib, kashkuliga isiriq solib olgan ko'r darvesh, ikki yonida ikki g'ulom, bozorga chiqardi:

*Hoy, ahli mo'min, yaxshilar,  
Eshitmadik demanglar!  
Luqmon hakim duogo'y,  
Pirlaridan boobro'y,  
Ibn Sino nomi bor,  
Yetti iqlim dong'i bor!  
Dard yo'qdir ul bilmagan,  
Chorasini qilmagan!  
Baloni daf etadi,  
Qazoni daf qiladi.  
Ahli iymon, yaxshilar,  
Eshitmadik demanglar!..*

Bu orada ko'r darveshdan saboq olgan yosh g'ulomlar o'zlarini olomon orasiga urishar, bir to'pdan ikkinchi to'pga o'tib, hazrat Ibn Sino to'g'risida har xil hikoyat va rivoyatlar aytishardi:

– Xudovandi karim bu zoti muborakka shunday salohiyat ato qilgankim, tibbiyot bobida bil-magan ilmi yo‘qdir. Birgina tomir urish holatiga qarab, sakkiz yuz sakson sakkiz dardni topadi. Yaqinda hazrat Ibn Sino huzuriga Nishopurdan bir navjuvon yigitni olib keldilar. Olib kelguncha esa yetti iqlim hakimlariga ko‘rsatganlar, ammo hech bir tabib, na Chin, na Hind va na Rum hakimlari sho‘rlikning joniga oro kirganlar, dardiga davo topganlar!

Shunda hazratim bu foniy dunyodan ul boqiy olamga rixlat qilishga chog‘langan bu majruhning tomirini ushlab, tug‘ilgan shahrini so‘radilar. Ayt-dilar. So‘ngra hazratim yigit tavallud topgan shaharning barcha dahalarini nomma-nom sanab chiqishlarini so‘radilar. Sanab chiqdilar. So‘ngra hakimi davron nomi zikr qilingan dahadagi har bir ko‘chani bir-bir aytib o‘tishlarini so‘radilar. Ayt-dilar. Shunda hakimi hoziq bu ko‘chada istihomat qilg‘uvchi barcha xonadonlarni nomma-nom atab chiqishlarini so‘radilar. Atab chiqdilar. Shunda taqsiri olam bu xonadonning hamma a‘zolarini bir-bir sanab o‘tishlarini so‘radilar. Sanab o‘tdilar. Bas! Sanash chog‘ida bir sohibjamol ismi tilga olingan edi, sho‘rlik yigitning yuziga qizillik yugurib, yumuq ko‘zlari «yarq» etib ochilib ketdi. Shunda xastaning tomir urishiga quloq solib o‘ltirgan hakimi davron uning qo‘lini qo‘yib yuborib kuldilarkim:

– Yigitning dardi oshiqlikdur! Darhol tug‘ilgan shahringizga qayting! Xasta farzandingizga o‘shal sohibjamolni olib berib, to‘y-tomosh bilan ularni qovushtiring, illo, yigit dardining davosi visoldur!





Ikkinchi g'ulom sershovqin bozorning boshqa bir joyida atrofiga bir guruh bekorchilarni yig'ib, Alloh onasining qornidayoq tengsiz salohiyat va cheksiz zakovat ato qilgan allomayi zamonning zakiyligi to'g'risida va'z aytardi:

Shundaykim, hazrat Ibi Sino hali tili chiqmagan chog'ida ularning xonadonida bir yosh cho'ri xizmat qilgan. Cho'ri go'dakni, go'dak uni yaxshi ko'rgan. Bir kun cho'ri uy bekasining yoqut ko'zli nodir uzugini olib, go'dakka ko'z-ko'z qilib o'ynab o'tirgan ekan, uzuk bir qop tariq ichiga tushib ketgan, cho'ri esa buni bilmay qolgan. Chunki shu payt uni uy bekasi chaqirib qolgan.

Bir mahal uy bekasi cho'risidan uzugini so'raydurkim, uzuk yo'q. U uzukni qayga qo'yanini bilmaydi. Bas, cho'rini o'g'rilikda ayblab, uydan haydab yuboradilar. Cho'ri yig'lay-yig'lay xonadondan chiqib ketadi. Buni ko'rgan go'dak ham chirqirab yig'laydi. U ikki kun tinimsiz yig'laydi, nechundir bir qop tariqqa talpinib yig'laydi. Buni ko'rgan go'dakning otasi bu qopda bir sir-asror bo'lsa kerak deb, qopdagi tariqni yerga to'kib, uni titib ko'radi. Qaraydiki, tilla uzuk tariq ichida! Ota-ona go'dakning zakiyligiga lol qolib, cho'rini topib keladilar va undan afv so'raydilar!

Shahar bozorlarining eng gavjum joylarida, rasta va guzarlarda ko'r darvesh boshliq g'ulomlar hazrat Ibn Sino to'g'risidagi bunday rivoyatlarni to'qishda davom etar, Abu Shilqim esa egnida qimmatbaho movut to'n, boshida hakimlar kiyadigan ko'k movut qalpoq, qo'lida oltin barobariga sotib olingan «al-Qonun», serhasham xonaning to'rida savlat to'kib o'tirar va eshikda turnaqator tizilgan xastalarni bitta-bitta qabul

qilardi. U, ko'zlari yumuq, xushsurat, cho'zinchoq yuzida viqorli tabassum goh xastalarning tomir urishlariga, goh qorin va ko'krak qafaslariga quloq tutar, so'ng giyoh to'la sandiq oldida qo'l qovushtirib o'tirgan ziyrak g'ulomiga murojaat qilardi. Forsiy kirsra giyohlar nomini turkiy, turkiy kirsra forscha aytar, bu narsa nechundir xastalarni lol qoldirar, ularning qalbida «hakimi davron»ga nisbatan cheksiz mehr va ixlos uyg'otardi. Eng qizig'i, Abu Shilqim buyurgan dorular aksar hollarda bo'lmasa ham, bot-bot xastalarga shifo keltirar, shunda basavlat va badavlat a'yonlar ta'zimga kelar, ta'zim bilan birga lutfi ehson deganingiz yomg'irday yog'ilib kelaverardi. Biroq, evoh! Po'lat sandiqlarni to'ldirib yuborgan bu oltinlar oxir-pirovardida faqat yaxshilik emas, baloyi nafs atalmish dardi bedavoni ham yetaklab keldi-yu, bir kuni Abu Shilqim bilan ko'r darvesh orasida yomon o't chiqdi!

– To'g'ri, tushgan oqchalarda sening ham ulushing bor, shaytoni basir! – dedi Abu Shilqim.  
– Ulushingni olib turibsen, shukur qil! Bu ehsonlar senga keldimi yo hakimi davron... ya'niki kaminagami?

Ko'r darvesh, yolg'iz ko'zi sovuq chaq nab, zaharxanda qildi:

– Hakimi davron emish! Hali sen chin Ibn Sino ekaningga inonib ham qolgandursen? Yomon eshak o'z egasini ustiga mindirmaydi. Seni «hakimi davron» qilgan kim ekani yodingdan chiqibdi, ho'kiz!

Lekin ho'kizdan «hakimi davron» yaratgan ko'r darvesh nechog'liq yanglishganini bilmas, Hurmiton bozorida topgan bu «ho'kiz» allaqachon qashqirga aylanganidan bexabar edi. Bu qashqir



o'zi yollagan katta karvon bilan ovloq Gurganjdan Buxoroga qaytarkan, bir kun kechasi joniga tekkan «shaytoni basir»ni sodiq g'ulomlariga ushlatib, qo'l-oyog'ini bog'latdi-da, hadsiz qumliklar orasiga tashlab ketdi. Qashqir qashqirligini qildi. Uning ko'nglini na ko'r darveshning achchiq faryodi erita oldi, na yolg'iz ko'zidan tirqirab oqqan obidiydasi!

Kim bilsin, ehtimol, Abu Shilqim ibn Shahvoniy bu ayovsiz ishni qilmaganida bugun boshiga bu savdolar tushmas edi. Zotan, kimsan Ibn Sino nomi bilan shuncha boylik orttirganidan keyin bu qaltis ishni qo'yib, tinchgina kun kechirsa bo'lmasmidi? Shunday qilganida hozir, ehtimol, bu sovuq qabrda yer tishlab yotmas edi!

Ha, Abu Shilqim o'shanda ona yurti Buxoroga behisob davlat bilan qaytdi. Ota mulkini sovrub, gado kiyimida chiqib ketgan Abu Shilqim o'n-o'n besh yildan keyin bir karvon mol-dunyo, o'nlab g'ulomlar, bir nechta go'zal kanizlar va xurjun-xurjun ganj bilan qaytdi. U nafaqat Juyi Mo'liyon dahasidagi bog'-u rog'larini qaytarib oldi, balki saroy tabiblari davrasiga kirishga ham muyassar bo'ldi. Rost, Buxoroyi sharifda chin Ibn Sinoni ko'rganlar va bilganlar bo'lgani uchun o'zini hazrat Ibn Sino deb atashga jur'at etmadi. Lekin bunga ehtiyoj ham yo'q edi. Buzsiz ham sal o'tmasdanoq Buxoro hokimi amir Aliteginning eng yaqin habibi va tabibiga aylandi. Padari buzrukvori Abu Faysal so'nggi somoniylar davrida qanday izzat-e'tiborga ega bo'lgan bo'lsa, Abu Shilqim ham somoniylar davlatini zer-zabun qilgan ilkxonlar saroyida shunday izzat-ikromga erishdi. Ammo... baxtga qarshi, bundan uch-to'rt

yil muqaddam mana shu mustabid sulton Mahmud G'aznaviy o'n ming jangovar fil va hisobsiz lashkar bilan Buxoro sarhadiga bostirib kirdi-yu, Abu Shilqimning inongan tog'i amir Alitegin Buxoroni tashlab qochdi. O'n ming tuyalik mol-dunyosi, sandiq-sandiq oltin-u kumushlari, mashhur harami, haramidagi kenja xotini bilan suyukli qizini tashlab qochdi. Aliteginning bu behisob ko'chi orasida Abu Shilqimning ham o'ttiz-qirq tuyalik mol-mulki, bir necha sandiq ganji va bir necha go'zal kanizlari qolib ketdi.

Mayli, bosh omon bo'lsa telpak topilar, degan gaplar rost ekan. Abu Shilqim sal o'tmay sulton Mahmud suvorilari qo'lida ketgan qirq tuya dunyosini qayta tiklab oldi. Alitegin ham o'n ming tuya dunyosini yuz ming tuya qilib qaytarib oldi. Sultondan emas, yo'q, jafokash fuqarodan qaytarib oldi. Ammo sultonning qo'lida ketgan haramini, to'g'rirog'i, haramidagi suyukli kenja xotini bilan suyukli qizini qaytarib ololmadi.

Alitegin necha marta G'aznaga elchi yubordi, xotini bilan qizi o'rniga ulardan ming chandon suluvroq kanizlar va'da qildi, lekin sulton Mahmud nechundir bu ikki asirani qaytarishni istamadi.

Har safar G'aznaga yuborilgan elchilar quruq qaytib kelganda amir Alitegin qafasga tushgan yo'lbarsday o'kirib, sulton Mahmudga qarshi lashkar tortishga chog'lanardi. Biroq g'azabidan tushib, sal hushiga kelgach, barobar qadam tashlaganda Buxoro tuprog'ini larzon-larzon qilgan o'n ming jangovar fil ko'z oldiga kelar, xartumlarni barobar ko'tarib, barobar o'kirganda osmoni falakni zir titratgan na'ralari quloqlari os-

tida qayta yangraganday bo'lardi-yu, dami ichiga tushib ketardi...

Bundan besh-olti oy muqaddam kutilmagan bir voqea sodir bo'ldi-yu, Abu Shilqimga bir umr tinchlik bermagan hazrat Ibn Sino yana uning halovatini buzdi.

Vaqt tun yarmidan oshgan edi. Kechasi bilan aysh qilib charchagan Abu Shilqim mast uyquda edi. Banogoh saroydan chopar kelib uni uyg'otdi.

Abu Shilqim saroyga yetib borganida amir Aliteginning mashvaratxonasiga Buxoroyi sharifdagi barcha ulamoyi zabardastlar, mashhur al-lomalar, saroy tabiblari va shoirlari yig'ilgan edi. Amirning o'zi, odatdagiday, qovog'i soliq, bir mahallar Nuh ibn Mansur o'tirgan oltin taxtda bir tutam siyrak soqolini silab, xayolga cho'mib o'tirar, uning o'ng tomonidagi kursini notanish, qiyg'ir burun bir kimsa egallagan edi. Ma'lum bo'lishicha, surmarang sallasiga elchilik nishoni qadalgan bu kimsa amir al-muslimni sulton Mahmud G'aznaviyning maxsus va muxtor elchisi bo'lib, hazrat Ibn Sinoni qidirib yurgan ekan. Elchining qo'lida shohkosaning yuzidekkina yumaloq surat bo'lib, bu Ibn Sino hazratlarining suratlari edi. Amir Alitegin, elchining qo'lidan bu suratni olib, mashvarat ahliga namoyish qilar ekan, puchuq burnini jiyirib kuldi:

– Ehtimolkim, oralaringda yashirinib yurgandur bu hakimi davron? Ana, Abu Halim ibn Fay-salga qaranglar! Suratdagi hazrat Ibn Sinoning baayni o'zi? Vo ajabo! Nechun yashirinib yurib-siz, taqsiri olam? Yashirinmang! Toki, amir al-mo'minin Ibn Sino hazratlariga bo'yi barobar oltin in'om etmoq azmida emish!

Amir Alitegin shunday deb qah-qah otib kuldi. Lekin Abu Shilqimga yalt etib qaragan mashvarat ahli orasida: «Yo, tavba, xuddi o'zi-ya! Xuddi...» – deb shivir-shivir qilganlar ham bo'ldi... Sultonning elchisi ham mushukning ko'zlariday sarg'ish ko'zlarini chaqchaytirib, Abu Shilqimga qadalib qolgan edi. Biroq Abu Shilqimni har kuni ming marotaba ko'rib, u bilan ming marotaba so'zlashib yurgan odamlarning uni hazrat Ibn Sino deb tan olishlari jezni oltin deyish bilan barobar edi!

Darhaqiqat, mashvarat ahlining «Yo, tavba! Xuddi o'zi-ya! Xuddi!» degan shivir-shivirlari avval kulguga, kulgu piching va kesatliqlarga aylandi-yu, Abu Shilqimning usiz ham hasad va raqobat o'tida kuygan yuragi battar kuydi. U shunday yonib ketdiki, ertasiga bor mulkini, kanizlari va g'ulomlarini Buxoro bozoriga chiqarib pulladi, uy-joyini ishonchli odamlar qo'liga topshirdi, so'ng saroy musavviriga elchi suratidan bir nusxa ko'chirtirib xurjuniga joyladi-da, Balx tomon otlangan katta karvon bilan birga subhi sodiq Buxoro darvozasi-dan chiqdi. Ikki haftadan keyin ko'r darvesh bilan birga qilgan ishini Balxda takrorladi. Jarchi yollab jar soldirdi. Buxorolik yosh shogirdi esa hazrat Ibn Sino to'g'risidagi hikoyalardan so'zladi. Sinov Abu Shilqim ibn Shahvoni kutgandan ming chandon yaxshi o'tdi. Xasta borki, unga asalga yopishgan pashshaday yopishdi. Pul deganingiz yomg'irday yog'ildi. Shundan keyin ular Teginobodga, Teginoboddan G'aznaga yo'l olishdi...

Xo'p, u yog'i-ku shunday bo'ldi, endi bu yog'i ne bo'ladi? Taqdiri ne kechadi? O, qarib quyulmagan nodon! Bir oyog'ing yerda bo'lsa, bir oyog'ing

go'rdan turganida hazrat Ibn Sino bo'lishni orzu qilgan miyasiz eshshak!

Yo'q, nafsilamrini aytganda Abu Shilqim ibn Shahvoni hazrat Ibn Sino bo'lish uchun qilmadi bu ishni. U faqat... omadi kelib, sultonning qalbiga yo'l topa olsa, amir Aliteginning kenja xotini bilan suyuqli qizini qutqazib olish niyatida jazm qilgan edi bu yumushni! Ularni qutqazib, Aliteginga in'om qilish va bu bilan Buxoro hokimining cheksiz muhabbatiga erishish niyatida bel bog'lagan edi bu ishga! Mana, niyatiga ham yetdi! Yetdi-yu, yiqildi! Endi bu sovuq go'rdan chiqishi amri mahol uning! O'ligi chiqadi bu go'rdan! Yo'q, o'ligi ham chiqolmaydi, kalamushlarga yem bo'ladi o'ligi, yem!..

Abu Shilqim ibn Shahvoni yana peshonasini yerga gurs-gurs urib, yer tirnashga kirishdi.

## SAKKIZINCHI BOB

Beruniy go'yo yomon tush ko'rib, bosinqiragan odamday, yuragi gurs-gurs urib uyg'onib ketdi. U anchagacha qayerga kelib qolganini anglay olmay yotdi, so'ng ko'zi shiftdagi do'ppidekkina tuynukka, g'adur-budur devor tokchasiga miltirab turgan moychiroqqa tushdi, tushdi-yu, yuragi orqasiga tortib ketdi.

Subhonollo! U tanish hibsonada, bundan o'n uch yil muqaddam G'aznaga kelgan, to'g'rirog'i, majburan olib kelingan yili tushgan zindonda yotardi! Faqat unda bir o'zi emas, yonida keksa ustod Abdusamad Avval<sup>1</sup> ham bor edi.

---

<sup>1</sup> Mashhur olim, Beruniyning ustozlaridan biri.

Kecha Osmon malikasi qasrida bo'lgan mashvaratdan keyin Beruniyning harorati oshib, ahvoli shunday og'irlashdiki, bu sovuq tosh qafasga qanday kelganini bir eslasa, bir eslay olmaydi.

U hamon o'z ko'zlariga ishonmas, nazarida, hamon tush ko'rayotganday edi. Yo'q, bu tush emas, u chindan ham o'n uch yil muqaddam tushgan zindonda yotardi. O'n uch yil ichida zindonda hech narsa, hatto, yerga to'shalgan eski bo'yralar ham o'zgarmabdi! Faqat ustod Abdusamad Avval yo'q, ustod yotgan joyda hozir qora qurum bosgan katta cho'yan qumg'on turardi, xolos.

Ustod Abdusamad Avval!..

Beruniy a'zoyi badani zirqirab, asta ko'zini yumdi, yumgan zahoti nigohi oldiga Ko'shki davlat maydoniga yig'ilgan behisob olomon keldi... Olomonning qoq o'rtasidagi ochiq joyga baland so'ri qurilib, unga to'rtta dor tikilgan, dorlar tagida soqollari ko'ksiga tushgan to'rtta mo'ysafid turar, ular orasida... ustod Abdusamad Avval ham bor edi.

Qo'llarida og'ir kishan, egnida kafan yanglig' uzun bo'z yaktak, yalang bosh, yalang oyoq, osmonga tikilgan ko'zlarida qo'rquv emas, yo'q, cheksiz bir qahr, soqol bosgan shiddatli yuzida mag'rur sokinlik!

Yodida bor, bu mudhish voqeadan bir hafta oldin ularni, ya'ni Gurganjdan haydab kelingan bir guruh allomalarni Ko'shki davlat saroyiga taklif qilishgan edi. Xuddi kechagiday noyob zeb-ziynatlar, ipak gilamlar, billur qandillar, g'aroyib oltin ma'budalar bilan bezatilgan mashvaratxonada ularni sulton o'zi qabul qilgan edi.



U mahalda sulton hali yigitday navqiron edi, egnida zarbof to'n, boshida injular qadalgan toj, serbar tilla kamarida tilla shamshir, oyog'ida kumush nag'al qoqilgan g'arch-g'urch etik, sulton Mahmud o'shanda Xorazmdan keltirilgan allomalarga, ayniqsa, Abu Rayhon bilan ustod Abdusamad Avvalga katta izzat-ehtrom ko'rsatgan, ularni ulug'lab, oltin kosalarda sharob sipqargan, ziyofatdan keyin esa egnilariga kimxob to'nlar yopgan, qimmatbaho sovg'a-salomlar in'om etgan edi. Abu Rayhon ziyofat vaqtidayoq g'aznalik shoirlar, xususan, ulamoyi zabardastlarning qovoqtumshuqlari osilib qolganini payqab, ko'ngli g'ash bo'lgan edi. Darhaqiqat, uch-to'rt kun o'tmasdanoq, tun yarmidan oshganda uning hujrasiga bir guruh navkarlar bostirib kirib, uni «Qal'ayi qahr» deb dong chiqargan mana shu tosh qafasga olib kelib tiqishgan edi. Eng yomoni – uni olib kelishganda hozir qora qumg'on turgan joydagi eski bo'yrada... ustod Abdusamad Avval yotgandi!

Keyin bilsa... mashvarat vaqtida qovoqlaridan qor yoqqan G'azna ulamolari ularni dahriylikda ayblashgan, bunga esa Beruniyning qarmatiylar<sup>1</sup> rahnamosi imom Ismoil kechmishlari haqidagi bir risolasi sabab bo'lgan ekan!..

Xorazmda, Ma'mun ibn Ma'mun saroyida xizmat qilib yurgan chog'larida pinhona yozilgan bu risolani dunyoda faqat bir odam, u ham bo'lsa ustod Abdusamad Avval bilar, to'g'rirog'i, risola o'zi ustodning iltimosiga binoan yozilgan edi. Yoshlik chog'larida badavlat padarining badavlat xonadonini tark etib, tabiblik bilan kun kechir-

---

<sup>1</sup> O'rta asrlarda diniy g'oyalar vositasida feodal zulmiga qarshi qaratilgan kurashchilar oqimi.

gan ustod Abdusamad Avval yolg'iz imom Ismoilni tan olar, haq yo'lida esa tariqatdan boshqa hamma narsani inkor etardi! U namozni birda o'qisa, birda o'qimas, ro'zani ham birda tutsa, birda tutmas, ammo bir burda non topsa yo'qsillar va yetim-yesirlar bilan baham ko'rardi. U faqir hujrasida zohidlik qilib, yo'qlab kelgan bitta-yarimta kasallarni davolar ekan, hech kimdan tap tortmay:

– Xudo nedur? – deb xitob qilar va o'zi javob berardi: – Adl-u haqiqatdur! Gunohi kabir nedur? Zebi ziynat va ayshi ishratdur! Savobi azim nedur? Mehri shafqatdur! O'zing yanglig' bandalarni suymoqdur! Baloyi nafsni tiymoqdur!..

Ustod Gurganjda, o'z kulbayi vayronasida o'tirib, kelgan-ketganlarga o'z e'tiqodini bayon etarkan, birovlar uning va'ziga quloq solsa, birov quloq solmas: ko'plar uni tarki dunyo qilgan bir devona deb hisoblar edi. Lekin bir qarashda g'arib ko'ringan bu chol faqat tabobat emas, boshqa ilmlar bobida ham tengsiz edi!

Tarki odat amri mahol, deganlaridek, ustod G'aznaga kelgandan keyin ham o'z odatini qo'ymadi, hech kimdan tap tortmay o'z so'zini so'zlayverdi. U, hatto, o'sha kuni, Ko'shki davlatda bo'lgan sulton G'aznaviy mashvaratida ishtirok etgan kuni ham, ketayotganlarida, egniga yopilgan kimxob to'nini yechib tashlab ketgan va uning zindon qilinishiga bu mislsiz «takabburligi» ham sabab bo'lgan edi!

O'shanda, mana shu zil-zalvar eshik ochilib, Beruniyni bu tor qafasga itarib yuborishganlarida, ustod bo'yraga tiz cho'kib, namoz o'qib o'tirardi. Toat-ibodatga birda rioya qilib, birda rioya qilmaydigan ustod eshikda Abu Rayhonni ko'rib

«yalt» etib qaradi. Osoyishta sersoqol yuzida kishini rom qiluvchi bir shiddat, o'siq qoshlari tagiga yashiringan sinchkov nigohida o'zgacha bir qat'iyat.

– Yodingda bo'lsin, Abu Rayhon! Imom Muhammad Ismoil... – Tangri uning qabrini munavvar etgay! – Imom Ismoil tariqati to'g'risidagi risolani kamina bitganmen! Sen emas, kamina bitganmen! So'zimni angladingmu, Abu Rayhon!

Beruniy beixtiyor boshini xam qilib:

– Bu so'zga kim inonadi, ustod? – deb so'radi.  
– Risolaga kaminaning nomi bitilgan.

– Yo'q, faqir sening nomingni o'chirganmen. Ne chora? Gurganjdan kelgan munofiq bir hamyur-timiz, sababi baxillik, ig'vo qilmish! Yodingda bo'lsin – sen yoshsen, kamina esam, yoshimni yashab, oshimni oshab bo'lganmen.

– Ustod!

– Bas! – chol, to'satdan oldidagi qora qumg'onni olib, yerga gursillatib urdi. – Agar bu tilagimni bajo keltirmasang bergan ilmimga rozi bo'lmasmen!

Beruniy arang boshini ko'tarib, qora qumg'on-dan bir qultum suv ichdi, hamon ko'z oldida turgan to'rtta dorni haydamoqchi bo'lib, yana ko'zini yumdi, lekin bu voqea go'yo o'n uch yil avval emas, xuddi kuni kecha bo'lib o'tganday, sira nigohi oldidan ketmas edi.

Ustod, egnida oq kafan kabi uzun bo'z yaktak, yalang bosh, yalang oyoq baland dor tagida turipti, taqir qirilgan ulkan boshini baland ko'tarib, ko'krak kerib turipti, osoyishta chehrasida, ko'kka tikilgan o'tkir ko'zlarida na qo'rquv bor, na iztirob!

Ana, osmoni falakni zir titratgan nog'oralar gumburi-yu karnay sadolari ostida darvoza ochi-

lib, saroydan... bir yonida vazir-u vuzaro, bir yonida qozi imom Sayid, sulton Mahmud ko'rin-di. Qilich yalang'ochlab, ot o'ynatgan yuzlarcha sarbozlar qurshovida sulton dor ro'parasida-gi ulkan marmar supaga chiqdi, chiqishi bilan Ko'shki davlat maydonini zir titratgan nog'oralar gumburi, osmoni falakni larzaga keltirgan kar-nay sadolari tinib, dengizday guvillagan olomon birdan suv quyganday jim bo'ldi.

O'shanda hibsdan chiqib, yana allomalar davrasiga qo'shilgan Beruniy ikki ko'zi ustodda, karaxt bo'lib turar, u butun vujudi bilan ustod tomon talpinar, u bilan so'ng bor quchoqlashib vidolashgisi kelar, ayni zamonda, qandaydir bir mo'jiza ro'y berib, dor tagida turgan ustodning afv etilishini ko'kdan iltijo qilardi.

Yo'q, Beruniy kutgan mo'jiza ro'y bermadi. Karnay sadolari va nog'oralar gumburi to'xtab, yig'ilgan olomon sukutga cho'mishi bilan qozi imom Sayid o'rnidan turib, va'z aytdi. U adolat qilichini qo'lida mahkam ushlab, barcha g'a-nimlar va dahriylarni qatlu om qilishga ahd-u jahd etgan, kulli mo'minlar mukammali va bani odamlar afzali amir al-muslimin, sulton Mahmud ibn Sabuqtegin a'lo hazratlariga hamd-u sanolar o'qidi. Egnida tiriklar libosi bo'lmish qora libos, boshida oftobda ajib tovlangan surmarang sal-la, imom Sayid hazratlarining ovozi tobora tiniq-lashib borar, yig'ilgan olomoni sehrlovchi ajib ohanglar kasb etib, maydon uzra bir tekis oqar-di. Lekin, banogoh, imom hazratlari endi ilhomga kirib, ovozi endi yuqori pardalarga ko'tarilganida dor tagida turgan ustod qo'lini betoqat silkitdi-yu:

– Xudo nedur, ey betavfiq? – deb xitob qildi. – Xudo – bu adl-u haqiqatdur!

Kutilmaganda momaqaldiroqday qaldiragan bu ovoz Ko'shki davlat qasrining yuksak tillakori peshtoqlariga urilib, o'n barobar kuchli aks sado berdi: – Adl-u haqiqatdur!.. Savobi azim nedur? – Yetim-yesirlar boshini silamoqdur! Gunohi kabir nedur? – Sen betavfiq yanglig' aysh-u ishrat va zebe ziyinat ishqida insof-u diyonatni unutmogdur!

Ustod har safar ovozi momaqaldiroqday qaldirab xitob qilganida saroy peshtoqlari yuz barobar kuchli aks sado berar, butun maydon – nayinki maydon, hatto, soyning u yuzidagi shahar, behisob ko'chalar, ko'chalardagi rastalar, karvon-saroylar, guzarlar – butun dorus-saltanat bu xitob, bu aks-sado sehriga mahliyo bo'lib qolgan edi. Go'yo bu so'zlar tiriklayin oq kafanga o'ralgan yalang oyoq, yalang bosh bir allomaning va'zi emas, g'oyibdan kelayotgan ilohiy nido edi!

Bu nido sehridan birinchi bo'lib sulton hushiga keldi:

– Sipohsolor qayda? Bu shakkok so'zlarni eshitmoq gunohi kabir emasmu? O'chir ovozini bu betavfiqning! O'chir!

«O'chir! – sado berdi tillakori peshtoqlar. – O'chir!»

Dor tagida qandaydir kurash boshlandi. Ustodning boshiga sirtmoq tashlandi, ammo shu payt hamon dengizday guvillagan olomon uzra yana o'sha ilohiy ovoz yangradi.

– Hoy, aysh-u ishrat azmida iymon-u e'tiqodini yodidan chiqargan bandayi ojiz Mahmud G'aznaviy! So'nggi kalomimni eshitgaysen!.. Xudo-

vandi karim gunohlarini kechirmaydi sening!  
Qilichidan qon tomgan senday mustabidni...

– Chop!

Sultonning hayqirigʻidan hushlariga kelgan suvorilar olomon tomon ot surdi-yu, hamma yoq agʻdar-toʻntar boʻlib ketdi...

... Mana, oʻn uch yildirki bu manzara, bu alamli tuygʻu Abu Rayhonning xayolidan ketmaydi, bilʻaks, har eslaganida koʻksiga nina sanchilgan-day boʻladi...

O, ustod, ustod!

Mana, Beruniyning oʻzi ham esini tanibdiki, haqiqat izlaydi. Haqiqat yoʻlida kirmagan koʻchasi, yurmagan yoʻli qolmadi. Birda uni koʻkdan kutsa, birda ilm va aql-u idrokdan qidirdi, yana birda Qobus ibn Vushmagir, Maʼmur ibn Maʼmun va sulton Mahmud kabi hokimlarni yoʻlga solib, haqiqatni qaror toptiraman, deb oʻyladi, biroq, e voh, ustoz aytgan adl-u haqiqat hamon undan qochmoqda, shamol kabi, yovvoyi ohu kabi tutqich bermay qochmoqda. U boʻlsa umri bino boʻptiki, «haqiqat» deb atalmish bu «ohu»ni quvib yuribdi. Bilʻaks, turov kuni Unsuriy aytgan «neʼmati ilohiy»ni inkor etmay, uni «bor» deb qutulib ketsa boʻlmasmidi? Unsuriy kabi ogʻzi toʻlguncha oltin oshasa boʻlmasmidi? U esa... hayhot, haqiqatni aytaman deb, mana, sovuq goʻrda yotibdi!

Bundan uch-toʻrt yil muqaddam, Hindistondan endi qaytgan mahallarida, bir kun sulton uni Koʻshki davlat saroyiga chaqirtirdi. U paytlarda Abu Rayhon oʻzi qurgan rasadxonadan chiqmas, kechalari sayyoralar harakatini kuzatar, kunduz kunlari Hindistondan olib kelgan kitoblari

va yozgan asarlarini tartibga solish bilan band bo'lardi.

Ko'shki davlatga chaqirishdan bir necha kun avval Buxoro yurishiga hozirlanayotgan sulton unga zoyicha tuzib, safar uchun saodatli onlarni aytib berishni topshirgan, Beruniy esa munajjimlik ilmiga ishonmasligini bahona qilib, bu ishdan bosh tortgan, shu sababdan saroyga otlanarkan, ko'ngli g'ash edi.

Beruniy borganda, sulton shoir Unsuriy kabi madhiyabozlar davrasida o'tirar edi. Beruniyni juda sovuq qarshi oldi, hatto, o'tirishni taklif qilmay, darhol «maqsadga» o'tdi.

– Mavlono Abu Rayhon! – dedi sulton qovog'ini uyib. – Yor-birolarlaring seni vohidi zamon allo-ma deb, hamd-u sano o'qiydilar. Sen bo'lsang... osiy banda neki topshiriq bersa, o'zingni nodonlikka olib, iltimosimni rad etasen!..

Beruniy qo'lini ko'ksiga qo'yib ta'zim qildi:

– Bir qoshiq qonimdan kechgaysiz, davlatpanoh. Aqli ojizim yetguncha valine'matinga xizmat qilmoqqa bel bog'laganmen. Ammo aqlim yetmasa.

Sulton o'tirgan joyida betoqat tebranib:

– Biz ham sening aqli zakovatingni sinamoq azmida chaqirdik! – dedi zaharxandalik bilan. – Boshingni ko'tarib atrofingga nazar sol, mavlono. Bu mashvaratxonada qancha eshik bor?

– To'rt eshik, olampanoh!

– Borakallo! – dedi sulton. – Hozir men o'rnimdan turib, shu eshiklarning biridan tashqariga chiqamen. Sen esa... qaysi eshikdan chiqishimni qog'ozga bitib, yostig'im ostiga qo'yasen. Topsang, to'n kiyasen, topmasang... egningdagi to'ningni

yechib berasen! – sulton shunday deb, Unsuriyga yuzlandi:

– Qog‘oz-qalam ber mavlonoga!

Shoir Unsuriy apil-tapil o‘rnidan turib, hamon o‘rtada qaqqayib turgan Beruniyga qog‘oz-qalam tutdi.

Beruniy bir qovog‘idan qor yoqqan sultonga, bir negadir kinoyali kulimsirab o‘tirgan davra ahliga sinovchan tikildi-yu, to‘satdan hamma narsani angladi: sulton uni mot qilish maqsadida chaqirtirgan! Qanday bo‘lmasin – mot qilish maqsadida! Bas, shunday ekan...

Beruniy, go‘yo miyasida allaqanday pinhoni murvatlar ishga tushganday, ko‘zlari yonib, xonaning to‘rt eshik va to‘rt devorini ko‘zdan o‘tkazarkan, xayoliga kutilmagan bir fikr keldi-yu, shoirning qo‘lidagi qalam-qog‘ozni yulib oldi. U bir zum ham ikkilanib turmasdan javobni tez yozdi-da, qog‘ozni to‘rt buklab, sultonga uzatdi. Sulton qog‘ozni olib yostig‘i tagiga yashirdi, biroq o‘rnidan turib tashqariga chiqish o‘rniga:

– Ustalar qayda? Chaqiring! – deb farmon berdi.

Darhol bo‘zag‘ada oybolta va cho‘kich ko‘targan besh-olti odam paydo bo‘ldi.

– Anov qibla tomondan tuynuk ochinglar! Darhol!

Ustalar devorni taraqturuq chopib, bir zumda odam sig‘adigan tuynuk ochishdi. Sulton miyig‘ida kulimsiraganicha o‘rnidan turib tuynukdan tashqariga chiqdi-da, shu zahotiyuq qaytib kirdi:

– Javobni o‘qi! – dedi u Unsuriyga qarab.

Unsuriy ham kinoyali kulimsiraganicha yosti tagidan qog‘ozni olib ochdi, ochdi-yu, rangi o‘chib, serrayib qoldi.

– O‘qi!





– Ja... javob to'g'ridur, olampanoh!

– Ya'ni?

– Ya'ni siz valine'mat tayyor eshiklardan chiqmay devordan tuynuk ochtirar emishsiz va shu tuynukdan tashqariga chiqar emishsiz, davlatpanoh!

– Yo, qudratingdan! – deb yubordi davradagilardan biri.

– To'n va sharob! – sulton shunday deb amr qildi-da, yuzini teskari burib:

– Istasang... Hamma baloga aqling yetadi, mavlono! – dedi g'ijinib. – Istamasang... Zoyicha tuzib, saodatli onlarni aytib berishni ham xohlamaysen!

– Olampanoh!

– Senga ijozat, mavlono!

Darhaqiqat, o'shanda ham Beruniy qilmagan ishni shoir Unsuriy qildi. Zoyicha tuzib, g'alaba keltirguvchi saodatli onlarni aytib berdi. So'ng, Buxoroga birga borib, hisobsiz in'omlar, tillik va tilsiz boyliklar orttirib qaytdi. Beruniy esa... anov madhiyaboz to'qigan cho'pchakni haqiqat deb, og'zi to'la oltin oshash o'rniga uni inkor etib yuripti! Undan ko'ra ul «ne'mati ilohiy» Hindiston yo Chin-mochin tomonlarda o'sadi, deb Unsuriy kabi ulug' martabalarga erishsa bo'lmasmidi? Bo'lar edi! Chunki... ul «ne'mati ilohiy»ni topib kelguncha yo sulton o'lardi, yo elchining o'zil.. Beruniy bo'lsa... Mayli, hamma in'om, hamma boyliklar o'shal madhiyabozlarga buyursin! U esa... uning uchun bitta-yu bitta tasalli qoldi. U ham bo'lsa ilm, bitgan va bitmoqchi bo'lgan asarlarini nihoyasiga yetkazmoq. Shundan boshqa orzusi yo'q uning! Yozishni niyat qilgan bu kitob-

lari orasida ustod Abdusamad Avvalga bag'ishlangan risola ham bor. Ammo... nahot uning bu ezgu orzulari ro'yobga chiqmasa? Nahot, taqdiri azal unga shunchalar beshafqat bo'lsa? Nahot, e'tiqod va haqiqat deb bu sovuq qafasda toabad qolib ketssa?

## TO'QQIZINCHI BOB

### 1

Vazir Abul Hasanak kiyik oviga Gardiz qal'asi yaqinidagi tog' oralig'ini tanladi. Bu yerda, atrofi qorli cho'qqilar bilan o'ralgan daralarda qoplonlar, chiyabo'rilar, yo'lbarslar makon qurgan, yuqorida, tog'-u toshlar ustida yovvoyi echkilar, mugizlari quloch-quloch arxarlar gala-gala bo'lib izg'ib yurar, tog' etagidagi qir va sayhonliklarda esa yosh kanizlarday hurkak, go'zal ohular uchardi. Eng muhimi, sultonning padari buzrukvori amir Sabuqteginga omad va saodat keltirgan ilohiy kiyik xuddi shu vohada, Gardiz qal'asi oldidagi sayhonlikda uchragan.

Amirning aytishicha, o'shanda ham xuddi hozirgiday bahor fasli ekan. Qaysi bir jangda mag'lubiyatga uchragan amir Sabuqtegin, – Alloh ruhini shod etgay! – ko'ngli vayron, yuragi g'ash, otda G'aznaga yolg'iz qaytayotgan ekan.

Amir Gardiz qal'asidan chiqib, keng sayhonlikdan o'tayotganida uning yo'lini uloqchasini ergashtirib olgan bir ona kiyik kesib o'tibdi. Amir darhol qo'liga kamonini olib, otishga chog'lanibdi, biroq jajji uloqchaga rahmi kelib, bolalik kiyikni tiriklay ushlashga ahd qilibdi-da, otining boshi-

ni qo'yibdi. Lekin ona kiyik tutqich bermabdi, toshdan-toshga sakrab, bir zumda ko'zdan g'oyib bo'libdi, mitti uloqcha esa qocholmapti, ingichka oyoqchalari mayishib, ora yo'lda to'xtab qolibdi. Shunda amir otdan tushib, dir-dir titragan uloqchani egarga o'ngarib olibdi-da, o'z yo'liga ravona bo'libdi. Biroq sal o'tmay, orqada xuddi ona yig'isiday zorli bir nido qulog'iga chalinibdi. O'g'irilib qarasa, boyagi ona kiyik toshlar orasidan chiqib, amirning orqasidan ma'rab kelayotgan emish. Amir uni tutib olish azmida yana ot solibdi. Lekin ona kiyik yana toshdan-toshga sakrab, qirlarga chiqib ketibdi. Bu hol bir necha bor takrorlanibdi. Shunda amir Sabuqtegin ona kiyikka rahmi kelib, ko'ziga yosh olibdi-yu, uloqchani qo'yib yuboribdi. Ona kiyik bolasini ergashtirib chopqillaganicha tog'larga chiqib ketibdi...

Shu-shu, amirning boshida aylanib yurgan qora bulutlar to'zg'ib, unga omad va saodat yor bo'libdi...

Kecha oqshom sulton bu hikoyani gapirib berarkan, qilt-qilt yutinib, ko'ziga yosh oldi.

Ular sultonning suyuqli shabistonida yolg'iz suhbat qurishar, shift va tokchalardagi shamlarning aksariyati o'chirilgan, darichalariga shoyi pardalar tutilgan g'ira-shira xonada allaqanday sirli bir ruh hokim edi.

Sulton, qoqsuyak oyoqlarini Abul Hasanakka uqalatib, to'rt qavat shoyi ko'rpachada yonboshlab yotardi. Uning chuqur botgan mungli ko'zlari burchakdagi qoramtir soyalarga tikilgan, go'yo bu soyalar orasida padari buzrukvorining arvohi bor, go'yo sulton otasining ruhi bilan suhbatlashar edi...

Abul Hasanak sultonning allaqanday sirli hikoyasiga quloq solib o'tirarkan, a'zoyi badani go'yo chumoli o'rmalaganday jimirlab ketdi. Keyin negadir yaqinda bosh vazirning bog'ida ko'rgan bolalik kiyik yodiga tushdi-yu, birdan ko'ngli ravshan tortib?

– Oftobi olam! – deb xitob qildi. – Hozir ayni ov chog'i! Siz valine'mat ham ko'pdan beri ko'ksingizga shamol tegmay, diqqinafas bo'lib yotibsiz...

Sulton, mungli ko'zlarini burchakdagi sirli soyalardan uzib, sodiq nadimiga qaradi:

– Hm... ovga chiqsak... omadimiz kelurmi?

– Inshoollo, kelur! – dedi Abul Hasanak. – Ayni bahor, bir o'q bilan ikki qushni uradurg'on merganlar bor...

– Bas! Qushchilarga farmon ber: suyuqli qora lochinim bilan takaturkman qorabayirimni shaylasinlar!

Abul Hasanak o'sha kechasiyoq vaziri a'zamning ko'shliga odam yuborib, uning bolalik kiyigini so'rab oldirdi. Rost, so'nggi paytlarda Gardiz qal'asi atrofidagi tog'larda imom Ismoil G'oziy degan bir betavfiq makon qurgan, degan mishmishlar tarqalgandi. Qandaydir paydo bo'lgan bu iymonsiz imom Ismoil go'yo dordan qochgan qulli qalang'i-qasang'ilarni yoniga yig'ib, sultonga qarshi g'azavot e'lon qilgan emish!

Ammo, birlamchi, qamchisini qadab ketsa nene hokimlar qirq yil sajda qiladigan sultoni salotinga qarshi bir to'p juldurvoqi gadolarning bosh ko'tarib chiqishiga inonmoq qiyin, ikkilamchi, ehtiyot choralarini ko'rib qo'ymoq mumkin. Abul Hasanak shunday qildi ham. Ovga chiqishdan



bir kun avval Gardiz qal'asi tevaragiga pinhona ikki yuz nafar suvori yubordi. Sulton bilan ovga chiqadiganlar sonini esa o'n kishidan oshirmadi, ular orasida sultonning eng yaqin nadimlaridan faqat bir odam, shoir Unsuriy bor edi, xolos.

Ular shahardan chiqib Gardiz qal'asi etagidagi ko'm-ko'k yassi qirlarga yetguncha sulton soya-bon aravada bordi.

Bu qirlar tik qoyalarga, qoyalar ko'z ilg'amas baland tog'larga tutashib ketardi. Niliy osmon kabi ko'm-ko'k bu tog'lar tepasida, burgutlar makon qurgan yuksakliklarda Gardiz qal'asi elas-elas ko'zga chalinardi.

Kun iliq, terak bo'yi ko'tarilgan oftob pastdagi zaminga allaqanday iliq bir mehr bilan nur sochar, go'yo o'zi hayot bergan olam go'zalligidan zavqlanib, unga muloyim kulib boqardi. Olam esa chindan ham go'zal, ovloq tog'largacha cho'zilgan qir va adirlar yam-yashil, gurkirab o'sgan yovshan, shuvoq, kiyik o'ti va yovvoyi bedalar orasida mitti-mitti chitirgullar, nafarmon rang no'xataklar, binafsha va chuchmomalar yal-yal yonar, o'tlar orasida ko'zga ko'rinmas qushlar sayrar, havoni yalpiz, kakra, shuvoq va yana allaqanday giyohlarning sal taxir, xushbo'y hidi tutgan edi.

Sulton ipak pardalar bilan o'ralgan tepasi ochiq aravada chalqancha yotar, g'ir-g'ir shabada uning ochiq ko'ksini, oq oralagan siyrak soqol-mo'ylovlarini silab-siypar, biroq sulton buni sezmas edi. Uning g'amgin nigohi artilgan shishaday tiniq osmon qa'rida ko'z ilg'amas yuksakliklarda sokin so'zib yurgan qora burgutlarda edi. Go'yo bu mayin oftob, bu tiniq niliy osmon,

qorli tog'lar uzra asta suzib yurgan bu burgutlar uning qalbidagi allaqanday hasratli torlarni chertib, xayolini qayoqqadir olib qochgan, sultonning hazin nigohida unga yot bo'lgan tizginsiz bir g'am muhrlangan edi.

Sultonning qarshisida o'tirgan Abul Hasanak uning holiga yuragi zirqirab, Unsuriyga qaradi: «Bir yo'lini topib, ko'nglini ko'tar davlatpanohning!» degan ma'noda imo qildi.

Shoir Unsuriy qiziq hangomalar, kulguli voqealar, askiyalar, ko'ngil ochguvchi nozik rivoyatlar bobida ustasi farang, shu boisdan amir al-mo'minning hamma safarlarida hamroh, hamma bazmi jamshidlarida hozir-u nozir. Lekin hozir, olampanoh unga yot bo'lgan g'ayritabiiy bir ma'yuslikka cho'mib yotganda...

Shoir Unsuriy vazir janoblarining chertsqa qoch sachragudek qip-qizil, chiroyli yuziga hadiksirab qaradi-da, haram kanizlarining qo'llaridek nozik, oppoq qo'llarini ko'ksiga qo'ydi:

– Oftobi olam afv etsinlar! Kaminaning yodiga g'aroyib bir rivoyat tushdi...

Sulton so'nik nigohini niliy osmondan uzib, Unsuriyga qaradi. Uning chuqur botgan ko'zlari yaralangan qushning ko'zlariday unsiz bir alam bilan javdirab turardi.

– To'xta, shoir... deydilarkim, nazm ahli Xudovandi karimga yaqin emish. Shu boisdan nazm ahlini payg'ambar alayhissalom siylagan emish...

– Shunday, olampanoh!..

– Shunday bo'lsa... ayt-chi, nazm bog'ining bog'boni! Alloh taolo bu osmon, bu olam, bu par-randa-yu darrandani nechun yaratmish? Kim uchun, ne maqsadda yaratmish bu go'zallikni?

Shoir Unsuriy «yalt» etib Abul Hasanakka qaradi. Ammo vazirning qip-qizil ko'hlik yuzida sarosimadan boshqa ifoda yo'q edi.

– Davlatpanoh! – dedi Unsuriy hayajondan duduqlanib. – Alloh taolo bu osmon, bu qushlar, bu go'zallikni bani bashar uchun, ya'niki o'z bandalarining ko'zini quvontirib, dilini shod etmoq azmida yaratgandir!

– Bandasining ko'zini quvontirmoq, dilini shod etmoq azmida yaratgan bo'lsa... nechun unga o'limni ravo ko'radi?

Sultonning mumday sarg'ish yuziga qizillik yugurib, mungli ko'zlari allaqanday ichki bir isyon-dan charaqlab ketdi.

– Hukmi Alloh shu erur, bandayi ojiz uning hukmiga itoat etmoqdan boshqa choramiz yo'qdir, olampanoh!..

– Hukmi Alloh! – dedi sulton alam bilan. – O'zing afv etgaysen, Parvardigori olam! Va lekin... Yo'q, shoir! Men sendan boshqa bir javob kutgan edim, sen esang... qozi imom Sayid so'zini so'zlading!

Unsuriy madad tilab Abul Hasanakka qaradi, biroq vazir hamon sarosimada edi. Umri ayshi ishrat va kayfi safo bilan o'tgan Abul Hasanak bunday chigal, serjumboq gaplarni birinchi eshitishi. Shu yaqin kunlargacha unga sultoni salotinning hamma gaplari, bosgan har bir qadami, hatto, o'ylagan o'ylarigacha – hammasi ravshan edi. Ammo bu davosiz dardga chalinibdiki, sultonning gap-so'zlari uni faqat cho'chitadi, yuragiga allaqanday noaniq, sovuq g'uluv soladi, xolos!

Boz ustiga bu ov, o'zi o'ylab topgan bu qaltis ov! Kim bilsin, bu ovchilar hamma ishni Abul

Hasanak aytgan tarzda qoyilmaqom qilib bajo keltira oladilarmi yoxud «ov» chogʻida kutilmagan bir ishkal chiqib qoladimi? Shaytonga ustozlik qilguvchi bosh vazirning qoʻlbola ohusi-chi? Pistirmaga qoʻyilgan ovchilar ohuni moʻljallagan paytda pistirmadan haydab chiqara oladilarmi yoki haydab chiqaramiz deb, oʻzlarini bildirib qoʻyadilarmi? Boringki, bildirib qoʻyishmagan taqdirda ham, bu qoʻlbola ohu otliq sultonni koʻrib qochadimi yoxud odamga oʻrgangan, be-fahm maxluq qochmay, turib oladimi?

Gardiz qalʼasiga yaqinlashgan sayin bu oʻylar Abul Hasanakning miyasida gʻujgʻon oʻynab, koʻnglidagi tahlikaga tahlika qoʻshmoqda edi...

Merganlar qurshovidagi soyabon arava goh keng sayhonliklar, goh koʻm-koʻk qirlar osha qalin archazor togʻlar bagʻriga kirib bordi.

Haligina dimoqqa gup-gup urgan yalpiz, kiyik oʻti va yovvoyi yoʻngʻichqa atri endi bitta-yu bitta shu xushboʻy hid, archa hidi bilan almashti.

Ana, soyabon aravaga qoʻshilgan yoʻrgʻa otlar, asta yoʻrtib, tepasida bir tup sada oʻsgan baland qirga chiqdi. Qir ortida yana bir koʻz ilgʻamas keng sayhonlik koʻrindi.

Mashriq tomoni qorli togʻlarga borib tutashgan bu behudud sayhonlikning har joy-har joyida toʻp-toʻp gujumlar oʻsar, ovloqda kumush tasmalardek yarqiragan jilgʻalar koʻzga chalinar, kecha pinhona joʻnatilgan suvorilar koʻrinmas, ular, aftidan togʻ-u toshlar orasida pisib yotishardi.

Toʻsatdan sultonning:

– Toʻxta! – degan boʻgʻiq ovozi eshitildi. – Qora-bayirim qani? – sulton arava soyaboniga tirmashib, oʻrnidan dast turdi. Tuya junidan toʻqil-



gan oq chakmon ichida uning qurigan terakday baland bo'y-basti yana ham balandroq ko'rinar, birdan charaqlab ketgan qisiq ko'zlarida, butun vazohatida ilgarigi kuch, ilgarigi iqtidor barq urar edi!

Yelkasiga qora lochin qo'ndirib olgan bosh qushchi siynasi qaldirg'och qanotiday yaltillagan qorabayirni yetaklab keldi.

Peshonasiga ipak popuklar taqilgan, o'mrovi tilla tasmalar bilan ziynatlangan qorabayir oltin suvlig'ini chaynaganicha, betoqat yer depsinib o'ynoqlab turardi.

Sulton uzun, qoqsuyak qo'llarini quyma til-ladan yasalib, ustiga ipak gilamcha tashlangan egarga qo'ydi, ko'zlarini yumib, uzoq pichirlab turdi, so'ng qo'ltig'idan olmoqchi bo'lgan Abul Hasanakning qo'lini siltab tashlab, shaxt bilan o'zini egarga oldi.

– Iloyo omin! – shoir Unsuriy ko'ziga yosh olib, oppoq nozik qo'llarini duoga ochdi. – Xudovandi karim sizday dini islom homiysidan o'z inoyatini darig' tutmag'ay! Niyatingiz mustajob bo'lib, ovingiz o'ngidan kelgay, bu ishda padari buzrukvoringiz ruhi siz olampanohga madadkor bo'lg'ay, omin!

– Ilohi omin! – sulton yuziga fotiha tortib, to'satdan tirqirab oqa boshlagan ko'z yoshlarini sidirib tashladi-da, qorabayiriga qamchi bosdi. Usiz ham betoqat pishqirib turgan qorabayir, os-monga sapchidi-yu, qushday uchib ketdi.

Bir necha navkar sultonning ketidan chop-moqchi bo'lib, otlarini niqtashdi, biroq Abul Hasanakning «To'xta!» degan hayqirig'i bilan otlarining jilovini tortishdi.

Sulton tez uzoqlashib borardi. Egnida tuya juni-dan to'qilgan oq chakmon, boshida qora hoshiya-

li oq qalpoq, sulton, xuddi qorabayir ustiga qo'nib olgan katta oq qarg'aga o'xshar, uzoqlashgan sayin bu o'xshashlik ortib borardi... Ana, qorabayir yo'l yoqasidagi bir to'p gujumdan o'tib, ikkinchi gujumga yaqinlasha boshladi. Ana, gujumga yetib ham bordi. Shu payt... Yo, Rab! Qorabayirga qo'nib olgan oq qarg'aning oldida ikki qora nuqta, biri kattaroq, biri kichikroq ikki qora nuqta paydo bo'ldi-yu, tez uzoqlasha boshladi.

– Ohu! – dedi Abul Hasanak, quvonchdan entikib. – Allohga shukur! Amir al-mo'minning pok niyati mustajob bo'ldi! Bolalik ohu!..

Shoir Unsuriy tiz cho'kib, qiblaga qarab yer o'pdi.

– Fayzi ilohiyning alomati bu! Xudoga shukur! Sultoni salotinning nidosi dargohi ilohiyga yetib bormish!

Ana, qushday uchib borayotgan qorabayir oldinda lip-lip etgan qora nuqtalarning birini quvib yetdi. Otga qo'nib olgan «oq qarg'a» pastga egilib, uni ko'tarib oldi, lekin sal o'tmay uni yana qo'yib yubordi-da, asta orqaga burildi.

Abul Hasanak aravadan irg'ib yerga tushdi, shatakda turgan arg'umoqlardan biriga sakrab mindi-da, uzoqdagi gujumlar tomon ot surdi.

«E, Yaratgan egam! Nahot, uning rejaları ro'yobga chiqqan bo'lsa? U o'ylaganidan ham ziyodroq, bekami ko'st, bexatar tarzda ro'yobga chiqqan bo'lsa! Nahot, sultoni salotin bu ishlar-dan keyin ham Abul Hasanakni ul betavfiq Ali G'aribdan past ko'rsa? Nahot, bundan keyin ham vaziri a'zamlık lavozimini ul xomsemiz battoldan unga olib bermasa?»

Sulton, otini asta yo'rttirib, yaqinlashib keldi. Uning ko'zlaridan tirqirab yosh oqar, bir-biri-



ni quvib oqqan yosh tomchilari keng yuzini sel-day yuvib, oq oralagan siyrak soqoliga, soqolidan bo'yniga tomchilardi. Lekin sulton buni sezmas, sezsa ham yashirmas edi. Sultonning ko'z yoshlari Abul Hasanakning dilida jo'sh urgan quvonchga quvonch, hayratga hayrat qo'shdi, shoir Unsuriy esa bil'aks, amir al-mo'mininni ko'rib ho'ngrab yubordi.

– Allohga shukur! Istiqbolning xayrli foli bu, of-tobi olam! Xayrli foli!

Sulton qo'lini ko'tarib uni to'xtatdi-da, to-mog'ini bo'g'gan yig'ini «qult» etib yutdi.

– Sadoqati zohir vazirim! Darhol Ali G'aribga chopar yo'llang! Inshoollo, bugungi fayzi ilohiy sabab yaqin kunlarda «Mozori kalon»da g'arib-u g'urabo va yetim-yesirlarga osh berilgay! Qirq ho'kiz, qirq tuya, qirq biya, qirq qo'chqor so'yib, qirq botmon guruch damlangay!.. Hozir esa.. ho-zir barcha mulozimlarga! – sulton yaqinlashish-ga jur'at etmay, uzoqroqda to'xtagan qushchilar va merganlarga imo qildi. – Barcha mulozimlarga chopon kiydiring, qo'y so'yib ziyofat bering!

«Sadoqati zohir vazirim! Sadoqati zohir!» – Abul Hasanak hamma bilan barobar «ilohi omin!» deb xitob qilarkan, to'satdan tomog'i g'ip bo'g'ilganini sezib, boshini pastroq egdi.

## 2

Peshinda boshlangan ziyofat namozi asrga ya-qin tugadi. Qo'y so'yilib, hammaga chopon, shoir Unsuriyga kimxob to'n, Abul Hasanakka esa zarbof to'n yopildi.

Sulton gujum tagiga oʻrnatilgan taxtiravonda yonboshlab yotib, bu shodiyonani jimgina kuza-tar, uning bilinar-bilinmas qizillik yugurgan yal-poq yuzida allaqanday sirli, ilohiy bir shuʻla aks etardi. U goho-goho mizgʻiganday boʻlib, koʻzla-rini yumar, shunda nigohi oldiga darhol gujum ortidan yugurib chiqqan ona-bola ohular ke-lardi. Sultonning koʻnglini ravshan qilgan ichki shuʻla ham oʻsha daqiqada lop etib yongan edi... Boshda, sulton qorabayirini qamchilab, bostirib borganida, ona kiyik goʻyo undan qoʻrqmagan-day uloqchasi atrofida gir aylanib qoldi. Oyoq-chalari mitti-mitti, koʻzlari katta-katta kulrang uloqcha esa ot dupurini eshitgandayoq pildirab qochdi-yu, onasidan oʻzib ketdi. Ona kiyik avval uning ketidan asta chopqillab bordi, biroq ot du-puri kuchaygach, shamolday uchib, uzoqlashib ketdi-da, uloqcha orqada qoldi...

Sulton, dilida ajib bir nur, qoqsuyak vujudida favqulodda bir kuch, hamon tasir-tusur ot surib borar, u bilan uloqcha oʻrtasi tobora qisqarmoqda edi. Nihoyat, uloqchani quvib yetdi-da, lochinday chang solib, koʻtarib oldi. Shu zahotiyuq yiroq-lashib qolgan ona kiyik shartta toʻxtadi, bir zum joyida dir-dir titrab turdi-da, asta-sekin orqaga qayta boshladi...

Yo, Rab! Xuddi padari buzrukvori amir Sa-buqtegin aytgan ish boʻldi! Darhaqiqat, istiqbol-ning xayrli foli bu! Xayrli foli!

Sulton hayajon ichida asta egilib, dir-dir titra-gan uloqchani yerga qoʻyib yubordi, qoʻyib yubori-shi bilan dilida ajib bir chirogʻ «lop» etib yondi-da, vujudida oʻzgacha bir holat, qandaydir sirli, ilohiy bir holat sodir boʻldi. Hatto, oʻng biqinidagi ogʻriq

ham tappa to'xtab, ko'ziga qorong'i ko'ringan olam birdan yorishib ketdi. Shundan beri o'zini onadan qayta tug'ilgan go'dakday his etmoqda. Tog'lar bilan o'ralgan bu keng sayhonlik boyagidan ham keng, boyagidan ham tiniq, archalar hidi boyagidan ham xushbo'y, qorli cho'qqilar boyagidan ham yuksak, odamlar esa bir-biridan yaxshi, bir-biridan mehribon ko'rinib ketdi sultonning ko'ziga. Hatto, peshindan keyin sevalab yog'a boshlagan yomg'ir ham uning ko'nglini xira qila olmadi, bil'aks, bu iliq, mayin yomg'ir ham boyagi bolalik ohu kabi istiqbolning yaxshi alo-mati bo'lib tuyuldi. Ha, padari buzrukvori Muzaffar amir Sabuqteginning chehrasida valilik muhri bor edi! Shoshlik<sup>1</sup> lashkarboshining o'g'li Sabuqtegin Sayhun<sup>2</sup> bo'ylarida bo'lgan bir jangda somoniylar qo'shiniga asir tushib, Buxoro bezorida sotilgan. Uni sotib olgan quljallob Buxorodan Balxga yayov haydagan. Savdogar shunday be-rahm-beshafqat ekanki, otasining oti yo'l azobiga dosh berolmay piqilib qolganida, o'lgan otining egar-jabduqlarini ham qulining yelkasiga yuk-lagan... Shunda, bu azobi uqubatlardan holdan ketib yiqilib qolgan padari buzrukvori tush ko'rgan, tushida Xizr alayhissalom ayon bo'lib, bu uqubatlarga dosh berishini, toki, oxir-pirovardida unga saodat yor bo'lishini aytib, oq fотиha bergan. Xizr alayhissalomning bu fotihasi mustajob bo'lib, Balx bozorida padari buzrukvorini amir Alptegin sotib olgan. Alptegin, – Alloh unga o'z dargohidan joy ato qilg'ay! – yosh g'ulomi Sabuqteginga mehri tushib, uni o'ziga mahram

---

<sup>1</sup> Shosh – Toshkentning qadimgi nomi.

<sup>2</sup> Sayhun – Sirdaryo.

qilib olgan. Shu-shu padari buzrukvorining qora kunlari orqada qolib, taqdir unga kulib boqqan. Yosh nadimining mardligi va salohiyatiga amin bo'lgan amir Alptegin bu bevafo dunyoni yetim qoldirib, u boqiy dunyoni munavvar qilmoq kuni kelganda, uni, ya'ni suyuqli lashkarboshisi Sabuqteginni o'z taxtiga voris qilib qoldirgan.

Agar amir Sabuqtegin o'z xo'jasi amir Alpteginning bergan tuzini oqlagan bo'lsa, sulton Mahmud, o'z padari buzrukvorining tuzini oqladi. Amir Sabuqtegni tuzgan davlat sarhadini o'n barobar kengaytirdi, mustahkamladi, unga meros qolgan G'aznayi munavvarani butun ro'yi zaminda go'zallikda tengsiz bir shahri muazzamga aylantirdi!.. Bas, padari buzrukvorining ruhini shod etgani uchun, mana, boshiga og'ir kunlar tushganida, uning arvohi sultonni ho'lladi, oh-u timsolida otasiga ayon bo'lgan fayzi ilohiy unga ham ayon bo'ldi. Shoyad padari buzrukvorining tushida namoyon bo'lgan Xizr payg'ambar uning ham tushiga kirsam, unga ham oq fотиha bersam!..

Sulton, g'oyat xushvaqt bir kayfiyatda ko'zi ilingan edi, vujudiga orom berib, ko'nglini munavvar qilgan bu ezgu o'ylar tushida ham davom etdi. Harqalay, allaqanday tiniq kuylar, xushovoz xonandalarning dilrabo qo'shiqlari qulog'iga quyilib, ko'ngli yana ham ravshan tortdi. Sulton bu kuy, bu dilrabo qo'shiqlarni toabad eshitishga tayyor edi, biroq to'satdan ularga allaqanday dag'al ovozlari qo'shildi, o'tirgan taxtiravoni qattiq silkinganday bo'ldi-yu, afsus bilan ko'zini ochdi.

U taxtiravonda emas, aravada yotar, arava haligi bir tup gujum tagida emas, baland bir qiryonbag'ridagi qo'shaloq chinor yonida to'xtab tu-

rardi. Yomg'ir tingan, yuksak qorli tog'lar ustiga yonboshlagan oftob chinor yaproqlaridagi billur tomchilar bilan o'pishib o'ynar, olam iliq nur seliga cho'milgan edi!..

Sulton hayrat bilan yon-veriga qaradi. U soyabon aravada yolg'iz yotar, yonida Abul Hasanak ham, shoir Unsuriy ham yo'q edi. Chinor tagidan eshitilayotgan kuy va qo'shiq asta tindi, faqat tanbur ovozi yana bir-ikki marta diring-diring qildi-da, u ham o'chdi:

– Ul zoti oliy Malikul davlat bo'lsa, kaminayi kamtarin Malik ul-sharob bo'lamen!

– Malik ul-sharob emish! Yo'ldan daf bo'l, tentak! Bo'lmasa hozir navkarlarga farmon beramen – oyoq-qo'lingni bog'lab, chinor shoxiga osadilar!

– Ofarin! Shu aqli farosat bilan sulton Mahmudga vazir bo'ldilarmi janoblari? Malik ul-sharobni dorga osadurg'on bo'lsa, yolg'iz Malikul davlat osadi.

«Qutlug'qadam!»

Nogahon sultonning yodiga bolalik va o'smirlik chog'lari tushdi. Suyukli nadimi Qutlug'qadam bilan Afshon soy sohilida kurash tushib, merganlik va chavandozlik bobida olishib yurgan onlari «lop» etib ko'z oldiga keldi-yu, oftob nuriday iliq bir narsa yuragini yoqimli silab o'tdi. U beixtiyor boshini yostiqdand uzib, ipak pardaning chetini ko'tardi.

Arava oldida boshiga eski qalpoq, egniga eski qora chakmon kiygan, soch-soqoli o'sib, patak bo'lib ketgan devonasifat bir kimsa Abul Hasanak bilan shoir Unsuriyning yo'lini to'sib turardi. Yo'ldan nariroqda, bir-biriga chirmashib o'sgan qo'sh chinor tagida esa bir guruh mashshoqlar o'tirishardi. O'rtaga yozilgan dasturxonda ikkita xum

ko'zga chalinardi. Mashshoqlar, birining qo'lida g'ijjak, birining qo'lida setor, birining qo'lida nay, juldur to'nli darvesh bilan Abul Hasanak o'rtasidagi «jang-u jadal»ni jimgina kuzatishar, bu dahana-ki jang ularga katta zavq berayotgan bo'lsa kerak, hammasi tirjaygan, hammasining og'zi qulog'ida.

Bu manzara sultonning dilida ham favqulodda bir zavq uyg'otdi. U soyabon aravaning ipak pardasini shartta yulib oldi-da, asta o'rnidan turdi:

– Hoy, sultoni salotinga yo'lto'sarlik qilishga jur'at etgan kim? Qutlug'qadam? Yo, tavba! Men seni allaqachon Arshi a'loda aysh qilib yuribdi desam, hanuz bu bevafo dunyoda ivirsib yuribsenmu?

Hamma arava tomon burilib qaradi. Malik ul-sharob besh panjasi bilan soqol bosgan yuzini ishqab mug'ambirona ishshaydi.

– Ne chora, amir al-mo'minin! Bog'i Eram ham bizday g'arib-u g'uraboga emas, sizday sultoni salotinlarga atalgan emish! Inchunin, u dunyoga shoshib ne qilamiz? Undan ko'ra faqirlar dunyosi bo'lmish bu dunyoda ivirsib yurganimiz ma'qul emasmi, amiri kalon? Bu kun Navro'zi olam! Qani, g'arib dasturxonimizga marhamat qilg'aysiz, sultoni salotin!

Chinor tagidan «Navro'zi olam! Navro'zi olam!» degan xushnud xitoblar eshitildi.

«Navro'zi olam? Yo, Rab! Bundan chiqdi hozir unga ayon bo'lgan ilohiy alomat bejiz emas ekan!»

– sultonning mumday sarg'ish chehrasi birdan yorishdi.

– Malik ul-sharob! Qani, o'shal dong'i olamga ketgan sharobingdan bir kosa keltir!

Malik ul-sharob darhol chinor tagiga yuzlanib:



– Hey, Bobo Setoriy! – deb chaqirdi-da, ko'zini qisib, xushnud kuldi:

*Qo'lga olib setoring, jon kirgizgaysen,  
Mayi nobdin bu jomingni to'lg'izgaysen!  
Gulob kabi pokdur gadolarning dili,  
Quygil sultonimga, bitsin, mushkuli!*

Chinor tagidan kimdir hayrat bilan:

– Tasanno, Malik ul-sharob! Tasanno! – deb xitob qildi, ketma-ket nay, setor va g'ijjaklar barobar yangrab, allaqanday sho'x, o'ynoqi kuy boshlandi.

Malik ul-sharob davradagilar qo'lidan may to'la kosani olib, hanuz miyig'ida kulimsiragani-cha aravadan tushgan sulton tomon yurdi.

*Gado shoddir har kuni,  
Jomdan uzmas ilkini,  
O'tar-ketar bu dunyo,  
Ketsin badar u dunyo!  
Fursat, umr g'animat,  
Ertang qilgung azimat!  
Besh kun davron surib qol,  
Bugun o'ynab-kulib qol!*

Shoir Unsuriy to'satdan oyoq ostidagi ho'l may-saga tiz cho'kib, sultonning etagini yuziga surtdi.

– Oftobi olam! Farishtalar omin degan shunday munavvar kunda bu shakkokning so'ziga kirmang!

Shoirning tavallosiga Abul Hasanakning nido-si qo'shildi:

– Haq so‘z bu, olampanoh!.. Bu tog‘larda anov iymonsiz imom Ismoil G‘oziy makon qurg‘an, olampanoh!

– Qaysi imom G‘oziy? Ne deb valdiraysen? – sulton qo‘lini bir siltadi-da, nogahon yuragini chulg‘ab olgan allaqanday yorug‘ tuyg‘uga bo‘ysunib, kosa to‘la sharobni bir ko‘tarishda bo‘shatdi.

– Alloh o‘zi afv etgay! Olti oy bo‘ldi, ko‘nglim qorong‘i tunday zimiston edi, shu bugun bir chirog‘ yondi!.. Abul Hasanak! – dedi u, to‘satdan qiyg‘os ko‘zlari hayrat bilan charaqlab. – Hammangga ijizat! Ot-arava bilan ikki navkar qolsa bas! Faqir bugun shu darvesh bilan suhbat quramen!

– Darvesh emas, Malik ul-sharob! – dedi Qutlug‘qadam. – A‘lo hazratlari Malikul davlat bo‘lsalar, kamina Malik ul-sharob bo‘lamen!

Shoir Unsuriy «endi jazosini tortadi bu shakok» degandek, umid bilan sultonga qaradi. Biroq sulton g‘alati kulimsirab tavoze bilan bosh egdi:

– Bir qoshiq qonimdan kechgaysiz, valine‘mat! Ijizat etsalar, faqir siz hazratimning bir oniy suhbatlarida bo‘lsam!..

– Marhamat! Malik ul-sharob davrasida shoh-ugado barobar!

Hanuz tizza bukib turgan Unsuriy ko‘zlari mo‘ltirab Abul Hasanakka qaradi, biroq sultonning odatini yaxshi bilgan Abul Hasanak lom-mim demay olisroqda turgan navkarlar tomon yo‘naldi.

Keksa mashshoqlar surilib, sultonga joy berishdi. Sulton, dilida hamon ajib bir shu‘la, eski namatning chetiga asta yonboshladi.

Yo, tavba! Osmon boyagidan ham tiniq, havo boyagidan ham musaffo, giyohlar hidi – qoqilar, chuchmomalar, buloq bo‘yidagi yalvizlar, yov-



voyi rayhon va archalar, qirlar sathini qoplagan yovshan va shuvoqlarning aralash-quralash atri boyagidan ham o'tkir, boyagidan ham xushbo'y!

Biri oq tuyaga, biri bo'taloqqa o'xshash ikki oq bulut ostida oq yelkanlarni eslatuvchi ulkan oqqushlar juft-juft bo'lib suzib yurar, ulardan ham yuqoriroqda, niliy osmon tagida, ulkan qora burgutlar ko'zga chalinardi... Mashshoqlarning kechki oftobday tiniq va hazin musiqasi sultonning tashna diliga suvday yoqar, eshitgan sayin eshitgisi kelardi. Vo darig'! Nechun u shu bugungacha bu mislsiz go'zallikdan bebahra ekan? Ajabo, salkam qirq yil saltanat tebratib, bunday go'zallikni ko'rgan emas, bunday musiqani eshitgan emas, bunday saodatli damlarni boshidan kechirgan emas!.. Hatto, unga eng katta zavq bergan onlar, Hindiston va Xuroson, Xorazm va Buxoro tojdorlarini bir hamla bilan zabun qilib, oldiga tiz cho'ktirgan chog'larida ham bunday zavqlangan emas u! Ha, u hindlar yurtidagi muazzam qal'alarni bir zarb bilan zabt etganida, taslimdan bosh tortgan shaharlarga o't qo'pib, tog'-tog' oltin va javohirlarni o'ljaga olgan damlarida yoxud Jayhun bo'ylariga saroparda qurdirib, karnay va surnaylar sadosi ostida yuz minglagan suvorilarni bitta-bitta sanab o'tkazgan onlarida mislsiz iftixor tuyg'usi uni o'z qanotlariga o'tqazib, go'yo osmoni falakka olib chiqib ketardi! O'sha damlarda unga dunyoda eng yoqimli sado – jangovar fillar na'rasi-yu, otlar dupuri bo'lib tuyular, g'olib qo'shinning «ur-ha, ur, sur-ha, sur!» degan suronli qiyqirig'i bilan nog'oralar gumburidan yoqimli sado yo'q deb o'ylar, olamda eng go'zal narsa esa qilich-qalqonlar-u muzaffar

lashkarning g'olib tug'lari bo'lib ko'rinardi! Endi bilsa... u bilgan go'zallikdan a'lo go'zallik, u o'ylagan baxtdan o'n chandon ulug' baxt, g'arib bo'lsa ham, qandaydir beg'alva, betashvish bir hayot bor ekan. Bunday tiniq osmon, biri tuya, biri jajji bo'taloqqa o'xshash oq bulutlar, bunday giyohlar, kishi qarab to'ymaydigan yuksak niliy tog'lar bor ekan!.. Ana, ro'parasida bolalik va o'spirinlik yillarining shohidi bo'lgan bir shoir o'tiribdi. Boshida eski telpak, egnida eski to'n... Biroq ikkisi-ning qaysi biri baxtliroq? Butun ro'yi zaminni tiz cho'ktirgan sulton Mahmud G'aznaviyimi yoxud o'zi yanglig' faqir-u haqirlar davrasida dilxushlik bilan umr o'tkazgan bu darveshmi?

Chashmaday tiniq, dilrabo kuy tobora avjiga chiqmoqda, Bobo Setoriy boshliq xonandalar boshlarini egib, go'yo o'z kuylaridan o'zlari erib ketayotganday ko'zlarini yumib, tebranib chalishar, kekxa bukri naychining esa ko'm-ko'k ma'sum ko'zlaridan tirqirab yosh oqardi.

Ana, nihoyat, kuy ham tugadi, tugashi bilan sulton qorni ochganini sezib, qaddini rostlab o'tirdi.

Dasturxonda birida may, birida sharbat to'la ikki xum, xumlarning yonida ustiga yovvoyi piyoz to'g'ralgan bir tovoq suzma, bir dasta arpa non va bir lagan yalpiz somsadan boshqa yegulik narsa yo'q edi. Lekin yalpiz solingan tandir somsa asaldan ham shirin, suzma og'izda erib ketar, hatto, arpa nonni ham yegan sayin yegisi kelardi kishi.

Mashshoqlar bir piyoladan sharbat ichishib, yana asboblarini qo'llariga olishdi, biroq sharbat o'rniga bir kosa may ichgan sulton to'satdan dilida suhbatga moyillik sezib, Malik ul-sharobga yuzlandi.



– Agar taqsim ijizat etsalar, mutriblarga tashakkur aytib, bir on dam bersak!

Malik ul-sharob baroq qoshlarini silab, tavoze bilan bosh egdi.

– Olampanoh bugun bizga aziz mehmondurlar. Amri mehmon vojibdur biz uchun!

Bu gapdan keyin mashshoqlar asboblarini chingorga suyab, o'rinlaridan turishdi.

Sulton haqiqatan ham yuragida jo'sh urgan tuyg'ulariga erk berish istagida edi. Bugun uning ko'ngli nechundir ezgu tilaklar bilan to'lib-toshgan, shu topda u faqat yaxshi gaplar aytib, ezgu ishlar qilgisi kelar, hatto, qilgan gunohlari uchun afv so'rashga ham tayyor edi.

To'satdan, o'smirlik paytlarida hindlar bazmxonasida bo'lgan mash'um janjal sultonning yodiga tushdi, tushdi-yu, nechundir yuragi «shig'» etdi. Kim bilsin, ehtimol, hind malagi sabab o'sha mash'um janjal bo'lmaganda, hozir ro'parasida xayolga tolib o'tirgan bu darvesh bugun uning qo'li yoxud eng salohiyatli lashkarboshisi bo'larmidi?

– Birodarim Qutlug'qadam! – dedi sulton, no-gahon ovozi samimiy qaltirab. – Sababi yoshlik, kamina senga o'rinsiz ozor berganim yodimdan chiqmaydi...

Malik ul-sharobning serajin, sersoqol yuzida hayratga o'xshash bir ifoda zohir bo'ldi. U sultonning allaqanday vasvas dardiga muhtalo bo'lib, g'alati odatlar chiqarganini eshitgan edi. Biroq... bu so'zi, bu qilig'i! Eng yaqin nadimlarini haydab yuborib, u bilan may ichib o'tirishi! Bu telba-teskari gaplari!..

– Mayli, davlatpanoh, o'tgan ishga salavot! Eski yarani tirnamoqdan foyda yo'q...

– Foyda bormi, yo‘qmi, o‘shal ish uchun uzr so‘raymen sendan. Benuqson Parvardigor, dey-dilar. Afv et, birodar!

Malik ul-sharobdan sado chiqmadi. Sulton chindan ham uning yuragidagi bitmas yarani qayta tirnadi. Ko‘ngli keng odam, u yuragida kek saqlamas edi, biroq bu yara, hanuz jizillab turgan bu eski yara!..

– Ajab hol! – dedi Malik ul-sharob, miyig‘ida kulimsirab, – kamina bir narsaga sira farosatim yetmaydi, amirim!

– Ya‘ni?

– Ya‘ni... Alloh taolo o‘z bandasiga shunday aql-zakovat ato qilibdi. Bandasi esa... nechun hamisha aqlga zid ishlar qiladi? Nechun faqat boshiga musibat tushgan chog‘laridagina yaxshilik va ezgulikni o‘ylaydi? Nechun o‘zi choh yoqasiga borib qolgandagina qilgan gunohlarini, boshqalarga o‘tkazgan jabr-sitamlarini eslaydi? Nechun!

Sultonning sharob tafti urib bo‘g‘riqqan yuzidan qoni qochib, yalpoq burnining keng parraklari asabiy pirpiradi.

– Meni choh yoqasiga bordi deb, kim aytdi senga?

– Hech kim! Telba shoir, xayolinga kelgan telba gapni aytdim, xolos. Bir qoshiq qonimdan kechgaysiz, poshshoyi olam!

Amir al-mo‘minin chuqur tin olib, bolishga hol-sizgina yonboshladi, yonboshlarkan, yana artilgan shishaday tiniq osmonga ko‘zi tushib, ko‘ngli yorishib ketdi.

– Sen ham kechir, Qutlug‘qadam. Bugun faqir g‘aroyib bir hodisaning shohidi bo‘ldim... Gardiz qal‘asi tomon ovga chiqqan edim... Noga-

hon yo'limni bolalik bir ohu kesib o'tdi. Kami-na ona-bola ohuga ot soldim. Onasi shamolday uchib, tutqich bermadi. Uni quvib yetib olsam bo'lur edi, rahmim keldi. Bolasi esa... qochol-madi, uni tutib olib ortimga qaytdim. Bir mahal orqamga burilib qarasam... – sulton to'satdan to-mog'i g'ip bo'gilib, dag'al kafti bilan quyilib kel-gan ko'z yoshlarini artdi. – Burilib qarasam, ona kiyik faryod chekib, orqamdan ergashib kelur! Ko'nglim vayron bo'lib, uloqchani qo'yib yubor-dim-u o'z yo'limga ravona bo'ldim...

Malik ul-sharob nima deyishini bilmay talmovsi-rab qoldi. Ajabo: ne-ne shaharlarni zer-zabar qilib, ne-ne qal'alarga o't qo'yib, rahm-shafqat neligini bilmagan bu fotih muzaffar bitta ohuning zorli nidosiga ko'ngli vayron bo'lib, yum-yum yig'laydi!

Sulton mungli ko'zlarini yumdi, go'yo oldida so-biq quli Qutlug'qadam emas, qo'l berib yukingan piri murshidi o'tirganday, sirli ovozda davom etdi:

– Yo'q, bu ona-bola ohuning faqirga duch keli-shi bejiz emas! Parvardigori olamning inoyatidan alomat bu! Zerokim, padari buzrukvorim ham boshiga mushkul tushgan kunlarda shunday bir ohuga duch kelib, uni qo'yib yuborgan ekan. Shu sabab omad yor bo'lib saodat oftobi kulib boqqan ekan!

«E voh! Nechun bu mustabid shoh bunchalar adli insofga kelib qoldi, desam, bo'rk ostida takya bor ekan-da!»

Malik ul-sharobning xiyol yumshagan ko'ngli qayta muzlab, boshini pastroq egdi.

– Nasib qilsa, erta-biriskun «Mozori kalon» qabristonida is chiqaramen. Qirq ho'kiz, qirq tuya, qirq biya, qirq qo'chqor so'yib, qirq bot-

mon guruch damlab, yurtga osh beramen. Barcha beva-bechoralar, yetim-yesirlar, gadolar va yo'qsillarga oqcha ulashib, valilar ruhini shod qilamen. Begunoh Parvardigor, Qutlug'qadam! Agar, osiy banda yoshlikda birovlarning ko'ngliga ozor bergan bo'lsam, endilikda, inshoolloh, savob ishlar ila, Alloh yo'liga xayr-ehson ila gunohlarimni yuvmoq niyatidamen!

Malik ul-sharob to'satdan qo'llari qaltiray boshlaganini sezib, ichida o'zidan bir kulib qo'ydi:

«Ha, nechun ilonga ro'baro' bo'lgan baqaday qaltiraysen, Malik ul-sharob? Qariganda joning shirin bo'ldimi? Qo'rqma, birodar! Qirq yil ko'nglingni kemirib yotgan alamlarni to'kmoq mavridi keldi. To'k bu alamlarni! Yo boshing ketar, yo ustingdagi uvada to'ning!»

Malik ul-sharob kosa to'la sharobni olib, bir ko'tarishda bo'shatdi-da, shirakayf ko'zlarini suzib sultonga qiyg'ir qarash qildi. Uning ilhomi kelib jazavasi tuta boshlagan edi.

– Kamina bir narsadan qo'rqamen, amir! Amirim qirq tuya, qirq biya emas, qirq ming tuya, qirq ming biya so'ysalar ham yetmas, poshshoyi olam!

– Qirq ming tuya, qirq ming biya? – sulton lom-mim demay qo'lidagi kosani to'ldirib may quydi-da, go'yo Malik ul-sharobga taqlid qilganday, uni bir sipqarishda bo'shatib, dasturxonga otib yubordi.

– Lozim bo'lsa, qirq ming emas, yuz ming tuya va yuz ming biya so'yamen, Qutlug'qadam!

– Yo'q, oftobi olam! Yuz ming biya, yuz ming tuya so'ymoq tugul, bor davlatlari, Osmon malikasi yanglig' saroylari, Bog'i Firuza yanglig' bo'stonlari, xazinalari to'la ganjlari, haramlari



to'la kanizlari va, hattoki, butun saltanatini so-vursalar ham ozlik qilur amirim!

Malik ul-sharob jahl ustida bu gaplarni aytish-ga aytdi-yu, birdan hushyor tortib, sultonga o'g'rincha nazar tashladi. Amir al-mo'minin esa ajabo, darg'azab bo'lish o'rniga jimgina bosh egib o'tirar, go'yo sobiq qulining so'zlari uning dilida isyon emas, yo'q, chuqur afsus-nadomat uyg'ot-gan edi.

– Osiy banda, – dedi sulton, xiyol ovozi titrab. – Men seni tengqurim deb, yoshlik chog'larimning shohidi bo'lgan aziz birodarim deb, yaxshi niyat-larimni izhori ixlos qilsam, sen... tag'in dilozorlik qilding, tag'in gustohligingga borib, dilimni og'rit-ding, Qutlug'qadam!

Malik ul-sharob bir zum aytgan so'zlaridan pushaymon qilib, dovdirab qoldi.

– Oftobi olam! Kamina... siz valine'mat ami-rimning xazinayi davlati behuda isrof bo'lmasin, deb qayg'urdim, xolos.

Sulton, ko'zlari o't chaqnaq, Qutlug'qadamga tikildi:

– Zaharxanda qilma, betavfiq! Jahongirlik qilgan bo'lsam... dini islom yo'lida qildim! Boshqa yurtlar zer-zabar bo'lsa, o'z yurtim obod bo'ldi! Ha, bani odamda insof yo'q ekan, insof! Hamma mening qat-tiqqo'lligimdan so'zlaydi. Va lekin... bu dorus-sal-tanatni dorus-saltanat qilgan kim? Osmon ma-likasi yanglig' saroylar, Ko'shki davlat va Ko'shki ma'mur kabi qasrlar qurgan, Bog'i Firuza yanglig' jannatmonand bog'lar yaratgan kim? Bu ko'shk, bu bog'-u bo'stonlarni kim uchun qurdim men?

– Kim uchun? Fuqaro uchun, g'arib-u g'urabo uchun qurganlar, valine'mat! – Malik ul-sharob

qo'lini bigiz qilib, tepadagi gujumni ko'rsatdi. – Anov gujum ostida turgan olacha to'nli gadoga bir qarasinlar, amirim!

Sulton kutilmagan bir itoatkorlik bilan Malik ul-sharob ko'rsatgan tomonga qaradi. U yerda, bir tup rayhonday bejirim gujum tagida, bir nechta mashshoqlar davra qurib o'tirishar, davraning o'rtasida olacha to'nlik kekxa bir darvesh qiyshanglab raqs tushardi.

– Bobo Xurmo Savdoyi deydilar bu gadoni!

– Bobo Xurmo?

– Ha, Bobo Xurmo Savdoyi! Poshshoyi olamning Bog'i Firuzi o'rnida bu gadoning xurmozori bo'lg'usi edi. Amirim uni tortib olib, o'rniga o'shal jannatmonand bog'larini qurdilar! Makonsiz qolgan bu sho'rlik esa mana, yigirma yildirki, be-makon tentirab yuribdi! Amirim esa... bu bog'u rog'larni kim uchun yaratdim, deb gerdayadilar!

Sulton boshini xam qilganicha yana bir daqiqa jim qoldi. So'ng, go'yo kimgadir arz qilganday:

– Tiling zahar sening, zahar! – deb ingradi-da, besaranjom bo'lib:

– Qaydasen, Abul Hasanak? Sarbozlar! – deb qichqirdi.

Soyabon arava yonida qaqqayib turgan ikki navkar qilichlarini yalang'ochlaganlaricha qo'sh chinor tomon intilishdi.

Malik ul-sharob, soqol bosgan serajin yuzi lo'lov yonib, sultonga qaradi-yu, to'satdan «san»sirab:

– Chop, amir al-mo'minin! Chop! – deb xitob qildi. – Yodingdami, sulton? Yoshlikda, o'zing bilgan Afshon shol dahasidagi hindlar bazmxonasida aysh qilib yurgan chog'larimiz xotiringda bormi, amir al-mo'minin! Sening kosangni emas, mening kosamni



qo'liga olgani uchun hasad o'tida qovurilib, o'n to'rt yashar ma'sumaga qilich ko'targaning esingdami? Esingda bo'lsa, bilib qo'y, sulton: o'shal raqqosa... Nargizabonu hamon tirik!

– Nargizabonu... hind raqqosasi Nargizabonu?

– Ha, sen qilich ko'targan o'shal zaifa hanuz hayot! Qo'llari mayib, bir umr seni qarg'ab o'tgusidir, amir al-mo'minin!..

Sulton nogahon «hmm» deb, o'ng biqinini changalladi-da, xuddi bo'ron sindirgan kekxa tolday ikki bukilib qoldi.

Malik ul-sharob buni ko'rdi-yu, yuragidagi g'azab xuddi suv sepilgan gulxanday so'nib, dilida pushaymonga o'xshash bir narsa uyg'ondi. Hoy, attang! Yaxshi bo'lsin, yomon bo'lsin, harqalay, yoshlik yillari birga o'tgan, endi esa... usiz ham Allohning qahriga yo'liqqan bir bandayi ojizga bu so'zlarni aytmoq darkormidi?

Malik ul-sharob, to'satdan yuragi qattiq achishib, hanuz ikki bukilib turgan sulton tomon intildi, biroq shu payt qayoqdandir tasir-tusur ot surib kelgan Abul Hasanak bilan shoir Unsuriy navkarlarni u yoq-bu yoqqa surib, sultonning qo'ltig'idan olishdi. Sulton sekin ingrab ularning qo'llarida osilib qoldi.

«Gunohkor bandangni o'zing kechirgaysen, Parvardigori olam! Nechun u boya vafodor vazirining so'ziga kirmadi? Nechun Malik ul-sharob atalmish bu shakkokning gapiga kirib, uning kufr sharobini ichdi?..»

Navkarlar yordamida aravaga chiqqan sulton birdan holsizlanib boshini yostiqa qo'ydi, qo'yar-kan, ko'zi yana osmonga tushdi. Lekin boyagi artilgan shishaday tiniq, niliy osmon o'rniga tubsiz choxday zimiston bo'shliqni ko'rdi.

## O'NINCHI BOB

Beruniy bir necha kun harorat ichida alahlab yotdi. U xuddi uzluksiz yomon tush ko'rayotgan odamga o'xshar, bu tushdan qutulish uchun bir «silkinib» uyg'onib ketishga urinar, biroq uyg'ona olmas, uyg'ongan paytlarida esa ko'zini ochishga majoli yo'q, xayol oqimida jimgina suzardi.

Xayol esa negadir, ehtimol yoshlik davridan o'tib, keksalik manziliga qadam qo'ygani uchundir, ko'proq allaqanday beg'ubor bolalik chog'lari-ga talpinadi, o'z yurti tomon, loyqa Jayhun sohili-da qad ko'targan Qiyot tomon parvoz qiladi. Ko'zi-ni bir zum yumsa Qiyot chekkasidagi hammollar va o'tinchilar mahallasi, mahalladagi paxsadan yasalgan g'arib kulbalar nigohi oldida ko'ndalang bo'ladi. Kichkina Abu Rayhon esini tanibdiki, kunduz kunlari guzar do'kondorlarining xizmati-ni qiladi. Ularga quduqdan suv tashiydi, do'kon-larini supuradi, halvofurushlarning o'chog'iga o't yoqadi, somsapazlarning somsalarini sotib beradi, kulollarning dastgohlarini aylantiradi, temirchilarning bosqonini bosadi. Qo'l-oyog'i chaqqon bu ozg'in, qoramtir bolakayni hamma yaxshi ko'radi, chunki u arablar rastasida yu-rib arab tilini, hindlar rastasida hind tilini, hat-to, bidir-bidir so'zlarini hech kim uqolmaydigan chin savdogarlarning tilini ham tez bilib oladi va bepul, beg'alva tilmochlik qiladi. Kechqurunlari, kun botib, qosh qoraygan mahalda esa Jayhun sohiliga chiqib, sahro tomon tikilib o'tiradi. Bir mahal ufqda chumoliday tizilgan odamlar ko'ri-nadi, ko'rinishi bilan yalang oyoq, yalang bosh Abu Rayhon ular tomon qushday uchadi. U na

oyog'iga qadalgan tikan, na chag'irtoshlarni seza-di, shamolday uchib boradi-yu, bir quchoq sazoq<sup>1</sup> tagida egilib, uzun asosini do'qillatib kelayotgan qoqsuyak ayol bag'riga o'zini otadi.

– Momojon! Sazoqingizni menga bering, men orqalaymen, momojon!

Ayol yurishdan to'xtab, ozgin qoramtir yuzidan oqqan marjon-marjon terni artadi, so'ng sazoqday dag'al qop-qora qo'llarini o'g'lining boshiga qo'yadi.

– Momojon, degan tillaringdan momong aylansin, toychog'im! Shu bir og'iz so'zing bilan yelkamdagi yukimni yengil qilding, shuning o'zi kifoya, toychog'im!

– Yo'q, yo'q, – deydi Abu Rayhon, momosining qoqsuyak dag'al kaftlarini o'pib. – Endi siz uyda o'ltirasiz, momojon, men o'zim o'tinkashlik qilamen! Sazoq tashib, sizni boqamen, momojon!

Ayolning horg'in ko'zlari to'satdan jiqqa yoshga to'ladi.

– Yo'q, toychog'im, sen hech qachon o'tinkash bo'lmaysen. Kecha halvofurushning do'konida bir alloma meni chaqirib aytdi: Alloh o'g'lingga tengsiz zakovat va mislsiz salohiyat ato qilgan, dedi. O'g'lingni menga ber, o'zimga shogird qilib olamen, saboq o'rgatamen, dedi. Sen o'qib alloma bo'larsen, do'konlarga mirza bo'larsen. Shunda momong ham sahrodan sazoq tashishdan qutuladi. Sen ul allo-maning etagidan qattiq ushla, toychog'im!

– Siz Abu Sahl Masihiyini aytasiz! Ulug' alloma ul, momojon!

– Momojon degan tilingdan momong aylansin, toychog'im! Nasroniy dinidan bo'lsa ham, yaxshi

---

<sup>1</sup> Sazoq – saksovul.

odam ekan ul Abu Sahl Masihiy, etagidan mahkam ushla uning, toychog'im!

Abu Sahl Masihiy!

Ajab hol: ustod Masihiy ni eslashi bilan Beruniyning miyasida go'yo zaif shamday miltirab turgan narsa «lip» etib o'chdi-yu, «yarq» etib boshqa bir chiroq yondi.

Avji bahor. Jayhun sohiliga tutashib ketgan ulkan bog' ayni gulga kirgan. Bog' o'rtasidagi ikki qavatli ko'shk xiyobonlarida kamalak rangli tovuqlar tovlanadi, daraxtlar orasida yovvoyi kiyiklar ko'zga chalinadi, chetlari nozik chiniy koshinlar bilan bezatilgan hovuzlarda bulutday oppoq oq qushlar suzadi.

Yosh Abu Rayhon ustod Abu Sahl Masihiy bilan oq ayiqlarning momiq terilari to'shalgan zinalardan yurib, ko'shkning ikkinchi qavatiga chiqadi.

Ustod, tokchalarida kuppakunduz behisob shamlar yongan uzun yo'lakning oxiriga borib, turnaqator eshiklardan birini ochadi...

Devorlariga bug'-u mugizlari, olmaxon va suvsar mo'ynalari osilgan, tagiga oq va qora ayiqlarning yumshoq terilari tashlangan keng xonaning o'rtasida mallarang soqolli ko'ksiga tushgan, ko'zlari ko'm-ko'k bir chol parqu yostiqlarga suyanib yonboshlab yotibdi. Uning yonida ko'zlari xuddi cholning ko'zlaridan moviy, uzunchoq yuzi bozordagi Xazor joriyalarining yuzlariday oppoq bir sahibjamol hisobcho't qoqib, daftariga bir nimalarni yozib o'tiribdi. Mehmonlarni ko'rgan sohibjamol daftar-qalamini ko'ksiga bosganicha, nazokat bilan yurib chiqib ketadi. Chol esa mehmonlarni dasturxonga taklif qilib, ustod Masihiy bilan o'z tillarida uzoq suhbatlashadi, so'ng Abu

Rayhonni oldiga chaqirib hisob ilmidan sinov qiladi. Sinovdan keyin ustod ketadi, Abu Rayhon esa savdogarning uyida qoladi. U hisob-kitob ishlaridan qutulgach, tun yarmigacha o'z hujrasida mutolaa bilan shug'ullanib o'tiradi. Nihoyat, mutolaadan charchab, endi to'shakka cho'zilganida kimdir eshigini gurs-gurs uradi, ketma-ket ayol kishining «Mirzam!» degan zorli nidosi eshitiladi. Abu Rayhon o'rnidan sakrab turib, eshikni ochadi. Ostonada... oppoq qo'llarida dir-dir titragan sham, Rayhona degan boyagi moviy ko'zli sohibjamol turardi! Sohibjamol Abu Rayhonni ko'rib:

– Otam! Mehribon otam! – deydi-yu, yerga tiz cho'kib, yuzini kaftlari orasiga yashiradi. Abu Rayhon marmar zinalardan kiyikday sakrab tepaga chiqadi. Chol o'sha, darichalari Jayhunga qaragan serhasham xonada qavat-qavat shoyi ko'rpachalar ustida chalqancha yotar, uning ochiq qolgan ko'm-ko'k ko'zlarida hayot so'ngan, dahani osilib qolgan.

... Boshqa oqshom. Dafn marosimidan keyin savdogarning serhasham ko'shki motam sukutiga cho'mgan. O'z hujrasida yana kitob mutolaa qilib o'tirgan Abu Rayhon qandaydir taraq-turuq ovozlardan cho'chib boshini ko'taradi. Bu tovushlar ikkinchi qavatdan, Abu Rayhonning hujrasi tepasidagi Rayhonabonu xonasidan eshitiladi.

Tepada, Rayhonaning xonasi oldida... savdogar hayot vaqtida uning eng yaqin mahrami bo'lgan bosh mirza bilan... yumaloqdan kelgan, ko'm-ko'k ko'zlari go'dakning ko'zlariday ma'sum bir bukri turardi. Egniga suvsar po'stin, boshiga suvsar telpak kiyib, belini oltin kamar bilan bog'lab olgan bu bukri – yo, Rab! – Ko'p yillar-

dan keyin G'aznada paydo bo'lgan, o'zining nayi va attorlik do'konchasi bilan dong chiqargan Piri Bukriy edi!..

Yosh Abu Rayhon uni taniydi. U mahalda bukri Qiyot shahrining eng mashhur savdogarlaridan biri hisoblanardi!..

Bukri, qo'lida qandaydir qalin daftar, zulfini uzi-lib tushgan eshikni zo'r berib o'ziga tortar, Rayhona esa dag'-dag' titrab uning ko'kragidan itarardi.

Yoshlik ekan, qaynoq o'spirinlik chog'lari ekan, Abu Rayhon nima bo'layotganini so'rab-surishtirib ham turmaydi. Rayhonaning yosh bilan yuvilgan yuzini ko'radi-yu, avval bosh mirzani, keyin nimalardir deb baqirayotgan bukrini giribonidan olib, marmar zinalar tomon otadi. Bosh mirza oyoq ostidagi sip-silliq ayiq terisiga sirg'anib yiqiladi, chorpahildan kelgan bukri esa marmar zinadan xuddi to'nkaday gumburlab yumalab ketadi.

Beruniy keyin surishtirib bilsa Rayhonaning otasi bukridan qarzdor ekan, biroq bukrini bu qarz emas, hatto, choldan behisob davlat ham emas, balki uning yolg'iz qizi, go'zal Rayhona qiziqtirar ekan!..

O'sha kecha, Rayhona Abu Rayhonning qucho-g'ida yig'lay-yig'lay uxlab qoladi, erta tong esa Rayhonaning issiq bo'salaridan mast bo'lib endi uyquga ketgan Abu Rayhon vahimali qiyqiriqlardan uyg'onib ketadi.

Yo'q, bu – bosh mirza bilan ayyor bukri ko'targan to'polon emas, Qiyotga nogahon bostirib kelgan Xorazmshoh qo'shinlarining qiyqirig'i edi!..

O'sha tong Qiyot hokimi qal'asida boshlangan yong'in bir zumda butun shaharga taraladi, chunki sahroda ko'tarilgan dovul yong'in uchqunlari-



ni osmoni falakka olib chiqib, yon-yoqqa sochadi, ulardan ko'tarilgan olov esa ajdaho kabi dahadan-dahaga, uydan-uyga, do'kondan-do'konga sakrab, butun-butun rastalar, saroylar, qasrlarni yamlab yutadi.

Abu Rayhon qo'lida behush Rayhonabonu, boqqa qochib chiqadi. Jayhun sohilida turib, Qiyot boshiga tushgan mislsiz ofatni, go'yo bir bog' shuvoqday lovillab yongan do'konlar, tutash rastalar, uylar, karvonsaroylar, qasrlarni o'z ko'zi bilan ko'radi, jahannam ichida qolgan odamlarning faryodini, dumlari va yollari yongan otlarning kishnashi, qo'y va echkilar, mushuk va itlarning odam bolasi yang'lig' zorli yig'isini eshitadi, ko'zida yosh, yuragi qon bo'lib eshitadi.

Qiziq dunyo ekan bu dunyo! Keyin bilsa... o'sha kecha nasroniy savdogarning ko'shki bilan birga Rayhonabonu ishqida yongan bukri-ning ko'shklari ham barobar kuyib, barobar kul bo'lgan ekan!

Beruniyning miyasida bazo'r miltiragan xira chiroq «lip» etib o'chadi-yu, boshqa bir chiroq yonadi.

Bepoyon sahro. Tun. Hammayoqda gulxan, to'g'rirog'i, so'nayotgan gulxanlarning zaif shu'lasini, go'yo osmon to'la yulduzlar o'sha oqshom yerga yomg'irday yog'ilgan-u hududsiz sahroga tariqday sochilib ketgan. Sahroda, yulduzday milt-milt etgan bu gulxanlar atrofida uvada-juvada odamlar. Bular mag'lub Qiyotdan muzaffar Gurganjga haydab ketilayotgan behisob mahbuslar. Ular, Xorazmshoh sarbozlari qurshovida kunduz yo'l yurib, kechalari sahroda tunashadi, gulxan yoqib isinishadi, suv qaynatishib, sarbozlar ulashgan zog'ora nonlarni tanovul qilishadi.

Rayhona tushgacha bir amallab o'zi yuradi, tushdan keyin chag'irtikon va toshlar tilka-tilka qilgan oyoqlarini bosolmay, yiqilib qoladi, shunda Abu Rayhon uni opichlab oladi.

...Ko'kda ham, yerda ham behisob yulduzlar miltiraydi. G'ir-g'ir esgan sovuq shabadada so'nayotgan gulxanning zaif cho'g'lari nogirongina jimirlaydi. Abu Rayhon, ustidagi uvada chakmonini yechib, behol dildirab yotgan Rayhona ning ustiga tashlaydi. Shu payt qorong'ida bo'g'iq xirilloq yo'tal eshitiladi.

– Alloh yo'liga bir tishlam non!..

Zimiston qorong'ilikda... egniga juldur chopon, boshiga eski kuloh kiygan pakanagina bir kimsa paydo bo'ladi. Kimsaning soqol-mo'ylovi, qosh-kipriklari kuyib, yuzi sovuq bir niqobga o'xshab qolgan.

Gulxan yonida isinib o'tirgan Rayhona gadoni ko'rib, o'zini Abu Rayhonning quchog'iga otadi! Yo, tavba! Soch-soqoli kuyib, qosh-kipriklari to'kilib, arvohga o'xshab qolgan bu kimsa... o'sha, Qiyot shahrining eng badavlat kishisi bo'lgan bukri savdogar edi.

Ha, taqdirning o'yini qiziq ekan!..

Ko'p o'tmay, Abu Rayhonning ko'z ochib ko'rgan sevgilisi Rayhonabonu olamdan o'tadi. Abu Rayhon Qiyot qirg'inidan so'ng Gurganjni tark etib, Jurjonga, Jurjondan Rayga, Raydan Hamadonga o'tib, musofir yurtlarda darbadar kezib yurganida olamdan o'tadi. Ilonning yog'ini yalagan bu bukri esa hanuz tirik, hanuz oyoq ostida ivirsib yuribdi! Ivirsib emish! Daf'atan ko'rgan kishi rahm qiladigan bu ayyor tunov kuni kimsan Horun ar-Rashid g'aznasidan yo'qolgan mash-

hur javohirni ko'z-ko'z qilib, undan Sadafbibini so'radi. Kim bilsin, Abu Rayhon bu sovuq go'rda tiriklay ko'milib yotganida, u battol bukri yer-to'lasiga yashiringan hisobsiz dunyosini sochib, Sadafbibini olib ketgandir ham!..

Yo, alhazar! Bu ne? Tushimi, o'ngimi? Ana, eshik tovushsizgina ochilib, Sadafbibi kirib keldi. Ma'yus quralay ko'zlarida allaqanday hadik, yumaloq kulcha yuzi hayajondan oqargan. U harir ipak durrasi bilan yuzining bir tomonini xi-yol yashirganicha Beruniyning yoniga o'tirdi.

Yo'q, hozir emas, o'sha kuni, mashvaratdan bir kun, avval, Xatlibegim kelib ketgan kuni bo'lib o'tdi bu voqea, lekin go'yo hozir bo'layotganday ko'z oldida turibdi. O'z so'zlari ham, Sadafbibining javoblari ham – hamma-hammasi quloqlari ostida qayta yangrayotganday bo'lyapti unga.

– Bibim. Sen qizim bo'lsang, Sabhu mening o'g'lim.

– Ustod! Meni... men sho'rlikni quvmang! Diy-doringizni ko'rmoq baxtidan judo qilmang meni, judo qilmang!

Mana, o'shandan beri necha kun o'tdi! Biroq Beruniy hamon kaftida qizning issiq lablarini his etadi, hamon uning hazin, dardli ovozini eshitadi. Yo, tavba! Unga ne bo'ldi? Bu ne o'y, ne orzu? Bilagidan kuchi, belidan quvvati ketib, bu sovuq go'rga tiriklayin tiqilganda o'ylaydigan o'ymi bu?

Beruniy yuragi yonib ketayotganday bo'lib, qora qumg'ondan bir qultum suv ichdi... Yo'q, hozir alamli o'ylar payti emas, bundan o'ylar bilan usiz ham o'rtanib turgan yurakni battar o'rtaydigan payt emas!

Beruniy, butun irodasini to'plab, xayolini boshqa tomonga burishga urindi. Haqiqatan, sal o'tmay, miyasidagi ko'ngilni g'ash qiluvchi xira chiroq o'chib, shu'lasini tiniqroq boshqa bir chiroq yondi.

...Yana bepoyon sahro. Yana seryulduz, zimiston kecha. Yana gulxan lovillab yonadi. Biroq gulxan yonida Rayhona emas, Ibn Sino. Ikkisi ham chuqur sukutda.

Qiyot qirg'inidan keyin ko'p yillar o'tgan, ko'p suvlar oqib ketgan. Jurjon va Rayda, Qobus va Vushmagir kabi manman, kalondimog' hokimlar saroyida kechgan musofirlik yillari orqada qolgan, u o'z eliga qaytgan. Lekin o'z eliga qaytgach topgan izzat-ikromlari, Gurganj hokimi Ma'mun ibn Ma'mun saroyidagi «Majlisi ulamo»da kechgan mas'ud damlar, shirin suhbatlar, qizg'in munozara va mushoiralar ham – hammasi o'z intihosiga yetgan. Chunki G'azna hokimi sulton Mahmuddan farmoni oliy kelgan. Ma'mun ibn Ma'mun saroyidagi barcha allomalar G'aznaga, sulton saroyiga jo'natilmog'i lozim. Sulton istagan allomalar orasida Abu Ali ibn Sino bilan ustod Masihiy ham bor. Lekin ular sulton tilagini rad etib, Jurjon tomon bosh olib ketishga ahd qilishgan.

Zim-ziyo kecha. Osmon allaqanday musaffo, oppoq yulduzlarga to'la... Jayhun sohilidan esgan g'ir-g'ir shabada o'rtadagi gulxanni goh u yonga, goh bu yonga yelpib o'ynaydi.

Beruniy bir Jurjon tomonlarda o'tgan musofirlik yillarini eslab, xomushlanadi, bir bo'lg'usi judolikni o'ylab, uf tortadi. Abu Ali esa qandaydir yaxshi umidlar qanotida parvoz qiladi, u Beruniy-ni ham birga ketishga undaydi. Boshga tushgan-ni birga ko'raylik, deb yolvoradi.

– Birga bo'lishni men ham istaymen! – deydi Beruniy xo'rsinib. – Dil-dilimdan istaymen. Ammo tag'in Jurjonga bormoq, tag'in Qobus va Vushmagir yanglig' hokimlar xizmatida bo'lmoq!.. Yo'q, kamina ularni ko'rib to'yanmen, azizim.

– Sulton Mahmud-chi? – deydi Abu Ali, – Qobus va Vushmagirdan nesi afzal uning? Yo, Hindiston-u Xurosonda qilgan qirg'inlari yodingizdan chiqdimi, ustod?

– Yo'q, azizim, yodimdan chiqqani yo'q. Kamina G'azna hokimini Jurjon hokimidan afzal ko'rmaymen. Oq qarg'a, qora qarg'a – baribir qarg'a. Va lekin...

– Yo'q, ustod! – deydi Abu Ali qizishib. – Hamma hokim bir xil emas, somoniylarni eslang!

– Vo ajabo! Somoniylar Buxoro va Xurosonni qonga belamaganmi? Ahli mardumning boshiga kulfat solmaganmi?

– Solgan! Ammo, bilasiz, bu foniy dunyoda hamma narsa nisbiydir. Somoniylar...

– Yoshlik qilasen, Abu Ali!...

Harqalay bul osiy banda faqat yomonlik emas, ko'p yaxshiliklar ham qilg'on. G'aznani obod etdi, ilm va nazm ahlining boshini siladi.

– Qochamiz. Pinhona qochamiz, ustod... Kamina kichik bir karvon bilan ahdlashib qo'yanmen. Mavlono Masihiy ham ketmoqqa bel bog'lagandur, ustod.

– Sizlarga oq yo'l, azizim! – deydi Beruniy. – Yo'llaringiz bexatar bo'lsin. Men esam... yo'q, bir borgan joyimga ikkinchi marotaba borishga na ko'nglim chopadi, Abu Ali, na toqatim yetadi! Charxi falak hali necha bor aylanib kelur. Nasib etsa tag'in diydor ko'rishgaymiz. Ko'rishmasak...

rozi bo'lsa, azizim. Oramizdan yaxshi-yomon so'z o'tgan bo'lsa, kechirgaysen, inim!

– Siz ham kechirgaysiz, ustod! – deydi Abu Ali. Qorong'ida uning «qult» etib yutingani eshitiladi. – Gunohkor banda, gustohlik qilib ko'nglingizni og'ritgan bo'lsam... kechirgaysiz, ustod!

Yillar o'tadi. G'aznaga kelgan Beruniy shahar chekkasida rasadxona quradi. Sultonning farmoni bilan qurilishga Isfahon va Hamadondan bir guruh me'morlar taklif qilinadi. Ular Beruniyga Ibn Sinodan ilk maktub keltirishadi, maktub bilan birga sovuq bir xabar keladi: Abu Ali bilan Gurganjdan chiqib, Jurjon tomon pinhona yo'l olgan ustod Abu Sahl Masihiy yo'l azobiga dosh berolmay, sahro qo'ynida jon taslim qilgan emish!..

Mana, bu mash'um xabar kelganiga o'n besh yildan oshibdi. Biroq Beruniyni hanuz tizginsiz bir o'y ezadi: nechun o'shanda Abu Alining nasihatini olmadim, nasihatini olganimda, ehtimol, cho'l bag'rida kekxa ustodga madad berarmidim, degan betaskin bir o'y ko'nglini xufton, dilini vayron qiladi.

Ibn Sino esa... mana, salkam yigirma yildirki, Beruniy uni bir ko'rsam, deb orzu qiladi. Ayniqsa, Hindistondan qaytib, uning «Al-Qonun»ini o'qigandan beri bu orzu unga tinchlik bermaydi, goho uni tushlarida ko'rib chiqadi...

Kim bilsin, tunov kuni Xatlibegim aytganidek, Ibn Sinoga maxsus elchilar yuborilgan bo'lsa, ehtimol, kelib ham qolar... Yo'q, bo'yi barobar oltin va'da qilganda ham sultonga xizmat qilishga ko'nmagan Ibn Sino endi ham ko'nmas. Bordi-yu, ko'nganda ham u yetib kelguncha uning o'zi tirik bo'ladimi, yo, bu go'r azobiga dosh berol-

may jon taslim qiladimi? Uni ko'rmay, uning o'z qo'lidan «al-Qonun»ini olib, «Hindiston»ni unga in'om etish baxtiga muyassar bo'lolmay olamdan o'tadimi?

Yo, tavba! Bu g'am, tuzday taxir bu ko'z yoshi qaydan keldi? Boshingga bundan yuz barobar katta musibatlar tushganda ham bu qadar ezilmagan eding, bu qadar bukilmagan eding! Senga ne bo'ldi, Abu Rayhon?

Beruniy miyasidagi xira shamni o'chirib, tiniq-roq shamlarni yoqishga uzoq urindi, biroq qaysi sham yonmasin, oxir-pirovardida bora-bora xiralashib qolar, ko'nglidagi yorug' esdaliklar og'ir, notinch o'ylar bilan almashardi.

## O'N BIRINCHI BOB

Sultonning tantiq vaziri Abul Hasanak amir al-mo'mininning shabistonidan<sup>1</sup> shirakayf odamday gandraklab chiqdi-da, salomxonadagi kursiga o'zini tashladi. Kimdir yo'talganday bo'ldi. Salomxonaga... qozi Sayid kirib keldi.

Qo'lida og'ir qahrabo tasbeh, egnida bo'y-bas-tiga yarashgan safrorang jubba, boshida safrorang salla, ikki yuzi anorday qip-qizil qozi Sayid kursida bemajol o'tirgan Abul Hasanakka qarab bilinar-bilinmas bosh irg'adi-da, boqma g'ozday kekkayib, ichkariga kirib ketdi.

Abul Hasanak bazo'r o'rnidan turdi, bazo'r yurib salomxonadan chiqdi. Shu topda u hech kimga duch kelishni istamas, uning ko'ngli faqat bir narsani tilar – tezda o'z ko'shkiga yetib borsa-yu, ust-ustiga bir-ikki piyola may ichib, xobxonada

---

<sup>1</sup> Shahrison – yotoqxona.

bo'lib o'tgan sovuq gaplarni xayolidan chiqarsa. Lekin qasdiga olib, saroydan chiqishi bilan dunyoda eng yomon ko'rgan odami – vaziri a'zam Ali G'aribga duch keldi.

Ali G'arib, saroy oldidagi xiyobonda, o'z g'ulomlari qurshovida turar, ulardan nariroqda yana to'rt nafar suvoriy ko'zga chalinar, bular Abul Hasanakning shaxsiy g'ulomlari edi.

Abul Hasanak darvozadan chiqishi bilan Ali G'arib, yoshi ulug' va martabasi baland bo'lsa ham, pildiraganicha uning istiqboliga yurdi.

– Inim Abul Hasanak! Maslahatli ish buzilmas, degan gap bor. Siz bilan maslahatlashadurg'on bir yumush chiqib qoldikim, iltimos – g'arib kulbamizga iltifot etsangiz!

– Ne maslahat? – Abul Hasanakning ovozi shubha aralash sovuq tahdid bilan yangradi. U bosh vazirdan hamisha hadiksirar, bu qari tulki uni sinash maqsadida chaqirayotganini sezar va bundan qo'rqar edi. Ali G'arib buni payqab chuqur xo'rsindi.

– Alloh shohid, inim, amir al-mo'minning boshidagi musibat siz bilan mening boshimizga tushgan musibatdur. Illo, bu musibatdan olampanohning dushmanlari shod bo'lsa, do'stlari qon yig'laydur. Bas, bu so'z haqiqat ekan, siz bilan biz bir-birimizga suyanib ish tutmog'imiz darkor. Otga mining, inim!

Qosh qorayib qolgan, shahar harir nimqora parda bilan o'ralganga o'xshar, har joy-har joydagi toshfonuslar xira yulduzday elas-elas ko'zga chalinardi. Shahar ko'chalari kimsasiz, do'konlar yopilgan, faqat soy bo'yidagi ba'zi karvonsaroylardagina tungi sirli hayot nishonalari sezilar,



qo'rg'onlarda gulxan yonar, o'choqlar atrofida odamlar kuymalanar edi.

Bosh vazirning baland qo'rg'on bilan o'ralgan ko'shki soyning chap sohilida, Bog'i Firuzadan bir chaqirimcha quyida, zodagonlar dahasining boshida edi.

Ko'shk darvozasida gulxan yoqib o'tirgan yaso-vullar barobar qilich yalang'ochlab, yo'l to'sishdi, biroq oldinda ot choptirib kelgan sardorning, «Vaziri a'zam janoblari!» degan xitobi bilan darhol qilichlarini sharaq-shuruq qinlarga urishib, otlarning jilovidan olishdi.

Nafis havorang marmar bilan ziynatlangan ikki qavatli muazzam ko'shk darvozadan ancha yiroqda, ulkan bog'ning o'rtasida edi. Hozir ko'shkning faqat bir nechtagina darichalari yorug', qolganlari o'yib olingan ko'zday qorayib turar, hamma yoq suv quyganday jimjit, faqat bog'da, daraxtlar orasida qandaydir soyalar g'imirlab yurardi.

Ali G'arib xuddi bosh vazir emas, Abul Hasanakning itoatkor g'ulomiday oldinda pildirab: «Marhamat, azizim, marhamat», deganicha, xiyobon bo'ylab ko'shkka yo'l boshladi. U ko'shk bo'sag'asida qo'l qovushtirib turgan sertavoze g'ulomlar yonidan o'tib, ikkinchi oshyonaga ko'tarildi-da, o'ng qo'ldagi ikki tavaqali o'ymakor eshikni ochdi. Bu – Abul Hasanak kutganidek, shohona jihozlangan xona emas, aksincha, faqirona bezatilgan chog'roq xona edi. Xonaning eshik va darichalariga odmigina ko'k darpar-dalar tutilgan, yerdagi paloslar ustiga qizil bo'z ko'rpachalar to'shalib, qizil bolishlar tashlangan.

Xonaning o'rtasida nozi ne'matlarga to'la sakkiz qirrali katta xontaxta turardi. Oddiygina

sopol taqsimchalarda pista va bodom, asal va shinnilar, murabbolar, ulkan laganlarda tog'day uyilgan bedana qovurdoqlar...

Abul Hasanak to'rdagi qizil bo'z ko'rpachaga o'tib o'tirarkan, vaziri a'zamning xonasini yana bir ko'zdan kechirdi, kechirarkan, negadir bundan uch-to'rt yil muqaddam sobiq bosh vazir Xo'ja Ahmad Maymandiyga<sup>1</sup> taqilgan ayblar yodiga tushdi. Sobiq bosh vazirga taqilgan eng katta ayb – o'z mansabidan foydalanib, hisobsiz boylik orttirganlikda edi. Rost, uning kimsan Xo'ja Ahmad Maymandiyning tillik<sup>2</sup> va tilsiz boyliklari hech kimga sir emas edi, chunki sobiq bosh vazir aql va makrda yagona bo'lsa ham, boyligini hech kimdan sir tutmas, aksincha, Osmon malikasi kabi ko'rkam saroyini, saroydagi harami, haramidagi onasi o'pmagan kanizlarini yiqqan zeb-ziynatlarini ko'z-ko'z qilishni yaxshi ko'rar, to'y-hashamlarda esa topgan dunyosini shamolday sovurar edi. Ammo bu saxiylik, bu oshkora namoyishlarning oqibati nima bo'ldi? Sobiq bosh vazirning g'animlari, jumladan, Abul Hasanakning o'zi ham Xo'ja Ahmad Maymandiyi yiqitishda uning ko'rkam qasrlari, haramlari va haramlaridagi husnda tengsiz joriyalarini ro'kach qilmadimi?.. Ro'kach qildi! Abul Hasanak ham, sobiq bosh vazirning tagiga suv quygan bu makkor Ali G'arib ham Xo'ja Ahmad Maymandiyga «saltanat xazinasiga chang soldi», degan ayb taqib, uni o'z yoyi, o'z o'qi bilan otib qulatisdi... Ammo... ilonning yog'ini yalagan bu tulki Maymandiy taqdiridan o'zi uchun katta xulosa chiqar-

---

<sup>1</sup> Sulton Mahmudning mashhur bosh vaziri.

<sup>2</sup> Tollik boylik – qullar ma'nosida.

ribdi, u esa hovliqma Abul Hasanak esa... bu ishdan hech bir saboq olmabdi!

Abul Hasanak bilar, bir qarashda chumoliday beozor ko'ringan bu yum-yumaloq xomsemiz odam hamma shahar, hamma muzofot hokimlarini qo'lga olgan, ayniqsa, boy tijorat ahli undan zir titrar, birorta xorijiy savdogar katta in'omlarsiz saltanat sarhadini hatlab o'tolmas edi. Ajabo! Unda o'z bo'y-bastiga zid pinhoniyl bir kuch, sehrli bir iqtidor bor edikim, bu kuch va makrning hammasini u faqat bir maqsadga, boylilik orttirish maqsadiga qaratgan edi. Abul Hasanak buni bilar, harqalay bu battolning boyligi Xo'ja Ahmad Maymandiyning boyligidan yuz barobar oshib ketganini sezar va bugun bo'lmasa ertaga uni fosh qilib, boshiga sobiq bosh vazirning kunini solaman, deb yurardi. Ammo, e voh, bu qari tulki u o'ylagandan o'n chandon mug'ambir ekan, pinhona ishlarining izini ham qoldirmay, hamma yoqni shipshiydam qilib qo'yibdi. U bo'lsa...

Abul Hasanakni yolg'iz qoldirib qayoqqadir gumdon bo'lgan Ali G'arib, lahza o'tmay, bo'yni ingichka, qorni katta chiroyli billur idish ko'tarib kirdi. Idish oltinday tovlangan shafaqrang may bilan to'ldirilgan edi. Bosh vazir miyig'ida kulimsirab, billur idishni tokchadagi shamga tutib tomosha qilarkan:

– Qirq yil yerto'lada yotgan bir xum mayim bor edi, – dedi tamshanib. – Siz azizim sharafiga shu xumni ochtirdim, inim...

– Vo ajabo! Agar yanglishmasam, janoblari sharob ichmoqni gunohi azim, deb bilur edilar!

– Alloh o'zi kechirgay! Bugun oftobi olamning ahvoli ruhiyasini ko'rib jigar-bag'rim ezilib ket-

diki, ko'ngil chigillarini jinday yozmoq gunoh bo'lmas, azizim. Qani, baniyati shifo! Sultoni salotinga shifo bergan. Ilohi omin!

«Chamasi bu tili shakar, ichi zahar qari tulki-ning yomon bir muddaosi bor. Ehtiyot bo'lmoq darkor!»

Abul Hasanak oltinday tovlangan shafaqrang maydan bir ho'plab, piyolani qaytarib bermoqchi edi, biroq musallas shunday xushbo'y, shunday xushta'm ediki, tomog'idan «qult» etib o'tib ketganini o'zi ham sezmay qoldi.

– Bay-bay-bay! Filhaqiqat, qirq yil saqlabsiz!

Abul Hasanak bu pakanagina, lo'ppi yuz odamni jinidan yomon ko'rsa ham, undan doim hadik-sirab yuradi. Rost, sobiq bosh vazirni ag'darishda ular bir yoqadan bosh chiqarishgan, lekin Abul Hasanak bu shirin zabon tulki bilan Xo'ja Ahmad Maymandiyga qarshi zimdan til biriktirganida, uni vaziri a'zam bo'ladi, degan o'y yetti uxlab tushiga ham kirmagan, aks holda til biriktirmas edi.

To'g'ri, amir al-mo'minin uni, Abul Hasanakni o'z farzandidan ham yaxshi ko'radi, eng yaqin nadimim deb biladi. Ilgari, bu mudhish vasvas dardiga giriftor bo'lishidan avval, usiz biror o'ltirish qilmas, Abul Hasanak sultonning hamma anjumanlarida bosh-qosh bo'lar, bazmi jamshidlarida soqiylik qilar, yaxshi so'zlari, madhiyalari, lutflari bilan amir al-mo'mininni ham, boshqa a'yon-u boyonlarni ham xushnud etib kelardi. Shu boisdan hamma uni sultonning eng yaqin muqarribi deb bilardi. Endi o'ylab qarasa, sultonning bu iltifotiga suyanib, ko'p hovliqibdi, ko'p dushmanlarning dodini beribdi-yu, ammo-lekin oyoq ostidan bu falokat chiqib qolishini xayoli-

ga ham keltirmabdi. Uning nazarida, suyangan tog'i amir al-mo'minin taxtda o'ttiz-qirq yil emas, toabad turmog'i lozim edi. Hayhot, faqat ojiz bandalar emas, sultoni salotinday «metin tog'» ham abadul-abad turmas ekan bu dunyoda.

Xumda qirq yil asir yotgan «shayton» o'z ishini qila boshladi: Abul Hasanakning ichini yondirib, tomirlaridagi qonini jo'shtirib yubordi. Bosh vazir ham mitti ko'zlari artilgan sirg'aday yaltillab, lo'ppi yuzlari naqsh olmaday taram-taram qizardi, biroq ikkala vazir ham gap boshlashga jur'at etolmas, xayollarida tug'yon urgan fikrlarni jilovlashga urinib, hadeb noz-ne'matlarga zo'r berishar, «oling, oling»lashib, izzat-ikromda bir-birlari bilan musobaqalashardi.

Nihoyat, Ali G'arib, lo'ppi yuzini silab, cho'zilib ketgan sukutni buzishga jur'at etdi.

– Shak yo'q, olampanohning tilagini hech bir kimsa tarki vojib qilolmaydur. Amri poshsho vojibdur. Davlatpanoh katta o'g'li amir Mas'udni emas, kenja zurriyoti shahzoda Muhammadni valiahd deb fatvo bergan ekan... – Ali G'arib tili-ning uchiga kelgan so'zini ichiga yutib, ro'parasida yonboshlab yotgan Abul Hasanakka ko'z qirini tashladi, tashladi-yu, darhol nigohini uzdi. Abul Hasanakning mastona suzilgan ko'zlarida qandaydir yomon bir hadik jilva qilardi.

– So'zlang, so'zlay bering, taqsimim...

– Yo'q, mening ortiqcha so'zim yo'q, – dedi Ali G'arib, darhol, hushyor tortib. – Shahzoda Muhammad diyonatli, mo'min-qobil yigit. Va lekin, faqir amir Mas'uddan qo'rqamen. Davlatpanoh uni toj-u taxtdan mosuvo qilib, shahzoda Muhammadni valiahdim deb fatvo berganda... siz

bilan men kalomulloni qo'lg'a olib, qasam ichdik. Shak yo'q, qasamyod qilg'animiz amir Mas'udning qulog'iga borib yetgandur!

Abul Hasanak to'satdan shiddat bilan qaddini rostlab:

– Muddao? – deb so'radi. – Bu so'zdan maqsad ne? Ochiq ayting, janob bosh vazir!

– Yo'-yo'-yo'q! Hech bir yomon niyatim yo'q! – Ali G'arib shosha-pisha piyolalarga may quydi, quyar-kan, nimjongina momiq qo'llari titrab ketdi-yu, til-larang sharobdan bir necha tomchisi oppoq das-turxonga tomib, pushtirang nuqtalar qo'ydi.

– Siz yoshsiz, azizim, kamina esa ko'p balolar-ni ko'raverib, ko'sa bo'lganmen, inim.

«Balli, ana endi haq gapni gapirding!»

– Faqir sizni bu g'arib kulbamga taklif qilib, ko'nglimni ochgan bo'lsam, boshimizga qilich kelganini sezib qildim bu ishni! Toki, bu qilich ik-kimizning boshimizda barobar turibdi! – Ali G'a-rib to'satdan ko'ziga yosh oldi. – Takror aytamen, inim, amri poshsho vojibdur. Va lekin... amir Mas'ud!.. Toj-u taxt deganda hech narsadan qaytmaydi u nobakor!

– Xo'p! – Abul Hasanak may to'la piyolani xon-taxtaga «taq» etkizib qo'ydi-da, kaftining orqasi bilan qop-qora bejirim mo'ylovini siladi. Uning sharobdan bo'g'iqqan chiroyli yuzida, haram go'zallarining ko'zlariday katta-katta serkiprik ko'zlarida qandaydir kishini o'ziga rom etguvchi shiddat va qat'iyat zuhur etdi. – Boshimizga ne musibat kelmasin... kamina ul oftobi olamning izmi ixtiyoridin chiqmasmen!

– Borakallo! – dedi Ali G'arib, momiq qo'llarini ko'ksiga qo'yib. – Ammo... amir Mas'ud!

– Ota rozi – Xudo rozi! Padari buzrukvori norozi bo'lg'on zurriyotdan Xudo ham norozi! – dedi Abul Hasanak, allaqanday jo'shib. – Bas! Amir Mas'uddan qo'rqmoq emas, qilich charxlamoq darkor, janobi bosh vazir, qilich!..

– So'zingiz to'g'ri, azizim. Ammo-lekin, o'zingizdan qolar gap yo'q, inim, barcha amir, barcha lashkarboshilarning amir Mas'udga ixloslari balanddur.

– Yo'q! – dedi Abul Hasanak, bo'g'iq tahdidli ovozda. Uning uchlari buralgan bejirim mo'ylovi dikrayib, ko'zlari ola-kula bo'lib ketdi. – Balki lashkarboshilar orasida fitna bordur? Balki amir al-mo'minin olamdan o'tmasdan turib, unga choh qazish payida yurgan nonko'rlar bordur? Balki bu fitnaning boshida vaziri a'zam janoblari o'zlari turgandur? – Abul Hasanak, o'z so'zidan o'zi junbishga kelib, o'ng qo'lini qilich dastasiga qo'ydi. Uning ola-kula ko'zlarida telbalik alomat-lari zohir bo'ldi. – Agar fitna bo'lsa, bilib qo'ying, vaziri a'zam! Faqir tirik ekanmen, kimki amir al-mo'mininga choh kavlasa, o'zi shu chohga qulaydi! – Abul Hasanak, qilichining bandini ushlaganicha, o'rnidan tura boshladi, biroq turib ulgurmadi. Ali G'arib baqaloq gavdasiga zid bir chaqqonlik bilan o'rindan sapchib turdi.

– Tort qo'lingni qilichdan! Yo, hozir g'ulomlarimni chaqiramen! Qo'llaringga kishan urdirib, zindonga tashlaymen, tentak!

Abul Hasanak, go'yo o'z quloqlariga ishonmaganday, ko'zlarini katta ochib angrayib qoldi, dikraygan mo'ylovining uchlari xuddi o'q yegan qushning qanotlariday pir-pir uchdi-yu, qilichi-

ning bandini qo'pib yuborib, ko'rpachaga holsizgina yiqildi.

– Ke... kechirgaysiz, valine'mat!

U, garchi bosh vazirning firib bobida benazir ekanini bilsa ham, ko'nglining tupkarisida uni pisand qilmas, nazarida, agar astoydil kirishsa, uni vaziri a'zamlikdan ag'darib tashlashga ham qurbi yetar edi. U endigina bu yum-yumaloq, baqaloq odamning butun mudhish qudratini his etdi.

Ali G'arib, go'yo hech narsa bo'lmaganday, qayta joyiga o'tirdi, bo'g'i q tahdidli ovozi qayta muloyimlashib, sekin davom etdi:

– Kamina sizni o'z inimday yaqin tutib, ko'nglimdagi dardlarimni izhor etsam, siz...

– Uzr, valine'mat. Yoshlik qildim!..

– Boshga qilich kelganda kishi yurak amriga emas, aql-idrok amriga tayanmog'i darkor. Bilib qo'ying, inim, ne ko'p, siz bilan bizning dushmanimiz ko'p. Qo'lingizda qilich, belingizda quvvat bor ekan, ular sizga ta'zim bajo keltirib, iljayib turadi. Qilichingiz qo'lingizdan tushsa o'zlari qilich yalang'ochlaydi. Siz bilan biz amir al-mo'minning qo'lidagi qilichlari edik. Yodingizda bo'lsin, yangi shoh, avvalgi shohning qilichlarini taqmaydi, bil'aks, ularni sindirib tashlab, o'z qilichlarini taqqusidir. Amir al-mo'minin, – Alloh uning umrini uzoq qilg'ay, – bu bebaqo dunyoni yetim qilib, ul dargohi ilohiyni munavvar etadurg'on bo'lsa, siz bilan biz o'sha kuniyoq eski qilichga aylanurmiz. Bu musibat faqat biz emas, bola-chaqalarimiz, nasl-nasabimizning boshiga ham tushmasa deb qo'rqamen. Qo'rqqanim sabab sizga ko'nglimni ochib, dardimni aytdim, siz



esa... so'zimning «Xudo»sini eshitib, «berdi»sini eshitmadingiz, inim!

Vo darig'! Bir qarashda lanj va beso'naqay ko'ringan bu ko'rimsizgina xomsemiz odam, bir necha oydan beri Abul Hasanakning ko'ngliga g'uluv solib, uyqu bermay kelayotgan gaplarni gapirdi. Baayni uning o'ylarini, uning yuragini kemirib kelayotgan shubha va hadiklarni bir-bir sanab berdi.

– Qissadan hissa shulki, ul takabbur hakim Ibn Sino hazratlariga yuborilgan ariz Abulvafo Sariqdan mushrif kelmish!

– Mushrif? Qachon? Ne mujda keltirdi u?

– Mujda!.. – Bosh vazir o'ymoqdekkina og'zini yalab kinoyali kulimsiradi. – O, azizim, azizim! Mujda kelsa – kamina sizni bu kulbaga chaqirib, bu so'zlarni so'zlab o'ltirmas edim! Taassuflar bo'lg'aykim, ul betavfiq hakimi davron, elchining daragini eshitib, qochibdi! Bundan o'n sakkiz yil muqaddam olampanohga xizmat qilishni istamay, Gurganjdan Jurjonga qochgan bo'lsa, bu safar ariz Abulvafoning daragini eshitib, Hamadondan qochibdi.

– Qayga?

– Qayga qochganini o'zidan borib so'raysiz, azizim!

Abul Hasanak bosh vazirning zaharxandasini ichiga yutib:

– Voy, tavba! – deb yoqasini ushladi. – Davlatpanoh unga bo'yi barobar ganj va'da qilgan bo'lsa... tag'in ne kerak ul takabbur hakimga?

– Siz hakimni qo'yib, o'z ahvolimizdan so'zlang, azizim. Oftobi olamning so'zini eshitdingiz. Ul

betavfiq hakimni bir-ikki haftada hozir-u nozir qilmasak, siz bilan bizning boshimiz tanimizdan judo bo'lg'usidir. Siz esa hakimni so'zlaysiz!

Abul Hasanakdan sado chiqmadi. Uning esiga hozirgi na sultonning xobxonasida bo'lib o'tgan suhbat tushdi, amir al-mo'mininning bo'g'i qahrli ovozi quloqlari ostida qayta yangrab ketdi: «Tilyog'lamalik qilma, Abul Hasanak, bilasen – faqir yolg'on so'zga inonmaymen yo sen hazrat Ibn Sinoni bir haftada hozir-u nozir qilasen, yo men hammangni duoyi bad qilamen!»

Abul Hasanak esa kiyik ovidan keyin yuksak rutbalar kutar, hatto, eski raqibi Ali G'aribning o'rniga vaziri a'zam bo'lishni umid qilib yurardi!

Abul Hasanak «may!» deb, piyolasini Ali G'aribga uzatdi. Biroq Ali G'arib may quyish o'rniga pildirab borib, eshikni zichlab yopib qaytdi.

– May ichishdan avval so'zimning «berdi»sini eshiting, azizim! – vaziri a'zam yon cho'ntagini kavlashtirib, to'rt buklangan bir qog'oz oldi.

– Omadsiz elchimiz Abdulvafo Sariqdan kelgan maktub: «Toj-u taxtimizning ko'rki, saltanatimizning ziynati, ul oftobi olamning sihat-salomatligini Alloh taolodan har laylu nahor tilab turibmiz» va hokazo, va hokazo. – Bosh vazir maktubni ko'z oldiga yaqinlashtirib, bir zum lablarini pichirlatib ichida o'qidi-da:

– Ha, mana! – deb yutindi. – Mana... «Ul sarvari saltanatning suyangan tog'i, toj-u taxtimizning aqli idroki bo'lmish siz valine'matimga yetib ma'lum bo'lg'aykim, biz faqir-u haqir Isfahondan umid oftobimiz so'nib, Teginobod muzofotiga kelib qo'nganimizda ajab bir hangomaning sho-

hidi bo'ldik. Shundaykim, shahar bozorida bir chehrasi munavvar zoti tabarruk o'zini hakimi davron hazrat Ibn Sino deb, ta'rif qilganlar va ko'p xastalarning dardlariga davo topib, ularning duoyi saodatlariga musharraf bo'lganlar.

Bu ajib hangoma kaminaning qulog'iga yetgach, ul hakimi davronni o'z qarorgohingga oldirishga jazm etdim. Ammo, afsuslar bo'lsinkim, kaminaning bu istagidan ogoh topgan ul allomayi zamon bir kechada qaygadir gumdon bo'lmish. Faqir yon-yoqqa ayg'oqchilarni safarbar qilib, so'rab-surishtirdim hamki, ammo darak topmadim. Har yoqqa ot choptirib ketgan mushriflar oxir-pirovardida tag'in bir ajib xabar topib keldilar. Shundaykim, o'zini Abu Ali ibn Sino deb ta'rif qilgan bul hakimi hoziq mashriq sari, inchunin, G'aznayi muborak tomon yo'l olgan emish.

Alqissa, bu g'aroyib hangomani siz oliymaqom vaziri a'zam janoblariga yetkazmoqdan maqsad shulkim, ehtimol, o'zini hazrat Ibn Sino deb ta'rif-u tavsif qilgan bu allomayi davronni dorus-saltanatdan surishtirib ko'rsangiz va lozim topsangiz, oftobi olamning quloqlariga yetkazsangiz. Kamina esa poshshoyi olamning nigohiga tushmoqdan qo'rqib, Teginobod muzofotida, shahar qal'asi tashida qo'nib turibmen, ko'zim yo'lda, siz valine'matimning duoyi salomlarini kutib yotmoqdamen...

Toabad duoyi joningizni qilib, g'arib qulingiz va hokazo, va hokazo...

Ali G'arib, munchoqday miltiragan qisiq ko'zlarini xatdan uzib, to'rda toshday qotgan Abul Hasanakka qaradi.

– Xo‘sh, so‘zlang, azizim!...

– Siz, – dedi Abul Hasanak, tili og‘zida zo‘rg‘a aylanib. – Siz... bu yolg‘on hangomaga inonib, o‘zini Ibn Sino deb ta‘riflagan soxta tabibni axtarmoq niyatidasiz?..

– Axtarmoq! Kamina uni allaqachon topib, hibsga qildirdim!

Abul Hasanak chiroyli ko‘zlarini ola-kula qilib:

– Inchunin, – dedi hansirab. – Inchunin uni olampanohga ro‘baro‘ qilmoqchisiz?

– Yo‘q! Xazrat Ibn Sinoni avval qamoq qilib, keyin amir al-mo‘minaga ro‘baro‘ qilib bo‘lmas!

– Xo‘sh? Xo‘sh?

– Buning uchun hakim hazratlarini mushriflarga qo‘shib darhol Teginobodga, ul xumkalla Abulvafo Sariq huzuriga qaytarmoq darkor! So‘ngra...

– So‘zlang! So‘zlay bering, taqsim!

– So‘ng ul hakimi hoziqni o‘z martabalariga munosib as‘asa-yu dabdaba ila kutib olmoq lozim, egniga shohona liboslar yopib, izzat-ikromini bajo keltirmoq darkor. Ana shundan keyingina...

– Bas! So‘zingizni angladim. Hammasini angladim! – dedi Abul Hasanak negadir rangi o‘chib. – Maqsadingiz... Bu yolg‘on dabdaba bilan yolg‘on Ibn Sinoni chin Ibn Sinoga aylantirmoq! Chin Ibn Sinoga aylantirib, sultoni salotiga ro‘baro‘ qilmoq! Yo, Rab! Bu yolg‘on oshkor bo‘lsa...

– Oshkor bo‘lsa! – Vaziri a‘zam qo‘lidagi piyola to‘la mayin qahr bilan devorga qarab sepdini, naqsh olmaday qip-qizil yuzidan qon qochib: – Bu yolg‘on oshkor bo‘lsa, chinini toping! – deb o‘shqirdi. – Yo, chin Ibn Sinoni toping, yoki bu

qovoq kallangizni suyuqli rahnamongiz qilichiga tutib bering!

Abul Hasanak qaltiroq qo'llari bilan boshini changallab oldi, so'ng go'yo butun salobati, dimog'-firog'i, g'ururi – hammasi yodidan chiqqanday, ikki bukilib vaziri a'zamning oldiga tiz cho'kdi.

– Afv eting, valine'mat! Befarosat iningizni afv eting!

## O'N IKKINCHI BOB

Noshud shogird sabab hibsga tushgan «hakimi zamon» Abu Shilqim ibn Shahvoniy bir-ikki kundayoq adoyi tamom bo'ldi. Zax va zimiston yerto'lada, u yoqdan-bu yoqqa tapir-tupur yugurib, ko'zi ilingudek bo'lsa, oyoq-qo'llarida o'rmalab yurguvchi yovuz kalamushlar «davrasida» o'tgan har bir kun ming kunga tatirdi. Uchinchi kuni Abu Shilqim ibn Shahvoniy hayotdan batamom umidini uzdi, «endi o'ldim, bu sovuq go'rga tiriklayin ko'mildim», degan o'yg'a bordi, bordi-yu, qibla tomonga sajda qilib, uzoq yig'ladi. Biroq yig'i ham yuragiga taskin-u tasalli berolmadi, bil'aks, ko'nglidagi eski alamli o'ylarni qayta qo'zg'adi:

«Kim senga hazrat Ibn Sino bo'lamen deb, bu qing'ir yo'lga kir dedi! Bu kuningdan besh battar bo'l, miyasini yegan eshshak!» – dedi Abu Shilqim, o'z yog'ida o'zi qovurilib. U bir o'zini, bir mastona valdirab, unga pand bergan shogirdini so'kib, ko'kka tavallo qilarkan, nechundir botbot ko'r darvesh esiga tushar, nazarida, u batol sovuq yerto'laning zim-ziyo burchagida turib

uni kalaka qilayotganday bo'lardi. Go'yo u yolg'iz ko'zini o'ynatib, qiqir-qiqir kular: «Ha, al qasosli minalhaq! Qasosli dunyo bu! Menga neki yomonlik qilgan bo'lsang hammasi qaytgidir, qaytib yoqangga yopishg'usidur!» deb g'oldirar edi.

Qamalishining uchinchi kuni bu vasvas va sovuq vahimalardan aqli chuvalashib, o'tirgan joyida yiqilib qoldi. Yiqilganda bir lahza ko'zi ilindi chog'i, tapir-tupur oyoq tovushlarini eshitib, cho'chib ko'zini ochdi. Zum o'tmay, eshik zulfinlarining shaqir-shuquri eshitildi.

«Yo, Parvardigor! – pichirladi Abu Shilqim, tirnoqlarigacha muzlab. – O'z hifzi himoyatingda saqlagaysen!»

Qo'sh tavaqali zalvarli eshik go'yo kimgadir nola qilganday uzoq g'ichirlab, bazo'r ochildi.

Bo'sag'ada... boshiga yaltiroq mis dubulg'a kiyib, beliga qilich taqib olgan novcha bir sarboz sham ko'tarib turar, uning orqasida zarbof to'nli yum-yumaloq bir odam ko'zga chalinardi. Eshik ochilishi bilan novcha sarboz orqaga chekinib, zarbof to'nli yum-yumaloq kimsaga yo'l berdi, u esa qo'l qovushtirib:

– Assalomu alaykum, ha... hakim hazratlari!  
– deb g'udrandi-da, yurib emas, yo'q, allaqanday pildirab kelib, Abu Shilqim ibn Shahvoniya ta'zim bajo keltirdi. – Hakimi zamon hazratlari afv etsinlar! Faqir vaziri a'zam Ali G'aribmen!

«Vaziri a'zam Ali G'arib? Amir al-mo'minning suyangan tog'i Ali G'arib?»

– Bir qoshiq qonimdan kechgaysiz, taqsiri olam! – dedi vaziri a'zam hamon qo'l qovushtirib.  
– Navkar ahlini bilasiz. Bu ho'kizlar bosh olish

bobida ustasi farang-u, ammo lutfi karam ne, izzat-ikrom ne – fahmi farosatlari yetishmaydi. Shon-shuhratingizga munosib izzat-ikrom ko'rsatmoq o'rniga bu sovuq yerto'laga qamaganlar. Biz gumrohlar esa bu yumushdan bexabar qolibmiz!

Abu Shilqim ibn Shahvoniyl har narsani kutsa ham, hozirgina to'kkan ko'z yoshlari arshi a'loga bunchalik tez yetib borishini kutmagan edi!

«Yo, Rab! Nahot, munchoq ko'zlari anov shamday zaif miltirab turgan bu qari tulkinning so'zlari rost bo'lsa? Nahot, makr bobida benazir deb nom chiqargan bu qari iblis uning, Abu Shilqim ibn Shahvoniylning chin Ibn Sino ekaniga inonsa?»

– Tasanno sizga, allomayi zamon, tasanno! Amir al-mo'minin siz hazratimni lutfan taklif etib, Hamadon va Isfahonga eng mo'tabar zotlarni elchi qilib yuborgan edi. Siz hazratim bo'lsa... o'z oyog'ingiz bilan yurib kelibsiz. Ofarin sizga, hazratim!

Abu Shilqim ibn Shahvoniylning yuragi «shuv» etib, a'zoyi badanidan behisob chumolilar o'rmlab o'tdi.

«Biladi! Hamma sir-asrorini biladi bu battol!»

– Elchi... Elchingiz Hamadondan qaytdimi, taqsiri olam? – dedi Abu Shilqim va bosh vazirning yuzida bilinar-bilinmas zaharxandani ko'rib, ichida so'kindi:

«Ho'kiz! Ho'kiz bo'lmasang buni so'rab ne qilarsen, gumroh!»

– Elchi... Elchimiz shu fursatda Teginobodda. Isfahondan siz hazratimni topolmay, tarvuzi qo'ltig'idan tushib qaytmish!

Abu Shilqim ibn Shahvoniyl yengil nafas olib, vaziri a'zamga dadilroq boqdi. Bosh vazirning lab-

laridagi kinoyali tabassum soʻngan, toʻlin oyday yum-yumaloq, qip-qizil yuzida cheksiz hayrat va chuqur ehtirom ifodasi balqib turardi.

– Ul oftobi olam har on, har daqiqa siz shayx ur rais hazratlarini koʻrmoq va izzat bajo keltirmoqqa mushtoqdurlar. Va lekin... agar siz hazratimga maʼqul va manzur tushsa, bizda bir maslahat bor, mavlono!

– Bosh ustiga!

– Kamina siz hazratimga lutfi karam tamanno aylamoqdan boshqa maqsadim yoʻqdir. Bas, biz sizni shu bugun yaqin bir muzofotga uzat-sak. Siz hazratim esa bir-ikki haftadan keyin Gʻaznayi munavvarga oʻz nomingizga munosib shon-u shavkat va izzat-ikrom ila tashrif buyur-sangiz. Toki, biz faqirlar sizday allomayi davronni oʻz dovrugʻingizga loyiq tarzda qarshi olsak va lutfi ehson va izzat-u ikrom ila ul oftobi olamga taqdim etmoq baxtiga muyassar boʻlsak!

«Chin soʻzmi bu, yo, burgaga tuzoq qoʻygan bu qari shaytonning hiylayi nayrangimi?» – Abu Shilqim ibn Shahvoniy vaziri aʼzamga yer ostidan oʻgʻrincha nazar tashladi, ammo uning hamon tavoze bilan bosh egib turganini koʻrib oʻzi ham bosh egdi.

– Vaziri aʼzam janoblarining istagi bizday faqir hakimlar uchun vojibdur, taqsiri olam!

## OʻN UCHINCHI BOB

Haftaning soʻnggi kunlarida Beruniy oʻzini xiyol yengil sezdi. Isitmasi qaytdi, koʻngli sal ravshan tortdi, faqat hanuz darmonsiz.



Vaqt choshgohga yaqinlashib qolgan bo'lsa kerak, tepadagi tuynukdan hibssonaga bir jom nur quyilmoqda, bu nur g'adir-budir xarsangtoshlardan qurilgan tor qafasni bir nafasga bo'lsa ham yoritgan edi.

Beruniy bosh tomonidagi ikki qumg'onning birini olib, yuzini yuvdi, zindonbon qo'yib ketgan arpa nonni suvga botirib bir burda yedi. U o'zini sal bardam sezib, o'rnidan turmoqchi edi, shu payt tepadagi tuynukda nimadir pitir-pitir qildi. Beruniy yalt etib tuynukka qaradi. Tuynukdan qandaydir bir qush «par» etib uchdi, uchganda yong'oqdekkina bir tosh «chars» etib uzildi-da, suv to'la qumg'onga kelib «cho'lp» etib tushdi. Qumg'ondagi suv chayqalib ketdi-yu, jo'mragidan tirqirab suv oqdi.

Beruniy, go'yo favqulodda bir hodisa ro'y berganday, yuragi gurs-gurs urib qumg'onga, to'g'rirog'i, qumg'on jo'mragidan oqib chiqib yerni ho'l qilgan suv tomchilariga tikilib qoldi. Keyin, apiltapil o'rnidan turdi-da, qafasday tor xonani gir aylanib, yong'oqday-yong'oqday bir nechta tosh terib keldi, so'ng yerga tiz cho'kib, bu toshlarni qumg'ondagi suvga bitta-bitta tashlab ko'rdi.

Har safar toshni qumg'onga tashlaganida uning jo'mragidan bir necha tomchi suv oqib chiqar, kattaroq tosh tashlasa, tomchilar ko'proq tushar, kichikroq tosh tashlasa suv kamroq oqardi..

Juda oddiy, ammo... baribir ajab hodisa! Nechun bu sodda, ammo kunday ravshan fikr uning miyasiga avvalroq kelmadi?

Beruniy, xuddi hibsdan ozod bo'lishi to'g'risida farmoni oliy kelganday, yuragi hapriqib, tor xonani yana bir necha marta aylanib chiqdi.

U go'yo ko'pdan beri miyasini band qilib ke-  
layotgan chigal bir jumboqning kalitini topgan-  
day hayajonlanar, entikar edi.

Yo'q: suv to'la idishga biror jism tushganda  
idishdan ma'lum miqdorda suv oqib tushishi  
uning uchun yangilik emas... Bu hodisa yunon  
olimi Arshimidus<sup>1</sup> asarlarida qayd qilingan. Suv-  
ga tashlangan jism o'zi siqib chiqargan jismdan  
og'ir bo'lsa – cho'kishi, barobar bo'lsa suzib yuri-  
shi unga ayon. Ammo... tuynukdan nogahon  
uzilib tushgan bu tosh! Qumg'on jo'mragidan  
oqib chiqqan bu bir necha tomchi suv! Ajabo,  
juda oddiygina bu hodisa Beruniyning miyasi-  
da ko'pdan beri aylanib yurgan murakkab bir  
muammoga kutilmagan bir tiniqlik kiritdi!

Mana, o'n-o'n besh yildirki, Beruniy nodir  
ma'danlar to'g'risida bir kitob yozish orzusida  
yuribdi. U oltin, kumush va noyob ma'danlar  
to'g'risida ko'p ilmiy ma'lumotlar, g'alati rivoyat-  
lar to'pladi, ular keltirgan fojialar haqida ko'p  
g'aroyib hangomalar yig'di, ham ilmiy, ham bani  
bashar uchun ibrat tarzida yozilajak bu kitobning  
nomini ham topdi. Uning nomi «Javohirnoma»  
bo'ladi! Endi eng qiyin ish – noyob ma'danlarning  
tuzilishi, tarkibi, qattqlik va yumshoqlik daraja-  
si, eng muhimi – solishtirma og'irligini aniqlash  
ishi qoldi! Buning uchun esa nozik bir olat ya-  
sash, to'g'rirog'i, bu olatni kashf qilish lozim!

– Arximed.

Beruniy ko'pdan beri bu nozik va murakkab  
asbob haqida o'ylar, goho uni kashf qilganday  
ham bo'lar, yana ozgina bosh qotirsa, bas, ix-

---

<sup>1</sup> Arshimidus – Arximed.

tiro ro'yobga chiqadigandek tuyular edi, biroq sal o'tmay, kalavaning uchi qayta yo'qolar, yechish lozim bo'lgan yangi muammolar paydo bo'lardi.

Mana endi masala oydinlashdi!

U xuddi mana shu qumg'onga o'xshash bir idish yasaydi. Idishning tagi keng, bo'yni ingichka bo'ladi. Shundaykim, tariqday narsa tushsa, tariq barobar, yong'oqday narsa tushsa, yong'oq barobar suv oqib chiqishi lozim. Jo'mrakning beliga esa kaftdekkina taqsimcha yopishtirib, unga nozik tarozi o'rnatadi. Bu tarozi shunday nozik va «sezgir» bo'lsinki, bir misqolning<sup>1</sup> o'ndan birini ham aniqlay olsin! O'lchov birligi sifatida esa ma'danlar sultoni oltinni oladi! Ha, bu ishda, oltindan a'lo ma'dan yo'q! Masalan, yuz misqol oltin olib, boshqa ma'danlarning solishtirma og'irligini shu oltin og'irligiga nisbatan aniqlash mumkin!

Beruniy hayajon ichida tor xonaning u boshidan bu boshiga uzluksiz borib-kelar, boyagi darmonsizlikdan asar ham qolmagan, xayoli esa tobora ravshanlashib borar, bir-biridan o'tkir, bir-biridan yorqin fikrlar turnaqator bo'lib tizilib kelardi!

Ha, g'alati narsa ekan hayot! Mana, tasodifan tuynukdan tushgan bitta tosh sabab uni ko'p yillardan beri qiynab kelayotgan murakkab bir jumboq yechildi hisob! Bundan bir necha yil muqaddam Hindistonda, Nanda shahri tevaragidagi baland toqqa chiqayotganida ham xuddi mana shunday g'aroyib bir hodisa ro'y bergan, miyasida nimadir «yarq» etib, yoshlik chog'laridan beri uni qiynab yurgan chigal bir muammoning uchi topilgan edi!

Beruniy yurishdan to'xtab, devorga suyandi, suyanishi bilan uning ko'p yillik farazini tas-

---

<sup>1</sup> Misqol – 4,5 grammga teng og'irlik o'lchovi.

diqlab, ulug' ixtiro ato qilgan Nanda tog'i «lop» etib nigohi oldiga keldi.

Tog'ning to'rt tarafi yong'oq otsa yumalab ketadigan cheksiz-chegarasiz sayhonlik edi.

Beruniy toqqa chiqishga ahd qilib, uning etagiga borganida ko'nglida hali hech narsa yo'q edi. Nechundir faqat bir narsa, olis ufqda qaqqayib turgan yolg'iz daraxt uning e'tiborini jalb etgan edi, xolos. U toqqa asta-sekin o'rmalab, ikki yuz qadamcha ko'tarilgach, nafasini rostlash uchun to'xtadi, to'xtadi-yu... beixtiyor boyagi daraxtni qidirdi. Ajabo: boya ufqda turgan daraxt tog' tagiga kelib qolgan, ufq esa yiroq-yiroqlarga chekingan edi! Rost, bu hodisa ham Beruniy uchun yangilik emas edi. Lekin balandlab borgan sari yangi ko'z ilg'amas ufqlar ochilishini kuzatarkan, xuddi bugungiday, miyasida allanarsa «yarq» etdi-yu, uni yillar davomida qiynab yurgan chigal bir muammo birdan ravshanlashdi: bu zamin – gir aylanasi osmoni falak bilan chegaralangan bu zamin, hamma o'ylaganidek, tep-tekis emas, yo'q, tekis emas!

Beruniy xayoliga kelgan allaqanday fikrdan bugungidan ham qattiqroq hayajonga tushib, olis ufqda o'sgan bir juft chinorni ko'z ostiga oldi-da, yana uch-to'rt yuz qadam o'rladi. Yo'q, u yangilishmagan, ufq boyagidan ham olisroqqa chekingan, bir juft chinor esa go'yo toqqa yaqinroq surilib kelgan edi.

Beruniy xarsangga o'tirib, birpas nafasini rostladi-da, yana toqqa o'rladi. Yana o'sha hodisa! Ufq yana yiroq-yiroqlarga chekindi, Beruniy ko'z ostiga olib qo'ygan narsalar esa go'yo toqqa yanada yaqinroq siljib kelganday bo'ldi.



Rost, bu hodisa ham Beruniy uchun yangilik emas edi. Lekin toqqa o'rlagan sari ufq chekinib, yangidan-yangi ko'z ilg'amas kengliklar ochilishini hayajon bilan kuzatarkan, miyasida nimadir yarq etib yondi-yu, ko'pdan beri unga tinchlik bermay yurgan notinch bir o'y, mavhum, ammo g'aroyib bir faraz favqulodda oydinlashdi.

Bu o'y, bu noaniq, ammo g'aroyib faraz Beruniyga yoshlikdan beri orom bermay kelardi. Nechun quyosh ertalab chiqib, kechqurun botadi, nechun oy har o'n besh kecha-kunduzda bir yangilanadi, nechun yulduzlar holati fasllarga qarab o'zgaradi? Nechun yozda osmonning bir burjida bo'lgan yulduzlar qishda boshqa bir joyga o'tib qoladi?

Beruniy tug'ilib voyaga yetibdiki, bu jumboqqa javob qidiradi. Uni yechish umidida o'zi qurgan rasadxonada kechani kunduzga, kunduzni kechaga ulab rasad o'tkazdi, arab, hind, yunon allomalarining kitoblarini suv qilib ichdi. Uning ko'nglida zaif shamday miltiragan bu farazlar o'shanda, rasadxonada bedor o'tgan tunlarda tug'ilgan edi. Nanda tog'idagi kuzatishlar esa xuddi bugun tuynukdan tushgan tosh kabi, uni ko'pdan beri qiynab kelgan fikrlarga ajib bir ravshanlik kiritdi!

Shu-shu, Beruniy tog' yonbag'riga chodir qurib, bir haftagacha har xil o'lchovlar bilan shug'ullandi. Avval tog' etagidan ko'ringan ufqni odimlab chiqdi, keyin asta-sekin toqqa ko'tarildi, ko'tarilarikan, har yuz qadamda «ochilgan» yangi ufqlar oralig'ini o'lchadi, so'ng olingan raqamlarni tog' balandligiga ko'paytirib, hosil bo'lgan

burchaklarni aniqladi. Eng muhimi – topilgan «markaz»ni yer kurrasining har qanday nuqtasi bilan birlashtiruvchi to'g'ri chiziqni aniqladi, bu esa uni eng ko'p qiynagan muammoni hal qilish imkonini berdi, ya'niki yer kurrasining tep-tekis emas, dumaloq ekanini raqamlar vositasida isbotlash imkonini berdi!.. Keyinchalik, Hindistonda shaharma-shahar yayov kezib yurgan chog'larida Beruniy vedachi kohinlardan g'alati bir rivoyat eshitdi: go'yo olam yaralishidan avval na quyosh bo'lgan, na oy va na yulduz! Birinchi bo'lib, zulmat, zulmatdan suv, suvdan esa olov bunyod bo'lgan. Olovdan tuxum barpo bo'lib, u ummonlar qa'rida suzib yurgan. So'ng, tuxum ichidagi oltin homiladan hindlar xudosi Borahim tug'ilgan. Borahim tuxumni yorib chiqqan-u uning bir pallasidan osmon, bir pallasidan yer hosil bo'lgan, shuning uchun ham hindlar boshda tuxum shaklida yaralgan bu olamni Borahim tuxumi deb ataydilar!

Yodida bor, keksa kohinlardan eshitgan bu rivoyat ham, xuddi bugun tuynukchadan tushgan tosh kabi, Beruniyga yer kurrasi to'g'risidagi risolasini yozishga yaxshi bir turtki bo'lgan edi. Yo'q, bugun topgan ixtirosi hali-hozir faqat kallasida, bu ixtironi hali nihoyasiga yetkazish kerak, ko'nglida endi unib chiqqan bu niholni parvarish qilib, undan hosil olish kerak hali?

Yo, Rab! Nahot, boshlagan bu ishlari, yozgan va yozayotgan kitoblari – hammasi chala qolsa? Ularni nihoyasiga yetkazolmay, bu sovuq go'rda toabad qolib ketsa?

To'xta! Bu ne? Eshik taqilladimi, yo unga shunday tuyuldimi? Ana, zulfinlar shaqir-shuqur



qildi, temir tasmalar bilan qoqilgan zalvarli eshikning bir tavaqasi asta ochilib, qo'llarida nayza, ikki sarboz, ularning orqasida esa... egnida zarbof to'n, boshida oppoq simobiy salla, kichkinagina, oppoqqina bir mo'ysafid ko'rindi. Bu – bosh devon sohibi Abu Nasr Mishkan janoblari edi!

Sohibi devon qo'lida naysimon yorliq, bemajol devorga suyanib qolgan Beruniy tomon yurdi:

– Muhtaram birodarim, Abu Rayhon! – Abu Nasr, ko'zida yosh, pildirab kelib Beruniy bilan ko'rishdi-da, darhol qo'lidagi yorliqni ochdi.

– Ul oftobi olamning mehri muruvvati cheksizdur, azizim. Mana, sizday allomayi davronni ozod etmoq to'g'risida farmoni humoyun bitib, faqirni huzuringizga yo'lladilar!

Sohibi devon qo'lini ko'tarib, yorliqni Beruniyning ko'ziga tutdi. Biroq yorliqdan ham bu-run Beruniyning ko'zi eshikdan ko'rinib turgan tog'larga tushdi. Tog' etagidagi ko'm-ko'k qirlarda qiyg'os gullagan bodomzorlar aniq ko'rinardi. To'p-to'p gullagan bodomzorlar qir yonbag'rida emas, yuksak bo'shliqlarda asta suzib yurgan nafis oq-pushti bulutlarga o'xshardi.

Yopiray! Nahot, bu sovuq go'rdan chiqib, o'sha yam-yashil qirlarda yurmoq yana nasib etsa? Bu go'zal oq-pushti bodomzorlarni kezib, ularning nozik hidini to'yib-to'yib hidlamoq nasib qilsa unga?

Abu Nasr Mishkan janoblari, go'yo Beruniyning xayolidan o'tgan fikrlarni ilg'ab olganday, chehrasi yorishib:

– Ul mehri daryo Xatlibegim omon bo'lsinlar! – deb xitob qildi. – Begim omon bo'lsalar hamma narsa o'rniga tushadur, mavlono.

Beruniy beixtiyor nigohini tog'lardan uzib:

– Xatlibegim? – deb so‘radi.

– Ofarin, mavlono! Begim sizni ul hakimi davron hazrat Ibn Sinoga yo‘llashni olampanohga maslahat berganlar! Begimning bu maslahati amir al-mo‘mininga ma‘qul va manzur bo‘lgandur.

– Kaminani Ibn Sinoga yo‘llamoqchilar?

– Balli! Bundan uch oy muqaddam ul hakim hazratlariga yuborilgan elchilardan hanuz darak yo‘q. Siz esa... hakimi davronning eng yaqin birodarisiz. Shu boisdan Xatlibegimning maslahati olampanohga ma‘qul bo‘lgan!

Sohibi devon uning sukutini alomati rizo, deb tushundi chamasi, eshikda serrayib turgan navkarlarga yuzlandi:

– Nechun qoqqan qoziqday qaqqayib qoldinglar? Kelinglar, qo‘ltig‘idan olib yordam beringlar mavlonoga!

## O‘N TO‘RTINCHI BOB

Amir Mas‘ud kechasi tomog‘i qaqrab uyg‘onib ketdi. Maxfiy ishratxona tokchalaridagi ba‘zi shamlar o‘chgan, ba‘zilari bazo‘r miltirab turardi...

Amir, bosh tomondagi olti qirrali xontaxtani paypaslab, tog‘-rog‘ noz-ne‘matlar orasidan bir piyola sharbat olib ichdi-da, yonidagi to‘shakka qaradi. Kechasi haram bekasi yozgan qalin shoyi to‘shak bo‘m-bo‘sh edi. Bu bo‘sh to‘shak amirga kechasi olishaverib bo‘y bermagan hurkak malakni, uning bo‘g‘izlanayotgan qo‘zichoqday zorli nidosini eslatdi-yu, yuzi burishib ketdi.

Ko‘zlari bo‘taloqning ko‘zlariday javdirab turgan bu yosh, hurkak malakni (uning ismi ham jismi-



ga monand – Qorako'zbeginm edi!) amirga Buxoro hokimi Alitegin in'om qilib yuborgan. In'omdan maqsad esa: bundan uch-to'rt yil muqaddam sulton Mahmud Buxoroga yurish qilganida asirga olib ketgan suyuqli kenja xotini bilan suyuqli qizini amir Mas'ud yordamida tutqundan qutqazish edi.

Rost, Hirotdan Hamadon tomon yurish boshlagan amir Mas'ud birda Isfahon uchun bo'lgan qattiq janglar sabab birda G'aznadan kelayotgan noxush xabarlar sabab aysh-ishratga uncha hushi yo'q, ko'ngliga qil ham sig'masdi. Lekin Buxoro hokimi Alitegin in'om etgan bu sanam... uning minilmagan toychoqday hurkak qiliqlari, ko'z yoshlari, oppoq siynasi... mana hozir ham amir kechasi bu hurkak toychoqni jilovlay olmagani esladi-yu, vujudida yana o'sha tizginsiz hayvoniy hirs uyg'ondi. U haram bekasini chiqirish uchun yostig'i tagidan shaqildog'ini qidir-di, biroq shu payt tashqarida dukur-dukur oyoq sharpasi eshitildi. Zum o'tmay, kimdir eshikni betoqat qoqdi.

– Kim bu, tun yarmida behalovat qilg'on?

– Bir qoshiq qonimdan kechgaysiz, amirim! Dorus-saltanatdan mushrif kelmish!

«Sipohsolor Abu Tohir! Shahzodaning inongan tog'i!»

– Hozir, Abu Tohir, hozir, – amir Mas'ud sapchib o'rnidan turdi. Uning xayoliga hammadan burun: «Nahot... nahot?» degan fikr keldi. Mana, bir oydan oshdi, G'aznadan maxfiy elchi Abulvafo Sariq kelib, Ibn Sino hazratlarini topolmay no-umid qaytib ketdi hamki, amir har on, har daqiqa G'aznadan sovuq xabar kutib (gunohkor ban-

dangni o'zing kechirgaysen, Xudovandi karim!) betoqat bo'ladi, kechalari mijja qoqmay chiqadi.

Abu Tohir, egnida sariq banoras to'n, belida po'lat shamshir, haramxona yo'lagida asabiy odimlardi.

– Ne xabar? Valine'mat qiblagohim...

– Allohga shukur, qiblagohingiz salomatdurlar!

«Yo, Parvardigor! Valine'mat padari buzrukvori... bir oyog'i yerda bo'lsa, bir oyog'i go'rda. Va lekin ul boqiy dunyoning g'amini yemoq o'rni-ga bu noraso dunyoning yumushlarini o'ylaydi. O'z zurriyotiga inonmay, mushrif ustiga mushrif yo'laydi!»

– Kecha mushrif, bugun mushrif! Keltirgan nomayi saodati qayda uning?

– Nomayi saodatni faqirga inonmadi, inonsa, amirimning uyqusini behalovat qilmas edim, shahzodayi valiahd!

– Xo'p, hozir orqangdan yetib boramen!

Tong yaqin, ko'kdagi yulduzlar xiralashib qolgan, bog'da qiyg'os gullagan o'rik va olmalar, xiyobon bo'yidagi sarvlar subhidam shabadasida asta chayqalar, havoni bahor giyohlarining nozik xushbo'y hidi tutgan edi. Amir, bog' o'rtasidagi xiyobonga tushib, – bu xiyobon to'g'ri saroyga olib borardi, – ishratxonadan uzoqlasha boshladi. Biroq, sal yurmay nechundir yuragi qattiq uvishib, xiyobon o'rtasida to'xtab qoldi. Negadir, ehtimol hozirgina ishratxonadan chiqqani uchundir, bultur Hirotda, xuddi mana shu paytlarda sodir bo'lgan yomon bir voqea amirning esiga tushdi. O'shanda ham amir Mas'ud o'z haramida xuddi bugungiday yosh bir kaniz bilan aysh qilib yotgan edi. Tun yarmida

mana shu sipohsolor Abu Tohir to'satdan eshikni duk-duk urdi. Ma'lum bo'lishicha, unda ham xuddi hozirgiday G'aznadan, bosh devon sohibi Abu Nasr Mishkan janoblaridan, mushrif kelgandi. Mushrif keltirgan nomada aytilishicha, padari buzrukvori sulton Mahmud amir Mas'udning Hirot saroyida qurdirgan maxfiy harami va bu haram devorlariga chizilgan shahvoniy suratlardan ogoh topgan. Va shahzodaning bu ishidan darg'azab bo'lib, uni taftish qilish maqsadida maxsus mushrif yo'llashga ahd qilgan!

Ustoz Abu Nasr Mishkan amirni o'z xufiyasi orqali bu ishdan ogoh qilar ekan, unga darhol haram devorlariga chizilgan shahvoniy suratlarni yo'q qilishni maslahat bergandi.

Darhaqiqat, amir o'z tasarrufiga Hirot muzofoti tekandan keyin Bog'i Hirotning eng xilvat joyiga maxfiy ishratxona qurdirgan, qizil marmardan barpo bo'lgach bu pinhoni ishratxona uning eng suyukli oromgohiga aylangan edi. Bino tomida katta hovuz bo'lib tog' chashmasidan keltirilgan suv avval shu hovuzga, hovuzdan yuzlarcha mayda quvurchalar orqali pastga shaloladay oqib tushar, binoni yomg'irdan yuvgan bu shalola eng jazirama kunlarda ham ishratxonani salqin va bahavo qilib turardi. Ishratxonaga amirdan boshqa hech kim tumshuq suqolmas, uning devorlariga haqiqatan ham «Alfiya-shalfiya» dostonidan olingan nozik suratlar chizilgan edi. Eng nafis bo'yoqlar bilan chizilgan bu behayo suratlarda qip-yalangoch sohibjamollar bilan alpomat yalang'och yigitlarning ishrat holatlari tasvir etilgandi... Bu ishratxona qurilibdiki, amir undan chiqmas, eng yosh, eng go'zal

kanizlari bilan tunini shu dargohda o'tkazar edi. Shu sababdan ham ustoz Abu Nasr Mishkaning maxfiy nomasini olib, alamdanda «dod» deb yubordi. Biroq bosh devon sohibining maslahatiga kirmasdan iloji yo'q, padari buzrukvor bilan hazillashib bo'lmas edi...

Amir o'shanda maxfiy nomani olgan kuniyoq ustalarni chaqirtirdi, bir kechada suratlarni o'chirtirib, hamma devorlarni ganch bilan qayta shuvatdi... Bu ishini ayni vaqtida qildirgan ekan, ertasigayoq sultonning maxsus mushrifi yetib keldi. U otdan sakrab tushdi-da, bir qo'lida noma, bir qo'lida yalang'och qilich, amirga salom ham bermasdan to'g'ri boqqa, bog'dan ishratxonaga o'tdi. U ishratxonaning kalitini so'rab ham eshikdagi qulfni qilichi bilan bir urib sindirdi-da, haram bekalarini siltab tashlab, ichkariga kirdi...

E voh, mushrif kechikkan, ganch bilan qayta shuvalgan ishratxonaning devorlaridagi hayosiz suratlardan asar ham yo'q edi!

...Bu esdaliklardan bo'g'ilib ketgan amir Mas'ud banoras to'ning yoqasini ochib, otash ko'ksini shabadaga tutdi.

Ha, nechun bo'g'ilmasin? Payg'ambar yoshidan oshgan qiblagohi o'zi hanuz aysh-u ishrat qilsin! Osmon malikasi kabi muazzam saroylar qurdirib, ularga mashhur mutriblar, xonanda va sozandalar, husnda benazir raqqosalar, dovrug'i butun ro'yi zaminga ketgan malikul kalom va vohidi zamon allomalarni yig'sin. Haramiga u yog'i Hindiston va Movarounnahr, bu yog'i Xuroson pari-paykarlarini to'plasin. Unga esa o'z pushtikamaridan bo'lgan zurriyotiga esa buning ham-



masini taqiqlasin! Axir, u – amir Mas'ud, Hirotda ishratxona qurdirgan bo'lsa, buni o'z padaridan o'rganib qurdirdi. Otasining olamga mashhur ko'shklarida xilvat go'shalar bor, bu go'shalar shahzodaning ishratxonasidagi suratlardan yuz barobar behayo suratlar bilan bezatilgan, yalang'och ayol va erkaklarning oltin haykallari bilan ziynatlangan.

Payg'ambar alayhissalom yoshidan oshgan padari bu pinhoniylar go'shalarda sovigan qonini ko'pirtirib, behisob viloyatlaridan in'omga kelgan huriliqlar bilan ayshini sursin, uni esa o'z zurriyotini, bu ne'matlardan mosuvo qilib, mashriq tomon o'tlanishga da'vat etsin! Mayli, amir Mas'udning o'zi ham so'nggi yillarda jang-jadal ishqida ko'p yonar, mag'ribda butkul Xuroson, Bag'dod va, hattokim, Rungacha zabt etib otasi yanglig' fотиhi muzaffar bo'lish orzusida yashardi. Bu to'g'ri. Ammo suyuqlik padari uni bu ishga da'vat etarkan, nechun o'z o'g'lidan og'ir dardga chalinganini yashiradi? Undan, o'z zurriyotidan yashiradi-yu, hazrat Ibn Sinoni so'roqlab, pinhona elchi yo'llaydi! Bu jumboq, bu sir-asrordan murodi ne? To'ng'ich farzandi amir Mas'udni G'azna taxtidan mosuvo qilib, erkatoy kenjatoyi shahzoda Muhammadni taxtga o'tqazishmi? Ehtimol, bevaqt tashrif buyurgan bu mushrif shu to'g'rida farmoni oliy keltirgandir?

Bog'ning etagidagi havorang marmardan qurilgan ikki oshyonali saroy bir-biri bilan taxt talashib kelgan ikki hokim – Shamsuddavla bilan Aloudavlalarning o'zlariday sovuq va ko'rimsiz edi.

Amir eshikda serrayib turgan nayzador suvorilar yonidan o'tib, ko'shkka kirdi. Kechasi yoqilgan

shamlar o'chirilmagan, ikkinchi oshyonaga olib chiqadigan tor yo'lak ham, yuqoridagi mashvaratxona ham yop-yorug' edi. Havoda kuygan sham hidi anqir, devorlari niliy koshinlar bilan qoplangan, tagiga guldor qirmizi paloslar to'shalgan keng mashvaratxona ko'shkning o'ziday fayzsiz edi.

Amir kirganda mo'ylovi endigina sabza urgan saroybon o'rtadagi do'ngalak xontaxtaga dasturxon yozmoqda edi.

– Abu Tohir qayda? Ayt, mushrifni olib kirsin!

Amir mashvaratxonaning shahar maydoniga qaragan darichalari oldiga borib, og'ir xayolga cho'mdi.

Saroy oldidagi maydon bo'm-bo'sh, faqat kungurador qurg'on burjlarida bitta-yarimta soqchilar ko'zga chalinardi. Qo'rg'on ortidagi shahar tong qorong'isida elas-elas ko'rinar, Zarrinrud daryosining u yuzidagi tor ko'chalarda qandaydir ko'lagalar g'imirlar, har joy-har joyda, chamasi, guzarlardagi karvonsaroylarda gulxan yonardi.

Amir, qal'a ortidagi g'ira-shira maydonlarda ivirsib yurgan soyalarga, allaqanday juldurvoqi gadolarga ko'zi tushishi bilan shaharda bir oydan beri qora o'lat kezib yurgani esiga tushdi, tushdi-yu, ko'ngli g'ash bo'lib, teskari burildi... Ha, shaharda qandaydir mudhish kasal boshlangan, bu kasal dahama-daha, ko'chama-ko'cha, uyma-uy dahshat solib kezib yurar, shu boisdan saroy ham, shahar darvozalari ham taqa-taq bekilgan.

Ajabo! Bu g'arib shaharga nechun yurish qildi u? Nechun G'aznayi munavvara turib, qaysar, beitoat forsiylar yurtiga ot soldi?

Yo, Parvardigor! Bu padari buzrukvori uni qachon, qaysi gunohlari uchun yomon ko'rib qoldi? Yozug'i ne uning?

Yo'q, bundan besh-o'n yil muqaddam Hindistonga yurish qilgan chog'larida sulton uni yonidan jildirmas, behisob qal'alar, qasrlar, muazzam shaharlar uchun bo'lgan ayovsiz janglarda unga eng og'ir qo'shinlarini ishonib topshirardi. Yosh amirning suronli janglardagi matonatini, yov ustiga sherday na'ra tortib, burgutday bostirib borishlarini ko'rganida ko'ziga yosh olib duq qillar, jang-u jadallardan so'ng beriladigan bazmi jamshidlarda esa uni bobosi amir Sabuqteginga o'xshatib, iftixor bilan so'zlar edi.

Hadsiz o'rmon va hududsiz chakalakzorlarda bo'ladigan ov paytlarida-chi?

Ov chog'ida jangovar fillarga minib olgan filkachlar o'rmon ichida nog'oralar chalib, yo'lbars va qoplonlarni ochiq maydonlarga quvib chiqishar, filga mingan sulton esa qo'lida kamon, o'z lashkarboshilari qurshovida otishga shay bo'lib turardi. Bir mahal, nog'oralar gumburi va ayyuhannos solgan ovchilar qiyqirig'i ostida o'rmon orasidagi ochiq maydonlarga go'yo alangaday lov-lov yongan qoplonlar, mudhish o'kirgan yovvoyi yo'lbarslar otilib chiqardi. Esida bor. Sind viloyatida bo'lgan shunday bir ov paytida chakalakzordan qochib chiqqan ikki yo'lbars yomg'irday yog'ilgan kamon o'qlaridan vahshiyo-na o'kirganlaricha, sultonni qurshab olgan lashkarboshilarga hamla qildi.

Amir Mas'ud o'q tekkan yo'lbarslarning butun dahshatini o'shanda birinchi marta ko'rdi!

Sulton mingan fil na'ra tortganicha, xartumini karnayday ko'tarib, lapanglab qochishga tutindi. Sultonni qurshagan suvorilar esa go'yo ikki juft emas, ikki ming yirtqich hamla qilganday, sepilgan tariqday sochilib ketdi. Kimningdir oti do'mbaloq oshib, egasi egardan qalpoqday uchib ketdi, sulton esa bir qo'li oltin taxtda, bir qo'li bilan jonholatda qilichni sug'urib olmoqchi bo'lar, biroq shoshganidanmi yo filning lapanglashidanmi, sug'urib ololmas, ola-kula ko'zlari fil dumiga osilib olgan yarador yo'lbarsda edi!

Amir Mas'ud buni ko'rdi-yu, dahshatdan osmonga sapchigan qora bedovini sulton tomon burdi. O'shanda u qo'rquv nimaligini bilmas, agar bitta emas, yuzta yo'lbars hamla qilsa ham tap tortmas, uni faqat bitta o'y – ostimdagi otim pand bermasa edi, degan o'y cho'chitar edi, xolos. Yo'q, amirning jur'ati, ko'pirgan qonining tizgin-siz harorati ostidagi otiga ham o'tdi-yu, yarador yo'lbarsni dumiga mindirib olib, lapanglab qochib ketayotgan fil ustiga bostirib bordi!..

Ha, o'z joni ko'ziga ko'rinmay ot surib bordi-yu, fil ustida hanuz o'kirib ketayotgan yarador yo'lbarsning boshiga qilich soldi...

Gunohkor bandasini Alloh o'zi kechirgay! Ammo... ba'zi-ba'zida, ayniqsa, otasining unga qilayotgan adolatsizliklarini eshitganida, amir Mas'ud yomon o'ylarga boradi. Nechun o'shanda, yarador yo'lbars hamla qilgan paytda ot solib borib uni ajal changalidan qutqarib qoldim, degan kufr fikrlargacha boradi u! Yo'q, ayb yolg'iz padarida emas, hamma baloga sabab – uning yonidagi vazir-u vuzarosi betavfiq Ali G'arib bi-



lan anov... hezbachcha Abul Hasanakda. Bu ikki iblis sultonning eng vafodor nadimlari, eng salohiyatli lashkarboshilari, itday sodiq g'ulomlari, hamma-hammasini yomonga chiqarib, saroydan yiroqlashtirishga muvaffaq bo'lishdi. Shular sabab nafaqat G'azna, butun saltanat fisqi fasod uyasiga aylandi. Ammo sulton buni bilmaydi, yo, bilsa ham o'zini bilib bilmaganlikka oladi, uning ko'zi ko'r, qulog'i kar...

Amirning xayolini Abu Tohirning:

– Valine'mat, amirim! – degan ovozi bo'ldi.

– Mushrif qayda?

– Mushrif... ikki hafta tun-u kun ot surib, holdan ketmish.

– Nomayi saodat?

– Nomayi saodatni uning qo'ynidan bazo'r topib oldim, marhamat, valine'mat! – Abu Tohir cho'ntagidan mittigina qora tumorcha chiqarib, ta'zim bilan amirga uzatdi. Ustiga uchta mitti kahrabo sadaf taqilgan bu qora tumorchaga ko'zi tushishi bilan amirning yuragi hapqirib ketdi: mehribon ammasi Xatlibegimning tumorchasi!..

– O'qi! – Amir xontaxgadagi guldor ko'zachadan bir piyola sharob quyib bir ho'plam ichdi-da, o'zini yostiqqa tashlab, Xatlibegimning nomasini eshitishga chog'landi...

Allohga ming qatla shukurkim, dorus-saltanatda amirni go'dakligidan yaxshi ko'rgan bu aziz zot bor!..

Mehri oftob ammayi zori! U erka jiyaniga cheksiz izhori muhabbat va behisob duoyi salom yo'llab, birda ko'z yoshi bilan, birda qayg'u-hasrati bilan dorus-saltanatdagi pinhoni yumushlarini bayon qilibdi.

Xatlibegimning xabar berishicha, saltanatning shon-u shavkati, toj-u taxtning zebi ziynati amir al-mo‘minin, garchi sababi xastalik, o‘z yog‘ida o‘zi qovurilib yotsa ham, noumid shayton, Alloh taolo o‘z bandasiga shifo ato qilsa ajab emas, faqat toj-u taxtning taqdiri qil ustida turganda uning, saltanatning yolg‘iz umidi – amir Mas‘udning yiroq-yiroqlarda bo‘lishi aqldan emas. Sababi, sultonni avrab, uning bag‘riga kirib olgan Ali G‘arib bilan Abul Hasanak kabi nobakorlar yomon rejalar bilan mashg‘uldirkim, bu mash‘um niyatga ko‘ra, sultoni salotin bu foniy dunyoni yetim qilib, ul boqiy dunyoni munavvar etadurg‘on bo‘lsa, ular subutsiz shahzoda Muhammadni taxtga o‘tkazmoq matlabidadur. Agar bani odam qiyofasidagi bu ikki shayton o‘z murodlariga yetsa, saltanatning ahvoli ne bo‘ladi? Zero, saltanat bamisoli bir daraxt bo‘lsa, G‘azna uning ildizi, boshqasi yaprog‘idur. Bas, amir Mas‘ud daraxtning yaprog‘i emas, ildizini o‘ylamog‘i darkor.

Suyukli ammayi zori!..

Amir Mas‘ud Abu Tohirning bir me‘yorda sokin oqqan ovozi eshitarkan, mehribon ammasining chehrasi ko‘z oldida namoyon bo‘ldi. Jussasi chog‘roq, o‘zi ozg‘ingina, qorachagina bo‘lsa ham, yurish-turishlari shiddatli, gap-so‘zlari o‘tkir, ayni chog‘da, surma tortilgan tim qora ko‘zlarida ichki bir iqtidor tovlanib turguvchi Xatlibegim bobosi amir Sabuqteginni eslatardi. Go‘dakligidan ammasining bag‘rida o‘sgan amir Mas‘ud uni o‘z volidasidan ham yaxshi ko‘radi. Go‘dakligi emish! Mana hozir ham, ko‘zini bir zum yumsa, kechalari ammasining qo‘ynida cho‘pchak eshitib yotgan ma‘sum bolalik

chog'lari yodiga tushadi, quloqlari ostida uning «op-pog'im», «qo'zichog'im», «bo'talog'im» deb erkaloguvchi muloyim ovozi yangraydi.

Amir, «hazrat Ibn Sino», degan so'z qulog'iga chalinganday bo'lib, xayol og'ushidan chiqdi.

– Ibn Sino? Qaysi Ibn Sino? Qayta o'qi!

Abu Tohir ko'zini maktubdan uzib, amirga «yalt» etib qaradi-da, itoatkorlik bilan takror o'qishga kirishdi:

«Ko'zimning nuri, belimning quvvati, mehribon boshafqat jiyanimga yetib ma'lum bo'lsinkim, biz dorus-saltanatda ajab bir savdoning shohidi bo'lib turibmiz... Bundan uch-to'rt oy muqaddam valine'mat qiblagohingiz ariz Abulvafo Sariqni Hamadon tomon yo'llagan edikim, allomayi zamon Ibn Sino hazratlarini topib kel deb. Padari pokingiz bu tabibi davronga shunday ixlos qo'ygankim, bu ixlosni uning diliga Alloh o'zi solmish. Ammo elchi Abulvafo Sariq hazrat Ibn Sinoni topa olmay o'zi qaytib kelayotgan emish, degan xabar keldikim, bu xabarni eshitib ko'p aziyat chekdik. Ajab holki, bu orada dorus-saltanatda boshqa bir mishmish tarqaldi, go'yo ul hakimi hoziqning o'zi G'aznayi munavvarada paydo bo'lgan emish! Ammo biz bu mishmishlarni haqiqat qilib ulgurmagan ham edik, ul hakimi hoziq qaygadur gumdon bo'ldi. Qay yo'sin sirli paydo bo'lgan bo'lsa, shu yo'sin sirli gumdon bo'ldi. Axir nahot ul takabbur hakimni topib bo'lmasa, bo'tam? Qidirib ko'r, shoyad topsang! Shoyad ul hakim kelib, og'am sho'rlikning dardini daf qilsa, shunda olampanoh ham aqli noraso shahzodadan ko'ngli sovib, shoyad mehri senga og'sa, qulunim!..»

Ajab maktub! Ajab savdo!

Ariz Abulvafo Sariq bundan bir yarim oy muqaddam amir Mas'ud huzuriga tashrif buyurgan edi. Ikki qo'li ko'ksida, ko'zida munchoq-munchoq yosh, xuddi mana shu ko'rpachada o'tirib, amirga hamma sir-asrorni so'zlab bergan edi. Ammo amir bu odamning na so'ziga inondi o'shanda, na to'kkan obidiydasiga! Chunki amir bilar: G'aznada lashkar devonini boshqargan bu mug'ambir ariz unga bosh egib kelishdan avval o'z navkarlari bilan pinhona Hamadon hokimi Alouddavla huzuriga o'tgan, unga birda yalinib-yolvorib, birda do'q-pisanda qilib, hazrat Ibn Sinoni topib berishni talab qilgan. Ibn Sino hazratlari gumdon bo'lib, talabi ro'yobga chiqmagandan keyin esa tarvuzi qo'ltig'idan tushib, amirning oldiga yukinib kelgan edi!

Padari sulton Mahmud: «Menga Abulvafo Sariqning bo'yi bilan sallasi yoqmaydi», deb bejiz aytmagan ekan! O'shanda, katta surmarang sallasi boshida xunuk qo'nqayib turgan bu beso'naqay odam unga ham yoqmadi.

Avvalambor, vallamat qiblagohi, qolaversa, bu beso'naqay ariz bu ishlarni undan sir saqlashni lozim ko'rishgan. Agar lozim ko'rishmaganda, Hamadonga pinhona o'tishdan avval unga murojaat qilishar edi! Agar Xudo saxt-sumbat berib, aql bermagan bu echki soqol ariz Hamadonga pinhona o'tishdan oldin uning oldiga kelganida edi, kelib hamma sir-asrorni bayon etganida edi, amir Mas'ud allaqachon ul hakimi zamonnini topib bergan bo'lardi! Chunki ko'pdan beri amir Mas'uddan hadiksirab yurgan Hamadon hokimi

Alouddavla endilikda sulh istab, har kuni elchi yuboradi, elchilar bilan tuya-tuya sovg'a-salomlar yo'llaydi...

Bo'yi bilan sallasi yoqmasa ham sultonning ishonchini qozona olgan Abulvafo Sariq ko'z yoshlari bilan echki soqolini yuva-yuva Isfahonni tark etdi! Amir Mas'ud esa... burgaga achchiq qilib ko'rpaga o't qo'yibdi!

Amir yurishdan to'xtab, Abu Tohirga qadalib qaradi:

– Darhol Hamadonga, Alouddavlagaga chopar yo'lla! Darhol bilmoq darkor – ul hakimi davron G'aznaga ketganmi yo hanuz Hamadon tevaragida yashirinib yuriptimi? Bor, devon beklariga farmon ber: darhol noma bitsinlar!

Amir Mas'ud shunday deb, ko'rpachaga yonboshladi-da, sharob to'la ko'zaga qo'l uzatdi.

## O'N BESHINCHI BOB

### 1

«Bugun, to'rt yuz yigirma birinchi yil hijriy, rabbiul oxir oyining to'rtinchi kuni bomdod chog'ida Hamadondan chiqib, namozi asrda shahardan besh farsang joydagi bir rabot yoniga kelib qo'ndik. Shayx rabotga tushishni istamadi, rabotdan yiroqroqdagi bir qir etagiga chodir tikib, otlar bilan tuyalarni tushovlab o'tloqqa qo'yib yubordik.

Kecha tun yarmida yana saroydan chopar kelib, shayxga noma topshirdi. Nomada aytilishi-cha, Hamadon hokimi Alouddavlagaga Isfahonni zabt etib turgan amir Mas'uddan elchi kelgan.

Elchi shayxni qidirib kelgan. Bundan ikki oy muqaddam ham shayxni yo'qlab elchi kelgan, u G'aznayi munavvaradan, sulton Mahmudning o'zidan kelgan edi. Shayx unda ham sulton xizmatiga borishni istamay, yashirinishga majbur bo'lgan, biroq shahardan chiqib ketmagan edi. Bu safar Hamadondan bosh olib chiqib ketmoqdan boshqa chora qolmadi, sababi sulton Mahmud uzoqda bo'lsa, amir Mas'ud qo'l cho'zsa yetadigan joyda, Isfahonda. Boz ustiga, Hamadon hokimi Alouddavla amir Mas'uddan baloyi azimdan qo'rqqanday qo'rqadi, chunki Isfahonni bir hamla bilan bosib olgan amir, istasa, Hamadonni ham bir kunda zabt etmoqqa qodir.

Biz kechasi bilan yo'l hozirligini ko'rdik. Bir sandiqqa kitoblarni joyladik, bir sandiqqa noyob dorularni. Har ehtimolga qarshi meshlarga suv to'ldirdik, dashti biyobonda boshpanasiz qolmaylik deb, chodir oldik. Qolgan narsalarni yor-birodarlar erta-buruskun yetkazib bermoqlari darkor.

Subhi sodiq shahar darvozasidan chiqdik. Men shayxdan «Qayga boramiz», deb so'radim. Shayx uf tortib: «Qayga bosh qo'yishni o'zim ham bilmaymen, o'g'lim, – dedi. – Mana, tavallud topgan yurtimni tark etib, musofirlik jandasini kiyganimga chorak asr bo'ldi. Ammo qayga muqim qo'nib, qachon halovat topamen, o'zim ham bilmaymen. Ehtimol, Bag'dod tomon ravona bo'lur-miz, bolam».

Shayx shunday deb, otini chuhladi va shu rabotga kelib qo'ngunimizcha undan sado chiqmadi.

Shayxning ahvoli ruhiyasi menga ayon. Mana, necha oydirki, Isfahondan xabar yo'q. Yolg'iz inisi

Abu Mahmud tirikmi, yo'qmi – hanuz qorong'i. Yong'inda qolgan kutubxonasidagi noyob kitoblari-chi? Nodir qo'lyozmalari-chi? Hanuz darak yo'q. Shahar qamalda. Shayx shuni o'ylab, kecha-yu kunduz iztirob otashida qovuriladi.

Rabot yaqiniga qo'nib, chodirlarni tikib bo'lguni-mizcha namozi asr bo'ldi. Namozdan keyin shayx, bir aylanib kelamen, deb qirga chiqib ketdi.

Kun iliq. Qir-adirlar ko'm-ko'k, ko'rgan ko'z quvonadi. Chamasi, bu yerlarga amir Mas'ud lashkarlari yetib kelmagan, uzoq-yaqindagi kichik-kichik qishloqlar osoyishta.

Shayx kun botib, qosh qorayganda qaytib keldi. U yana qattiq hayajonda edi.

– Ajab hol! – dedi shayx. – Bu dasht, bu adirlar xuddi Buxoro tevaragidagi dasht-u adirlarga o'xshaydi. Anov qishloqlar esa yo tavba! – xuddi kamina tavallud topgan Afshonaning o'zi. Baayni o'zil..

Shayx shunday deb ko'ziga yosh oldi.

– Tavallud topgan joylaringizni sog'inibsiz, ustod, – dedim. – Bag'dodni qo'yib, Buxoro tomon yo'l olaylik!

– Koshkiydi, Buxoroni ko'rmoq nasib etsa! – dedi shayx ma'yuslanib. Sen bilmaysen, bolam, u yerda Alitegin degan bir hokim bor. Bu hokim oldida amir Mas'udning etagida namoz o'qisa bo'lur!

Shayx shunday deb, qalam-qog'oz keltirishni iltimos qildi.

– Bugun «Kitob al-Insaf»ni qayta tiklashga urinib ko'raylik, – dedi shayx. – Men aytib tura-men, sen yozasen!..

Shayx xamisha shunday qiladi. Boshiga bir musibat tushsa yoxud alamli o'ylar yuragini

iskanjaga olsa, hamisha o'zini ish bilan ovutadi, hamma narsani yig'ishtirib qo'yib, biror asarini yozmoqqa kirishadi.

Bugun ham biz tun yarmigacha ish bilan mashg'ul bo'ldik. Men «Kitob al-Insof»ning qo'lyozmasini o'qigan edim, biroq yodimda yaxshi saqlanib qolmagan edi. Shayx esa hammasi yodida ekan, chodirda u yoqdan-bu yoqqa yurib, aytib turdi, men aytganini yozib bordim. Shu tariqa tun yarmigacha yigirma sahifani to'ldirdik. Tun yarmidan oshganda shayx ikkimiz chirog'ni o'chirib, to'shak yozib yotdik. Kamina charchagan ekanmen, darhol uxlab qoldim. Bir mahal uyg'onib ketsam, shayx uyqudan turgan ekan. Sham yoqib, egniga quroq janda, boshiga eski kuloh kiyimoqda edi. Men hayron bo'lib, o'rnimdan turgan edim, shayx:

– Tavallud topgan joylarim yodinga tushib, ko'zimdan uyqu qochdi, – dedi. – Sen uxlay ber, bolam, kamina atrof-tevarakni bir aylanib kelamen.

Men undan, nechun ustingizga janda, boshingizga kuloh kiydingiz, deb so'radim. Shayx: «Ehtiyot shart», deb javob qildi.

Shayx shamni o'chirib, chodirdan chiqdi, men qayta yotib uxlab qoldim».

(Ubayd Juzjoniy xotiralaridan)

## 2

Ibn Sino tungi shudringda ho'l bo'lgan chodir etagini ko'tarib, tashqariga chiqdi.

Bepoyon dasht artilgan tilladay tiniq yirik yulduzdarga to'la, go'yo osmon bilan dasht qo'shilib





ketgan-u oppoq yirik yulduzlar bahorgi giyohlar orasiga tariqday sochilib ketgan, go'yo ularni hovuchlab terib olsa, hovuchlab sochib yuborsa bo'ladi.

Ibn Sino, to'satdan yuragi «shig'» etib, chodir yonida to'xtadi. Nigohi oldiga xuddi mana shunday iliq tun qo'ynida, tuproq yo'lda ketayotgan ho'kiz arava keldi, arava uzra asta aylanayotgan tungi osmon o'shanda ham mana shunday oppoq, musaffo yulduzlarga to'la edi.

– Bibijon!

– Hov, oltinim? Nechun uxlamaysen?

Qorong'ida tilla taqinchoqlar nozik jaranglaydi, so'ng uch-to'rt yashar go'dakning dimog'iga «gup» etib sut va issiq non hidi uradi. Kichkina Abu Ali onasi Sitorabonuning iliq kaftini tutib, cho'lp-cho'lp o'padi, yuziga, ko'zlariga surtadi.

– Bu yulduzlar qaydan kelgan, bibijon?

– Ularni Alloh yaratgan, oltinim.

– Alloh qayda, bibijon?

– Etti qavat osmonning ustida, arshi a'loda.

Uxla, qo'zichog'im...

Sut va issiq non hidi ufurgan mayin qo'llar go'dakning yuzini mehr bilan silab ko'rpani yopmoqchi bo'ladi, biroq go'dak betoqat tipirchilab, ko'rpani ochib tashlaydi.

– Bu yulduzlarning oti bormi, bibijon?

– Bor, oltinim, ularni ulamolar biladi. Katta bo'lganingda sen ham ulamo bo'lasen... Shunda hammasini bilib olasen.

– Yo'q, bibijon, men bilamen. Huv anov, qoq tepadagi katta oq yulduzni Oltin qoziq deydilar. Oltin qoziqning ostidagi yetti yulduzning nomi

Banot na'sh. Anov chekkada yaltirab turgan yulduzni Utorid yulduzi deydilar, bibijon!

Go'dak so'zini tugatolmaydi. To'satdan yuzida, peshonasida onasining issiq lablarini his etadi, ko'z yoshi aralash pichirlab aytgan gaplari arava g'ildiraklarining g'ichir-g'ichirini bosib ketadi:

– Iloyo bu zehnni ato qilgan tangrim o'z panohida asragay seni! Iloyo umring uzoq, yulduzing yorug' bo'lg'ay, bolajonim! Endi uxla, qo'zi-chog'im. Hozir Afshonaga yetib boramiz. O'riklar dovuchcha tukkandur! Gulruxsor onang dovuchcha terib, seni kutib o'tirgandur? Uxla, oltinim!

Gulruxsor – tog'asining katta qizi. To'rt yashar Abu Ali uni o'z tug'ishgan opasi Gulnoradan ham yaxshi ko'radi. Gulruxsorning qo'llari onasi Sitorabonuning qo'llaridan ham mayin, muloyim, chiroyli. Ko'zlari osmonday ko'm-ko'k, tili novvotdan ham shirin Gulruxsor hovuch-hovuch tut terib, Abu Aliga tutadi, Abu Ali esa xuddi oxurdan yem yegan toychoqday, uning hovuchiga tumshug'ini tiqib, sadafday-sadafday marvarid tutlarni bitta-bitta terib yeydi, yeb bo'lib, allaqanday xushbo'y giyohlar atri ufurgan nozik barmoqlarini o'padi, bitta-bitta o'padi. Gulruxsor qotib-qotib kuladi. Uning kulgusidan zavqlangan Abu Ali yana o'padi, qayta-qayta o'padi. Kechalari esa Gulruxsorning rayhon hidi kelgan yumshoq, silliq sochlarini o'ynab yotadi, yuzini uning oppoq mayin siynasiga bosib uxlashni yaxshi ko'radi.

– Bibijon! – deydi Abu Ali entikib. – Men opajonimni yaxshi ko'ramen, bibijon!

– U ham seni yaxshi ko'radi. Uxla, oltinim, uxlab tur, opajoningni ko'rasen!



E voh! Gulruksorni ko'rish nasib etmaydi. Abu Ali ertalab yurakni tilka-pora qilg'uvchi yig'i va faryodlardan uyg'onib ketadi. Arava tog'asining chorbog'i yonida turipti. Eshik oldida tumonat odam. Onasi Sitorabonu o'zini ko'k mato yopilgan tobutga tashlab, faryod chekmoqda. Abu Ali nima bo'lganini anglay olmaydi, lekin ko'k mato yopilgan tobutni quchoqlab yig'layotgan onasini ko'rib, aravadan sakraydi-yu, onasiga qo'shilihib u ham faryod chekadi.

Tun. To'rt yashar Abu Ali o'z hovlilarida, katta shotut tagidagi supada yotipti. Tepasida iyagini tizzalariga qo'rganicha Sitorabonu mung'ayib o'tiripti. Go'dak ko'zini ochishi bilan onasining yosh to'la ko'zlarini ko'radi.

– Bibijon! Nega yig'laysiz, bibijon?

– Nega yig'lamayin! Opajoningni berib qo'ydik, oltinim.

– Opajonimni kimga berdingiz, bibijon?

– Opajoningni farishtalar olib ketdi, oltinim!

– Farishtalar opajonimni qayga olib ketdilar, bibijon?

– Jannatga, oltinim, bog'i firdavsga olib ketdilar, qo'zichog'im...

– Opajonim jannatdan qachon keladi, bibijon?

– Koshkiydi kelsa, oltinim! Kim bilsin, Buxoroda bo'lib yaxshi hakimlar ko'rganida, shifo topib, tuzalib ketarmidi opajoning! Bu yerda na bir yaxshi tabib bor, na bir habib, ne chora, oltinim?

– Yaxshi hakim deganingiz ne, bibijon?

– Katta bo'lganingda bilasen, oltinim. Xastalarni davolaguvchi allomalarni hakim deydilar. Kim bilsin, yaxshi hakim bo'lganida opajoningdan ayrilib qolmasdik, oltinim?

– Bibijon! Katta bo'lganimda hakim bo'lamen. Opajonimni davolab, jannatdan olib kelamen, bibijon.

Go'dak so'zini tugatolmaydi. Sitorabonu o'g'lini bag'riga bosadi-yu, ko'z yoshlari bilan go'dakning yuzini yuvib, uni qayta-qayta o'padi.

– Iloyo farishtalar omin degay bu so'zingga, oltinim! Omin degay!

Ajab hol! Oshini oshab, yoshini yashab deganday, ellikdan oshib qolganida ma'sum go'daklik chog'larini eslab iztirobga tushsa? Bu ma'yus o'ylarning sababi ne? Hamadon sarhadidagi bu ko'm-ko'k dasht Buxoro dashtlarini yodiga solganidanmi yo olisdagi anov qishloqlar u tavallud topgan suyukli Afshonani eslatganidanmi? Agar faqat eslatgani uchun yuragi shunday pitirlasa, ona yurtini ko'rganda qay ahvolga tushadi? Musofirlikda necha bor tushlariga kirib chiqqan Buxoro ko'chalaridan qayta o'tsa, Afshona bog'lariga kirib, go'daklik chog'laridagidek, o'z qo'li bilan tut va dovuchcha terib yesa ne bo'ladi?

Tong yaqin. Ana, olis-yaqinlarda xo'rozlar qichqirdi, eshaklar hangradi, har joy-har joyda cho'kib yotgan tuyalar, tushovlangan otlar ko'zga tashlandi, rabot qo'rg'oni tomonda gulxan yoqib, isinib o'tirgan sarbozlarning gangir-gungur ovozlari quloqqa chalindi.

Ha, Ibn Sino yanglishmagan, yam-yashil may-salar bilan qoplangan bu dasht, ko'kni to'ldirgan bu oppoq yulduzlar, gurkirab o'sgan shuvoq va yovshanlar, kakra va yantoqlarning o'tkir bo'ylari, ularning betakror atri, hamma-hammasi Buxoro zaminini, Buxoro giyohlarini esga solardi!

Ibn Sino giyohlar to'g'risidagi ilk saboqlarni avval mashhur arab allomasi Abubakr ar-Roziy, keyin Buqrot hakim bilan Jolinus kitoblaridan o'qib bilgan, biroq eng katta ilmni Afshona qirlari ortidagi saksovlzor qumliklarni yayov kezgan chog'lari-da, avom bo'lsa ham giyohlar sirini yaxshi bilgan cho'pon-cho'liqlar davrasida orttirgan edi!..

Yana dard, yana bemor, yana dorivor giyohlar! Qachon bu o'y xayolidan ko'tarilib, biroz orom beradi unga?

Dashtni chulg'ab olgan harir tuman sal tarqab osmonning mashriq tomoni oqara boshladi, ko'kda g'uj-g'uj yongan yulduzlar siyraklashdi, xiralashdi. Oyoq ostida gilamdan yastangan maysalar to'piqqa kelgan yovshan va shuvoqlar, mitti shamlarday yalt-yalt etgan chirog'poyalar, yer bag'rini ignaday teshib chiqqan piyozi anzuriylar bu qirlarni bezash orzusida, danakdan-danakdan meva tukkan lolaqizg'aldoqlar, o'tkir tikanaklar bilan o'ralgan yantoqlar, moviy gulchalarga bezangan noxatak va chitir gullar, kakra va yovvoyi bedalar ertalabki shudringda cho'milib, allaqanday yashnab ketgan Ibn Sino ularning betakror muattar hidlarini hidlab to'ymas, nazarida, go'yo hamma giyohlar unga erkananib boqayotganday, go'yo, «meni tanidingmi, men qaysi dard, qaysi kasalga malham bo'lishim yodingdami» deb iltijo qilayotganday tuyular, u yerga tiz cho'kib bu giyohlarni asta silab qo'ygisi, yuziga, ko'zlariga surtgisi kelardi!

Ibn Sino qir yonbag'rida o'sgan sada tagida to'xtab, to'yib-to'yib nafas olarkan, shogirdi Abu Ubayd al-Juzjoniyning bir so'zi yodiga tushib, ichida kulib qo'ydi:

– Ustod! Sizdan bir so‘z so‘rasam maylimi?

– Xo‘sh?

– Aytadilarkim, siz o‘t-o‘lanlar tilini bilar emishsiz. Qirma-qir, dashtma-dasht yurib, giyohlar bilan so‘zlashar emishsiz. Giyohlar sizga bo‘y cho‘zib, «men falon dardga davomen, men pismadon kasalga shifo bo‘lamen», deb sir-asrorlarini bayon qilishar emish. Shu gap rostmi, ustod?

– Xo‘sh-xo‘sh?

– Aytadilarkim, bir xastaning dardiga davo topolmay, ko‘nglingiz g‘ash bo‘lib, tog‘larga chiqib ketgan emishsiz. Tog‘ma-tog‘ yurib giyohlar bilan so‘zlashgan emishsiz. Shunda bir giyohning so‘zi sizni lol qoldirgan emish. Bu giyoh o‘sha, bevaqt olamdan o‘tgan xastaning dardiga davo ekan. Shunda siz qattiq kuyunib:

– Nechun bu so‘zingni avval aytmading? – deb so‘ragan emishsiz. Yo, kechlik qilasmikin? U sho‘rlik hali dafn qilingani yo‘q, seni olib borib, muolija qilib ko‘rsammikin? – degan emishsiz. Shunda giyoh ham taassuf bildirib:

– Yo‘q, hakimi hoziq, men ul sho‘rlikning dardiga davo bo‘lur edim, biroq ajalga davo bo‘lolmaymen! – deb javob bergan emish. Shu so‘z haqiqatmi, ustod?..

Ajal! Hayot va o‘lim! Mana, salkam qirq yildirki, bu yechilmas tugun Ibn Sinoning xayolini betinim band etib keladi, bu chigal sir-asrorning tagiga yetish orzusida u qay ko‘chalarga kirib chiqmadi, ne-ne dorularni yaratmadi! Ajab hol: yoshlikda, Buxoro hokimi Nuh ibn Mansurni davolab, uning kutubxonasidagi Abu Bakr ar-Roziy, Buqrot hakim va Jolinus kitoblarini «chaynamay yutib»

yurgan chog'larida, kelgusida uning uchun yechilmaydigan jumboq bo'lmashligiga, hatto, ajalga ham davo topishiga amin edi. Endi esa minglab giyohlar sirini anglab, serjumboq tabiatning ko'p hodisalariga tushunganida esa yoshlik orzularining puchligiga ishondi. Hayhot, tabiat sirlarini o'rgangan sayin uning tagi chuqurlashib bormoqda, bir jumboqni yechsa, ikkinchisi, ikkinchisini yechsa, uchinchisi ro'baro' bo'ladi. Mana, soqoliga oq oralab, ko'zidan nuri, belidan quvvati keta boshladi hamki, ilm bobidagi bu quvdi-qochdining intihosi ko'rinmaydi.

Durust, u endi tabiat sirlarining ibtidosini biladi. Tirik mavjudot borki, chumolidan tortib bani odamgacha – hammasi to'rt unsurдан – tuproq, suv, olov va havodan barpo bo'lgani ayon unga! Bu olamning yaratilishi, tabiat hodisalarining bir-biriga chambarchas bog'lanib ketishi metin bir qonuniyatga asoslanganini, qonuniyat esa o'z navbatida, buyuk bir zarurat poydevoriga qurilganini anglab oldi. Faqat bu qonuniyatning tagiga yetmoq, bu ulug' zaruratni anglamoq qoldi, xolos. Anglamoq uchun esa aql-idrokka suyanmoq zarur. Shuning uchun ham u, avvalambor, ko'kka, ikkilamchi, aql-idrokka sig'inadi, aql-idrok oldida bosh egadi.

Ha, bu tafakkur, bu aql-idrok bani odamga faqat bir maqsadda, o'zi yashagan bu olamni bilmoq, tabiat sirlarini anglamoq va, nihoyat, oq-u qorani tanib, o'z hayotini insof va adolat asosiga qurmoq uchun ato qilingan! Bani odam esa e voh, hanuz chirkin istak va tuban hissiyotlar tuzog'idan chiqolmaydi! Shu boisdan o'zi yanglig'

odamlar ustidan hokim bo'lish istagida yongan sulton Mahmud kabi fotihlar qo'lida qo'g'irchoq bo'lib yuribdi! Shu boisdan ularga donolar so'ziday mustabid shohlar amri, a'lo tuyuladi, donolar qolib, fotihlar so'ziga yuradi!.. Umr esa e voh, qisqa ekan, o'lim, hayhot, haq ekan!

«O'lim» so'zi xayoliga kelishi bilan negadir yana yoshlik yillari esiga tushdi, «Juyi Mo'liyon» ko'chasining oxiridagi «Dorush shifo» shifoxonasi ko'z oldiga keldi.

Zimiston tun. Shifoxona uyquda. Eng chekkadagi chog'roqqina hujrada Jolinus kitobidan ilmi tashrihga<sup>1</sup> oid bobini ko'zdan kechirib o'tirgan yosh tabib Abu Ali eshik taqillaganini eshitib, cho'chib boshini ko'taradi.

Bo'sag'ada... ustiga to'n ustidan uzun oq rido kiyib, og'zini oq ro'mol bilan bog'lab olgan ustod Abu Mansur Qamariy<sup>2</sup>, – Alloh uning ruhini shod etgay! – shogirdiga sinovchan tikilib turipti. Ustod bilan shogird muzxonaga tushib, o'sha kuni olamdan o'tgan bir gadoning murdasini yorib ko'rmoqlari lozim. Abu Ali buni biladi. Shuning uchunmi yo ustodning ustidagi oq kiyimi sababmi, bo'sag'ada turgan ustod – ustod emas, marhumning arvohi bo'lib tuyuladi-yu, a'zoyi badanidan sovuq ter chiqib ketadi.

«Dorush shifo» hovlisining eng chekkasida, ming xil dorivor giyohlar saqlanadigan chog'roq xona, xonaning tagida esa yozda ham qishdagiday salqin turadigan katta yerto'la bo'lardi. Xastalar u yoqda

---

<sup>1</sup> Ilmi tashrih – anatomiya.

<sup>2</sup> Abu Mansur Qamariy – buxorolik tabib, Ibn Sinoning ilk ustози.



tursin, hatto, qorovullar ham cho'chib, chetlab o'tadigan bu «muzxona»da marhumlar jasadi saqlanar, to qarindosh-urug'lari kelib olib ketguncha, jasadlar shu yerga qo'yilar edi.

Zimiston kecha... Hamma uyquda, hatto, qorovullar ham pinakka ketgan, hovlida tiq etgan tovush eshitilmaydi.

Ustod, oyoq uchida yurib, hovlining mashriq tomoniga o'tadi, u yerdagi bostirma tagiga kirgach, tik zinalardan yurib, «muzxonaga» tushadi-da, qo'lidagi shamni yoqadi.

Abu Ali, o'sha kungacha ustod rahbarligida qo'y-echki va it-mushuklarni so'yib, ichki a'zolarini o'rganib yurgan bo'lsa ham, odam murdasini yorib ko'rishni o'ylamagan, shu boisdan bo'lsa kerak, hamon a'zoyi badanida chumolilar o'rmlaydi.

Marhumning jasadi maxsus qurilgan baland so'riga qo'yilib, ustiga boshdan-oyoq oq mato yopilgan.

Ustod, eshik zanjiriga ishonmay, uni ichidan tirgaklandi, so'ng marhumning bosh tomoniga cho'kkalab, uzoq tilovat qiladi. U «Surayi yosin»ning uzun yo'lini o'qiydi, Abu Ali esa poygakka cho'nqayib, surani so'zma-so'z takrorlaydi. Ajabo, tilovatdan so'ng uning ko'ngli xiyol tinchiganday bo'ladi, go'yo ular «bu kufr» ishlari uchun marhumdan afv so'raydilar-u so'roqlari ijobat bo'ladi!

Muzxonaning darichasi yo'q, kunduzlari faqat eshikdan shu'la tushar, eshik yopilsa yerto'la zimiston bo'lardi. Ustod o'zi olib kelgan shamlarni bitta-bitta yoqib tokchalarga qadab chiqadi, tilovatdan so'ng sal hushiga kelgan Abu Ali esa

nashtarlarni, jom va qumg'onlarni tayyorlaydi. Hamma narsa taxt bo'lgach, ustod, hamon pichir-pichir duo o'qiganicha, murdaning yuzidan oq matoni oladi...

Bir kun avval olamdan o'tgan bu gado so'rida chalqancha yotar, uning ko'zlari ochiq qolgan, u go'yo tirig-u ularning ishini ko'p xushlamay jimgina kuzatib yotganga o'xshardi.

Yillar o'tadi. Ilmi tashrihni mukammal bilmoq niyatida Ibn Sino yana ko'p murdalarni pinhoniy yorib ko'radi, har bir a'zoning holati va tuzilishigina emas, bu a'zolarning eng mayda qon tomirlarigacha tekshiradi, o'rganadi. Zotan, Buqrot hakimning: «Kimni dori tuzatmasa, giyoh tuzatadi, kimni giyoh tuzatmasa, pichoq tuzatadi, kimni pichoq tuzatmasa, o'lim tuzatadi», degan naqliga amal qilib, pichoqni shifo bobidagi o'zining eng ishonchli quroliga aylantiradi. Lekin «Dorush shifo»dagi bu yerto'la, yerto'laning to'rida go'yo tirik odamday ularga jimgina tikilib yotgan ko'zi ochiq bu gado!.. Yo'q, ko'ngliga mudhish qo'rquv solgan bu oqshom hech qachon esidan chiqmaydi uning!

Ustod esa... shogirdining sovuq vahima og'ushida titrab turganini ko'rib:

– Alloh o'zi kechirgay, bolam!.. – deb shivirlaydi. – Kamina yoshimni yashab, oshimni oshab bo'lganmen. Bu ishni men, avvalambor, sen uchun qilmoqdamen. Xudovandi karim o'z bandasini qanday yaratgan – buni bilmoq gunoh emas, bolam. Bil'aks, yaxshi tabib buni bilmog'i darkor, davolash borasida foydalanmog'i darkor! Hamma narsa Allohdan, bolam, ammo yaratguv-

chi o'z bandasiga aql-zakovatni shu matlubda in'om etgankim, u hammasini bilmog'i lozim! Bas, davolash yo'llarini bilmoq – biz hakimlar uchun ham farz, ham qarzdur! Qo'rqma, bolam, nashtarni qo'lingga olib, yaqinroq kel!..

Ustod shunday dedi-da, hamon bilinar-bilinmas qaltiragan qo'llari bilan murdaning qorniga nashtar soldi.

Ha, Ibn Sino tabobatga ixlos qo'yibdiki, olamda neki dard bo'lsa, hammasini bilishga harakat qildi, ularga davo axtarib, salkam uch ming giyohning shifobaxsh sirlarini o'rganib chiqdi. Bu dardlar tafsiri «Al-Qonun» kitobining besh jildini, dorivor giyohlar bayoni esa «Ash-Shifo» asarining ikki jildini tashkil qildi!.. U kasalliklarni ikkiga, ya'niki murakkab va sodda kasalliklarga ajratdi va shunga qarab murakkab va sodda dorular yaratdi. Yuzlar-cha shifobaxsh giyohlar va ne'matlar birikmasidan yasalgan bu murakkab dorular ojizlik qilganida jarrohlik san'atini ishga soldi, o'nlab jarrohiya asboblarini, huqna<sup>1</sup> qilishning yangi yo'llarini o'ylab topdi. Va shu yo'sin ming-ming xastalarning davosiz dardlarini daf qilib, duolarini oldi. Faqat, hayhot, o'limga davo topmadi!

Hayot ne? O'lim ne? Agar bu noraso olamdan boshqa olam, boshqa hayot bo'lmasa, bani odam nechun kelib, nechun ketdi?

Har safar uning dorulari kor qilmay, biror ojiz banda qo'lida jon taslim qilganida bu notinch o'ylar, bu shakkok fikr unga oylab tinchlik bermaydi!

Yo, tavba! Bu g'alati o'ylar qaydan keldi? Xayoli nechun bunchalik parishon bugun? Buncha-

---

<sup>1</sup> Huqna – klizma.

lik hazin? Nahot, bunga sabab Buxoro qirlariga o'xshash bu ko'm-ko'k qirlar bo'lsa? Afshonani eslatuvchi anov ko'm-ko'k qishloqlar bo'lsa?

### 3

Qirlar ustidagi oqish tuman tarqab, dasht butun latofati bilan namoyon bo'ldi. Ana, ko'kdagi siyrak oq bulutlar lovillab yona boshladi, qirlar ortidan ko'tarilgan oftobning serjilva o'ynoqi nurlari giyohlar bargidagi shabnam bilan o'pishib, butun dashtni ajib bir shu'laga cho'miltirdi-yu, yiroqdagi bog'lar boyagidan ham yashnab ketdi.

Bog'lar orasida pastak yapasqi uylar elas-elas ko'rinar, faqat qishloq o'rtasidagi ulkan masjidning qubbador gumbazi charaqlab turar, u xuddi Afshona masjidini eslatar edi. Juma kunlari Afshona masjidiga yaqin tevarakdagi qishloqlar-gina emas, hatto, Buxorodan ham namozxonlar daryoday oqib kelar, masjid oldidagi maydon va chorrahalar, turnaqator rastalar, do'kon va do'konchalar ot surgan zodagonlarga, hammasi birday oppoq kiyingan ulamolarga, zikr tushgan qalandarlar, tilanchilar, gadolar, moxovlar, oyoq-qo'llaridan ayrilgan mayib-majruhlarga to'lib ketar, bog'lar bilan qurshalgan Afshona qal'asi ari uyasiday g'uvillar edi.

Afshona! Yana Afshona! Mana, salkam o'ttiz yildirki, bir zum yolg'iz qolsa lop etib ko'z oldiga tug'ilgan joylari keladi. Afshonaning bog'lari, ko'm-ko'k qirlari, hadsiz sayhonliklari yodiga tushadi.

Ibn Sino bir-bir bosib ro'paradagi qirga chiqdi. Qir etagidan katta anhor o'tardi. Anhorning u

yuzida, bo'z yaktak kiygan bir necha bolalar sigir boqib yurishar, olisroqdagi yalanglikda omochlariga ho'kiz va xachir qo'shib yer haydayotgan dehqonlar ko'zga chalinardi.

Yo, tavba! Afshona chekkasidan ham xuddi mana shunday anhor o'tar, anhorning chap sohilida bepoyon qovun polizlar yastanib yotardi.

Bu polizlarda shirin-shakar amiriylar, bosvol-dilar, sahar payti tun sukutini buzib kars-kars yorilg'uvchi shakarpalak, to'rlamalar, kattaligi mushtdekkina bo'lsa ham, sharbati til yorg'uvchi qora qovunlar bitardi. Kichkina Abu Ali kechalari qamish kapa yonidagi shohsupada ilk ustozlari Notiliyning po'stiniga o'ranib yotib, osmon to'la yulduzlarni sanashni yaxshi ko'rardi. Subhidam esa kars-kars yorilgan to'rlamalarning ovozi bilan uyg'onib ketar, sovuqdan dir-dir titrab polizga tushar, shudringda cho'milgan muzday palaklarni yalang oyoq oralab, yorilgan qovun parchalarini terib yeyishni sevar edi!

O, bolalik! Beg'ubor, betashvish bolalik! Kechasi uchgan yulduz yanglig' «yalt» etib, bir chaqnading-u o'tding-ketding!

Bir-biridan ma'yus, ammo allaqalday tiniq esdaliklar xuddi tasbeh munchoqlariday bir-biriga ulanib borardi.

Avji bahor. Afshona tevaragidagi yam-yashil sayhonlikda oq, jigarrang, qora-qizg'ish o'tovlar saf tortgan, anhor yoqasidagi tepalikka esa rang-barang ipak tasmalar bilan bezatilgan o'n ikki qanotli ulkan oq o'tov tikilgan. O'tovning to'rida, baland qilib to'shalgan oq kigizlar ustida, uzun tim qora sochlariga behisob kumush tanga va mitti qo'ng'i-

roqchalar taqilgan bir qiz yotibdi. Qizning ko'zlari yumuq, majolsiz, nimjon qo'llari baland to'shakdan sirpalib tushib, holsizgina osilib qolgan.

Yosh tabibni o'tovga boshlab kirgan kulcha yuzli, bodomqovoq kanizak asta borib to'shak oldiga tiz cho'kadi. Shunda sharpani sezgan qiz qalin kipriklarini bazo'r ochib, poygakda jimgina tikilib turgan yosh tabibga qaraydi, qaraydi-yu, «qult» etib yutinadi. Yutinganda go'dakning tomog'iday nimjon, oppoq tomog'ining ostidagi moshdek qora xoli qandaydir ojizgina qimirlab qo'yadi...

...Ibn Sino, go'yo bu voqea bundan o'ttiz yil burun emas, hozir sodir bo'lganday, yuragi allaqanday jizillab ketdi.

Ha, Bo'tako'zbegim degan bu sahronishin suluv ham uning hayot osmonida bir lahza yongan yorug' yulduzday yarq etdi-yu, o'tdi-ketdi!

Ne chora? Bani odam hayoti shunday qisqa ekan, ham qisqa, ham g'urbatga to'la ekan! Hayhot! Uning bolalik yillarini yorug' nurga yo'g'irgan bu mehri daryo insonlardan kimlar qoldi? Kimlar bor? Allohga shukur, padari buzrukvorini o'z qo'li bilan Buxoro tuprog'iga dafn etdi, onayizorini esa dafn etish nasib qilmadi. Singlisi Gurganjda qoldi, yolg'iz inisi Abu Mahmud esa... o'likmi, tirikmi, yoxud uning kutubxonasini asrayman deb, yong'in ichida qoldimi – mana, necha kundirki, bu notinch o'y Ibn Sinoga na uyqu beradi, na orom!

Ota-ona, qarindosh-urug'larining qismati shu bo'ldi! Ona yurti-chi?

Aytishlaricha, ilksenlar avlodidan bo'lmish amir Alitegin Buxoroni ko'p xushlamas emish.

Qishda shaharda tursa ham, yozda ko'ngliga yaqin dashtlarga ko'chib chiqar emish, behisob o'tovlar qurdirib, kuni ov bilan, uloq va ko'pkari bilan, qo'shni shaharlarga qiron keltirish bilan o'tar emish!

Alitegin ham mayli, sulton Mahmud-chi?

Mashriqda Hindiston, Mag'ribda Xuroson yetmagandek, sulton bundan uch-to'rt yil muqaddam Buxoro va Samarqandga o'n ming jangovar fil bilan bostirib borgan emish. O'n ming jangovar fil barobar qadam tashlaganda Buxoro tuprog'i larzon-larzon bo'lgan emish, bir joyda to'xtab, barobar na'ra tortganda esa osmon-u falak zir titragan emish!..

Ajabo, mana endi u, kimsan Ibn Sino, Buxoroga qirg'inbarot keltirgan shu sultonni davolamog'i darkor emish, bedavo dardiga davo topib, boshqa qirg'inlarga yo'l ochib bermog'i lozim emish! Buning uchun esa sulton makon qurgan G'aznayi munavvaraga bormog'i darkor emish!

Rost, ojiz banda, uning o'zi ham odil poshsho qidirib ko'p yanglishdi. Shamsuddavla va malikayi Saida kabi aqli ko'toh gumrohlarni insof va adolat yo'liga solaman deb, umrining eng mas'ud yillarini yo'qotdi, shu niyatda, hatto, ularga vazirlik ham qilib ko'rди, biroq, hayhot, shon-shuhrat ishqida yongan bu johil hokimlarning tuban istaklari oldida uning ezgu orzulari bamisoli toshga tekkan oynaday chil-chil sindi. Va lekin... bu dunyoda hamma narsa nisbiy! Birgina Hindistonga o'n yetti marta yurish qilib, necha-necha shaharlarni vayron qilgan, qal'alar va ibodatxonalariga yashiringan ming-ming zaifalar, norasidalar,

mayib-majruhlar ustidan tiriklayin o't qo'yib yuborgan sulton Mahmudday jahongir oldida Ibn Sino xizmat qilgan gumroh hokimlarning etagida namoz o'qisa bo'ladi!

Bundan besh-olti yil muqaddam Isfahonda hindistonlik bir sayyoh gapirib bergan edi. Hindlarda «Javohir» degan bir rusum bo'lar emish. Shundaykim, erlar jang-jadalda halok bo'lsalar, xotinlar o'zlarini o'tga tashlar emish. Sulton Mahmud bostirib borganida, erlarining jang maydonlarida halok bo'lganini ko'rgan ming-ming xotinlar, go'yo jahongir keltirgan qatli bedod yetmaganiday, o'zlarini olovga tashlab o'lgan emish!..

Hind sayyohi buni oppoq soqolini ko'z yoshlari bilan yuvib gapirib bergan, Ibn Sino esa uning mudhish hikoyasini zir titrab eshitarkan, sultonning yuzini bu dunyo, u dunyo ko'rmaslikka ichida ont ichgan edi!

Faqat bir narsa G'aznani o'ylaganda uning yuragini allaqanday jizillatib yuboradi – u ham bo'lsa, ustod Beruniy bilan diydor ko'rishish istagi! Ular so'ng bor ko'rishganlariga, to'g'rirog'i, kechasi Gurganj darvozasidan pinhona chiqib, qalin saksovulzor orasida so'ng bor vidolashganlariga necha yil bo'ldi. Mana, salkam yigirma yil bo'libdi. Shundan keyin ilmiy muammolarga oid uch-to'rtta maktub va sayyoralar orqali yetib kelgan uzuq-yuluq gaplarni hisobga olmaganda, ustoddan darak yo'q. Ba'zi xabarga qaraganda ustod Beruniy Gurganjni tark etib, G'aznaga borganidan keyin u yerda katta rasadxona qurgan, rasadxonasi sultonga ma'qul tushib, uni o'zi bilan birga Hindistonga olib ketgan. U yerda ustod hind-



lar tilini o'rganib, avval sultonga tilmochlik qilgan, keyin esa bu yurt haqida, uning tarixi, ilmi hikmatlari, urf-odatlarini, qo'shiq va dostonlari, hikoyat va rivoyatlari to'g'risida katta kitob yozish maqsadida Hindistonda uzoq fursat qolib ketgan.

Bu gaplarning qaysi biri rost, qaysi bari yolg'on – Ibn Sino aniq bilmaydi. Lekin yoshlikdagi uchrashuvlari, suhbatlari, ayniqsa, Gurganjda, «Majlisi ulamo»dagi bahs-munozaralari yodiga tushib, qattiq sog'inadi. Shunday paytlarda kitob javonidagi eng noyob qo'lyozmalar orasiga yashirib qo'yilgan ustodning maktublarini olib o'qiydi, qayta-qayta o'qiydi. Rost, murakkab tabiat hodisalari haqida yozilgan bu maktublarda ustod uni qattiq koyigan joylari ham bor, ayniqsa, muallimi avval Arastuning «Ilohiyat»iga ko'r-ko'rona taqlid qilgansan, deb undan norozi bo'lgan satrlari ham yo'q emas, biroq, baribir, nechundir ularni qayta-qayta o'qirkan, ustodning qoramtir shiddatli chehrasi nigohi oldiga kelib, yuragida yana o'sha sog'inch tuyg'usi lovillab yonadi...

Yaqinda, har shanba Hamadonda bo'ladigan ulamolar majlisida, G'azna tomondan kelgan bir savdogar g'alati bir gap aytdi-yu, uning ko'nglida cho'g'day miltiragan sog'inch tuyg'usi battar yalig'landi.

Shundaykim, ustod Hindistondan qaytib kelandan keyin sulton uni Osmon malikasi qasriga taklif etgan emish!

«Ey, allomayi zamon! Ilmi irfon orasida shunday gap borkim, go'yo sen yecholmaydurg'on muammo, sen bilmaydurg'on sir-asror yo'q! Bu gap haqmi yo lofmi, buni sinamoq azmida hozir

o'rtaga masala tashlaymen, yechsang vazning barobar oltin olasen, yecholmasang xumkallangni tanangdan judo qilamen!

– Marhamat, ayting masalangizni! – degan emish ustod.

– Masala shulkim, sen o'ltirg'on bu mashvaratxonaning to'rt eshigi bor. Hozir faqir o'rnimdan turib, shu eshiklarning biridan ko'chaga chiqamen. Sen aql-zakovatda yagona bo'lsang, qaysi eshikdan chiqishimni qog'ozga yozib, yostig'imning ostiga qo'yib ketasen. Orqangdan men chiqamen, so'ng jumboqni to'g'ri yechdingmi, yo'qmi, yozgan qog'ozingni olib o'qib bilamen!

Ustod uzoq o'ylab turmay xat yozib sultonga bergan emish, sulton esa qog'ozni yostiq tagiga yashirib, ustalarni chaqirtirgan emish, ularga mashvaratxona devorini buzdirib, tuynuk ochtirgan va shu tuynukdan tashqariga chiqqan emish. So'ng yostiq tagidagi qog'ozni olib allomalarga o'qittirgan emish.

Vo darig! Qog'ozda shunday deb yozilgan emish: «Olampanoh to'rt eshikning hech biridan chiqmaydur, devorni buzdirib, tuynuk ochtirur va shu tuynukdan tashqariga chiqadur!»

Bu hikoyani eshitib, butun majlis ahli yoqasini ushladi, Ibn Sinoning yuragidagi sog'inch uchunlari esa battar yallig'landi...

Ha, Ibn Sino ustodni bir ko'rish, u bilan to'yib-to'yib suhbatlashish uchun na yo'l azoblaridan qo'rqadi, na boshqa qiyinchiliklardan. Ammo bu sulton?.. Allomalarga telba-teskari masalalar berib, ulardan dono javoblar kutguvchi bu telba hokim!..

Nogahon qir etagida xachir yetaklagan bir odam ko'rindi. U to'ppa-to'g'ri Ibn Sinoga qarab kelardi. Ibn Sino negadir bu odam bilan uchrashgisi kelmay, o'rnidan turdi.

– Qayga shoshasen, ey darvesh?

Ibn Sino beixtiyor to'xtadi. Uning ro'parasida soch-soqoli o'sib ketgan, ochlikdanmi, betoblikdanmi ko'zlari ichiga botib, uzun burni so'rrayib qolgan bir mo'ysafid turardi. Mo'ysafidning egnida quroq-quroq bo'z ko'ylak, bo'z shalvar, oyog'ida chilvir bilan chandib bog'langan eski choriq, xachirining belidagi xurjunning bir ko'zida katta suvqovoq, bir ko'zida bo'yni cho'ziq sopol xum ko'rinar, aftidan, u yaqindagi rabot meshkobchisi edi.

– Assalomu alaykum...

– Vaalaykum assalom... – meshkobchi kirtaygan ko'zlari bilan Ibn Sinoga bir daqiqa sinovchan tikilib turdi, so'ng. – Muroding qorin to'ydirmoq bo'lsa... yo anov qishloqqa, yo, rabotga bor, – dedi hamon Ibn Sinodan nigohini uzmay. – Allohga hamd-u sano o'qib, rizq-ro'zingni terib ye! Sabab, bu qirlarda daydib yuribsen, ey darvesh?

Yo, tavba! Soch-soqoli o'sib ketgan bu keksa meshkobchi kingadir o'xshar, juda-juda o'xshardi!

Ibn Sino yuragiga quyilib kelgan ichki g'alayonni zo'rg'a bosib:

– Peshonamga yozilgani shu bo'lsa ne qilay, ey bandayi mo'min? – dedi.

Meshkobchi, go'yo bir nimadan cho'chiganday, sal orqaga chekinib: «Yopiray!» deb pichirladi.

– Devonalik joningga tekkan bo'lsa bizning karvonga bor. Tuyakashlik qil! Usting but, noning halol bo'lur, faqir banda!

– Qaysi karvon?  
– Isfahondan chiqib, Buxoroyi sharifga bo-rayotgan katta karvon!

– Buxoroyi sharif?

– Vo ajabo! Buxoroyi sharifni eshitmagan gum-rohlar ham bormi olamda? Dong'i yetti iqlimga ketgan shahri munavvardur Buxoro! Yura ber, ham ziyorat, ham tijorat bo'ladi sen uchun!

«Astag'firullo! Musofir yurtida suv tashib yurgan bu meshkobchini qayerdadir ko'rgan u! Ha, buxorolik... yo'q, afshonalik bir kimsani eslatadi bu meshkobchi! Juda-juda eslatadi! Yo'q-yo'q, keksayganda qayoqdagi o'ylar keladi kishining xayoliga!»

– Lutf-u karaming uchun tashakkur, birodar, ammo tuyakash bo'lishga keksalik qilamen! – Ibn Sino hayajon ichida teskari burilib, pastga qarab yo'naldi, biroq bir necha qadam yurmasdan meshkobchining «Yo, Parvardigor!» degan xitobini eshitib, beixtiyor to'xtadi.

Keksa meshkobchi hanuz o'z joyida turardi. Ibn Sino to'xtab orqasiga qarashi bilan uning qo'lidagi qamchisi yerga tushib ketdi, o'zi esa yo-qasini ushlab:

– Yo, tavba! Abu Ali?! – deb xitob qildi.

– Shokalon?

– Abu Ali? – meshkobchi qo'llari qaltirab oldinga talpindi-yu, negadir jur'ati yetmay, yana to'xtadi. – Yo'q! Ko'zlarimga inonmaymen! Abu Ali ibn Sino darvesh bo'lmish? Dong'i olamga ketgan hakimi davron Ibn Sino devona kiyimida tilamchilik qilib yurmish? Bu ne hol, yo, Parvardigor?

Ibn Sino ham hamon o'z ko'zlariga ishonmay lol bo'lib turardi.

«Yo, Rab! Telba taqdirning ne o'yini bu? Yoshlik birodari Shokalon bu musofir yurtlarda meshkobchilik qilib yurgan bo'lsa!»

Shokalon, patak soqoli dir-dir titrab, Ibn Sino tomon yurdi. Ikki do'st, ko'zlarida yosh, uzoq quchoqlashib turishdi.

– Astag'firullo! Nahot, bu ko'rib turganlarim tush emas, o'ngim bo'lsa, Abu Ali?

– Sen-chi? Senga ne bo'ldi? Bu musofir yurtga qachon kelding? Faqirga ters qaragan telba taqdir senga nechun ters qaradi, Shokalon?

– So'rama, Abu Ali! – xitob qildi Shokalon. – Sen so'rama, men so'zlamay, so'zlab bag'rimni tig'lamay! – Shokalon kirtaygan ko'zlarini uqalab Ibn Sinoga qaradi-yu, uchinchi bor:

– Yo'q, inonmaymen! – deb yoqasini ushladi. – O'z ko'zlarimga inonmaymen! Biz seni Hamadon va Isfahonda vaziri a'zam deb eshitgan edik, Abu Ali!

Ibn Sino ma'yus bosh chayqab:

– Farqi ne? – deb kulimsiradi. – Vaziri a'zammi, darveshmi, farqi ne, Shokalon?

– Yo'q! Ajab dunyo ekan bu dunyo, Abu Ali! Tavallud topgan yurtingda sening noming odamlar tilida davri doston, sen bo'lsang...

– Mayli, Shokalon, meni qo'yib Afshonadan so'zla! Buxoro qalay? El-yurtning ahvoli nechuk?

– O, Abu Ali, Abu Ali! – dedi Shokalon boshini g'amgin tebratib. – El-yurtning ahvolini so'rama! Sen bilgan Afshonadan yolg'iz kultepa qolgan! Bilmam, eshitdingmi, yo'qmi, bundan to'rt-besh yil avval Buxoroga sulton Mahmud bostirib keldi.

– Ming taassuf, eshitdim.

– Eshitsang... Afshona xonavayron bo'ldi, Abu Ali, xonavayron! Bog'-rog'lar jangovar fillar ostida

toptaldi. Sen so‘rama, men yuragimni tig‘lamay, Abu Ali!

Ibn Sino boshini changallagancha uzoq sukutga toldi.

– E voh! Bundan chiqdi, sen ham faqirga o‘xshab... sulton Mahmud tazyiqidan qochib yuribsen, Shokalon?

– Yo‘q, Abu Ali! – dedi Shokalon uf tortib. – Faqir bu musofir yurtiga yolg‘iz zurriyotim Shoyusufni qidirib keldim.

– Zurriyotingga ne bo‘ldi?

– O, Abu Ali, Abu Ali! – dedi Shokalon, o‘tirgan joyida og‘ir tebranib. – Taqdirning o‘yiniga chora yo‘q ekan! O‘g‘limning qismati sening qismatingga o‘xshadi. Uning ishqi Bo‘tako‘zbeginning qiziga tushdi, Abu Ali.

– Bo‘tako‘zbegin!

– Ha, g‘alati dunyo ekan bu dunyo, Abu Ali! O‘g‘lim ham o‘shal sen suygan baxtiqaro Bo‘tako‘zbeginning qizini suyib qoldi. Ul ham senga o‘xshab, ma‘shuqasining visoliga yetolmay, «yohu», deb bu tomonlarga bosh olib ketdi!

«Bo‘tako‘zbegin? Uning qizi? Yo, tavba! Bu sho‘rlik meshkobchi ne deydi? Aqli hushi joyidami buning yo boshiga tushgan musibatlardan telbalanib qolganmi?»

– Yo, tavba! Bo‘tako‘zbegin tirikmi?

– Yo‘q, sho‘rlik begin, – Alloh uning qabrini charog‘on qilg‘ay, – olamdan o‘tdi. O‘zing davolagan zotiljam dardi olib ketdi ul notavonni. Biroq undan Qorako‘zbegin degan bir ojiza qolgan edi. Allohning qudrati bilan quralay ko‘zlaridan tortib, bo‘ynidagi qora xoligacha marhumaning o‘zi

edi! Ne chora? Qismati ham sho'rlik Bo'tako'zbekimning qismatiga tortdi. Bultur ko'klamda bek qo'rg'onini bir kechada qaroqchilar bosib, Qorako'zbekimni o'g'irlab ketdi. O'g'lim esa... O'g'lim misoli bir shunqor edi, Abu Ali! Qizning otasi o'g'limni o'ziga sarboz qilib olgan edi!

Shokalon dam-badam uf tortib, o'g'lining boshiga tushgan musibatni uzoq so'zladi. Uning aytishicha, bu sirni, bek qizini olib qochgan qaroqchilar sirini hech kim bilmas emish. Birovlar, Qorako'zbekimni olib qochgan bebosh sahnoshin beklar, desa birovlar, Buxoro hokimi! Alitegin der emish. Bundan to'rt-besh yil muqaddam, sulton Mahmud Buxoroga bostirib borgan-da, Aliteginning kenja xotini bilan suyukli qizini asir qilib olib ketgan emish. Alitegin ularni qaytarish umidida, bek qizini bosib olib, uni Isfahonga, amir Mas'ud haramiga in'om etib yuborgan emish. Shokalonning o'g'li esa bu gapni eshitib ma'shuqasining izidan Isfahon tomonlarga bosh olib chiqib ketgan emish. Ota ekan, Shokalon ham bu musibatga chiday olmay, yolg'iz farzandini qidirib kelgan emish...

Ibn Sino Shokalonning hikoyasini birda ilg'asa, birda ilg'amadi. Uning xayoli xuddi uya qo'yan joylariga talpingan qushday yana Afshona tomon parvoz qildi, ko'z oldida esa ulkan oq o'tov to'rida yotgan Bo'tako'zbekim namoyon bo'ladi! Yo'q, bu – ilk bor ko'rganida ko'zlari jiqqa yoshga to'lgan nogiron Bo'tako'zbekim emas, bir oylik muolija sabab onadan qayta tug'ilgan, huddi bo'taloqning ko'zlariday qop-qora serkiprik ko'zlarida sho'x uchqunlar paydo bo'lgan tamom boshqa, latif va muloyim bir qiz edi!

Qanday dorular ishlatgan edi u o'shanda? Salkam o'ttiz yil o'tgan bo'lsa ham hanuz yodida turipti: oq tuyaning qimroniga yantoq shakarini, mo'miyoga asalari sutini qo'shib bergan, ishtaha uchun esa ko'knori po'stining qaynatmasi bilan Misr sabri<sup>1</sup>sining sharbatini ishlatib, shaftoli va achchiq bodom yog'ida qovurilgan barra qo'zi go'shtini buyurgan edi!

Bu – o'zi kashf etgan murakkab dorularni ikkinchi bor ishlatishi edi! Birinchi marta Buxoro hokimi Nuh ibn Mansurni shifolab, uning boy kutubxonasiga kirish baxtiga erishgan, ikkinchi bor esa Bo'tako'zbeimni davolab, uning muloyim tabassumiga sazovor bo'lgandi.

Hanuz nigohi oldida turipti. Bo'tako'zbeim, o'tovga kirgan yosh tabibni ko'rib, qaddini rostlab o'tiradi, rostlaganida uzun tim qora sochlari-ga taqilgan kumush qo'ng'iroqchalar va nozik til-la halqachalar ajib ovoz chiqarib jaranglab keta-di. Begimning xatti-harakatlarida, chehrasida, boqishlarida nimadir o'zgargan. Abu Ali sezadi: qizning nigohidagi bu o'zgarish faqat sog'lig'i yaxshilanganidan emas, yo'q, uning yuragida qan-daydir qaynoq bir ehtiros paydo bo'lgan.

Abu Ali yuragi «jiz» etib, bo'sag'ada to'xtaydi. Begimning lablaridagi, bo'taloqning ko'zlariday katta-katta ma'sum ko'zlaridagi sirli tabassumu-ni sarosimaga soladi. Begim esa yosh tabibning sarosimaga tushib, «duv» qizarganini ko'radi-yu, muloyim kuladi:

– Keling, o'tiring, hakim hazratlari! – deydi qiz qo'sha-qo'sha bilaguzuklar taqilgan nozik qo'lla-rini yosh tabibga cho'zib.

---

<sup>1</sup> Sabri – aloy.



– Nechun mendan qochasiz? – deb so'raydi u, so'raydi-yu, to'satdan ko'ziga yosh oladi. – Kela-siz, biroq yonimda lahza o'tirmay, tag'in qocha-siz. Uzun kun yo'lingizga tikilamen... siz esa... yonimda lahza o'tirmay qochasiz...

Bo'tako'zbekim yana «qult» etib yutinadi, yutin-ganda tomog'idagi moshdekkina qora xoli odat-dagiday ojizgina qimirlaydi. Bu qora xol, yo'q, xol emas, «qult» etib yutinganda uning allaqan-day ojiz qimirlashi yosh tabibning yuragidan o't chiqarib yuboradi.

– Sizning mehri sharofatingiz bilan men sho'rlik bir o'limdan qoldim, – deydi begim. – Bu yaxshiligingizni toabad unutmaymen, hazratim!

«Hazratim» so'zi begimning tilida juda g'alati eshitaladi. Abu Alining nazarida Bo'tako'zbekim go'yo undan kulayotganday tuyuladi-yu, «Bu so'zni bir aytdingiz, qayta aytmang!» degisi keladi, biroq hayajondan tili aylanmay g'o'ldirab qoladi.

– Endi ijozat etsangiz, o'rnimdan tursam, – deydi Bo'tako'zbekim, allaqanday nozli yolvorib. – Bu qafasdan chiqsam, dala-dashtlarni kezib, to'yib-to'yib nafas olsam, chechaklar tersam...

– Yo'q, yo'q, dala-dashtlarni kezishga hali er-tadur, begim!

Qiz asabiy harakat bilan to'zg'igan sochlarini orqaga tashlaydi.

– Bugun ijozat etmasangiz, ertaga kech bo'ladi, hazratim!

Begimning so'zlarida kishini cho'chitadigan pinhoni-y bir ma'no bor. Bu sirli ma'no Abu Alini vahimaga soladi.

– Mayli, men ijozat beramen, ammo otangiz...

– Amri tabib – vojib. Otam sizning so‘zingizni vojib deb biladi!

O‘shanda ham bahor edi. Ayni bahor. Bepoyon Cho‘li malik sahronishin chevarlar to‘qigan guldor paloslarni eslatadi. Gurkirab o‘sgan giyohlar to‘piqqa keladi, yam-yashil yantoq, shuvoq, yovshan, bo‘ztikan, qo‘ng‘iroq gullar orasida piyoladay-piyoladay lolaqizg‘aldoqlar cho‘g‘day yonadi. Binafsharang chuchmomalar ipakday eshiladi, sachratqi va noxatak gullarida asalarilar vizillaydi.

Hadsiz-hududsiz dashtning har joy-har joyiga oq, qizil, qo‘ng‘ir o‘tovlar tikilgan, gala-gala qo‘y-echkilar, uyur-uyur yilqilar ko‘rinadi, bo‘taloqlarini yetaklab olgan tuyalar vazmin «bo‘x-bo‘x»lab yuribdi... Goho-goho sahro tinchini uyur talashgan ayg‘irlarning muzaffar kishnashi buzadi, qo‘y-qo‘zilarning allaqanday yoqimtoy ma‘rashi va otlar dupuri yurakni qitiqlaydi. O‘tovlar tevaragida esa qizil ko‘ylak ustidan qizil nimcha kiyib, ukki pati taqilgan g‘alati qalpoqchalarini boshlariga qiya qo‘ndirib olgan qiz-kelinchaklar ko‘rinadi: ularning sho‘x qiliqlari, qaltis hazillari, muloyim kulgulari yurakka jaz-jaz tegadi...

Kechalari, biyalar tushovlanib, sigirlar sog‘ilib, o‘choqlarda olov so‘ngach, pana joylarga bo‘z yigitlar yig‘ilib, qiz-kelinchaklarni kutishadi. Nihoyat, keksalar uyquga ketgach, qiz-kelinchaklar o‘tovlardan chiqib kelishadi. Ular taqinchoqlarini mayin jaranglatib, uzoqdan piqir-piqir kulishib, to‘p-to‘p bo‘lishib kelishadi-yu, darhol o‘z juftlarini topib olishadi, so‘ngra g‘alati o‘yinlar, tortishuvlar, cho‘lp-cho‘lp o‘pishishlar bilan tugaydigan berkinmachoqlar boshlanadi, taraf-taraf bo‘lib lapar va o‘lanlar aytiladi...



Buxoroda yuzlari ochiq qiz-juvonlarni ko'rgan yosh tabibga bu o'yin-kulgular, bu erkin va latif munosabatlar, allaqanday hazin nurga yo'g'rilgan o'lan va laparlar juda g'alati tuyuladi. U go'yo bu zamindan boshqa, go'zal bir olamga tushib qolganday sezadi o'zini. Bo'tako'zbegin esa... Yigitlar orasidan doim yosh tabibni tanlaydi. Issiq lablari bilan Abu Alining yuziga jaz-jaz tegib, berkinmachoq paytida qayerga yashirinishini oldindan shivirlab aytadi. Shuning uchun ham birinchi bo'lib beginni Abu Ali topadi, qizning cho'g'day issiq bo'sasi ham aksar hollarida Abu Aliga nasib etadi! Yosh tabibni faqat bir narsa qiynaydi – u qiz-yigitlarning o'lan va laparlariga qo'shila olmaydi. Aytishuvlarda so'z topolmay qiynaladi. Lekin bu tiniq, seryulduz dasht oqshomlarida Bo'tako'zbeginning yonida yonboshlab yotib, bu o'lanlarni, dasht oqshomiday tiniq, ma'yus laparlarni tong otguncha eshitgisi keladi, shirin tushga o'xshagan bu mas'ud damlar toabad tugamasa deydi!..

...Ibn Sino yuzini iliq bahor oftobiga tutib, uzoq sukutga ketdi. Shokalon ham negadir sukutga cho'mgan, aftidan, darvesh qiyofasidagi hamyur-ting xayolini bo'lishni istamaydi.

Ibn Sino bo'lsa hamon bir-biridan g'alati, bir-biridan hayajonli esdaliklar oqimidan chiqolmaydi. Esdaliklar esa go'yo guldan gulga uchib-qo'nib yurgan kapalaklarga o'xshaydi, lip-lip etib, bir voqeadan ikkinchisiga, ikkinchisidan uchinchisiga uchib o'tadi.

Mana, kelinchakday yashnab ketgan dasht bag'rida o'n chog'li qiz-yigitlar ot surib ketyapti.

Oldinda Bo'tako'zbekim. Uning ostida yoliga ipak popuklar taqilgan chiroyli saman yo'rg'a. Begimni uch-to'rtta otliq kanizlar qurshab olgan. Orqaroqda esa sahroyi bekning shaxsiy sarbozlari, ular orasida... mana shu Shokalon bilan Abu Ali ham bor. Bo'tako'zbekim oldinda ot choptirib bormoqda. Abu Alining ikki ko'zi qizda. U ko'k qashqa bedovining boshini qo'yib, qizni quvib yetgisi, uning ochiq yuziga, serkiprik bo'ta ko'zlariga tikilib, yonma-yon ketgisi keladi. Biroq sarbozlaridan iymanadi.

Ana, ular dasht bag'ridan chiqib, lolaqizg'aldoqlar chaman ochilgan qumliklar bag'riga sho'ng'iydi. Sho'ng'ishlari bilan Bo'tako'zbekim orqaroqda kelayotgan Abu Aliga qarab ko'z qisadi-yu, ostidagi saman yo'rg'asiga qamchi bosadi. Qizning «men qochamen, siz quving», deganini tushungan Abu Ali ham, yuragi gurs-gurs urib, ko'k qashqa bedovining boshini qo'yadi, qo'yarkan, ularni boshlab ketayotgan ko'sa yasovulga ko'zi tushadi. Yasavulning ko'zlari chaqchayib ketgan. Biroq Abu Ali unga e'tibor bermaydi. Yosh tabibning fikri xayoli kumush tangalar taqilgan sochlarini yoyib, qumliklar orasida shamolday uchib ketayotgan Bo'tako'zbekimda, Abu Alining ko'k qashqa bedovi go'yo uning yuragidagi g'alayonni sezganday, qushliklarga sho'ng'ib ketgan saman yo'rg'a ortidan qushday uchadi. Qiyqiriq ko'tariladi. Ot tuyoqlari ostidan otilib chiqqan lolaqizg'aldoqlar go'yo yaradan otilib chiqqan qon yanglig' har tomonga sochiladi.

To'satdan, oldinda qushday uchib ketayotgan qiz otining boshini qalin saksovulzorga buradi, buradi-yu, Abu Aliga qarab sharaqlab kuladi.

– Balli! Ot chopishni o'rganibsiz, hazratim!  
– Yo'q, chavandozlikda sizga bas kelolmaymen, begim!

– Begim dedingiz... tag'in bir ayting?.. – deydi qiz erkalanib. Uning bo'taloqning ko'zlariday ma'sum ko'zlari allaqanday charaqlab ketgan, titroq ovozida, xatti-harakatida yaqindagina to'shakdan turgan xasta emas, yo'q, sahronishinlarga xos bir qat'iyat bor. – Bilib qo'ying, hazratim, otam... erta-burun ko'chib ketmoq niyati bor! Siz unga ayting! Muolija fursati tugagani yo'q, deng. Hali bir oy davolamoq darkor, deng, hazratim, bir oy!

Begimdagi hayajon Abu Aliga o'tadi.

– Bir oy emas, bir yil bor, bir yil!..

– Rostmi bu so'zingiz? – deydi begim titrab. Uning yumuq ko'zlaridan tirqirab oqqan yosh tomchilari lovillab yongan yuzini yuvib, bo'yniga yumalab tushadi-yu, tomog'idagi moshdekkina qora xolida turib qoladi. Abu Ali yaqinlashib kelayotgan ot dupurini eshitadi, biroq ko'ziga hech narsa ko'rinmay, otini oldinga niqtaydi-da, qizning ingichka nozik belidan quchadi. Qiz ko'zini yumganicha cho'g'day issiq yuzini uning yuziga bosadi...

Ot dupuri, vahimali xayqiriq tobora yaqinlashib keladi...

– Bilib qo'ying, hazratim! Siz meni o'lim chagalidan xalos qildingiz. Endi sizdan ayrilmoqdan o'lim afzal menga!

Abu Ali qizning pir-pir uchgan sho'rtang lablaridan, yosh to'la quralay ko'zlaridan, tomog'idagi moshdekkina qora xolidan o'padi, shoshib, en-

tikib, yonib o'padi, so'ng... so'ng kimningdir dag'al harakatidan o'ziga keladi. Tepasida... ko'sa yasovul! Uning sarg'ish ko'zlari qisilgan, cho'qmorday qora mushti qattiq tugilgan.

– Sen... tabib emas, bek qizini yo'ldan urish niyatida yurgan iblis ekansen!

Yasovulning so'zini:

– Bas! Hakim hazratlarini haqorat qilmang!  
– degan titroq ovoz bo'ladi. Bu – begim. Uning ko'zlarida halqa-halqa yosh!

– Hakim hazratlari? – kuladi yasovul. – Uyat-siz! Dasht havosi bahona, diydor g'animat! Qani, otingning boshini orqaga bur, behayo!

Abu Ali garang. U ham ko'sa yasovulga o'xshab dag'-dag' titraydi, biroq tiliga hech bir kalima kelmaydi. Yasovul esa faqat uni emas, begimni ham haqorat qilib so'kadi, saman yo'rg'aning jilovidan olib, orqaga sudraydi. Qiz, kamon kipriklarida halqa-halqa yosh, kanizlar va yasovullar qurshovida, orqaga qaray-qaray uzoqlashib ketadi...

Kapalakdek qo'nimsiz xotira bu ma'yus manzaradan «lip» etib uchadi-yu, boshqa bir mudhish manzaraga borib «qo'nadi».

Subhi sodiq. Kechasi bilan mijja qoqmay qovurilib chiqqan Abu Ali tong payti ot dupurini eshitib uyg'onib ketadi. Bu – begimning kanizi bilan ot surib kelgan Shokalon! Mana shu Shokalon!

– Qarorgohni yov bosdi! – deydi kaniz yig'lab. – Sho'rlik bekam! Sho'rlik bekam!..

– Tez! – deydi Shokalon. – Otinga mingash! Tezroq bo'l, Abu Ali!

Haqiqatan, qayerdandir ovloqdan, bek qarorgohi joylashgan qir tomondan, qandaydir vahshiy

hayqiriqlar keladi. «Ur, ha, ur!», «Chop, ha, chop!» degan xitoblar eshitiladi, otlar kishnaydi.

Abu Ali jonholatda Shokalonning otiga mingashdi. Biroq, e voh! Ular oq ko'pikka cho'milgan otlarini shafqatsiz qamchilab, qarorgohga yetib borganlarida: «Ur, ha, ur! Chop, ha, chop!» degan hayqiriqlar tingan, ot dupuri uzoqlashgan edi! Tepalikda faqat ag'darilgan o'choqlar, tutab yotgan o'tovlar qolgan, har joy-har joydan ingragan ovozlari eshitar, sahroyi bekning sarbozlarigina emas, o'zi ham chavaqlangan, Bo'tako'z begim esa... uning izlari ham yo'qolgan edi!..

...Ibn Sino go'yo bu mudhish voqea o'ttiz yil muqaddam emas, hozir ro'y berganday, yuragi tinimsiz bezillab uzoq yotdi.

Ajabo, o'shanda taqdir unga kulib boqib, o'z suygani bilan qovushganida nima bo'lardi? Saodat yor bo'larmidi ularga? Yor bo'lganda u hozirgidek «hakimi davron» degan nom chiqararmidi? Tabobat bobida qilgan ishlarini, yozgan yuzlab asarlarini yoza olarmidi? Faqat avom emas, hatto, jahonni titratgan shohlargacha undan shifo izlab, oldida bosh egib turisharmidi? – dedi o'zicha Ibn Sino, dedi-yu, ichida bir kulib qo'ydi.

«O, Abu Ali, Abu Ali! Donolikni da'vo qilaysen, ammo nodonlarning o'yini o'ylaysen! Yoshing ellikka kelganda hamon chirkin shon-shuhrat g'amini chekasen? E voh! Bu dovrug', bu shon-shuhratdan yoshlik chog'laringda o'sha dasht sanami bilan o'tgan mas'ud visol onlari afzal emasmi? Mabodo charx bir aylanib, o'sha betakror onlar qaytib kelsa, qaysi birini tanlar eding? Ul beg'ubor muhabbat damlarinimi yoxud bu bevafo shon-shuhratnimi?»

Ibn Sino kinoyali kulimsiraganicha uzoq sukutga toldi, uning yuragi hamon bezillab og'rir, nazarida, Shokalon aytgan qiz unga yot emas, yo'q, jigarining bir parchasidan bunyod bo'lgan o'z zurriyoti edi!

Yodida bor: bundan o'n-o'n besh yil muqaddam Hamadonda, gumroh Shamsuddavlaning vazirlari to'qigan fisqi fujur sabab bir bevaning xonadonida yashirinib yotgan chog'larida ham xuddi shunday bir voqea sodir bo'lgan edi.

Eri o'lib, tul qolgan yoshgina, ko'hlikkina bevaning uch-to'rt yashar bir qizchasi bo'lardi. Ibn Sino bevaning tashqi hovlisida turar, beva esa qizalog'i bilan ichkari hovlida yashardi. Avval-boshda beva undan tortinib o'zini olib qochdi, biroq asta-sekin ust-boshiga, uy-ro'zg'or yumushlariga qarashib yurib, o'rganib ketdi-yu, oralarida allaqanday tiniq samimiy bir yaqinlik vujudga keldi. Bu yaqinlikka bevaning uch-to'rt yashar qizalog'i ham sabab bo'ldi. Tili chuchuk, ko'zlari ko'm-ko'k bu qizaloq sal o'tmay uni o'z otasiday sevib qoldi.

Yozda, ayni saraton chog'larida, Ibn Sino Isfahonga safar qildi-yu, u yerda bir-ikki hafta qolib ketdi. Qaytib kelsa, qandaydir taomdan zaharlangan qizaloq o'lim to'shagida qovurilib yotar, aqli hushini yo'qotib qo'yan beva esa nima qilishini bilmas edi.

Ibn Sino darhol muolajaga kirishdi. Huqna qildi, har xil dorular berdi. Uning davosidan keyin behush yotgan qizaloqning yuziga qon yugurib, ko'zini ochdi, uni tanidi chog'i, ko'kargan lablarini bazo'r qimirlatib: «Ota! Otajon!» – deb pichirlagan bo'ldi-yu, ko'zini qayta yumdi.





Shu-shu, Ibn Sino qancha urinmasin, qizaloq ko'zini ochmadi.

O'sha kecha, quloqlari ostida bevaning betasalli nolasi, qo'lida jonsiz qizaloq, Ibn Sino hovlida ko'kka tikilib tong ottirdi! Dilida ko'kning qudratiga shubha va isyon, xayolida o'lim va hayot haqida eski notinch o'ylar, u tong otguncha mijja qoqmadi. Keyin esa go'yo begona qizaloq emas, o'z pushtikamaridan bo'lgan jigarbandidan ayrilganday bir necha oygacha iztirob chekib yurdi. Hozir ham... Bo'tako'zbeğim!

Ibn Sino osmondan ko'zini uzib, qaddini rostlab o'tirdi. Shokalon patak soqolini tutamlab, hamon o'ygacha cho'mib yotardi.

– U sho'rlilik... Bo'tako'zbeğimning qizi...

– Qorako'zbeğim, – dedi Shokalon.

– Qorako'zbeğim... Isfahonda, amir Mas'ud haramida ekani aniqmi?

– Men qaydan bilay, o'g'limning so'zini aytamen, Abu Ali.

– O'g'ling qayda?

– Isfahon yonida bir g'orni makon qilib, ko'ksini zaxga berib, zohidlik qilib yotipti. Ammo bundan ne foyda? Shahar darvozalari berk. Shaharda qora o'lat daydib yurmish!

Ibn Sino bir sapchib tushdi. Rangi quv o'chib:

– Qora o'lat? – deb so'radi.

– Ha, odamlar shunday deydilar. Shaharda qora o'lat boshlanib, ahli mo'minlarni tutday to'kmoqda emish. Isfahonga hech kim kira olmas, hech kim undan chiqa olmas emish. O'n ikki darvozaning hammasi taqa-taq berk emish. Ne chora? O'g'limning yonida bir oy turib, orqam-

ga qaytdim. Mana shu karvon bilan Buxoroga qaytmoq azmida karvonga meshkobchi bo'lib yollandim, Abu Ali.

Ibn Sino soqolini tutamlab bir lahza o'yg'a toldi-yu, to'satdan shaxt bilan o'rnidan turdi.

– Faqir... Isfahonga ravona bo'lamen, istasang birga olib ketamen, Shokalon!

### O'N OLTINCHI BOB

Ariz Abulvafo Sariq Teginobod tomon ot choptirib ketgan sarbozlar orqasidan uzoq tikilib qoldi. Sarbozlar sariq parda tutilgan soyabon aravani qurshab olgan aravada G'aznadan kelgan hakimi davron... Ibn Sino hazratlari bor edi. Rost, ariz Abulvafo Ibn Sino hazratlarini ko'rolmadi, chunki, avvalambor, hazrat soyabon aravadan chiqmadi, qolaversa, aravada o'tirgan hakimi hoziqning yuziga nechundir qora charm niqob kiydirilgan, niqob ichidan faqat cho'g'day yongan ko'zlarigina ko'rinardi.

Abulvafo Sariq buni arava qo'zg'alib, ipak pardaning bir cheti xiyol ko'tarilganida ko'rib qoldi, ko'r-di-yu, vahima bosib, tirnoqlarigacha muzlab ketdi.

Kecha yuzi g'irt cho'tir, serjahl bir mushrif G'aznadan, vaziri a'zam Ali G'aribdan maxfiy noma keltirdi. Nomada aytilishicha, cho'tir mushrif boshlab boradigan hakim hazratlarini toki Teginobod bozorida jar solinib, odamlarga ayon qilmaguncha hech bir kimsa ko'rmasligi darkor. Jar solinib fuqaroga ayon bo'lganidan keyin esa maxfiy mushrif hakimi davronni Abulvafo Sariq ixtiyoriga yetkazadi. Abulvafo esa hakim hazrat-

larini zo'r lutfi karam va izzat-ikrom bilan kutib olmog'i, so'ng Teginobod hokimini bu ishdan bir og'izgina xabardor qilib, G'azna tomon ravona bo'lmog'i darkor!

Abulvafo Sariq garchi hazrat Ibn Sino to'g'risidagi pinhoniylar gapni boshda o'zi chiqargan bo'lsa ham, vaziri a'zamning maxfiy nomasini o'qib, yuragi uvishib ketdi, chunki Ali G'aribning rejasida Abulvafo o'ylaganidan ham xatarli va mudhish bir narsa bor edi! Lekin faqat bugun, yuziga qora charm niqob kiyib olgan bu noma'lum kimsani ko'rganidan keyingina vaziri a'zam rejasining butun dahshatini his etdi... Ana, soyabon aravani qurshab olgan sarbozlar yaqindagi rabot qo'rg'oni yonidan o'tib, olisdan elas-elas ko'zga chalingan Teginobod qal'asi tomon ot surishdi. Sal o'tmay, soyabon arava ham, uni qurshab olgan sarbozlar ham g'ira-shira tong qorong'iligida g'oyib bo'lishdi.

Abulvafo Sariq, bir-bir bosib, qir yonbag'riga tikilgan qizil saropardaga qarab yurdi. Bundan bir oy muqaddam, Abulvafo Hamadondan qaytganida atayin, mana shu rabotni tanlagan edi. Chunki amir al-muslimin farmoni bilan shaylangan uning maxsus karvoni hech narsaga muhtoj emas, karvonda hamma narsa mavjud – oziq-ovqatdan tortib ot-ulovgacha, qurol-aslahadan tortib kiyim-kechag-u xurjun-xurjun oltingacha – hammasi muhayyo edi.

Ariz Abulvafo bir-bir bosib tepasiga zar popuklar taqilgan qizil ipak saropardaga yaqinlashganda undan o'n besh-o'n olti yashar, ko'zlari katta-katta nozikkina bir o'spirin chiqib ta'zim bajo keltirdi. Bu – ariz janoblarning suyukli g'ulomi

edi. Qizil ipak ko'ylak va qizil ipak shalvar kiyib, xipcha belini ingichka kumush kamar bilan bog'lab olgan yosh g'ulom uyatchan kanizlarday nazokat bilan bosh egib:

– Mustahab<sup>1</sup> qilasizmi, taqsirim? – deb so'radi.

Boshqa payt bo'lganda Abulvafo Sariq suyukli g'ulomining tomog'ini silab erkalagan bo'lardi, lekin hozir ko'ngliga qil ham sig'may:

– Xufiyalar qayda? – deb so'radi.

– Chodir ortida. Taqsirimning xizmatlariga muntazirdurlar.

– Chaqir!

Ariz gapini tugatmagan ham ediki, chodir orqasidan to'rt nafar qalandar chiqib keldi. Hammalarining ustlarida juldur chopon, boshlarida kuloh, qo'llarida aso, yelkalarida xurjun.

Abulvafo Sariq sarg'ish qoshlarini chimirib, ularning yuzlariga bitta-bitta qadalib qaradi:

– Tunda aytgan so'zlarim eslaringda bormu?

Mo'risimon to'rtta kuloh bab-baravar egildi:

– Toabad esdan chiqmaydur!..

– Ana! – Ariz qo'lini niqtab, yiroqda elas-elas ko'ringan Teginobod qo'rg'oniga ishora qildi. – Hozir ketgan suvorilarni ko'rdinglar. Darhol orqasidan ot suring! Kecha aytdim, tag'in aytamen: biror xato bo'lib, hakimi davronning izi yo'qolsa, hammangning kallang ketadi! So'zim ayonmu?

Eski kulohli to'rt kalla yana baravar egildi.

– Ayon, valine'mat!

Abulvafo Sariq qalandarlar ot surib ko'zdan g'oyib bo'lguncha orqalaridan tikilib turdi, so'ng chodir panasiga o'tib, tahorat qildi. Odatda, u

<sup>1</sup> Tahorat.

bomdod namoziga o'tirishdan avval qarorgohni bir aylanib chiqar, soqchilardan xabar olar, otlar, tuyalar, chodirlar, xullas, maxsus karvonning hamma ikir-chikirlarini bir-bir nigohidan o'tkazar edi. Bugun qarorgohni aylanishga ham hushi bo'lmadi, olisroqda gulxan yoqib, ovqat yeyishga tutingan bakovullarga bir ko'z tashladi-da, horg'in odimlab chodirga kirdi, to'rdagi gilam joynamozga o'tib, ikki rakat namoz o'qidi.

Mana, yaqin uch oy bo'ldiki, ariz Abulvafo Sariq shu «hakimi zamon»ni deb, sarson-u sargardon.

Bundan uch oy muqaddam, tun yarmida uyiga bostirib kirgan ikki mushrif uni issiq to'shagidan ko'tarib, G'uzg'anon qal'asiga olib borishdi.

Osmonni qora bulut qoplagan, sovuq zimiston kecha edi. Atrofi baland devor bilan qurshalgan tosh qal'ada tiq etgan tovush eshitilmas, qal'a ko'hna maqbaraday sovuq va osuda edi. Tor yo'laklarning marmar devorlariga qadalgan tilla shamdonlarda bitta-yarimtagina sham yonar, ularning hazni shu'lasida qasr ichi, garchi zarhal bezaklar va g'aroyib hind paloslari bilan bezatilgan bo'lsa ham allaqanday g'arib va mungli ko'rinardi.

Sulton qasrning eng tupkarisida, devorlari havorang koshinlar bilan qoplangan ulkan chor-burchak xonaning to'rida, parqu yostiqlarga suyanib yonboshlab yotar, oldidagi oltin xontaxtada bittagina shaftoli gulli ko'zacha bilan bita-yu bitta nozik chiniy piyola turardi.

Sultonning azaldan qoqsuyak, bo'ychan gavdasi burungidan ham cho'zilgan, sahroyilarga xos keng, suyakdor yuzi sariq charm qoplangan niqobga o'xshar, taralmagan siyrak mosh-guruch

soqol-mo'ylolari paxmaygan, faqat ko'zlari, siyrak qoshlari tagiga yashiringan qiyy'os ko'zlarigina burungiday tiyrak va sinchkov edi.

– Janobi ariz! Faqir sizni katta bir umid bilan chaqirtirdim. Ammo bu umidimni izhor etishdan avval, sizga aytadurg'on boshqa bir so'zim bor. – sulton cho'gir qovunday so'poq boshini xam qilib, uzoq o'yg'a toldi. Uning ovozi ham tanish, ham allaqanday notanish, nogiron edi.

– So'zim shulki, faqirni afv eting, janobi ariz! Men sizning qirq yillik sadoqati zohir xizmatlaringizni unutib, behuda ozor berdim... Benuqson Parvardigor, bani odam, xoh shoh bo'lsin, xoh gado, oxir pirovardida ojiz banda ekanmiz...

Yo, tavba! Ariz Abulvafo olamni zir titratgan bu fotihi muzaffarning qo'lida qirq yil xizmat qilib, bunday nogiron va notavon so'zlarni birinchi eshitishi edi!

– Oftobi olam! Oradan neki so'z o'tgan bo'lsa, ayb sizda emas, ayb beadab qulingizdadur!

Sulton «o'tiring», deb imo qildi-da, yana ko'zini yumdi. Uning marjon-marjon terlagan keng yuzi bujmayib, yupqa lablari qattiq qisildi:

– Saltanat g'animlari yomon so'z tarqatganlar... Go'yokim, faqir og'ir dardga chalinganmen, go'yokim tanimdan kuch, belimdan quvvat ketgan emish! – sultonning uzun qoramtir barmoqlari asta yig'ilib, cho'qmorday mushtga aylandi. – Yolg'on! Alloh taologa ming qatla shukurkim, tanjonim salomat, to'rt mucham but! Menga o'lim tilagan barcha g'animlarim bilan oshkora kuch sinashga quvvatim yetadur! Ammo... ko'ksimda bir armonim bor! – dedi sulton va go'yo u bu armon

yuragini ezib yuborayotgandek, jundor ko'kragini asta siladi. – U ham bo'lsa... hazrat Ibn Sino degan hakimi hoziqni bir ko'rmoqdur!.. Durust, mana, yigirma yildirki, bu takabbur hakim bizga xizmat qilishdan bosh tortib, elma-el qochib yurmish! Ammo men ham shu bugunga qadar u bilan ishim yo'q edi. Agar men ul allomayi davronni o'z gulshanimda ko'rishni istaganimda, yetti qavat yerning ostidan bo'lsa ham toptirib keltirar edim! Osmonga chiqsa oyog'idan tortib tushirar edim, yerga kirs qulog'idan tortib chiqarar edim! Endilikda esa... endilikda ko'rmog'im darkor uni! – sultonning ovozi nogahon momaqaldiroqday qaldirab, ulkan tanobiy xonani yangratib yubordi. Shunday bo'lsa ham ariz Abulvafo sultonning ruhida qandaydir majruhlik borligiga, u to'g'rida shaharda yurgan gaplar, allaqanday vasvas dardiga muhtalo bo'lib qolganligi haqidagi mishmishlar haq ekaniga inondi.

G'aznada anchadan beri kezib yurgan bu sovuq mishmishlar sultonning do'stlarini dahshatga solsa, g'animlarini behad shod etmoqda, tarafdorlari Allohdan unga shifo tilasa, dushmanlari tun-u kun unga o'lim tilamoqda edilar. Shu tufayli dorus-saltanat notinch, hammaning qulog'i saroyda, mash'um xabar tilagida edi. Uning o'zi, bir necha yil avval harbiy devondan chetlashtirilgan Abulvafo Sariqning o'zi ham, shaxsiy ko'shkida har kun, har on bu mash'um xabarni kutib yotardi. Shu boisdan ham sultonning so'zini eshitganda xayoliga kelgan birinchi fikr – qochmoq bo'ldi! Duch kelgan tomonga bosh olib qochmoq va bu ishlar bir taraf bo'lmaguncha yashirinib yotmoq bo'ldi. Biroq sul-

tonning oldidan chiqqach, bu fikrining noo'rinligini tushundi, o'zi ham tushundi, pinhoniyl kengashga yig'ilgan xesh-u aqrabolari ham tushuntirishdi. Birlamchi, qo'l cho'zsa, qo'li mashriqdan mag'ribga yetguvchi bu qora quzg'undan qochib qutulmoq amri mahol, ikkilamchi, hamma narsa Allohning irodasiga bog'liq. Alloh taoloning inoyati bilan amir al-mo'minin shifo topsa, uning holi ne bo'ladi? Faqat o'zi emas, barcha zurriyotlari, avlod-u ajdodlarining ahvoli ne kechadi, degan o'y, duch kelgan tomonga bosh olib qochish fikridan qaytardi uni.

Xullas kalom, mana, yaqin uch oydirki, maxfiy elchi Abulvafo Sariq yo'lda, yo'q, yo'lda emas, ikki o't orasida! «O't» so'zi nechundir amir Mas'udni yodiga soldi. Amirning xuddi otasining ko'zlari-day sovuq qiyg'os ko'zlari esiga tushdi, quloqlari ostida uning bo'g'i, tahdidli ovozi yangrab ketganday bo'ldi. Darhaqiqat, o'ngga yursang ajdahoga duch kelasan, so'lga yursang jahannamga!

Abulvafo Sariq bu og'ir o'ylardan charchab boshini yostiqqa qo'ydi, qo'rgan zahoti pinakka ketgan ekan, bir mahal allaqanday shov-shuvni eshitib, ko'zini ochdi.

Kun peshindan oqqan, saroparda tevaragidagi ko'm-ko'k adirlar bahor oftobining iliq seliga g'arq bo'lgan.

Soyning u yuzidagi Teginobod qo'rg'onlari tomondan bir guruh suvorilar ot surib kelar, ularning orqasida sariq ipak parda yopilgan soyabon arava ko'rinar, aravaning ortida yana bir guruh navkarlar ko'zga chalinardi.

Ana, oldindagi guruhdan sallasiga elchi nishoni qadalgan bir kimsa uzilib chiqib, Abulvafo tomon ot surdi.





«Mushrif! Kecha vaziri a'zamdanda maxfiy noma keltirgan cho'tir mushrif!»

Sallasiga elchi nishonini qadab olgan cho'tir mushrif, og'zi qulog'ida, ot surib kelib, egardan sakrab tushdi.

– Janobi ariz! Siz qidirgan hakimi davron... Abu Ali ibn Sino hazratlari topilmish! Hazratim Hirot bozorida jar soldirib, nogiron va notavon bandalarni davolab yurgan ekanlar, mana huzurlariga tashrif buyurdilar!

«Bu ishing uchun befahm kallangdan judo bo'lishingni bilmay tirjayasen, ahmoq!» – dedi Abulvafo ichida, dedi-yu, har tarafdanda yugurishib kelayotgan g'ulomlar, bakovullar, sarbozlarini ko'rib:

– Hakimi davron... Ibn Sino hazratlarining qadamlariga hasanot! – deb xitob qildi. – Yo, qudratingdan o'rgulay, Parvardigori olam! Bugun Xizr alayhissalomni yo'qlasak bo'lur ekan. Niyatimiz xolis ekan, mana, Allohga ming qatla shukurkim, Ibn Sino hazratlarini yetkazdi bizga!

U gapini tugatmagan ham ediki, sariq ipak parda yopilgan soyabon arava yetib kelib, ariz janoblarining ro'parasida to'xtadi.

Sallasiga nishon qistirilgan cho'tir mushrif chopqillab borib, soyabon aravaning pardasini ko'tardi.

– Ariz Abulvafo janobi oliylarining qarorgohiga xush kelibsiz, Abu Ali ibn Sino hazratlari! Qadamlariga hasanot!..

Arava zinasida oldin soqol-mo'ylovi endigina sabza urganda xushqomat bir g'ulom ko'rindi. U saroparda oldida jimgina bosh egib turgan izdi-

homga allaqanday sinovchan nazar bilan tikilib qaradi-da, pardani ochib:

– Marhamat qilg‘aysiz, shayx ur-raais! – deb ta‘zim qildi.

Bir oniy sukutdan keyin parda ichidagi parda ochilib, egniga ko‘k movut to‘n ustidan sutday oq rido kiygan, boshidagi uchli ko‘k taqiya ustidan oppoq simobiy salla o‘ragan «hakimi davron...» Abu Shilqim ibn Shahvoniy ko‘rindi. Bir qo‘lida saxtiyon jildli yostiqlay kitob, bir qo‘lida fil suya-gidan jilo berilgan arg‘uvoniy aso, Abu Shilqim, arava zinasiga oyoq qo‘yib, atrofiga allaqanday viqorli qarash qildi.

Yo‘q, bu Malik ul-sharob kulbasidagi Abu Shilqim ibn Shahvoniy emas, mosh-guruch so-qoli o‘ziga xo‘p yarashgan, butun vajohati – eg-nidagi movut to‘nidan tortib, boshidagi simo-biy sallasigacha, qo‘lidagi yostiqlay kitob va, hatto, arg‘uvoniy asogacha – butun borlig‘ida allaqanday ulug‘vorlik muhri zuhur bo‘lgan bir donishmand, shayx ur-raais, desa degudek, chehrasidan nur yog‘ilib turgan bir... «allomayi zamon» edi! Shundaykim, yig‘ilgan raiyat bir zum esankirab qoldi. Faqat hushyor turgan cho‘tir mushrifgina:

– Taqsiri olam! – deb «allomayi zamon»ga ta‘zim bajo keltirdi. – Ul amir al-mo‘mininning o‘ng qo‘li bo‘lmish ariz janoblarining munavvar saropar-dasiga marhamat qilg‘aysiz! Qadamlariga hasa-not, taqsirim!

Ibn Shahvoniy joyidan jilmadi. U Abulvafo Sa-riqning beso‘naqay bo‘y-basti bilan qo‘pol surma-rang sallasiga ijirg‘anib qarab qo‘ydi-da:

– Tashakkur! – dedi miyig'ida kulimsirab. – Ammo faqirga alohida saroparda darkor! Qani saroparda?

Cho'tir mushrif yalt etib arizga qaradi:

– Ha, shayx ur-ra'is hazratlariga alohida saroparda tikilmog'i darkor! Alohida!

Shu zahotiy oq bir necha g'ulomlar: «Saroparda! Saroparda!» deb qichqirganlaricha uzoqdagi oq o'tovlar tomon yugurib ketishdi.

Cho'tir mushrif yana «hakimi davron»ga qarab ta'zim qildi:

– Taqsiri olam! Siz hazratimga saroparda tikilguncha ariz janoblarining chodiriga marhamat qilg'aysiz!

– Qadamlariga hasanot! – dedi Abulvafo Sariq beso'naqay qaddini ikki bukib.

Ibn Shahvoniy xushsurat shogirdining yelkasi-ga qo'lini qo'yib, aravadan tushdi, viqor bilan yerni bir-bir bosib, qizil ipak chodir tomon ravona bo'ldi.

Hamma, hatto, Abulvafo Sariqning o'zi ham, martabalariga zid bir shoshqaloqlik bilan orqaga tisarilib, unga yo'l berishdi, yolg'iz sallasiga nishon qistirilgan cho'tir mushrifgina «hakimi davron hazratlari»ni chodirga boshlab kirishga jur'at eta oldi.

«Hakimi davron» Teginobod bozorida jar solinib, olomon olqishiga sazovor bo'lgandan keyin nechog'li o'zgarib qolmasin, cho'tir mushrif nechundir, ehtimol, «hazratlari»ni G'aznadan o'zi olib kelgani uchundir, uni uncha nazariga ilmas edi. Garchi, to'satdan dimog'-firog' paydo qilgan «allomayi zamon»ning bema'ni qiliqlarini kechirishga majbur bo'lsa ham, ichida undan kular,

nazarida, «shayx ur-raï» bir necha daqiqadan keyin o'ziga kelib, mo'minlashib qoladigandek tuyulardi. Shuning uchun ham to'rdagi olti qirrali xontaxta atrofiga joylashib, duo o'qilgandan keyin gapni yana cho'tir mushrif boshladi.

U kelgusi ishlarni maslahatlashib olmoqchi edi, biroq endi og'zini ochgan ham ediki, «hakimi hoziq» barmoqlaridagi qo'sha-qo'sha tilla uzuklarini ko'z-ko'z qilib, oppoq nozik qo'lini ko'tardi.

– Safar haqida hali ko'p so'zlashamiz, janobi mushrif! Biz hakimlar aytamizkim, avval taom, ba'daz kalom! Bilib qo'ying – bu naql ko'p purhikmat naqldur!..

«Hakimi davron» shunday deb, quyiyoqda kamtarona bosh egib o'tirgan Abulvafo Sariqqa yuzlandi:

– Faqirni kechirgaysiz, janob ariz, biz hakimlar tanovulga kirishishdan avval dasturxonga tortiladurg'on taomlarni bilmog'imiz darkor...

– Sho'rva, – dedi Abulvafo Sariq, – shurvayi sher nomi bilan dong chiqargan xo'roz sho'rva, hazratim.

– Bu shunday sho'rvaki! – dedi cho'tir mushrif.  
– Ichgan xo'roz bo'lur, ichmagan makiyon!

– Borakallo! Ming makiyondan bir xo'roz a'lodur! – dedi «hakimi zamon». – Zotan, tabobatda xo'roz go'shti ming bir baloga davodur. Yana?

– Kabob! Emchakdan uzilmagan barra qo'zichoqning jigaridan qilingan tandir kabob, hazratim. Archa ko'mirida pishirilgan.

– Balli! Archa ko'mirida pishirilgan bo'lsa, yomon bo'lmas. Xo'sh, endi maydan so'zlang, janobi ariz!

– May!

– Ha, may! – «Hakimi davron» chiroyli qaychilangan mosh-guruch soqolini silab, to'satdan qah-qah otib kuldi. – Yo, ariz janoblari umrida sharob ichmaganlarmi, yo sho'rvayi sherdan boshqa ne'matni iste'mol qilmaganlarmi?

Mushrif ham «hakimi davron»ning kulgusiga qo'shilib qah-qah otib kuldi.

– O, siz janobi arizni bilmaysiz, hazratim! Yoshlikda ariz janoblarining saroyida bo'lgan gulgun o'ttirishlar-u bu o'ttirishlarni bezagan mutriblar, malikul kalomlar! Daryo yanglig' oqqan sharob-u guloblar!..

– Nozaninlar-chi? Yo, xo'roz sho'rvani tanovul qilib makiyonlardan qochganlarmi, ariz janoblari?

– O, siz ariz janoblarining kanizlarini ko'rmagansiz, hazratim! – dedi cho'tir mushrif va bar-kash ko'tarib kirgan bakovullarni ko'rib:

– Boda! Bir xum boda! – deb buyurdi.

Zum o'tmay, o'rtadagi olti qirrali xontaxta yuz xil noz-ne'matlarga to'ldi. Nafis kumush taqsimchalarda po'sti yupqa g'alvirak bodomlar, xurmo va pistalar, qora mayiz va ko'k kishmish, qaymoqqa qorilgan issiq patirlar, somsa va bedana qovurdoqlar, bug'i burqirab turgan sho'rvayi sher, qo'yingki, olamda neki ne'mat mavjud, hammasi muhayyo bo'ldi.

«Hakimi davron» cho'tir mushrif tutgan piyolani bir ko'tarishda bo'shatdi-da, ariz Abulvafoga qarab:

– Ming afsuski, janoblari faqirning kitoblarini mutolaa qilmabsiz! – dedi qo'sha-qo'sha tilla uzuklar bilan bezalgan oppoq qo'lini tizzasidagi yostiqday kitobga qo'yib, – faqir bani bashar g'amida tunlarni bedor o'tkazib, bunday bebaho kitoblar

bitdim. Bani odam esa bu noyob durdonalardan benasib, ya'niki donolar fikridan bexabardur. Agar bahramand bo'lib, bu bebaho durdonalardan boxabar bo'lg'oningizda bilur edingiz: yaxshi sharob ham go'zal nozanin kabi Allohning bebaho ne'matidur! Shunday ne'matkim, bu ne'matni iste'mol qilmoq gunoh emas, bil'aks, uni iste'mol qilmaslik gunohi azimdir! Alxusus, sho'rvayi sherdan keyin. Yo, janoblari bu bebaho ne'matni iste'mol qilish baxtidan mosuvodirlarmi? Mosuvo bo'lsalar davosini qilurmiz!..

«Hakimi zamon» bilan cho'tir mushrif barobar qah-qah otib kulishdi. Abulvafo Sariq esa hamon sigirning ko'zlariday sarg'ish ko'zlarini lo'q qilib o'tirar, aftidan, u «hakimi davron»ning tagdor so'zlarini hanuz yaxshi ilg'ab ololmas edi.

– Bas! – «allomayi zamon» to'satdan shogirdiga yuzlandi. – Biz o'z istaklarimizni qog'ozga bitib bermasak, ariz janoblari tushunmas ekanlar. Qalam-qog'ozingni ol. Oldingmi? Yoz!.. Avvalambor, har laylu nahor tog' ohusi sutidan olingan bir kosa qaymoq muhayyo qilingay!

Abulvafo Sariq ma'sum ko'zlarini javdiratib, cho'tir mushrifga qaradi.

– Tog' ohusi?

– Ohu emas, sut! Ya'niki, ohu sutidan olingan qaymoq! Yo, umrida qaymoq tanovul qilmaganlarmi janobi ariz?

– Qilganmiz, taqsir, qilganmiz, ammo... tog' ohusi?

– Nechun ajablanasiz, janob ariz? Yo, amir al-mo'minning viloyatlarida tog'lar yo'qmi?

– Bor, taqsiri olam!

- Yo, bu tog'larda ohu yo'qmi, janobi ariz?  
Bu safar Abulvafo Sariq o'rniga cho'tir mushrif:
- Ofarin! – deb xitob qildi. – Sizday allomayi zamon uchun ohu suti uyoqda tursin, anqoning urug'i desangiz ham muhayyo qilurmiz, hazratim!..
- Borakallo, inim!.. Balx tutining sharbatil!  
Abulvafo Sariq ko'zlari pирpirab:
- Hirot tutining sharbatil bo'lsa-chi? – deb so'radi. – Ya'niki, Hirotida payvand qilingan Balx tutining sharbatil!
- Yo'q, yo'q! Balx tuprog'ida o'sgan Balx tutining sharbatidan boshqa sharbat iste'mol qilmaymen!..
- Bosh ustiga! – dedi cho'tir mushrif, hayrat to'la ko'zlari chaqnab.
- Peshinga... Bodom yog'ida qovurilgan ohu bolasining go'shtikim, unga kiyik o'ti bilan rayhon talqoni, zira va qoraqat urug'i solinmog'i darkor!.. Yodingizda bo'lsin, bu giyohlardan birortasi bo'lmasa bir chaqirim yiroqdan sezib olamen!..
- Bosh ustiga, hazratim!
- Kechki taom yengil bo'lmog'i darkor! Bir juft bedana kabob bilan boya aytgan xo'roz sho'rvakim, bu sho'rvani nozik bir makiyon bilan, ya'nikim onasi o'pmagan yosh bir malak bilan birga baham ko'rsak nur ustiga nur bo'lur!
- Tasanno hazratim, tasanno! – qichqirdi cho'tir mushrif mastona ishshayib. Abulvafo Sariq esa boshidagi beso'naqay sellasi bir tomonga og'ib, bir nuqtaga tikilib o'tirar, u xuddi piri murshidi oldida dovdirab qolgan muridga o'xshardi.
- Qiziq, boya ertalab, yuziga niqob kiygan bu kimsani tasodifan ko'rganida ko'ngliga yopirilib

kelgan shubhalar endi, «hakimi davron»ning g'aroyib talablaridan keyin tamom tarqab ketdi. «Hakim hazratlari»ning talablari ortib borgan sari, ajabo, ariz janoblarining qalbidagi hurmat-ehtirov ham ortib borar, faqat bitta-yu bitta talabi, ya'niki onasi o'pmagan malak to'g'risidagi talabi uni xiyol dovdiratib qo'ygandi.

– Shayx ur-ra'is hazratlari faqirni afv etsinlar, – dedi ariz qo'rqqa-pisa. – Mavlonoyi zamon aytgan ul jannatiy malak... har kuni yangisi bo'lmog'i darkormi yoxud...

– O, janobi ariz? Koshkiydi, har kuni yangisi bo'lsa!.. Bu ne'matning yangisiga ne yetsin, taqsim? – «Hakimi davron» yana boyagiday qah-qah otib kuldi-yu, to'satdan nimadir esiga tushib, kulgusini tiydi. – Ha, inchunin, kamina eshitgan edim... Buxoro hokimi amir Aliteginning suyuqli kenja xotini Teginobod qal'asida asira deb eshitgan edim!

Ariz ko'zini lo'q qilib, cho'tir mushrifga qaradi.

– Amir Aliteginning suyuqli xotini?

– Ha, ul oftobi olam sulton Mahmud bundan uch-to'rt yil muqaddam, Buxoroyi sharifga yurish qilganida amir Aliteginning suyuqli xotini bilan erka qizini asir qilib olib ketgan emishkim, eshitishimcha, bu go'zal mahbuslar Teginobod qal'asida emish. Ehtimol, ularni toptirib kelursiz?

– Yo'q, yo'q chorasi yo'q buning! – dedi ariz qo'rqib ketib. – Birlamchi, go'zal asiralar Teginobodda emas, boshqa joyda saqlanur! Ikkilamchi, ular amir al-mo'mininning qattiq nazoratidadur!

– Ofarin sizga, janobi ariz! – «Hakimi zamon» uchinchi piyola sharobni sipqarib, chiroyli mo'ylovini siladi. – Go'zal asiralar olampanohning



nazoratida bo'lsa, olampanohning o'zlari, erta-indin, faqirning nazoratiga tushgusidir. Chumchuqday joni kaminaning qo'lida bo'lg'usidir! – dedi «hakimi davron», dedi-yu, to'satdan ko'zlari baqrayib bo'sag'aga qarab qoldi.

Saroparda bo'sag'asida, qo'lida nozi ne'mat to'la kumush barkash, Abulvafo Sariqning yosh g'ulomi turar, uning qizlarning ko'zlariday qop-qora serkiprik ko'zlari hayo bilan yerga tikilgan edi.

– Kel, yulduzim, tortinma, kelaver, oppog'im! Ko'zlaringdan og'ang aylansin! – dedi «allomayi zamon», og'zining tanobi qochib. – Sizlarga ruxsat, janobi ariz va janobi mushrif! Faqir dam olmog'im darkor! Xizmatimga shu chehrayi shamsni qoldirsangiz bas. Sizlarga ruxsat, birodari azizlar!

Abulvafo Sariq najot so'rab mushrifga qaradi.

– Bul yosh g'ulom...

– Daf bo'l ko'zimdan! – Ibn Shahvoniy qo'lidagi piyolani xontaxtadagi kumush barkashga qarab otdi. – Kimsan, «hakimi davron Ibn Sino hazratlari»ga so'z qaytarmoq!.. Ko'zimdan yo'qol, miyasi aynigan tentak!

Abulvafo Sariq boshidagi beso'naqay sallasini to'g'rilab, bir narsa demoqchi bo'ldi, biroq cho'tir mushrif uning qo'lidan «shap» ushlab, tashqariga sudradi.

– Vazmin bo'ling, janobi ariz, vazmin bo'ling!

«Allomayi zamon», ya'niki Abu Shilqim ibn Shahvoniy ularga qayrilib ham qaramadi. U shirakayf ko'zlarini mastona suzib, yosh mahramni yoniga tortardi.

Abulvafo Sariq, xuddi bo'talog'idan ayrilgan katta tuyaday, orqasiga qaray-qaray chodirdan chiqdi.

**O'N YETTINCHI BOB****1**

Beruniyni «Qal'ayi qahr»dan olib chiqqan Abu Nasr Mishkan uni o'z navkarlari bilan to hovlisi-gacha kuzatib qo'ydi. Xayrlasharkan, saroydan shu bugunoq choparlar kelib, uni olib ketishini, sulton bilan uchrashishga hozir-u nozir bo'lib turishini tayinladi.

Eshikni Sabhu ochdi, ochdi-yu, ustodni ko'rib, salomlashish o'ringa turgan joyiga tiz cho'kdi, goh nigohini osmonga tikib, goh yer o'pib, ko'kka tavallo qilishga tutindi. Azaldan qop-qora, ozg'in yigit, u burungidan ham ozib, cho'p bo'lib qolgan, g'am cho'kkan ko'zlari ichiga botib, so'nayotgan shamday miltirab turardi. Beruniy Sabhuni o'rnidan turg'azib hovliga kirdi. Hovliga suv sepilgan, ariq bo'ylariga gul va rayhon nihollari o'tqazilgan, hamma yoq saranjom-sarishta edi. Lekin Beruniyga nimadir yetishmayotganday tuyulib, Sabhuga qaradi.

– Sadafbibi qayda?

– Sadafbibi... bibim! – Sabhu eshik tutqichini qo'yib yuborib yana turgan joyiga tiz cho'kdi-yu, peshonasini yerga gurs-gurs urdi. – Bibidan ayrilib qoldik, ustod. Ayrilib qoldik!

– Qachon?

– O'shal... siz hibsga tushgan kuni tunda... to'rt nafar sarbozlar bostirib kelib, soyabon aravaga tiqib olib ketdilar.

Beruniy devorga suyanganicha uzoq turdi. Bu sovuq xabarni eshitishi bilan negadir esiga lop etib

Piri Bukriy tushdi. Nigohi oldiga qorong'i yerto'la keldi, yerto'laning burchagida ulkan qora kalamushday g'imirlab, yum-yumaloq qutichani topib chiqqani, uning ichidagi bebaho javohirni ko'z-ko'z qilib, Sadafbibini so'rab yalinib-yolvorganlari xayolida jonlandi-yu, a'zoyi badanini sovuq ter bosdi. O'sha! Bukriy! Biroq... bukri bo'lsa, Sabhu aytgan sarbozlar qaydan keldi? Yo'q, tunda bostirib kelish faqat saroy sarbozlarining qo'lidan keladi! Lekin unday desa... nahot sulton, harami to'la kaniz, ishq-shu sho'rlik joriyaga tushgan bo'lsa?

Ehtimol, bu jumboqni Malik ul-sharob yechib berar? Ehtimol, bu sirdan voqifdur u, dedi Beruniy. Biroq Sabhu uning bu umidini ham chilchil sindirdi. Ma'lum bo'lishicha, Beruniy hibsga tushgan kunlari Malik ul-sharob ham zindon qilingan, buning sababini ham hech kim bilmas, birovlar shakkoklik qilib, sultonga qarshi gapirgan desa birovlar uni zindonga tashlagan sulton emas, vazir-u vuzaro deyishardi!..

Sadafbibidan judo bo'lgan faqir xuddi shamsiz hujraday xiralashib, huvillab qolgan edi. Beruniy o'zi ham endi bildi: uning kulbasini to'ldirib, oftobday yashnatib turgan Sadafbibi ekan! Qizning kulgu arimaydigan kulcha yuzi, xorazmcha sal chuchuk tili, birda sho'x, birda mungli, ammo yoqimtoy qo'shiqlari ekan!

Ne qilmoq kerak? Qaydan qidirmoq kerak? Bu ishda Xatlibegimdan boshqa biror kimsadan najot kutish qiyin edi. Shu boisdan Beruniy, garchi bu o'ktam, shaddod xotinga ro'baro' bo'lishdan yuragi bezillasa ham, Abu Nasr Mishkan aytgan choparlarni sabrsizlik bilan kuta boshladi. Biroq

sohibi devon aytgan choparlardan nechundir darak yo'q edi.

Beruniy garchi uydan chiqmasa ham shahardagi tahlika battar kuchayganini, saroyda boshlangan pinhoniyl kurash battar avj olganini payqar, shuning uchun ham birda choparlarning kelmaganidan suyunsa, birda shahardan bosh olib chiqib ketgisi kelar, ammo Sadafbibi bilan Malik ul-sharobning taqdiri uni bu fikrdan qaytarar edi.

Beruniy ularni qutqarish choralarini o'ylab, xayolan ming bir ko'chaga kirib chiqar, biroq hech bir chora topolmay ko'ngli xufton bo'lardi-yu, bu tizginsiz o'ylar girdobidan qutulish umidida goh «Hindiston»ni qayta qo'lga olib, uni yangi sahil-falar bilan to'ldirar, goh «Qal'ayi qahr»da xayoliga kelgan ixtironi nihoyasiga yetkazish umidida rasadxonaga yo'l olardi.

Rasadxona «Gardiz» qal'asidan beriroqdagi «Ko'hsher» cho'qqisining tepasida bo'lib, uni bundan o'n ikki yil muqaddam. Hindiston safaridan avval Beruniy o'zi bosh bo'lib qurdirgan edi. Ikki oshyonali muazzam binoning yuqori qavatida sayyoralar harakatini kuzatuvchi murakkab olatlar joylashgan, xona devorlariga tavqim va jadvallar osilgan. Birinchi qavatda esa ilmiy anjuman va mushoiralar uchun maxsus xonalar, sultonga atalgan doston va qasidalarni ko'p nusxalarda ko'chi-ruvchi husnixat xattotlar uchun qurilgan shinam hujralar bor. Ilgari, rasadxona qurilgan dastlabki yillarda, sulton bu yerga ko'p kelar, kechalari u murakkab olatlar yonida o'tirib, munajjimlar bilan sirli suhbatlar qurishni, ayniqsa, nazm bo'stonlarining bog'bonlari bitgan doston va qasidalarni



eshitishni yaxshi ko'rardi. Keyin xushxat xattotlar sultonga yoqqan eng dabdabali qasidalarni yuzlarcha nusxalarda ko'chirib, qo'l ostidagi barcha hokimlarga, elchilar orqali esa xorijiy ellarga sovg'a qilib jo'natardi. Lekin keyingi yillarda, sulton dunyoviy ishlardan sal o'zini tiyib, taqvoga yuz tutgandan buyon, ayniqsa, kasalga chalinib, dabdaba-yu as'asalardan ko'ngli sovigandan beri rasadxonadan fayz ketgan, ko'p allomalar ham qadamlarini tiygan, faqat kekxa munajjim mavlono Abu Tolib Farruxiy bilan shoir Ziynatdiy, yoshlardan esa salohiyatli tarixchi va noyob xushxat sohibi Abu Fazl Bayhakiy-gina hamon kelib-ketib turishardi.

Beruniy ilgari ham ko'p vaqtini rasadxonada o'tkazar, uning tinch, osuda xonalarida o'tirib, mutolaa va mushohada bilan shug'ullanar, bu ishlardan charchagan chog'larida esa o'z hamkasb birodarlari bilan ilmi nujum, handasa va falsafa haqida suhbat qurishni yaxshi ko'rardi. Mana endi ham aziz do'sti Malik ul-sharob bilan Sadafbibidan ayrilib, o'zini qo'yadigan joy topolmay qolgan bu og'ir kunlarda ham rasadxona uning joniga ora kirdi. U rasadxona ustaxonasiga maxsus dastgoh o'rnatib, «Qal'ayi qahr»da xayolan ixtiro qilgan g'aroyib olatni yasashga kirishdi.

Obdasta shaklida yasaladigan bu olat va uning tuzilishi Beruniyning kallasida obdan pishgan edi, biroq shunday bo'lsa ham, bu ixtiro uni ko'p qiynadi. Ayniqsa, obdasta jo'mragi tagiga o'rnatiladigan tarozuni yasash mushkul bo'ldi, chunki bu taroz-u haqiqatan ham nihoyatda «sezgir», ya'ni bir misqolning yuzdan birini ham aniqlay olishi lozim edi. Shundaykim, suv to'la obdastaga

solingan ma'dan o'z hajmi barobar suv tomchilarini siqib chiqarganida «nozik» taroz-u ma'dan og'irlig'ini, to'g'rirog'i, ma'dan og'irligining siqib chiqarilgan suv og'irlig'iga nisbatini aniqlamog'i lozim. Bu nisbat, o'z navbatida, oltin og'irlig'iga nisbatan solishtiriladi va shu yo'sin tabiatda neki ma'dan bo'lsa, hammasining solishtirma og'irlig'ini aniqlash niyati yaraladi!..

Beruniy avval bu «nozik» tarozuni topish umidida rastama-rasta yurib, hamma tanish zargarlarni aylanib chiqdi, Piri Bukriydan boshqa hamma attorlarning tarozularini ko'zdan kechirdi, biroq o'zi istagan «sezgir» tarozuni hech kimdan topolmadi. Hatto, xazinadorlarning oltin tarozulari ham u tilagan darajada «nozik» emas edi!.. Ammo Beruniyni ko'p qiynagan bu muammoning yaxshi tomoni ham bor – u fikrni chalg'itib, ko'nglida zil bo'lib yotgan og'ir o'ylarni xiyol tarqatar edi. Shu boisdan Beruniy bir necha kun kecha-yu kunduz rasadxonadan chiqmadi. Bugun bir lahza orom olish umidida shahar hovlisiga kelgan edi, g'am-anduhda yurgan Sabhuni ko'rib tag'in ko'ngli g'ash bo'ldi-da, yana tong otguncha ish bilan o'zini chalg'itdi. Tong payti o'tirgan joyida ko'zi ilingan ekan, Sabhu kirib uyg'otdi.

## 2

Tashqarida to'rt nafar navkar ot o'ynatib turar, ular orasida boshiga ko'k salla o'rab, ustiga ko'k movut to'n kiygan sohibi devon ko'rinardi.

Tong yaqin, tevarak-atrofdan xo'rozlar qichqirar, itlar hurar, goho-goho eshaklar hangrar, lekin osmon hanuz yulduzga to'la, zodagonlar dahasi-

ning har joy-har joyiga o'rnatilgan toshfonuslar hanuz o'chirilmagan edi.

Afshon soy yoqasidan tasir-tusur ot surib ketayotgan suvorilar Bog'i Mahmud qo'rg'oniga yetgach, xuddi bir narsani yo'qotganday, bir on tapir-tupur qilib turishdi-da, chap qo'ldagi Ko'shki davlat saroyiga emas, o'ng qo'lga, shahar tashqarisiga qarab burilishdi. Sal o'tmay soyning u yuzidagi uylar, rastalar, do'konlar masjid va karvonsaroylar orqada qolib, oldinda bir-biriga tutashib ketgan yassi qirlar ko'rindi, qirlar ortida «Mozori kalon» qabristoni masjidining tillakori gumbazi yarqirab ketdi.

Beruniy hayron bo'lib, yonida ot choptirib borayotgan sohibi devonga qaradi. Devon boshlig'i ko'zini yumib, ma'yus bosh chayqadi: «Sabr qiling, mavlono!»

Zum o'tmay, qabriston qo'rg'oni ham o'ngda qolib, oldinda qalin archazor qirlar ko'rindi. Dimoqqa yosh archa va yovvoyi giyohlarning nozik bo'yi gup-gup urdi, so'ng qirlar orasida keng sayhonlik namoyon bo'ldi. Yosh archalar bilan qurshalgan bu sayhonlik o'rtasiga, xuddi mo'jaz tilla qasrni eslatuvchi sap-sariq ipak saroparda tikilgan edi. Saropardadan yiroqroqda na bir chodir ko'rinar, na chodir atrofida g'imirlab yurgan allaqanday soyalar ko'zga chalinardi. Archazor suv quygandek jimjit, ovloqdagi qabriston kabi mungli sukutda edi...

Sohibi devon, navkarlar yordamida otdan tushib, uvishib qolgan oyoqlarini uqalarkan:

– Mavlono, – dedi allaqanday yolvorib. – Olampanohning ahvoli og'ir. Ne istak bildirsa yo'q demaysiz, azizim!

Shu payt qarshidagi ipak saropardadan to'pig'igacha qora libosga o'ranib, yuzini qora durra bilan to'sib olgan novcha bir ayol chiqib, yuzidagi durrasini sal ko'tardi.

– Assalomu alaykum, mavlono!

«Xatlibegim?»

Xatlibegim, qora durrasini qayta yuziga tortib, sohibi devonga yuzlandi:

– Kechagi so'zim yodingizdadur? Bu suhbat pinhona qolmog'i lozim! Fursat ziq, tez kiring, taqsirim! Men sizlarni Osmon malikasi saroyida – o'z xosxonamda kutamen!..

Xatlibegim shunday dedi-da, oyoq ostidagi mayin giyohlarni ship-ship bosib, archazor orasiga kirib ketdi.

Beruniy beixtiyor yuragi uvishib, sohibi devon orqasidan saropardaga kirdi. Bitta-yu bitta sham yoqilgan yuz kishilik ulkan saroparda bo'm-bo'sh va nimqorong'i edi. Saropardaning chap tomonida, baland qilib to'shalgan oq kigizlar ustida... boshiga qora telpak, egniga uzun qora jun chakmon kiygan bir odam... (Yo, Rab! – bu odam sulton Mahmud G'aznaviy edi) uzala tushib yotardi!

Saropardada odatdagi zeb-ziynatlardan asar ham yo'q, sultonning kiyim-boshidan tortib, yerga to'shalgan kigiz, mustahab uchun qo'yilgan jom va qumg'onlar, hammasi eski va allaqanday g'arib edi...

Sulton saropardaga kimdir kirganni sezib, o'rnidan qo'zg'almoqchi bo'ldi, biroq Abu Nasr Mishkan janoblari chaqqonlik bilan pildirab borib, boshi ostidagi yostiqlarni ko'tarib qo'ydi. Sulton o'ymoq tagidagi simobday miltiragan ko'zlari bilan Beruniy-



ga bir on sinovchan tikildi, so'ng: «Yaqinroq kel!» deb imo qildi-da, ko'zini yumdi.

– Mavlono Abu Rayhon! Ne chora, hamma-miz ham ojiz bandamiz. Chumchuqday jonimiz yaratganning hukmidadur. Va lekin... Xudovandi karim ko'nglinga bir armon solmish, ul ham bo'lsa... Ibn Sino hazratlarini bir ko'rmoqdur! – sulton siyrak kipriklari orasidan sizib chiqqan ko'z yoshini «qult» etib yutindi-da:

– Alloh shohid! – deb xitob qildi. – Alloh shohid, bu armonni ko'nglinga yaratguvchim o'zi solmish! Bas, sizni chaqirmoqdan murodim shulkim, bu so'nggi armonim o'zim bilan birga go'rimga ketmagay!

Sohibi devon shosha-pisha cho'ntagidan dast-ro'molini olib ko'ziga bosdi.

– Davlatpanoh! Inshoollo, niyatingiz mustajob bo'lur. Ariz Abulvafo Sariqdan xabar keldi: Ibn Sino hazratlarini olib, bir hafta burun Teginobod-dan chiqqan emish. Mana, mavlono Abu Rayhon ham bugun yo'lga chiqur, ul zoti sharifim qarshi olib, tezda G'aznaga yetkazadur.

«Yo, tavba! Nahot, bu so'zlar rost bo'lsa? Nahot, Abu Ali, yigirma yildan buyon sulton Mahmudga xizmat qilishdan bosh tortib, musofir yurtlarda darbadar kezib yurgan Abu Ali endi G'azna to-mon yo'l olgan bo'lsa? Nahot, Abu Rayhon u bilan diydor ko'rishmoq baxtiga muyassar bo'lsa?»

Sulton Beruniyning yuzida aks etgan hayajon-ni boshqacha tushundi, chog'i:

– Faqirni afv eting, mavlono, – dedi chuqur xo'rsinib. – Tunov kuni jahl ustida sizga qattiq ozor berdim. Ne chora – saltanat yumushlari

shunday ekankim, taxt sohibi birda o'z fuqarosining boshini silasa, birda qattiqqo'l bo'lmoqdan boshqa chora yo'q ekan!

Beruniyning dilida bir zum «yarq» etib yongan sham qayga so'ndi. Uning qalbida qat-qat bo'lib yotgan tug'yonlar, uyqusiz tunlarda sultonga aytishni armon qilgan eng shafqatsiz so'zlar lop etib qayta esiga tushdi. Yoshlik chog'larida, adolatsiz ishlardan yuragi lovillab yongan paytlarida Beruniy bu so'zlarni sulton bilan yuzma-yuz turib gaplashishni orzu qilar, ustodi Abdusamad Avval kabi dor tagida turib bo'lsa ham, ko'nglidagi dardlarini tap tortmay aytish umidida yurardi. Mana, o'sha damlar keldi, yuragida yig'ilgan hamma dard-u sitamlari, hamma alam, hamma isyonlarini to'ksa arziydigan qasosli onlar keldi. Va lekin... boshiga oltin toj o'rniga eski qalpoq, egniga zarrin libos o'rniga qora chakmon kiyib, eski kigiz ustida uzala tushib yotgan bu g'arib sulton!.. Uning quduq tagidagi bir tomchi simobday miltiragan mungli ko'zlari!..

– Subhonollo! So'zinga inoning, allomayi davron! Osiy banda qilgan gunohlarimni bilamen. Shu sababdan, mana, go'ristonga keldim. Niyatim – valilar qabrini tavof aylab, ularning ruhini shod etmoqdur! Qaysiki bandayi mo'minning ko'ngliga ozor bergan bo'lsam yoxud nohaq zulm qilgan bo'lsam, ahdim – barchaning ko'nglini ovlamoq, mulkiga xiyonat qilgan bo'lsam, o'n barobar ko'proq qilib qaytarib bermoqdur. Zero, faqirdan jabr ko'rgan har bir bandayi mo'min kaminaning gunohidan o'tib, uni afv etgay!.. Mana, sohibi devon shohid! Uch kun muqaddam shahri Tusga

yana bir tuya oltin, bir tuya kumush yo'ladim. Murodim – ul malikul kalom. Abulqosim Firdavsiy hazratlarining maqbarasiga marmar sag'ana o'rnatib, tavallud topgan shahrida yana bir masjid jome qurdirmoqdur!..

«Yo, Parvardigor! Bu insof, bu afsus-nadomatlarini bu g'ofil bandangning ko'ngliga o'ttiz-qirq yil muqaddam solsang bo'lmasmidi? El boshiga mislsiz ofat keltirgan jang-u jadallar, ilm ahliga qilgan xo'rlik va tahqirlardan avval insofga keltirsang bo'lmasmidi? Nechun faqat umrining so'ngida, ko'ziga Azroil alayhissalom ko'ringanda insof-u adolatga keltirding, bu qahri qattiq bandangni?»

Sulton Beruniydan javob kutib, bir daqiqa sukut saqladi, so'ng yana o'sha mahzun ovozda davom etdi:

– Sizga yolg'on, Allohga rost, mavlono! Mana, o'n yildir kim, men ul nazm sultoni Abulqosim Firdavsiyni ranjitganimdan pushaymonmen! Nechun o'shanda ul malikul kalomni o'z qanotimga olmadim, nechun ichiqora vazirlar so'ziga kirib, uni G'aznadan haydadim? Nechun yozgan kitobini olib, boshidan oltin-u javohir sochmadim?

Sultonning ovozi to'satdan tizginsiz bir o'kinch bilan yangrab ketdi-yu, Abu Nasr Mishkan quyilib kelgan ko'z yoshlarini qult-qult yutib:

– Oftobi olam! – deb zorlandi. – Bu ishda pushaymon chekmang! Agar Abulqosim Firdavsiy, – Alloh unga ravzayi rizvondan joy ato qilgay! – o'sha daqiqada takabburlik qilmay, sizday amir al-mo'mininga izhori ixlos etganida, agar nazm ahli baxillik qilib, sizday olampanohni chalg'it-maganida... siz bu ishni qilmas edingiz!..

– Tashakkur, azizim!

Beruniy indamay boshini xam qildi. Shu zahotiy oq Afshon shol dahasidagi eski hammom ko'z oldiga keldi. Hammom to'la kafangado shoir-lar, mutriblar, miskin-u majruhlar o'rtasida, bir qo'lida kosa to'la kumush tanga, bir qo'lida may, bo'y-basti kelishgan, sersoqol, serjahl bir mo'ysafid turar, u ust-ustiga qadah ko'tarib, kosadagi kumush tangalarni hovuchlab osmonga otar, biroq yerga daranglab sochilgan tangalarga hech kim qaramas, hamma uning ulug'vor vajohati va isyonkor so'zlariga mahliyo bo'lib qolgan edi:

– Nazm sul-toni atalmish kamina ham «Shohnoma»ni yozguncha senlar kabi gado edim! Bugun «Shohnoma»ni yozib tugatganimda ham o'shandayin gadomen!.. Mana, «Shohnoma»ning pulini olinglar! Yarmini senlarga, yarmini sul-ton G'aznaviyning o'ziga in'om etamen. Toki, ul sohibqiron hindlar yurtiga yurish qilib, g'aznasi bo'shab, kambag'al bo'lib qolmishlar!

Sersoqol, serjahl shoir shunday deb, yana bir siqim tangani osmonga otadi, yerga tushgan kumush tangalar allaqanday sho'x jaranglab, har tomonga yumalab ketadi. Bu sho'x darang-durungni miskin-u majruhlarning xurram qiyqirig'i bosib ketadi:

– Ofarin, ustod!

– Yo'q, siz gado emas, gadolar pirisiz! Ustod!

– Piri emas, shohi de, tentak, gadolar shohi!

Bu voqeani eslashi bilan Beruniyning yodiga negadir Malik ul-sharob tushdi-yu, endi og'zini ochmoqchi bo'lgan edi, amir al-mo'minin uning so'zini bo'ldi:

– Ibn Sino hazratlariga yetkazgaysiz, mavlono! Ul zoti sharif G'aznayi munavvarada eng yuksak ikrom topg'usidir. Saroyga tashrif buyurgan kuni vazni barobar oltin in'om etamen. Tabarruk boshidan jom-jom dur va javohir sochamen! G'aznaning eng bahavo joyidan marmar qasr qurib, haramimdan istagan kanizini sovg'a qilamen!..

«Ajab dunyo ekan bu dunyo! Kuni kecha butun ro'yi zaminni zir titratgan, arkoni harb va arkoni davlat oldida ilm ahlini sariq chaqaga olmagan bu mustabid shoh bugun Ibn Sinoning oyog'iga yiqilmoqqa rozi! Haqiqatan... al-qassos-u minal-haq! Haqiqatan qasosli dunyo ekan bu dunyo!»

– Ko'nglingiz to'q bo'lsin, mavlono! Ibn Sino hazratlari qanday martabaga erishsa, siz ham shunday martabalarga erishursiz!..

Beruniy Malik ul-sharob to'g'risida gapirish mavridi kelganini sezib, ta'zim qildi:

– Bu yaxshiligingizni toabad unutmaymen, davlatpanoh! Ammo... bir qoshiq qonimdan kechsangiz... sizga bir iltimosim bor!

– So'zlang, mavlono!

– Iltimosim shulki... davlatingiz soyasida Malik ul-sharob degan bir g'arib shoir bor.

– G'arib emas... shakkok mayparast ul! Xo'sh?

– Kaminani kechirgaysiz, davlatpanoh! Ammo... bilmam nechun, keksalik manziliga qadam qo'ygan bu nogiron shoirni kimlardir zindonga tashlabdur. Uning keksaligi hurmati...

Sulton yotgan joyida betoqat qimirlab, qoqsuyak qo'lini ko'tardi.

– Boshqa paytda arzingiz inobatga o'tmas edi, mavlono! Zerokim, ul betavfiq mayparast... Xo'p!

Mavlononing arzi yerda qolmasin. Farmon yoz, Abu Nasr!

Beruniy ikki qo'lini ko'ksiga qo'yganicha orqasi bilan yurib, saropardadan chiqdi, chiqarkan: «Sadafni ham so'rab-surishtirsam bo'lar edi», degan fikr ko'nglidan o'tdi, biroq bu fikridan darhol qaytdi.

«Yo'q, bu dunyo ustunlaridan bir mahalda ikki narsani iltimos qilib bo'lmas. Yaxshisi, bu iltimos bilan Xatlibegimga murojaat qilmoq joiz!»

### **O'N SAKKIZINCHI BOB**

Beruniy bilan sohibi devon saropardani tark etgandan keyin sulton a'zoyi badani allaqanday bo'shashib, uzoq yotdi.

Kecha kunbotish oldida «Mozori kalon» qabristoni yaqinidagi bu qirlarga kelib qo'nganidan keyin biqinidagi sanchiq xiyol pasayib, tinimsiz qaqshab og'rikan jismi sal orom olgan, bu orom qalbida umid shamini yoqqan edi. Bu sham hamon miltirab turardi...

Ana, qabriston tomondan azon ovozi eshitildi. Mo'minlarni bomdod namoziga chaqirgan bu mungli ovoz tog'larda aks sado berib, shunday tiniq yangradiki, sultonning a'zoyi badani jimirlab, ko'zidan yosh chiqib ketdi. Nazarida, bu ovoz qabriston masjididan emas, yo'q, g'oyibdan kelayotgan ilohiy ovoz bo'lib tuyuladi-yu, nechundir marhum padari buzrukvorining bir gapi esga tushib ketdi.

U mahalda sulton hali yosh edi. Padari buzrukvori amir Sabuqtegin, – Alloh uning oxiratini

bezavol, iymonini basalomat qilg'ay! – Nishopurga yurish boshlagan chog'lar edi.

Xuddi hozirgiday iliq bahor kunlari edi. Nishopur yo'lidagi adirlar, qirlar, ko'z ilg'amas sayhonliklar yam-yashil giyohlar bilan qoplangan, qir va dashtlarni to'ldirgan hisobsiz lashkar ham qandaydir ko'tarinki ruhda edi. Har kuni namozi asr payti qo'shin bir joyga borib qo'nar, shunda ulkan qarorgoh chumoli uyasiday g'imirlab qolar, kechasi dashtda behisob gulxanlar yonar, qo'ylar, otlar, ho'kizlar so'yilar, doshqozonlar osilib, marhum qiblagohi uchun qurilgan yuz kishilik saropardaga barcha amirlar, lashkarboshilar, vazir-u vuzaro to'planar, ularga eng nozik taomlar tortilar, eng mashhur mutriblar, xonanda va sozandalar yig'ilib, tongotar bazmlar bo'lardi...

Bir kuni, esida bor, Nishopur yaqinidagi Hoki-sor degan joyga yetib borishdi. Yo'lning ikki tomoni baland adir edi. Bu adirlarga yetganda amir Sabuqtegin to'satdan boshqalardan o'zib ketdi-da, bir qirdan ikkinchi qirga ot surib, uzoq aylanib yurdi. Hamma hayron, lashkarboshilar unga yaqinlashishni ham, orqada qolishni ham bilishmas, amir esa lom-mim demay hamon ot surar, har qirga chiqqanida atrof-tevarakka uzoq tikilib qolar, so'ng yana lom-mim demay, oldinda ko'ringan boshqa bir qirga ot surib ketardi.

Nihoyat, navbatdagi qirga chiqqanida qidirgan narsasini topdi chog'i, otdan sakrab tushdi-da, tiz cho'kib qayta-qayta yer o'pdi. Ketma-ket ot choptirib borgan yosh Mahmud otasining qo'lida katta bir temir qoziqni ko'rdi. Padari buzrukvori, ko'zida yosh, bu qoziqni qayta-qayta o'par, so'ng

qiblaga yuzlanib bot-bot sajda qilardi. Hamma hayron, padari buzrukvori esa namoz o'qishda davom etar, bir rakaatdan keyin ikkinchi rakaatga kirishar edi. Nihoyat, u yuziga fotiha tortib, o'rnidan turdi-da, qoziq topilgan tepalikka saroparda tikishni, qo'ylar so'yilib, butun lashkarga ziyofat berishni amr qildi.

O'sha kuni xufton namozidan keyin padari buzrukvori saropardaga hamma lashkarboshilarni yig'ib, Buxoro bozorida qul bo'lib sotilganidan keyin boshiga tushgan musibatlarini so'zlab berdi. Uni sotib olib, Nishopurga haydagan quljallob shunday xasis ekanki, ostidagi oti yo'lda yiqilib qolganida o'lgan otning egar-jabduqlarini ham uning yelkasiga ortib, bu bepoyon cho'li biyobondan yayov haydabdi...

– Yelkamda egar-jabduq, – degan edi o'shanda padari buzrukvori. – Yalang oyoq tikan bosib, salkam bir hafta yayov yurdim. Shundaykim, bu cho'li biyobonda ko'rgan azob-uqubatlarim, chekkan zahmatlarimni Xudovandi karim hech bir bandasining boshiga solmag'ay... Oxir pirovardida, jonim halqumimga kelib, yurishga madorim qolmay ado bo'lganimda mana shu tepaga, hozir saroparda tikilib, sizlar o'tirgan joyga kelib qo'ndik. Faqir yolg'iz soyam qolgan edi. Bir qultum suv ichishga majolim yo'q, shu yerga kelib quladim-u tilim-tilim bo'lib ketgan oyoqlarimni uqalab, tong otguncha nola chekdim. Yozug'i ne ojiz bandangning, deb ko'kka tavallo qildim. Oxiri charchoq yengib, ko'zim ilingan ekan, tush ko'rdim... Tushimda... qo'lida aso, boshida salla, oppoq bir qariya tepamga kelib:



– Hey, bandayi g'ofil! – deb xitob qildi. – Nechun Parvardigori olamga bunchalar oh-u faryod qilasan? Nechun bunchalar g'ussa chekasan?

– O, valine'mat, buzrukvor! Faqir yig'lamay kim yig'lasun? Mening boshimga tushgan bu ko'rgulik hech bir mo'minning boshiga tushmasin!

– Inshalloho maassobirin! – dedi oppoq chol. – Alloh sabr qilguchilar bilan birgadur. Sabr qil, bo'tam. Faqir-u haqir Xizr alayhissalom bo'lamen. Sabr qilsang... boshingga tushgan bu musibatlardan yaqin kunlarda forig' bo'lafen, toleying baland, istiqboling yorug' bo'lg'usidir. Ulug' martaba va toj-u taxt kutadur seni! Shukrona bildirib, sabr qil, bo'tam!..

– Uyg'onib ketsam... ko'rganlarim tush ekan, – degan edi o'shanda padari buzrukvori ko'ziga yosh olib. – Tong yaqin bo'lsa-da, karvon ahli uyquda edi. Darhol o'rnimdan turdim, tahorat qilib namozga kirishdim. Karvon ahli g'afolat uyqusidan uyg'onguncha kamina ellik rakaat namoz o'qidim. Har rakaatdan keyin a'zoyi badanimdagi og'riq tarqab oxir-pirovardida jismimda shunday bir quvvat sezdimki, qolgan yo'lni otday yelib-yugurib bosdim. Nishopurga ikki kun deganda kirib bordik. Nishopur bozorida taqdir kaminani somoniyalar sipohsolori Alpteginga ro'baro' qildi. Amir Alptegin, – Alloh ruhlarini masrur qilgay! – salohiyatli lashkarboshi, mard va tanti odam edi. Ul zoti sharifning faqirga mehri tushib, o'ziga nading qilib oldi. Faqir ham unga halol xizmat qildim, jang-u jadallarda ot surib, bergan tuzini oqladim. Shu-shu, birlamchi, Alloh taoloning inoyati, ikkilamchi, Xizr alayhissalomning duoyi saodati mustajob bo'lib, mana, sohibi toj bo'ldim!..

Sulton padari buzrukvorining bu hikoyasini es-larkan, kecha ham, bugun ham, negadir Xizr alay-hissalom uning ham tushiga kiradiganday, unga ham shifo tilab, oq fotiha qiladiganday tuyulardi.

Sulton ko'zini yumib, ko'kka tavallo qilib yotar-kan, bir necha bor burchakda, saropadaning sham shu'lasini yetmagan g'ira-shira joyida, op-poq bir chol unga tikilib turganday, go'yo uning muloyim afsungar ovozi qulog'iga chalinganday bo'ldi. Biroq har safar ko'zini kattaroq ochib, o'sha tomonga tikilib qarashi bilan nuroniy qariya qay-gadir gumdon bo'lardi. Mana, hozir ham shunday bo'ldi. Nazarida, chodirning pardasi ko'tarilib... qo'lida aso... boshida oppoq dastor, nuroniy bir qariya, yo'q, qariya emas, chehrasidan ajib nur yog'ilib turgan Xizr alayhissalomning o'zi kirib keldi. Xizr alayhissalom poygakda to'xtab, unga bir nimalar deb shivirladi. Yo, Rab! Na-hot, tushida ayon bo'lgan narsalar tag'in behu-da ro'yoga aylansa? Nahot, ko'zini ochishi bilan bu mehriboni beshafqat qariya yana qaygadir gumdon bo'lsa?.. Yo'q, sulton ko'zini ochmaydi. So'zlang, valine'mat! Qo'l oching, bandayi o'zini o'z himoyatingizga olib, bir duoyi saodat qiling, piri murshid! Faqir esa tun-u kun istig'for aylab, qolgan umrimni toat-ibodat bilan o'tkazgaymen!

Shu payt qulog'iga:

– Olampanoh! – deb asta shivirlagan ovoz eshitildi. Ovoz sulton tasavvuridagi hazrat Xizr ovoziday muloyim va sehrli emas, sal xirildoq va o'ktam edi. Lekin sulton ko'zini ochmay: «Yo, jab-bor! Yo, xalloq! – deb shivirladi. – O'zingga ming

qatla shukurkim, osiy bandangning so'nggi tilagini vojib qilding!»

– Davlatpanoh? – bu safar ovoz aniqroq eshitildi. – Ko'zingizni oching. Tong otdi. Barcha ahli mo'min Mozori kalon qabristonida hozir-u nozir. Bomdod namozi qazo bo'lmasin!

Endi batamom ayon bo'ldi – gapirayotgan Xizr alayhissalom emas, piri murshid imom Sayid edi! Ammo sulton birdan ko'ngli suv ichganday yorishib:

– Pirim, – deb xitob qildi. – Siz hozir faqirga hazrat Xizr alayhissalom timsolida ayon bo'ldingiz. Peshonamni silab, duoyi saodat tiladingiz! Piri murshid duosi – muhri Xudodir! Xudo xohlasa, endi shifo topg'usimen, pirim, shifo topg'usimen!

Imom Sayid ko'zlarini ko'kka tikdi, kahrabo tasbeh ushlagan oppoq qo'llarini ochib:

– Ilohi omin! – deb yuziga fotiha tortdi. – Inshoollo, har laylu nahor takbir tushirib, mashoyixlardan siz amir al-mo'mininga kushoyish tilab, duo qilib turibmizkim, bu duoyi xayrimiz mustajob bo'lg'ay! Dard – mehmon, shifosini bersa ajab emas. Ilohi balong yukini tortmoqqa, quvvat va muhabbating mehnatini tortmoqqa sabr bergaysen. Qani, bismillohir rahmonir rahim!

Sultonning chuqur botgan ko'zlari zimiston kulbadagi shamday yarqirab ketdi-yu, qurigan terakday qovjiragan tanasida allaqanday notabiiy bir kuch sezib, sekin o'rnidan turdi.

Tashqarida, archazorga tikilgan saropardaning bir yonida hammasi birday safrorang jubba kiygan ulamoyi zabardastlar qo'l qovushtirib turar, bir yonida esa arkoni harb va arkoni davlat, vazir-u vuzaro va a'yon-u boyonlar saf tortgan edi.

Oftob hali chiqmagan, yiroqdagi qorli tog'lar usti endi oqara boshlagan, biroq tevarak-atrof yashnab-yasharib ketgan. Oyoq ostidagi bo'liq maysalar orasida chigirtkalar chirillar, Afshon soy tomonda qurbaqalar qurillar, dimoqqa archa, na'matakgul, yavshan, bo'ztikan va yovvoyi piyoz gup-gup urardi...

Sulton birdan quyilib kelgan qandaydir ichki bir tuyg'uga bo'ysunib, orqasiga, Afshon soy ortidagi shaharga o'girilib qaradi.

Suyukli shahri! Padari buzrukvori amir Sabuqtegin asos solgan, lekin uning, sulton sohibqironning peshona teri, mehr-u muhabbati, zar va zo'ri bilan kamol topgan... suyukli shahri G'aznayi munavvara!

Shahar tutash bog'lar orasidan yaxshi ko'rinmas, faqat Bog'i Firuz ortidagi Osmon malikasi qasrining oq marmar peshtoqlari bilan Ko'shki davlat saroyining lojuvard gumbazi elas-elas ko'zga chalinardi.

Osmon malikasi!

Sulton, negadir, G'aznada qurdirgan barcha saroy, ko'shk va qasrlari, behisob masjidlari orasida ulkan oq qushga o'xshagan mana shu marmar saroyini yaxshi ko'radi. Bog'i Firuz bilan ma'sum kelinchakni eslatuvchi mana shu oq qasr dilining hushi, ko'nglining oromi! Bog'i Firuzdagi osuda yo'lkalar, qishin-yozin kumush favvoralar suviga cho'milgan musaffo gulzorlar, chiniy, koshinlar bilan bezatilgan tiniq hovuzlar va hovuzlarda suzib yurguvchi oqqushlar, kamalak rangli tovuqlar, xurmo va ananas yanglig' nodir daraxtlar o'sguvchi ko'rkam xiyobonlar!

«E, Yaratgan Egam! Nahot, bu go'zallikni, bu qasri muazzamlar, bu jannatmonand bog'larni barpo qilib, endi rohat-u farog'atda yashayman deganida hammasidan mosuvo qilsang? Nahot uning, amir al-mo'minin atalmish sulton Mahmud G'aznaviyning taqdirini go'ristonda tentirab yurgan anov gadolar va yo'qsillar taqdiri bilan barobar qilsang? Boradigan joyi ham o'sha gadolar boradigan besh gaz sovuq go'r bo'lsa? Unda nechun Qur'oni karimda: «As salotin zulalohi fil azr», ya'niki «sultonlar yerdagi soyamdur», deding? Nechun ularni bandalaring ustidan baland ko'tarding, e, sarvari koinot?»

Sultonning xayolini Ali G'aribning:

– Taxtiravonni keltiring! – degan o'ktam ovozi bo'ldi. Unga Abul Hasanakning allaqanday quvnoq, xurram tovushi qo'shildi:

– Shoshmang, hazratim, men, men o'zim...

«Gur» etib yopirilib kelgan katta olomon taxtiravonni dast ko'tarib oldi-da, talashib-tortishib qabriston tomon yo'naldi.

Raiyatning boshida imom Sayid borardi. Eg-nida keng safrorang jubba, boshida surmarang salla, imom Sayid, qo'lidagi asoni yerga duk-duk qadab, to'yan g'ozday asta-asta qadam tashlar, uning yurishida, oppoq qoshlari tagiga yashirgan katta-katta sarg'ish ko'zlarining mamnun porlashida, ko'ksiga tushgan chiroyli soqolining kumushrang jilosida ichki bir viqor va mamnuniyat barq urib turardi. Ha, u endi o'zidan mamnun bo'lsa arziydi. Axir kimsan, butkul ro'yi zaminni zir titratgan sulton sohibqironni o'z iqtidoriga bo'ysundirib, yot desa yotadurg'on, tur

desa turadurg'on qildi! Rost, sulton hech qachon imom Sayidga qarshi borgan emas. Poyqadami yetgan yurt borki, hamma joyda uning istagi bilan yangi masjidlar qurdirib, barcha peshvoyi din va ulamoyi zabardastlarga homiylik qilgan, yuksak rutbalar bilan ko'ngillarini xushnud etgan. Va lekin hech qachon bunchalik tobe, bunchalik mute ham bo'lgan emas! Garchi, imomning pand-u nasihatlarini tardid<sup>1</sup> etmasa ham, pinhona o'z bilganini qilgan, bil'aks, anov allomayi mutakabbir Abu Ali ibn Sinoga zimdan elchi yuborib, kecha-yu kunduz uning yo'lini poylab o'ltirmas edi! Imom hufiyalarining xabar berishicha, sulton, hatto, anov betavfiq Abu Rayhon Beruniyni ham hibsdan chiqarib, maxsus divsuvorlar bilan Ibn Sinoga yuborishga ahd qilgan. Shu boisdan ham, imom hazratlari boya saropardaga kirganda sultonidan norozi edi, lekin bu o'rtada, chamas, sultonning ruhida nogahoniy bir o'zgarish ro'y berdi, u Xizr alayhissalom to'g'risida so'z ochib, imomning ko'nglini chog' qildi. «Sizni Xizr alayhissalom timsolida ko'rdim», dedi. Bas, endilikda imomning aytgani aytgan, degani degan! Endilikda hech bir kimsa, hatto, ul takabbur hakim Ibn Sino ham sultonning jilovini o'z qo'liga ololmaydi! Sulton endi toabad imom Sayid hazratlariga musallamdur<sup>2</sup>.

...Sulton, taxtiravon qattiq silkinganini sezib, ko'zini ochdi. Yuksakda, boyagidan ham tiniqlashgan ko'm-ko'k osmon qa'rida, yolg'iz oq bulut suzib yurardi. Yo'q, bu bulut emas, bulut shak-

<sup>1</sup> Tardid – rad qilmoq.

<sup>2</sup> Musallam – taslim.



lidagi bir odam, ustida hakimlar ridosi, boshida hakimlarning uchli oq qalpog'i, soqoli ko'ksiga tushgan nuroniy bir kimsa! Yo, Rab? Hakimi davron... Ibn Sino emasmi bu?.. Ha, ha, hazrat Ibn Sino! Xuddi o'zi! Boya Xizr alayhissalom ko'ziga ko'ringani bejiz emas! Xizr alayhissalom hakimi davron Ibn Sino timsolida ayon bo'lsa ajab emas. Istiqbolning xayrli alomati bu!

Sulton birdan tomog'i g'ib bo'g'ilib, ko'zini yumdi. Shu payt daryoday guvillagan olomon ovozi qulog'iga kirdi.

«Iymonsiz Malik ul-sharob! Butkul xazinangni sadaqa qilsang ham qilgan gunohlaringni yuvmaysen», dedi. Yo'q, sulton mardumi mo'minga yaxshilik qilg'on ekan, mana, butun G'azna ko'chib chiqmish! Yurishga qodir ahli imon bor ki, bari istiqboliga kelmish. Faqat... Qutlug'qadam aytgan Bobo Xurmo qayda? Uni topmoq darkor! Kimgaki ozor bergan bo'lsa, hammasini qidirib topmoq va ko'nglini olmoq darkor. E, Yaratgan Egam! Nechun insof-u adolat to'g'risidagi bu o'ylar uning xayoliga endi kelmish? Nogahon yopishgan manov baloyi nahs bilan birga kelmish?»

Azim daryo tobora kuchliroq guvillamoqda edi. Ana, zikr tushgan darveshlarning vahimali «huv-huv»lari, navkarlarning «po'sht-po'sht»lari va, hatto, ayrim xitoblar qulog'iga chalina boshladi.

– Bu ne? Kimning tobuti bu?

– Tobut emas, taxtiravon bu, xumkalla! Poshshoyi olam!

– Xudo rahmat qilg'ay! Insofli poshsho edi sulton Mahmud!

Sulton nogohon taxtiravonni larzon urdirib, qaddini tikladi. U qabrston qo'rg'oni oldiga yig'ilgan behisob olomni ko'rdi. Ot o'ynatgan suvorilar, zarbof to'nlariga o'ralgan arkoni davlat va arkoni harb, kashkullarini silkitib, dud va tutun ichida zikr tushgan darveshlar, kosov qo'llarini cho'zib, sadaqa so'ragan gadolar, uvada to'nli moxovlar, oq g'ozday kerilgan ulamoyi zabardastlar!

Sulton bebosh daryoday ko'pirib-toshgan bu olomni ko'rib, bir daqiqa hushidan ayrilib, garang bo'lib qoldi. So'ng:

– Qayt orqangga! Qayt! – deb baqirdi-da, taxtiravonga chalqancha yiqildi.

## O'N TO'QQIZINCHI BOB

Beruniy bilan sohibi devon Abu Nasr Mishkan navkarlar qurshovida Afshon soyga yaqinlashib qolganlarida, qarshida Mozori kalon qabrstoni tomon yo'l olgan olomon ko'rindi. To'p-to'p darveshlar, bir-birlari bilan so'kishgan, allanimalarni talashgan gadolar, ot o'ynatib «po'sht-po'sht»lagan zodagonlar, asolarini do'qillatib, ko'kka nola qilgan majruhlar, najot tilagan xastalar, sog'lar, piyoda va otliqlar chindan ham qirg'oqlardan toshib chiqqan selday yopirilib kelardi. Faqat Afshon soy sohil emas, g'ira-shira tong qorong'iligiga burkangan shahar ham cho'p suqilgan ari uyasiday guvillar, dahalarda gulxanlar yonar, qorovullarning shaqildog'i shaqillar, u yoqdan-bu yoqqa chopgan ot tuyoqlarining dupuri osmoni falakka chiqqan edi. Lekin ajabo: Osmon malikasi saroyi ham, saroy ortidagi Xatlibeginning alohida ko'shki ham suv



quygandek jimjit, qo'rg'on oldidagi ulkan maydon kimsasiz, xiyobon va gulzorlarda tirik bir jon ko'rinmas edi...

«Mehmon»larni ko'shk oldida kutib olgan yosh kaniz bosh devon sohibini bir chetga imlab, qu-log'iga allanimalarni shivirladi-da, zar sochilgan shaffof durrasi bilan og'zini to'sganicha, Abu Rayhonga qarab ta'zim qildi.

– Marhamat qilsinlar, mavlono... Begim sizni kutmoqdalar!

Kanizning ko'zlari nechundir kulib turardi.

Beruniy oq marmar zinadan chiqib, baland peshayvon orqali uzun yo'lakka kirdi. Yo'lakning ikki tarafida qator o'ymakor eshiklar saf tortgan, tokchalaridagi toshfonuslar shu'lasida eshiklarning oltin tasmalari va ularga qadalgan dur va javohirlar ko'k, qizil, nafarmon ranglarda nafis jilo sochardi.

Oldinda borayotgan yosh kaniz to'rdagi eshikni ochib, tezgina ichkariga kirib chiqdi-da, yana boyagiday bilinar-bilinmas kulimsirab, navozish bilan bosh egdi:

– Marhamat, mavlono!

Beruniy negadir xiyol yuragi o'ynab, ichkariga kirdi. Xatlibegim devorlariga shaftoli va bodom gulli nozik so'zana va palaklar tutilgan katta chorburchak xonaning to'rida, nozi ne'matlar bilan to'ldirilgan do'ngalak xontaxta orqasida qizil shoyi bolishlarga suyanib o'tirardi. Shiftdagi chamberak qandilga terilgan hisobsiz shamlar shu'lasida xonadagi ipak gilamlar, tokchalardagi yoqut piyola va kumush barkashlar, fil suyagidan yasalgan g'aroyib quti va qutichalar, nodir ziynatlar, ziynatlargina emas, zarrin liboslarga

o'ralgan Xatlibegimning o'zi ham allaqanday notabiiy yarqirab ketgan, go'yo xona to'rida jonli ayol emas, tokchalardagi oltin ma'budalarning yana bittasi joy olgan edi.

Beruniy kirib, ta'zim qilishi bilan «oltin ma'bu-da»ga jon kirdi, yoqut ko'zli tilla uzuk va yirik oltin bilaguzuklar taqilgan qo'llarini uzatib, takalluf bilan yonidan joy ko'rsatdi.

– Xush kelibsiz, mavlono, to'rga o'ting.

Beruniy begim ko'rsatgan joyga o'tib o'tirarkan, mushk-anbar va upa-elikning xushbo'y hidi dimog'iga «gup» etib urildi.

Bugun begimning liboslari ham, pardoz-andozlari ham boshqacha, zar sochilgan ko'k shoyi ko'ylak ustidan qizil baxmal mursak kiygan, boshiga harir shoyi durra tashlab, durra ustidan inju qadalgan toj qo'ndirgan. Qoracha yuziga qalin upa surib, qiyg'os ko'zlariga surma tortilgan, hatto, tishiga surkalgan tishqolisi ham yangilangandek, gapirganda tishlari qora sadafdan yaltillab ketardi. Beruniy ixtiyorsiz suratda begimning harakatlari ni kuzatarkan, bundan ko'p yillar ilgari, sind muzofotidagi ko'l sohilida pinhona uchrashganlarida ham, dimog'iga mushk-anbarning xuddi shunday nozik hidi «gup» etib urgani yodiga tushdi. O'shanda ham Xatlibegim mana shunday qimmatbaho zarrin liboslar kiyib, yuziga nozik bo'yoqlar surkab olgandi. Lekin unda, begimning shaxsiy saropar-dasida pinhona uchrashganlarida, bu o'ktam qoracha juvonga hammasi yarashar, zarrin libos ham, yuziga surkalgan upa-elik ham, qiyg'os ko'zlariga tortilgan surma va, hatto, tishqoli surtilgan tishlari ham – hammasi yoqimtoy va jozibali edi. Hozir esa

uning yuzi... hind kohinlari va afsungarlari kiyadigan niqobni eslatar, faqat surma tortilgan suzuk ko'zlari allaqanday chaqnaib, xushomad aralash iltijo bilan javdirab turardi...

«Qoramtir ayol yuziga upa surtsa... qora qozonga un chaplanganday bo'lar ekan. Aqlli xotin, nechuk bunga farosati yetmaydi?»

– Sharobmi yo sharbatmi, mavlono?

– Sharbat, – dedi Beruniy va Xatlibegimning yupqa lablarida zuhur bo'lgan istehzoli tabassumni ko'rib, qo'shimcha qildi. – Ne chora, nahr-ul hayot shunday tez oqar ekankim, sharob ichadurg'on yoshlik chog'larimiz o'tdi-ketdi, begim.

Begimning suzuk ko'zlarida favqulodda sho'x uchqunlar jilva qildi, tishqoli surtilgan qora sadaf tishlari g'alati yarqirab ketdi.

– Bil'aks, endi kuchga to'lgansiz, mavlono!

– Tashakkur, begim...

– Yoshlik paytlarim o'tgan deb nola qilasiz, uyingizda esa... o'n gulidan bir guli ochilmagan sohibjamollar xizmat qiladi!

Beruniy «yalt» etib qaradi. Upa chaplangan niqobli yuz hanuz sovuq kulimsirardi!

«Alvasti!.. Sadafbibining boshiga yetgan bu alvasti!»

– Ayol zotini ma'zur tutasiz, mavlono, sizga bir og'iz so'zim bor. O'n gulidan bir guli ochilmagan ul sohibjamol... sizga faqat joriyalik qilgan edimi yoki...

– So'zingizni angladim, begim. Ul sho'rlik ma'suma... Faqirning yurtidan olib kelib sotilgan bir joriyadur. Bu joriya bilan bizning elimiz bir, tilimiz bir!.. – Beruniy hayajon ichida o'tirgan joyida bir

tebranib qoʻydi. – Hibsda yotgan chogʻimda... kul-bayi vayronamga bir guruh sarbozlar bostirib kelib shoʻrlik maʼsumani olib ketmish, begim.

Xonaga bir daqiqa chuqur sukut choʻkdi. Bu sukutni Xatlibegimning sovuq kulgisi buzdi:

– Bir guruh sarbozlar bostirib kirib, suyukli joriyangizni olib ketgan boʻlsa... buni men gʻaribga arz qilganingiz qiziq, mavlono!

– Faqirning gunohidan oʻting, begim, miskin kulbamga bostirib borgan ul sarbozlar saroydan emish!..

– Bilmam! Sultoni salotinning ahvoli sizga ayon! Boringki, ahvoli yaxshi boʻlganda ham, sul-ton sizning joriyangizga zor emas, mavlono. Alloh taolo unga shifo bergay! Shifo bersa... haram toʻla pari-paykar. Sizning joriyangiz bu gulruksorlar oldida choʻrilikka ham oʻtmaydi, mavlono...

Xatlibegimning zaharxandasi Beruniyning yuragidagi shubhani soʻndirish u yoqda tursin, battar oʻt yoqdi.

«Shu jodugar! Shoʻrlikning boshiga yetgan shu jodugar!»

Oʻrtaga choʻkkan jimlikni Xatlibegimning bir-dan oʻzgargan tahdidli ovozi boʻldi:

– Oftobi olam sizga oʻz tilagini izhor etgandur, mavlono!

– Izhor etdilar, begim. Ibn Sino hazratlari yoʻlga chiqqan emish!

Xatlibegim betoqat bosh chayqab:

– Siz ul hakimi hoziq... Ibn Sino hazratlarini taniysizmi? – deb soʻradi.

– Taniymen. Biz Xorazmda, Maʼmun ibn Maʼmun saroyida besh yil birga xizmat qilganmiz, begim...

– Ofarin! Tanisangiz sizdan bir iltimos, mavlono, – Xatlibegim tirnoqlariga xina qo'yilgan uzun qoramtir barmoqlarini Beruniyning qo'liga qo'ydi-da, yaqinroq surilib o'tirdi.

– Sizdan yashiradurg'on siri pinhonim yo'q, mavlono. Bir mahallar o'zingiz saboq bergan shogirdingiz amir Mas'uddan kecha ajab bir maktub oldim. Xabaringiz bor, ul shahzoda valiahd Isfahonda lashkar tortib turmish!

Xatlibegim negadir ko'ziga yosh olib, bir daqiqa jim qoldi.

– Ul sadoqati boqiy shogirdingiz, amir Mas'ud demishkim, hakimi davron Ibn Sino hazratlari G'aznaga borishdan bosh tortib, hanuz Hamadon tomonda qochib yurgan emish!..

Beruniy yer ostidan Xatlibegimga o'g'rincha qaradi. Begim, dasturxon tagidan ikki buklangan bir maktubni olib, ko'rsatdi-da, qayta dasturxon tagiga yashirdi.

– Ha, shahzodayi valiahd xuddi shunday deb yozmish. Siz bilmaysiz, mavlono, bu vaziri a'zam Ali G'arib bilan anov hez... meni afv eting, mavlono, anov xushchehra hezalak Abul Hasanak!.. Bu ikki quzg'unning niyatlari yomon, mavlono! Agar sulton sohibqiron bu foniy dunyoni yetim qoldirib, u boqiy dunyoni obod etsa... bu ikki battol shahzodayi valiahdni toj-u taxtdan mosuvo qilib, o'rniga anov befarosat shahzoda Muhammadni ko'tarmoq niyatidadur... So'zim ayonmu, mavlono?

– Vazirlar to'g'risidagi so'zingiz ayon, begim. Ammo hazrat Ibn Sino!..

– Men ham shunga hayronmen, mavlono, – dedi Xatlibegim. – Ul hakimi hoziq G'aznaga ke-

lishdin bosh tortib, Hamadon tomonlarda qochib yurgan bo'lsa... sulton aytgan bu Ibn Sino qaydan keldi? Bu Ibn Sino Teginoboddan topilgan emish, mavlono!

Xatlibeginning so'zlarida aql bovar qilmas bir sir-asror bor edi! Beruniy beixtiyor yoqasini ushlab:

– Ajab jumboq! – deb yubordi. – Siz aytmoqchisizki, Teginoboddan chiqqan bu Ibn Sino boshqa hakim, ya'niki soxta Ibn Sino demoqchisiz, begim?

Xatlibegim qattiq uf tortib, boshini sarak-sarak qildi.

– Bilmam, mavlono. Men uni ko'rmagan bo'lsam... Chin Ibn Sinomi, soxtami – bu jumboqni yolg'iz siz yecha olasiz, mavlono!

– Durust. Ammo bu ishdan, ya'niki chin Ibn Sino o'rniga soxta Ibn Sinoni topib, uni sultoni salotinga ro'baro' qilmoqdan maqsadlari ne bu ikki vazirning?

– Maqsadlari? O, mavlono, mavlono! Allomayi zamon degan nomingiz bilan bu ikki shaytonning firib yumushlariga aqlingiz yetmaydi. Maqsadlari – amir al-mo'minning boshiga yetmoq! Bu soxta Ibn Sino qo'li bilan unga og'u berib o'ldirmoq! – dedi Xatlibegim, dedi-yu, o'z so'zidan o'zi qo'rqib, ko'zlari olazarak bo'lib eshikka qaradi.

Beruniy boshi garang, tili lol, churq etmay o'tirardi. Boya Ibn Sino to'g'risidagi xabarni eshitganida yuragiga yopirilib kelgan quvonch endi tamom so'ngan, uning o'rnini yana o'sha eski alamli o'ylar egallagan edi.

«Haqiqatan, nechun uni, fikri zikri kitob bilan band bo'lgan bir sho'rlik allomani bu qabih ishlar-



ga sherik qilmoqchi bo'ladilar? Hokimiyat uchun, toj-u taxt uchun, bani odamlar ustidan hokimlik qilmoq uchun hech bir tubanlikdan qaytmas ekanlar, o'zlari qilsin bu tubanlikni! Uning yolg'iz tilagi – bu fitna-fasodlardan yiroq yurib, qolgan umrini mutolaa va mushohadaga bag'ishlamoq edi! Nahot, bu razil ishlar sabab eng so'nggi niyatidan ham mosuvo bo'lsa?»

Xatlibegim, go'yo uning ko'nglidagi g'alayonni sezgandek, shitob bilan o'rnidan turdi.

– Qolgan so'zni sizga sohibi devon... Abu Nasr Mishkan janoblari aytar. Siz uchun ot-ulov, xufiyalar, navkarlar – hammasi shay! Shoyad Tegnoboddan topilgan bu hakimi davron o'shal siz bilgan chin Ibn Sino bo'lsa!..

– Shoyad! – Beruniy jimgina ta'zim qilib eshik tomon yurdi.

– Biroz sabr qiling, mavlono! – Xatlibegim ichiga inju qadalgan zarrin shippagi bilan ipak gilamlarni sharpasizgina bosib borib, tokchadagi oltin bar-kash orqasidan bejiringina bir quticha oldi.

– Kecha saroyga savdo ahli tashrif buyurib, arzimas bir narsa hadya qilgan edilar. Ko'rib qimmatini aytasangiz, mavlono.

Xatlibegim, allaqanday sirli kulimsiraganicha, qutichani ochdi. Fil suyagidan yasalgan bejiringina qutichaning tagida... ko'k, qizil, nafarmon va yana allaqanday nozik ranglarda jilolangan yirik bir javohir yotardi! Yo, tavba! Bu o'sha, Piri Bukriy ko'rsatgan, ne-ne shoh-u gadolarning qo'lidan o'tgan, ne-ne mudhish voqealarga sabab bo'lgan va oxir-pirovardida Sadafbibi uchun va'da qilingan mash'um javohirning o'zi edi.

Beruniyning nazarida, go'yo birdan oftob chiqdi-yu, ko'z oldini to'sib turgan tuman tarqab ketdi! Xuddi Hindistonda, Nanda shahri yonidagi toqqa chiqqanida to'satdan miyasida nimadir «yarq» etib, yer kurrasining shakli ayon bo'lganidek, hozir ham hamma narsa ayon bo'ldi: bu sovg'a Xatlibegimga Sadafbibi uchun kelgan! Munofiq Piri Bukriy Sadafbibi uchun in'om qilgan bu javohirni!

Beruniy birdan quti o'chib, begimga tik boqdi.

– Bu javohir... ko'p yovuz ishlarning shohidi bo'lgan, ko'p shoh-u gadolarning boshini yegan javohirdur, begim...

Xatlibegimning qisiq ko'zlari hayrat bilan porladi.

– Ajab hangoma! So'zlang, mavlono!

– Bu javohirning tarixi uzoq, begim. Nasib bo'lsa bir kun so'zlab berurmen. Buning bahosi ham... bebahodur. Va lekin, qancha bebaho bo'lmasin, bir sho'rlik ojizaning hayot-mamotini bu toshga bog'lamoq... adolatdan bo'lmas, begim!

– Sho'rlik ojiza?

– Nechun ajablanasiz, begim? Bu javohir... mening joriyam, sho'rlik Sadafbibi uchun in'om qilingandur sizga, begim!..

Xatlibegimning upa surtilgan qoracha yuzi to'satdan nafrat aralash g'azabdan bujmayib ketdi.

– Joriyangizmi yo o'ynashingizmi u manjalaqi?

– Begim!..

– Bas! Sizga ruxsat, mavlono! Amri poshsho – vojibdur! Farmoni oliyni bajo keltiring, mavlono!

Beruniy begimning o't chaqnagan nigohidan ko'zini uzib, boshini xam qildi.





– Qulluq, begim! Ammo... Faqirning arzini ham inobatga oling! Sho'rlik joriya saroyda bo'lsa ozod qiling! Agar anov firibgar bukrining qo'lida bo'lsa – ul battol bukri qo'yib yuborsin begunoh ma'sumani!..

– Ma'suma! – Xatlibegim teskari burilib, devordagi ipak gilamni asta timdalarkan:

– E, Yaratgan Egam! – deb nido qildi. – E, rasuli barhaq! Qaysi gunohlarim uchun bu xo'rlik, bu haqorat?.. Tirnog'imga arzimaydigan bir cho'ri! Ko'chada qolgan bir manjalaqi!

Beruniy indamay eshik tomon yo'naldi.

«Yo, tavba! Ne-ne bek va amirlar turganda kim-san amir al-mo'mininning suyukli singlisi bo'lmish bu xotinning ishqiqi faqirday kekxa bir allo-maga tushsa...»

Beruniy eshikni sekin ochib, o'zini yo'lakka oldi. Ichkaridan hamon Xatlibegimning bo'g'iq, alamli yig'isi eshilib turardi.

## YIGIRMANCHI BOB

Hibsxona to'ntarilgan qozonday zimiston edi. Malik ul-sharobni boshlab kelgan sarbozlar uning qo'lidan kishanini, ko'zidan qalin bo'z belbog'ini yechib, eshikdan itarib yuborishdi. Malik ul-sharob oyoqlari ostidagi to'nkaga o'xshash bir narsaga qoqilib ketdi-yu, bor og'irligi bilan yuztuban yiqildi, boshi qattiq bir narsaga tegib, anchagacha hushini yig'olmay yotdi. Uning ikki ko'zi shiftda edi. Shiftdagi do'ppidekkina tuynukdan tushgan bir hovuch nur yerto'laning kaftdek joyini ham yorita olmas edi. Eng yomoni – yer-

to'lada biror jonzot o'lgan bo'lsa kerak, zindonni to'ldirgan kana va kalamush hidiga o'laksa hidi qo'shilgan, ko'ngilni ozdiruvchi bu qo'lansa hidga toqat qilib bo'lmas, biroq toqat qilmay iloj yo'q, boshini toshga urib dodlasa, dodini hech kim eshitmas edi!

Yo'q, kimdir bor! Hibsonaning allaqaysi bir burchagida kimdir betoqat pitirlaganday, asta ingraganday bo'ldi.

Malik ul-sharob sekin boshini ko'tarib, qu-log'ini ding qildi.

– Hoy, kim bor bu baloyi jahannamda?

Qibla tomondagi zimiston burchakdan:

– Malik ul-sharob? – degan zaif ovoz keldi.

– Bobo Xurmo? – Malik ul-sharob oyoq ostida yumalab yotgan zarang kosa, jom va qumg'onlarni ag'dar-to'ntar qilib, ovoz kelgan tomonga emakladi.

Beligacha qip-yalang'och Bobo Xurmo taqir bo'yrada uzala tushib yotar, uning soch-soqoli burungidan ham o'sib ketgan, ko'zlari yumuq, harorati baland, allaqanday xirillab nafas olardi.

– Suv! Bir qultum suv!

Malik ul-sharob qorong'ida yer timirskilab, – uning ko'zi zimiston yerto'laga endigina o'rgan boshladi, – qora qumg'onni topib keldi. Bobo Xurmo qumg'on jo'mragiga tishini shaq-shaq urib, suv icharkan:

– O! – dedi bezgak tutganday qaltirab. – Qani endi o'sha gulgun sharbatingdan bir piyola bo'lsa, Malik ul-sharob! Loaqal bir piyola! O't ichida qovrulamen, azizim, o't ichida!

Malik ul-sharob endigina uning badanida sog' joyi qolmaganini ko'rди, qorni, ko'kragi, bo'yni,



hatto, yuzlari ham qamchi izlaridan taram-taram bo'lib ko'karib ketgandi!

Malik ul-sharob chakmonini yechib, uning boshi ostiga qo'ydi, belbog'ini yozib, ustiga yopdi.

– Sho'rlik Bobo Savdoyi! Qaysi gunohlaring uchun seni qiynoqqa soldilar bu battollar?

– Gunohlarim? – dedi Bobo Xurmo yotgan joyida to'lg'anib. – Birdan-bir gunohim sening mayxonangda aytgan ertagim!

– Ertaging?

– Ha, tunov kuni, tuslik ikki sayyoh tashrif buyurgan oqshom beshafqat bir kimsani taxtga o'tqazgan nodon fuqaro to'g'risida so'zlagan ertagim yodingdami? Yodingda bo'lsa o'shal ertagim uchun! Go'yo bu ertak bilan kamina sulton sohibqironning izzatini yerga urgan emishmen. Uni johil va berahm, G'azna ahlini esa nodonga chiqargan emishmen!..

Malik ul-sharob bo'g'ilib ketayotganday bo'lib, bo'z ko'ylagining yoqasini shartta yulqib ochdi-da, holsizlanib devorga suyandi.

Yo, tavba! Necha marta uning o'ziga ham xuddi shunday bema'ni ayblar taqishgan, birda shakkoklikda, birda dahriylikda, yana birda esa saltanat qudrati va amir al-mo'minin obro'siga putur yetkazishda ayblab, necha marta zindonga tashlashgan. O'zlari to'qigan bo'htonlarga iqror qilishga urinib, ne-ne qiynoqlarga solishmagan uni! Yaxshiyam, sulton Mahmud yoshlik chog'larida, yuragida insof va adolat tuyg'usi tamoman so'nib bitmagan mahallarda, Nargizabonu sabab sobiq g'ulomi Qutlug'qadamning daxlsizligi to'g'risida birdan-bir adolatli farmon

bergan ekan. Malik ul-sharob, har safar boshiga qilich kelganida, shu farmonni dastak qilib, qutulib ketardi. Ammo bu safar... Bu safar sultonga bir balo bo'lganga o'xshaydi. Avval Beruniy-ni hibbs qildirdi, undan keyin o'zini Ibn Sino deb atagan anov telba mayparastni! Mayparastdan keyin uning shogirdini, shogirdidan so'ng manov sho'rlik Bobo Xurmo Savdoyini, Savdoyidan keyin uni! Hatto, Sadafbibi ham qaygadir yo'qolgan. Beruniy zindon qilingan kuni kechasi bir guruh navkarlar bostirib borib, uni ham qayoqqadir olib ketishgan! Yo, alhazar! Kimki Malik ul-sharobga yaqin bo'lsa, hammasi hibbsda! Endi bu hibsdan, o'laksa hidi anqigan bu jahannamdan tiriklayin chiqqa oladimi, yo'qmi – buyog'i yolg'iz Allohga ayon!

Mayli! Unga baribir. Uni bu bevafo dunyo bilan bog'lab turguvchi na bir ilinj qoldi, na bir yaxshi umid! Faqat bir narsa qiynaydi uni, u ham bo'lsa Nargizabonu!..

Nargizabonuni eslashi bilan hozirgina mayxonada o'zini sarbozlarning oyoqlari ostiga tashlab, faryod chekkan kampiri ko'z oldiga keldi-yu, tirnoqlarigacha zirqirab ketdi.

Sarbozlar majruh kampirning faryodiga quloq solishmadi. Kampir, qilich kesgan mayib qo'llari bilan sarbozlarning etagiga tirmashib, bo'sag'agacha emaklab bordi va o'sha yerda yumalab qoldi. Qo'liga kishan urilgan Malik ul-sharob esa yerda yiqilib qolgan kampir tomon bir-ikki talpinib ko'rди, biroq sarbozlarning qo'llari temir kishanlardan ham mahkam edi, yaralangan qushday pitir-pitir qildi-da, «shilq» etib yiqildi.

Yo'q, bu mash'um yumushlar bejiz emas, bu yerda teran bir sir-asror bor. Anov telba sayyoh ham bir baloni boshlab keldi! Boshda, bu sayyoh mayxonaga pinhona kirib kelganida, ayniqsa, xushsurat shogirdining qo'lidagi suratni ko'rganida Malik ul-sharob uning Ibn Sino ekaniga chippa-chin ishondi! Sayyoh esa... sayyoh bir haftagacha Malik ul-sharobning yerto'lasiga yashirinib olib, kecha-yu kunduz ichdi, shunday ichdiki, oxir-pirovardida o'z qusug'iga o'zi bulg'anib qoldi. Maydan hushiga kelgach chog'larida esa saroy va sulton haqidagi mishmishlarni so'rab-surishtirar, mayxona eshigini qiya ochib, mayxo'rlarning gap-so'zlariga o'g'rincha quloq solar, so'ng yana yerto'laga tushib, xumlarni quchoqlaganicha ichkilikka mukkasidan ketardi!

Umrida mug'ambirlik ko'chasidan o'tmagan oqko'ngil odam, Malik ul-sharob shunda ham gumonsiramagan edi, bir kuni tun yarmida yerto'lada ko'tarilgan allaqanday g'ala-g'ovurdan uyg'onib ketdi. U yerdan qattiq so'kingan bo'g'iq ovozlari, taraqturuq tovushlar eshitilardi. To'satdan, eshik taraqlab ochilib, kimdir alpang-talpang yurib chiqdi. Bu – yosh sayyoh edi. Uning yuzlari tiralgan, ko'zlari ola-kula, o'ziyam oyog'ida zo'rg'a turardi.

– Bu ne to'polon? Ne bo'ldi? – dedi Malik ul-sharob qattiq ranjib.

– Anov... Abu Shilqim! – dedi yosh sayyoh yig'i aralash g'o'ldirab. – O'zini Ibn Sino deb, ahli mo'minlarni tunab yurgan Abu Shilqim ibn Shahvoni. Sirini ochsam bugun dorga tortiladi! – Shogird shunday dedi-yu, o'z so'zidan o'zi

qo'rqib ketdimi yoxud sababi mastlikmi, yuz-tuban tushib, darhol pinakka ketdi.

Malik ul-sharob o'zlarini Ibn Sino deb, oqko'ngil avomni tunab yurguvchi qalloblar haqida ko'p eshitgan edi. Bu safar ham xuddi shunday firibgarlardan biriga duch kelganini sezib, uni haydashga chog'langan edi, biroq xuddi o'sha kecha bir guruh navkarlar mayxonaga nogahon bostirib kelib, «Ibn Sino hazratlarini» qo'l-oyog'idan bog'lab olib ketishdi!

Malik ul-sharobning xayolini Bobo Xurmoning asta ingragan ovozi bo'ldi.

– Suv beraymi, pirim?

– Yo'q-yo'q... Kamina senga bir so'z aytmoqchi edim, yodimdan ko'tarildi! Hm.. Ha, yodimga tushdi! Bu yovuzlar... o'sha kuni mayxonangga mehmon bo'lib kelgan ikki sayyohni ko'p so'rab-surishtirdilar, Malik ul-sharob!

– Nechun?

– Bilmam, azizim! Bu yerda ne sir-asror bor, yolg'iz Alloh biladi. Ammo shu ikki sayyoh bilan anov... imomni ko'p surishtirdilar quzg'unlar!

– Qaysi imom?

– Qaysi bo'lur edi! O'shal birodaring imom Ismoil G'oziyni aytamen. Oo!.. Qani endi beza-  
vol yoshlik chog'larim qaytib kelsa! Imom Ismoil  
lashkarida ot surib, yo bu iymonsizlarni qirg'in-  
barot qilsam, yo jang maydonida shahid o'lsam!

Malik ul-sharob devorga suyanganicha ko'zini yumdi, yumgan zahoti darhol imom Ismoilning qilich tekkan chandiq yuzi, lochinning ko'zlari-day tiyrak, o'tkir ko'zlari yodiga tushdi.

Malik ul-sharob ham necha marta imomning Ko'hisher darasidagi qarorgohiga bosh olib

qochmoqchi bo'lgan, lekin imom uning bu istagini xushlamagan edi. «Saltanatdagi ahvolni bilib turmoq uchun G'aznada pinhoniylar makonimiz bo'lmog'i darkor, bu ishda sening mayxonangdan yaxshi joy yo'q», deb, uni niyatidan qaytargan edi. «Nahot, ilonning yog'ini yalagan bu makkorlar bu sirdan ham ogoh topgan bo'lsalar?»

– O, yovuzlar, yovuzlar! – dedi Bobo Xurmo ingrab. – Hamma narsadan voqif bular! Yer ostida ilon qimirlasa – biladilar bu kazzoblar!

– Nechun bilmasinlar? Bir odamga o'n ayg'oqchi, o'n xufiya!..

– O, Malik ul-sharob! Bu mal'un xufiyalar orasida inongan tog'ingni ko'rasen hali! Qil o'tmas qadrdongini ko'rasen hali!..

Malik ul-sharob beixtiyor yuragi uvishib:

– Qil o'tmas qadrdonim? – deb so'radi.

– Ha, taassuflar bo'lg'aykim, inongan tog'ing ham ayg'oqchi ekan!

«Inongan tog'im? Kim ekan u inongan tog'im! Yopiray! Bir balo bo'ldi bu saltanatga! Na davlat tinch, na sulton!»

Malik ul-sharob payg'ambar yoshiga kirib, ne-ne fojialarni ko'rmadi! Sho'rlik mardumi mo'min ajal kelsa «o'lim haq» deb, taqdirga tan berib, bu noraso dunyo bilan befig'on, befaryod, bezabongina vidolashadi. Qirq yil saltanat tebratib, davr-u davron surgan bu sulton esa... tilida «o'lim – Allohning inoyati», desa ham, dilida tavahhum, jununlar holiga tushib qoldi!

Bundan uch kun muqaddam, mayxo'rlar tarqab, mayxona uyquga cho'mganida, Malik ul-sharobni bozor qorovuli kirib uyg'otdi.

- Seni keksa bir devona yo‘qlab kelmish!
- Neki ahmoq yo‘qlab kelsa uyg‘ota berasanmi, nodon? Devona bo‘lsa bir burda non sadaqa qil!
- Kechirgaysen, Malik ul-sharob. Devona ayta-diki, vaziri a‘zamdan keldim deb! Qo‘lida bir xalta oltin! Mana, o‘zi ham kirdi...

Malik ul-sharob yalt etib eshikka qaradi, qaradi-yu, o‘z ko‘zlariga ishonmay angrayib qoldi. Yo, tavba! Bo‘sag‘ada... amir al-mo‘minin sulton Mahmud G‘aznaviy turardi!.. Ustida eski quroq chopon, boshida xorazmcha eski cho‘girma, belida qizil bo‘z belbog‘!

U: «Indama, ovozing chiqmasin!» degan ma‘noda kaftini labiga bosdi, so‘ng bozor qorovuliga yuzlanib:

– Sen boraver! – deb g‘o‘ldiradi-da, oyog‘ini arang sudrab ichkariga kirdi.

Qorovul qo‘lidagi toshfonusni tokchaga qo‘yib, shosha-pisha xonadan chiqdi, chiqishi bilan sulton, go‘yo kimdir oyog‘iga bolta urganday, tizzalari qaltirab, yerdagi eski namatga holsizgina cho‘kkaladi, shunda belidagi xaltasi yerga tegib, darang-durung ovoz chiqardi.

«Qorovul aytgan oltin! Yopiray! Oltinlarni ne qiladi? Devona sifatida tun yarmida ne matlubda tentirab yuribdi bu jununsifat sulton?»

Amir al-mo‘minin, ko‘zlari yumuq, og‘ir han-sirab ancha o‘tirdi. Uning yuzi tunov kuni tog‘da ko‘rganidan ham battar sarg‘ayib, bo‘yinlari bo‘sh xaltaday osilib qolgan, siyrak mosh-guruch soqoli chuvalab ketgan, u chindan ham holdan toygan och gadoga o‘xshardi.

– Birodarim Qutlug‘qadam! – dedi sulton, allaqanday nogiron, mahzun tovushda. – Tunov



kungi so'zlaring hanuz yodimda, hanuz kechalari uyqu bermaydi menga!

Sal hushiga kelgan Malik ul-sharob nogahon yuragi «shig'» etib:

– Bir qoshiq qonimdan kechgaysen, amirim! – dedi. – Qurib ketgur rindona kayfiyat sabab faqir o'sha kuni ko'nglingga ozor berdim...

– Yo'q, yo'q! – sulton zaif chirog'day miltiragan ko'zlarini bir ochib, qayta yumdi. – So'zimga inon, Qutlug'qadam, agarchand Alloh taolo o'z inoyatini darig' tutmay bu dardi bedavodan forig' qilsa... men ham darveshlikni ixtiyor etib, bir tunda dorus-saltanatdan chiqib ketar edim. Ustimga janda, boshimga kuloh kiyib, «huv» deb boshimni olib chiqib ketar edim, tilamchilik ila kun kechirib, qilgan gunohlarimni yuvar edim! E, Yaratgan Egam! O'zingdan o'zga g'amguzorim yo'q! – dedi sulton to'satdan allaqanday faryod chekib. – Va lekin... nahot bu mayparast aytganday savob yumushlarimdan qilgan gunohlarim ko'p bo'lsa? Yo'q, inonmaymen bu gapga! Ammo... inonmasam ham, mana, bir xalta oltin olib keldim, Qutlug'qadam! O'shal o'zing aytgan yetim-yesirlarga ulashgaysen! Kerak bo'lsa... yuz xalta desang ham keltirib berurmen...

Sulton so'zini tugatmagan ham ediki, eshik sharaqlab ochildi-da, g'ira-shira xonaga... vaziri a'zam Ali G'arib kirib keldi.

Sulton, go'yo Ali G'arib emas, ko'ziga baloyi azim ko'ringanday talmovsirab:

– Ali G'arib? – deb xitob qildi.

– Yo, Rab! – dedi Ali G'arib, yoqasini ushlab. – Sulton sohibqiron gado kiyimida? Bu ne hol? Sizga ne bo'ldi, olampanoh?

Sulton, nogiron jismi qalt-qalt titrab:

– Yo‘qol ko‘zimdan, battol! – deb baqirdi. Biroq vaziri a‘zam amir al-mo‘mininning hayqirig‘iga bo‘ysinish o‘rniga yerga tiz cho‘kib, sultonning oyoqlarini quchoqlab oldi.

– Sadoqati boqiy qulingizni afv etgaysiz, olampanoh! Va lekin... birov ko‘rsa ne deydi? El-yurt eshitsu ne bo‘ladi, oftobi olam?

– Daf bo‘l, iblis!

– Mayli, faqirni o‘ldirsangiz o‘ldiring! Ammo... bugun darg‘azab bo‘lsangiz ertaga tashakkur aytasiz faqirga! Hech bir kimsa ko‘rmagay sizni, olampanoh! – Ali G‘arib shunday deb, qo‘ynidan qizil shoyi belbog‘ chiqardi-da, sultonning yuziga tashlab eshikka yuzlandi:

– Sardor!

Tashqarida tapir-tupur oyoq tovushlari eshilib, xonaga ikki navkar kirib keldi.

– Ko‘taring bu gadoni! Olib chiqib, aravaga soling!

Yuzi qizil shoyi belbog‘ bilan o‘ralgan sulton bir-ikki marta pitir-pitir qildi-da, o‘likday uzala tushib yotib oldi.

To navkarlar sultonni ko‘tarib olib chiqib ketguncha Ali G‘arib bir chekkada qovog‘ini uyib sukut saqlab turdi, so‘ng Malik ul-sharobga qarab:

– So‘zimni qulog‘ingga quyib ol, betavfiq! – dedi past, tahdidli tovushda. – Tuya ko‘rdingmi – yo‘q! Biya ko‘rdingmi – yo‘q! Bil‘aks, po‘stingni shilib, ichiga somon tiqamen, shayton!

...Ha, bir balo bo‘ldi bu saltanatga! Hammayoq xufiya! Hammayoq ayg‘oqchi! Hammayoq vahimal..

– Qil o‘tmas qadrdoning deding, Bobo Xurmo!



– Ha, ul quzg'un sening tuzingni ichib tuzlug'ingga...

Bobo Xurmoning so'zi og'zida qoldi, chunki shu payt zindonning qo'sh tavaqali zalvarli eshigi g'ichir-g'ichir qilib, bazo'r ochildi-da, toshfonus ko'targan ikki sarboz ko'rindi.

– Osiy banda Qutlug'qadam! Chiq zindondan!

Malik ul-sharob qorong'ida Bobo Xurmoning boshi uzra egildi.

– Alvido! Diydor ko'rish nasib etmasa rozi bo'l, Bobo Xurmo! – Malik ul-sharob bo'g'ziga tiqilgan ko'z yoshini ichiga yutib, o'rnidan turarkan, Bobo Xurmoning: «Iloyo kaminaning boshiga tushgan bu uqubat sening boshingga tushmagay, azizim!» – deb shivirlaganini eshitdi.

Ikki sarboz – biri oldinda, biri orqada, Malik ul-sharobni zindondan olib chiqishdi-da, uzun tor yo'lakdan qayoqqadir boshlab ketishdi.

Malik ul-sharob, tekis yo'lakda qoqinib-surinib borarkan, uni kutayotgan qiynoqlar to'g'risida emas, hamon Bobo Xurmoning so'zlari to'g'risida o'ylardi.

Yopiray, kim ekan u, Malik ul-sharobga qil o'tmas qadrdon tutinib, boz ustidan gap tashib yurgan? Tuzini yeb, tuzlug'iga tuflab yurgan u battol kim? Piri G'ijjakiymi yo anov kekxa nashavand Bobo Hofiz Bulbuliymi yoxud... Piri Bukriymi?.. Yo'q, yo'q, o'z elidan ayrilib, musofir yurtida yuragi qon bo'lib yurgan bu majruh mashshoq bunday tubanlikka bormaydi! Nafosat va nazokat ahlidan bu yovuzlik chiqmaydi!

To'satdan, tor yo'lakning ikki tomonidagi turnaqator eshiklardan biri ochilib, ichkaridan...

yalang'och qilich ushlagan echki soqol bir navkar chiqdi. Sarbozlar uni ko'rishlari bilan o'zlari-ni chetga olib, Malik ul-sharobga yo'l berishdi. Navkar mahbusga boshdan-oyoq tikilib qaradi, bo'z ko'ylagi tagidan ozg'in tanasini paypaslab ko'rdi, keyin qovog'ini uyganicha, ichkariga imo qildi: «Kir!»

Malik ul-sharob, birinchi daf'a yuragi allanechuk uvishib, qiya ochiq eshikdan ichkariga kirdi. Uning ketidan sersoqol navkar ham kirib, eshikni zich yopdi.

Torgina chorburchak xona, tokchadagi toshfonusni hisobga olmaganda, deyarli jihozsiz, unda faqat ikki kursi turar, ularning biri bo'sh, ikkinchisi esa... vo darig'! Kimsan vaziri a'zam, Ali G'arib janoblarining o'zlari o'tirar edi!..

Malik ul-sharob shaytonga saboq berguvchi bu qari tulkini ham, undan avval qirq yil hukm surgan sobiq bosh vazir Xo'ja Ahmad Maymandiyni ham yaxshi bilar, ular davrida necha marta hibsga tushgan, birda shakkoklik, birda dahriylik, yana birda saltanat sha'niga yomon so'zlar aytding, degan kechirilmas gunohlar bilan zindonga solingan, ammo hech qachon shaxsan vaziri a'zamning tergoviga musharraf bo'lmagan edi!..

U beixtiyor kinoyali kulimsirab, poygakda to'xtagan edi, Ali G'arib:

– Nasl-nasabing qul bo'lsa-da, Malik ul-sharob degan noming bor, – dedi bilinar-bilinmas kulimsirab. – Marhamat, kursiga o'tir, Qutlug'qadam!

– Tashakkur! – Malik ul-sharob kursiga o'tirishi bilan vaziri a'zam o'rnidan turib ketdi-da, qo'llarini orqasiga qilib tor, shipshiydam xonani



bir aylanib chiqdi. Uning harakatlari asabiy, qovog'i soliq, ikki ko'zlari uyqusizlikdan qizarib, battar kirtayib qolgandi.

«Sirti yaltiroq, ichi qaltiroq umr! Bosh vazir bo'lish ham oson emas! Ammo oson bo'lmasa, bu azob-uqubatni yelkasiga ortib ne qiladi, bu pakana fosiq? Qo'راسi to'la qo'y, xazinası to'la ganj, haramı to'la kanız! Ayshını urıb, kayfını surıb yotmaydımı bog'i bo'stonıda! Yo'q, yotıb bo'ptı bu qarı tulkı! Hokımıyat kerak bu ıblısğa! Banı odam ustıdan, o'zı yanglıg' bandalar ustıdan hokımlık qılmoq dardıga muhtalo bo'lgan bu dajjol!»

Ali G'arib, to'satdan yurishdan to'xtab:

– Osiy banda Qutlug'qadam! – dedi sekin, muloyim tovushda. – Bizga shu narsa ayonkim, bundan chamasi uch hafta muqaddam, sening mayxonangga bir kekxa sayyoh o'z shogirdi bilan pinhona kelib qo'nmish. Va bir hafta mehmon bo'lmish. Kim edi va ne muddaoda kelgan edi bu sayyoh?

Vaziri a'zam so'zini muloyim boshlasa ham, oxirini tahdid bilan tugatdi-yu, Malik ul-sharob biroz allaqanday talmovsirab qoldi.

– Bu sayyohning ne maqsadda yurgani faqirdan ko'ra siz janoblariğa ayonroq emasmu, taqsir?

– Sabab?

– Sababi... shu daqiqada janoblaring qo'lidadur ul firibgar!

– Firibgar?

– Ha, o'zini hazrat Ibn Sino deb, sho'rlik avomni to'nab yurgan bir battol ekan ul sayyoh!

– Hmm! – Ali G'arib, xuddi noxush gap eshitgan odamday, yuzı bujmayıb, qovog'ını uydi. – Xo'sh, soxta tabıb ekanını qaydan bilding uning?

– Kamina yomon odamni ming chaqirim naridan bilamen, taqsir! Kimsan, hakimi davron Ibn Sino hazratlariga nomunosib yurish-turishlaridan, mast-alast qiliqlaridan, telba-teskari gap-soʻzlaridan bildim hazratim!

– Xulqi atvoridan! – dedi vaziri aʼzam, negadir birdan gʻazabi joʻshib. – Ibn Sino hazratlarini farishta deb kim aytdi senga?

– Farishta emasdur, va lekin...

– Sen ul hakimi davron... Ibn Sino xazratlarining suratini koʻrdingmu? Oʻshal mashhur va maʼlum suratkash, allomayi zamon Abu Nasr Ar-raq chizgan suratni koʻrdingmu?

– Koʻrdim, taqsiri olam.

– Xoʻsh? Oʻxshaydimu?

– Oʻxshaydi...

– Ikki tomchi suvday oʻxshaydi! – dedi Ali Gʻarib. Malik ul-sharob vaziri aʼzam janoblarning maqsadiga tushunolmay, bir lahza jim qoldi.

– Yo, soʻzim notoʻgʻrimi, Qutlugʻqadam?

– Toʻgʻri va lekin ul firibgar...

– Firibgar! – dedi Ali Gʻarib, kirtaygan koʻzlari ni chaqchaytirib. – Firibgar boʻlsa nechun unga mayxonang toʻridan joy berding? Aziz mehmon deb, shohlarga koʻrsatmagan lutf-karam aylading, boshingga koʻtarib eʼzozlading! Eʼzozlab turib, saltanatga qarshi pinxona suhbatlar qurding? – Vaziri aʼzam oppoq loʻppi qoʻlini musht qilib tugdi-da, poshnasi baland qizil saxtiyon etigi bilan yerda dik-dik sakrab, Malik ul-sharobga yaqinlashdi. – Yolgʻiz bu sayyoh emas, mana, qirq yildirki, Gʻaznayi munavvarada neki iprindi-siprindilar, neki gado, neki qalangʻi-qasangʻi, dordan qochgan neki qalloblar boʻlsa hamma-

sig a boshpana berasen! Ular bilan kufr majlislar qurasen! Va bu majlislarda saltanat sha'niga bo'htonlar yog'dirib, shakkoklik qilasen!..

Malik ul-sharob, qo'llarini kursi suyanchig'iga tirab, asta o'rnidan turdi.

– Taqsiri olam! Agar qirq yildan beri shakkoklik qilg'on bo'lsam, saltanat sha'niga yomon so'zlar aytib, bo'htonlar yog'dirg'on bo'lsam nechun faqirning tilini sug'urib olmadingiz? Nechun oyog'imdan dorga osib, ostimdan o't qo'ymadingiz, janobi bosh vazir?

– Zaharxanda qilma, betavfiq! Agar amir al-mo'minin... sababi yoshlik, farmon berib qo'ymaganida, o'zim bilar edim ne qilmoqni. Ammo... Bas! Endi pichoq suyakka borib taqaldi! Endi sening qilmishlaring ayon bizga! Bosgan har bir qadaming, aytgan har bir so'zing ayon bizga! Tomchi sel bo'lmas, dushman el bo'lmas! Anov quzg'un imom Ismoil bilan tiling bir sen iymonsizning!

– Qaysi imom Ismoil, taqsir?

– Hozir bilasen qaysi imom! – Vaziri a'zam, ikki ko'zlari cho'g'day yonib, eshikdagi echki soqol navkarga yuzlandi. – Chaqir o'rgamchini!

«O'rgamchi» so'zini eshitishi bilan Malik ul-sharob «shilq» etib kursiga o'tirib qoldi.

«O'sha! Piri Bukriy! Odamlar uni nechundir «qora o'rgamchi», deb ko'p xushlamas edi. Malik ul-sharob bo'lsa, musofir deb, ko'ngli o'ksik, mayib-majruh tug'ilgan, yurtidan ayrilgan bir g'arib-u notavon deb unga rahm-shafqat qilgan, uyining to'ridan joy berib, boshini silagan edi!.. U iblis bo'lsa tuzini ichib, tuzlug'iga tupurib yurgan ekan! Vo darig'! Nahot, bu gap rost bo'lsa? Nahot,

o‘z kuylari bilan bir uy mayxo‘rlarni yig‘latib yurgan bu bukri bunday tuban sotqinlikka borsa?»

Malik ul-sharob, o‘tirgan joyida g‘ujanak bo‘lib, ko‘zini chirt yumib oldi. Shu payt eshikda qandaydir bir sharpa eshitildi, so‘ng Ali G‘aribning:

– Qani, so‘zla, o‘rgamchi! – degan tahdidli ovozi qulog‘iga chalindi-yu, qo‘rqinqirab ko‘zini ochdi.

Poygakda... Piri Bukriy turardi. Yo‘q, bu Malik ul-sharob bilgan Piri Bukriy emas, boshqa bir bukri edi! U odatdagi qora chakmon o‘rniga keng zarbof to‘n kiyib, boshidagi eski kuloh o‘rniga uchiga dur qadalgan suvsar telpak qo‘ndirib olgan, o‘ziyam, soqol-mo‘ylovlari qaychilanib, allaqanday yosharib ketgan edi. Faqat ko‘zlari, o‘sha, bolalarning ko‘zlariday ma’sum ko‘m-ko‘k ko‘zlari allaqanday bejo javdirardi!

Malik ul-sharob Piri Bukriyning chehrasiga jirkanish aralash taajjub bilan tikilib qararkan, to‘satdan, «Sadafbibi!» degan fikr miyasida yashinday yarq etdi. «Ha, bu bukrining yasanib olgani bejiz emas, sho‘rlik qizni qo‘lga tushirgan bu qari o‘rgamchi!»

Bu fikr Malik ul-sharobni shunday hayratga soldiki, tili gapga kelmay, biroz angrayib qoldi, so‘ng qayoqdandir olisdan vaziri a‘zamning to‘vushi qulog‘iga chalindi:

– Ha, bukri, nechun og‘zingga talqon solib olding? So‘zla! Bor haqiqatni so‘zla! Hammasini eshitsin bu nobakor!

Malik ul-sharob yalt egib Piri Bukriyga qaradi. Bukriy qo‘ltig‘idan qora charm jildlik qalin bir kitobni olib, vaziri a‘zamga ta‘zim qildi:

– Taqsim! Mana, marhamat, hammasi bitilgan bu daftarga! So‘nggi yigirma yilda bu shakkok may-



parastning kufr kulbasida neki so'z aytilgan bo'lsa, saltanat sha'niga, poshshoyi olam va siz janoblari-ning sha'niga dog' tushirguvchi neki fisqi fujur gap bo'lgan bo'lsa – hammasi bu daftarga bitilgan! Kunma-kun, so'zma-so'z bitilgan, taqsir!

Piri Bukriy shunday dedi-da, qalin daftarni kaftlarida tutganicha, vaziri a'zam tomon yurdi. U Malik ul-sharobdan hadiksirab, uni chetlab o'ta boshladi. Biroq Malik ul-sharob sapchib o'rnidan turdi-yu:

– O, quzg'un, o nokas! – deb mushtini ko'tardi. – Salkam yigirma yil tuzimni ichib, tuzlug'imga tupurgan nonko'r! Nega yer yutmaydi sen iblisni? Nega?

Piri Bukriy ko'zlari ola-kula bo'lib, dahshat ichida orqaga tisarildi. Ammo Malik ul-sharob bir hatlashda unga yetib, zarbof to'ning yoqasidan oldi:

– Bu sotqinliging uchun, yigirma yil bu qora daftarga bitgan ig'vo so'zlaring uchun ne olding? Ne shon-sharaf topding, ne martabalarga erishding, bukrri shayton? – Malik ul-sharob shunday deb, bukrining qo'lidagi qora charm jildli qalin daftarni yulib oldi-da, qulochkashlab boshiga tushirdi. Piri Bukriy «ih» deb, boshini ushlaganicha yerga cho'kkalab qoldi. Malik ul-sharob unga qarab yana talpindi. Biroq shov-shuvni eshitib, chopib kirgan echkisoqol navkar uning qo'llaridan qayirib, eshik tomon sudradi.

Malik ul-sharob navkar bilan olishib, eshikdan chiqarkan, to'rda haykalday qotib qolgan vaziri a'zam bilan yerda ingrab yotgan bukriga ijirg'a-nib qaradi va bor kuchini to'plab bukrining yuziga tufladi:

– Bu kuningdan beshbattar bo'l, battol!

## YIGIRMA BIRINCHI BOB

### 1

Beruniy hech narsaga tushunolmay qoldi. Uni G'aznadan olib chiqqan navkarlar goh karvon yo'lidan yursa goh pistirma joylarga burilib, tog'-u toshlar, qir va adirlar, jarliklarni panalab ketardi. Katta karvon yo'lida esa qandaydir shubhali choparlar, qo'sh otli divsuvorlar, sallalariga nayzasimon kumush nishon qadalgan mushriflar betinim ot surishar, biri Teginobod tomon yo'l olsa, biri, bil'aks, G'azna tomon ot choptirib o'tardi.

Beruniyni boshlab ketayotgan mushrif xuddi iskovuch itdek, hamma narsani oldindan sezardi, yiroqda odam qorasi ko'ringan zahoti uning kimligini bilib goh navkarlarni pistirmaga boshlar, goh, aksincha, o'z yo'lida dadil davom etar, choparlar bilan salomlashib hol-ahvol so'rashib o'tardi.

Xatlibegim boshliq bir qancha arkoni harb va arkoni davlat bir tomonda, vaziri a'zam Ali G'arib va uning tarafdorlari bir tomonda, toj-u taxt uchun pinhoni kurash ketayotganini Beruniy yaxshi bilardi. Ammo bu kurash bunchalik shiddatli tus olgani xayoliga ham kelmagan edi. Boz ustiga, qayoqdandir paydo bo'lgan bu sirli Ibn Sino! Uning nomi bilan bog'liq bu qorong'i mish-mishlar! Bu ayovsiz pinhoni kurash!

Har safar, navkarlar maxfiy mushrifning imosi bilan otlarning boshlarini pistirmaga burarkan Beruniy ich-ichidan zil ketar, qay balodan bu tuban ishga aralashib qoldim, degan fikr uni qat-

tiq azoblar edi. Shunday paytlarda rasadxonadagi sokin hujrasi xontaxtada qolgan qo'lyozmalari, javondagi kitoblari ko'z oldiga kelardi-yu, yuragi battar achishib ketardi.

Beruniy so'nggi yillarda, yoshlik davridan o'tib keksalik manziliga qadam qo'yanidan beri fursat deb atalmish ne'matning qadrini juda yuksak baholaydigan bo'ldi. Behuda o'tgan har bir daqiqa uni qattiq iztirobga solar, hatto, hordiq onlari ham huzur o'rniga ko'nglini g'ash qilardi. Ayniqsa, «Qal'ayi qahr»ni ko'rish «baxtiga muyassar» bo'lgandan beri bu tuyg'u kuchayib ketdi. Nazarida, o'ylab qo'yan ko'p rejalari, xususan, ma'danlar haqidagi bosh kitobi bilan nabotot olami to'g'risidagi asarlari yozilmay qoladigandan tuyulib ko'nglidagi g'ashlik battar kuchayar edi, ayni zamonda bo'lg'usi uchrashuv ham uni tobora hayajonga solmoqda edi. To'g'risini aytganda, Beruniy qandaydir paydo bo'lgan bu sirli tabib Xatlibegim aytganidek, yolg'on Ibn Sino emas, chin Ibn Sino bo'lib chiqishini istar, juda-juda istardi. Sulton o'z yo'liga, ular esa.. qani endi, sababi bu qing'ir ish bo'lsa ham, diydor ko'rishmoq nasib etsa! Diydor ko'rishib, yoshlik chog'larini bir eslashsa! Avval Buxoroda, Afshona qirlarida yonboshlab yotib, to'yib-to'yib dardlashgan onlarini, keyin Gurganjda, Ma'mun ibn Ma'mun saroyidagi «Majlisi ulamo» yig'inlarida bo'lgan bahs-munozaralarni eslashib ajib nurga yo'g'rilgan o'sha mas'ud damlar haqida suhbatlashsa, sababi yoshlik, oralaridan o'tgan nizo va nifoqlar uchun kechirim so'rashib, ko'ngillaridagi g'uborlarni yuvishsa!

Ibn Sino, soʻnggi somoniylar inqirozidan keyin Buxoroni tark etib, Gurganjga kelgan mahalda Beruniy Maʼmun ibn Maʼmun saroyidagi eng nufuzli allomalardan hisoblanar, u «Majlisi ulamo»ning doimiy raisi edi.

Maʼmun ibn Maʼmun tugʻilishdan nimjon, kasalmand hadikchi odam edi. U, sulton Mahmud sabab toj-u taxti doim silkinib turgani uchun hamma narsadan, hatto, oʻz soyasidan ham choʻchir edi. Yomon tush koʻrsa tushidan qoʻrqar, osmonda momaqaldiroq qaldirasa, momaqaldiroqdan yashin chaqnasa, yashindan vahimaga tushar shuning uchun ham saroyda nafaqat shoir va allomalar har xil folbinlar, afsungarlar, azayimxonlar ham ivirsib yurardi. U birda mashhur allomalarning majlislarida ishtirok etsa, birda bu «kufr ishi» uchun ulamoyi zebardastlardan uzr soʻrab, ularning etagida namoz oʻqir, yana birda esa folbinlar va kohinlar «tilsimi»ga inonib, qabristonlarda tunab chiqardi. Shu boisdan «Majlisi ulamo»ning yigʻinlarida koʻproq tabiat ofatlari bot-bot boʻlib turadigan boʻron va dovullar, Jayhunning bebosh toshqinlari, elga qirgʻin keltiruvchi vabo va chechak kasallari toʻgʻrisida gap borardi.

Ibn Sino u mahalda yosh edi. Biroq yosh hakimning har bir soʻzi chuqur ilm va mantiqqa asoslanar, u tibbiyot pirlari – Uqlidus va Jolinus, Abubakir ar-Roziy va Buqrot hakim allomalarning kitoblarini yoddan bilar, hatto, Arastuning ilohiyat bobidagi mashhur asarini ham ipidan-ignasigacha oʻrgangan, zotan, majlisda qanday murakkab masala koʻtarilmasin, hammasi toʻgʻrisida fikr bildirishga qodir edi.



Beruniy har safar Ibn Sino va uning Gurganjdagi obro'si haqida o'ylaganida keyinchalik unga yozgan xatlari, to'g'rirog'i, bu xatlarda yo'l qo'yan gustohlilari esiga tushadi-yu, ko'ngli g'ash bo'ladi. Xayolidan esa: «Bu dag'alliklarga sabab ne? Inson nomiga nomunosib raqobat dardi emasmi?» degan fikr o'tib, dil-dilidan iztirob chekadi.

Yo'q, Ibn Sino hech qachon manmanlik qilgan emas unga esa hurmatsizlik alomatini ko'rsatgan emas. Ular ilk bor Buxoroda uchrashgan mahallaridayoq yosh Abu Ali Beruniyni «ustod» deb atagan edi, ko'p yillardan keyin Gurganjda uchrashganlarida ham «ustod» so'zini og'zidan tushirmadi.

Yo'qsa, nechun Beruniy keyinchalik, tabiat sirlari to'g'risidagi yozishmalarida, alxusus, Arastuning «Ilohiyat»i haqida, jismlarning issiqlik va sovuqlikda kengayishi va torayishi to'g'risida xat yozishganlarida Ibn Sinoga nisbatan qo'pollik qildi, allomalar sha'niga yarashmaydigan gustohlikka yo'l qo'ydi? Yozishmalar ham mayli, Ibn Sino Jurjon hokimi Qobus ibn Vushmagirning qizi Zarrinabonuning iltimosi bilan shaharlar orasidagi masofalarni o'lchash to'g'risida risola yozganida Beruniy uning bu risolasini kamsitdi, hatto, uni yerga uruvchi maktublar yo'lladi? Nechun?

Buning sababi ham o'sha dard, inson sha'niga, xususan, allomalar sha'niga nomunosib raqobat tuyg'usi emasmi?

Uchrashuv onlari yaqinlashgan sayin bu o'ylar Beruniyni ko'p qiynar, ko'p ezar edi!

G'azna Teginobod yo'li ko'm-ko'k adirlar orasidan o'tar, dam keng sayhonliklar, hududsiz yangliklarga chiqar, dam yana bir-biriga o'xshash yam-yashil yassi qirlarni oralab ketardi.

Gohi-gohida uzoq-yaqinda baland tog'lar ko'zga chalinar, yo'l tor va qorong'i daralarga sho'ng'ir, sharqirab oqqan soy va daryolarni yoqalab ketardi...

Safarning ikkinchi kuni kechqurun ular baland qir yonbag'rida joylashgan katta bekatga yetib, qo'nishdi.

Bekatning ulkan sardobasi bor, aftidan, u katta karvonga mo'ljallangan edi. Lekin sardobadan ham burun Beruniyning diqqatini bekat ortidagi baland qir jalb etdi. Uzoqdan ulkan gumbazga o'xshab ko'ringan bu qir nimasi bilandir Nanda shahri yaqinidagi yuksak tog'ni eslatardi. Beruniy qirni uzoqdan ko'rgandayoq g'alati bo'lib ketdi-yu, bekatga yotib, otdan tushishlari bilan maxfiy mushrifdan ijozat so'rab, qir tomon yo'l oldi.

Oftob ufqqa yonboshlagan, butun olam uning iliq nuriga g'arq bo'lgan. Qir yonbag'rida suruv-suruv qo'y-qo'zilar o'tlab yurar, tushovlangan otlar, sigirlar toshdan toshga sakrab yurgan oq echkilar ko'rinardi. Bekat qo'rg'onining har joy-har joyidan tutun ko'tarilar, havoni tezak va yovshan hidi tutgan edi!..

Ha, xuddi o'zi! Nanda shahri yonidagi tog' ham xuddi shunday ko'm-ko'k, xuddi shunday baland, tevarak-atrof esa bundan ham tekis, bundan ham beqiyos, behudud bir sayhonlik edi!..

Hanuz yodida: u har yuz qadam ko'tarilganda bir to'xtab, ufqqa qarar, ufq esa yana bir necha chaqirim chekinib, yangi kengliklar, pastdan

ko'rinmagan yiroq manzaralar namoyon bo'lardi... Har safar yangi balandlikdan yangi ufq ochilganda Beruniy bu nuqtadan xayolan chiziq o'tkazib, turgan joyiga nisbatan hosil bo'lgan burchakni belgilar ekan, favqulodda ulkan bir kashfiyot oldida turganini sezib, yuragi gurs-gurs urardi!

Haqiqatan, g'alati yaralgan ekan inson aql-idroki! U go'yo xasis baqqolday ilm deb atalmish durdonalarni bitta-bitta terib, miyaning eng xilvat burchaklariga yig'ib qo'yaverar ekan. Ammo nimadir turtki bo'lib, kechasi yongan mash'alday «yarq» etib yonmaguncha bu xilvatdagi durdonalar ham jilo berib yarqirab ketmas ekan!

Beruniyning nazarida, Nanda tog'idagi hodisa uning uchun ana shunday mash'al xizmatini qildi-yu, xayolida yig'ilib yurgan fikrlarga ajib bir tiniqlik kiritdi! Ha, bu voqeadan ancha oldin, samoviy hodisalarni kuzatib mashhur rasadxonalarda yulduzlar jadvalini tuzib yurgan paytlarida ham yer kurrasining shakli haqidagi bu fikr uning ko'nglidan ko'p marotaba o'tgan edi! Lekin o'sha kuni, Nanda tog'idagi xarsang tosh ustida o'tirib, toqqa chiqish jarayonida namoyon bo'lgan g'aroyib hodisa to'g'risida xayol surarkan, ilgari qilgan taxminlari aniq va mukammal bir shaklga kirdi!

O'sha oqshom, Beruniy tog' tepasida, osmon to'la yulduzlarga tikilib tong ottirdi. Mijja qoqmay tong ottirdi! U dunyoda eng baxtli odam edi! Chunki o'sha kecha unga tabiatning buyuk bir siri ayon bo'lgandi!

...Kechki oftob ufqqa qo'ndi, qirlar ustini qoplagan harir tuman orasida u xuddi eritilgan bir jom oltinga o'xshardi. Ana, bu bir jom oltin

go'yo ulkan nahrga cho'nganday yer qa'riga asta cho'mib ketdi. Lekin Beruniy bilar, agar u bu qirdan balandroq qirga chiqib boqsa, botgan o'tob hamon botmagan bo'ladi, hamon jom to'la oltinday balqib turadi!

Rost, Beruniy bu ulug' kashfiyoti haqidagi risolasini hali allomalar davrasida e'lon qilmadi, chunki biladi: oddiy allomalar uyoqda tursin, eng katta munajjimlar ham bu risolani idrok etishga ojizlik qiladi!

Hayhot! Unga besh qo'lday aniq ko'rinib turgan haqiqat boshqalarga qorong'u, unga ayon bo'lgan sir-sinoatlar boshqalar uchun jumboq! Uni ezayotgan narsa ham shu! Uning kashfiyotlariga aqli yetadigan, farazlarining mag'zini chaqa oladigan na bir yo'ldoshi bor, na bir sirdoshi! Hayotda aqli aqlingga teng bir hamdaming, qilgan kashfiyotlaring, o'ylagan o'ylaringga tushunadigan, dardlaringga hamdard bo'ladigan bir kimsang bo'lmasa ham qiyin ekan! Qani endi yonida Ibn Sino bo'lsa! Ibn Sino u qilgan kashfiyotlar, u yozgan kitoblarning mag'zini chaqa olardi, ularning qadriga yetardi!

Ufqdagi bir jom oltin batamom yerga singib ketdi, yiroq-yiroqlarda lovillab yongan shafaq asta so'ndi. Qora duxobaday tiniq osmonda ilk yulduzlar yondi, bekat hujralarining darichalari yorishdi...

Beruniy asoga suyanib, sekin o'rnidan turdi.





## 2

Yo, qudratingdan!

Xiragina moychiroq arang yoritgan tor hujra-ning to'rida... boshida eski qalpoq, egnida eski olacha chakmon, keksa bir odam o'tirardi!..

– Malik ul-sharob!

– Ofarin, allomayi zamon! Taniding-a! – Malik ul-sharob yonidagi xurjunini bir chetga surib, o'rnidan turdi.

Uning soch-soqoli avvalgidan ham o'sib ketgan, o'ziyam cho'pday ozib, allaqanday bukchayib qolgan, biroq hanuz ilgarigiday xurram ko'rinar, og'zidan bilinar-bilinmas sharob hidi kelardi...

Beruniy aziz birodarining ahvolidan yuragi zirqirab, quchog'ini ochib ko'rishdi.

– Yopiray! Hibsdan chiqdingmi yo mayxonadan keldingmi, azizim?

Malik ul-sharob, boshidagi eski qalpog'i bilan yuz-ko'zlarini artib, kinoyali kulimsiradi:

– G'alati so'zlarni so'zlaysen, allomayi davron! Malik ul-sharobga zindon ham mayxona, mayxona ham mayxona! Tilasang senga ham quyib beramen! – Malik ul-sharob shunday deb, eski chakmonining belbog'ini yechdi, qo'ynidan kichikroq bir meshni sug'urib olib, uni shaloplatib chayqatdi:

*Bu dunyo bir hibsxona, bilib ol,  
U dunyo ham emas jannat, kelib qol,  
U ham ortmas ulug'lardan, ko'ngil uz.  
Kuning bitmay yayrab, o'ynab-kulib qol!*

Malik ul-sharob meshning og'zidagi charm ipni yechdi, boshini orqasiga tashlab, qultillatib

bir-ikki ho‘plam sharbat ichdi-da, meshni Beruniyga uzatdi.

*Bu dunyoyi qo‘tir, o‘tar-da ketar,  
Qani, Abu Rayhon, ol, meshni ko‘tar!*

Beruniy o‘zini tutolmay beixtiyor kulib yubordi-yu, darhol lab-lunjini yig‘ishtirdi.

Malik ul-sharob, garchi bir qarashda juda xushnud ko‘rinsa ham, gap-so‘zlari va xatti-harakatlarida ilgari unga yot bo‘lgan chuqur bir nogironlik sezilib turardi. Zotan, u so‘nggi yillarda may ichishni yig‘ishtirib qo‘ygan, uni qanchalik ulug‘lamasin, o‘zi kamdan-kam og‘ziga olardi. Endi esa...

Beruniy gira-shira qorong‘ilikda qadrdonining zahil yuziga, ichga botib ketgan g‘amgin ko‘zlari-ga tikilib-tikilib qaradi.

– Senga ne bo‘ldi, Malik ul-sharob? Sulton zindoniga tushgan hech bir bandayi mo‘min undan omon chiqqan emas. Mana, qutulib chiqibsen, shukur qil, azizim!

– Yo‘q, Abu Rayhon! Sen bilmaysen! Kamining yuragini qon qilgan narsa sultonning zindoni emas! Zindonda yegan kaltaklarim ham emas!  
– Malik ul-sharob shunday deb xitob qildi-da, egnidagi eski chakmonini shartta yechib, yerga otdi. Uning qovurg‘alari turtib chiqqan nimjongina tanasida sog‘ joy yo‘q, hammayog‘i ko‘k bo‘yoq surtilganday taram-taram bo‘lib ko‘karib ketgan, chumchuqday jon bu ojiz tanadan «pir» etib uchib ketmaganiga hayron bo‘lardi kishi.

– Yo‘q, Abu Rayhon! Malik ul-sharobni qiynagan narsa zindon azobi emas, yo‘q! Kaminani qiy-

nagan narsa... qil o'tmas qadrdonimning xiyonati! Ha, sen haq ekansen, Abu Rayhon! Kamina rahm-shafqat qilib yurgan Piri Bukriy tuban bir sotqin ekan! Anov mal'un vaziri a'zamning xufiyasi ekan! Yigirma yildirki, kulbayi vayronamda ne majlis, ne so'z bo'lsa – hammasini diliga jo qilib, kitobiga bitib, oqizmay-tomizmay yetkazib yurgan ekan bu firibgar bukri!..

Beruniy indamay devorga suyanib turardi. U Piri Bukriyni qanchalik yomon ko'rmasin, uning bu tuban ishlaridan bexabar edi. Malik ul-sharob mayxonasida mayxo'rlik qilib, nay-u navosi bilan hammaning ko'nglini olib, zimdan gap tashib yurgan bir iblis ekanini xayoliga ham keltirmagan edi!..

– O, bani odam! Bani odam! – dedi Malik ul-sharob, fig'oni chiqib. – Bani odamning bu tubanligi oldida nechun bu osmon ag'darilib yerga tushmaydi? Nechun asfalasofilinga ketmaydi bu noraso olam? Ul tuban ayg'oqchi bilmaydiki, bu dunyoda kimki vafo qilsa vafo, jafo qilsa jafo topg'usidir! Kamina esa uni musofir deb, faqir-u haqir deb, rahm-shafqat qilib yuribmen! May ichsam, ul kazzobsiz ichmas edim, osh yesam, ul quzg'unsiz yemas edim! Ul battol bo'lsa... so'zlagan har bir so'zimga yuz so'z qo'shib, yaxshi kalomimni yomonga yo'yib, anov makkor vaziri a'zaminga yetkazib yurgan ekan!.. Yo, tavba! Bu tuban yumushga qo'l urgan ul sotqinni bir ko'rsang edi, Abu Rayhon! Kuni kecha gadoday ivirsib yurgan bu azozil zarbof to'nlarga o'ralib olmish soch-soqolini qirtishlab, yasharib ketmish ul bukri!

«Sadafbibi! Sho'rlik Sadafbibi!»

Beruniy tishini tishiga bosib hamon devorga suyanib turar, dilida esa ilgari hech qachon his

etmagan alamli tuyg'ular jo'sh urardi. Qani endi, shu topda shartta chiqib, G'azna tomon ot surishning iloji bo'lsa! Hech joyda to'xtamay, to'g'ri G'aznaga kirib borsa, kirib borsa-yu, burgaga tuzoq qo'yan bu iblisning do'koniga bostirib kirib giribonidan ushlasa!

– Yo'q! – dedi Malik ul-sharob. – Na adolat bor bu osiy bandalarda, na insof va na haqiqat!.. Qirq yil elda qatl-u qirg'in qilib, endi Azroil qo'lida to'lg'anib yotgan bu sulton esa... o'zini «hakimi davron» deb hammani shilib yurgan bir qallobni chin Ibn Sino deb e'lon qilsa!

Beruniy, garchi bu gapni eshitgan bo'lsa ham, beixtiyor bir sapchib tushdi:

– Hammani shilib yurgan bir qallob? So'zingni anglamadim, Malik ul-sharob?

– Nechun anglamaysen? Vaziri a'zam topgan bu Ibn Sino – chin Ibn Sino emas, Ali G'aribning o'zi yanglig' bir makkor! Shaharma-shahar izg'ib yurgan bir mayparast, o'zini Ibn Sino deb, avomni to'nab yurgan bir qallob! Vaziri a'zam topgan bu «hazrat» Ibn Sino o'shal battol! Laqabi Abu Shilqim ibn Shahvoniyy!

– Abu Shilqim ibn Shahvoniyy? Ajab laqab! Bu sirni qaydan bilding?

Malik ul-sharob maqtov eshitgan yosh boladay qiqirlab kuldi:

– Sirni aytdim, asrorini so'rama, Abu Rayhon! Ammo yodingda bo'lsin. Bu sirni butun dorus-sal-tanatda faqat ikki kishi biladi. Biri – ul shaytoni layn Ali G'arib, biri – kaminayi kamtarin! Bas! Sen chin Ibn Sinoni tanisang, kamina bu soxta Ibn Sinoni taniymen! Ikkovimiz ham bu mudhish

sirdan voqifimiz! Va lekin, bu voqiflik bizga ne keltiradi – yaxshilikmi yoxud yomonlik – buni yolg'iz Alloh biladi, Abu Rayhon!..

Beruniy javob bermadi. Uning ko'ngliga hozir na gap sig'ardi, na hazil-mutoyiba!

Malik ul-sharobning gaplari, Sadafbibi taqdiri, chin va yolg'on Ibn Sino haqidagi mudhish hangoma – buning hammasi uning ko'nglidagi osoyishtalikni izdan chiqargan, xayoli yana to's-to'polon bo'lib ketgandi.

### 3

Odatda tong qorong'usida yo'lga tushadigan navkarlar bu safar kun chiqdi hamki, o'rinlaridan qo'zg'alishmadi. Beruniy bilan Malik ul-sharobni hech kim bezovta qilmadi, ular go'yo mushriflarning eslaridan chiqqan edi. Faqat tushga yaqin qayoqdandir ikki suvori ot choptirib keldi-yu, rabot cho'p suqilgan ari uyasiday g'uvillab qoldi. Farroshlar bekat qo'rg'onining ichi sirtini supurishga kirishishdi, turnaqator tizilgan meshkobchilar sardobadan suv olib, katta yo'lga suv sepishdi, otboqarlar otxonalardan eng chopqir otlarni olib chiqib, yangi egar-jabduqlar urishdi. Beruniy bilan birga kelgan sarbozlar esa go'yo Ibn Sino atalmish hakimi davronni emas, ayovsiz dushman lashkarlarini qarshi olishga hozirlik ko'rayotgandek, qilichlarini qayrab, otlarini shay qilib qo'yishdi. Sal o'tmay Beruniylar joylashgan hujraga ularni boshlab kelgan puchuq mushrif tashrif buyurdi. U egniga yangi zarbof to'n kiygan, belini og'ir kumush kamar bilan bog'lab, boshiga kokil osilgan dubulg'a qo'ndirib olgandi.

Puchuq mushrif bandiga popuk taqilgan egri qilichini etigiga shaq-shuq urib, yerni tap-tap bosib kirib keldi, qovog'ini uyib, har bir so'zini qilichday kesib-kesib gapirdi, biroq xatti-harakatlarida qandaydir ichki bir g'alayon sezilib turardi.

– Mavlono! – dedi u Beruniyga murojaat qilib. – Hozir... hakimi davron... Ibn Sino hazratlari yetib keladurlar. Ul oftobi olamning amr-u farmonlari shulkim, biz ul mo'tabar zotni o'z qanotimiz ostiga olib, sog'-salomat dorus-saltanatga yetkazmog'imiz darkor... Siz ul zoti oliylarini yaxshi taniysiz, mavlono?

Beruniy sekin bosh irg'adi.

– Taniymen, agar bu Ibn Sino faqir bilgan o'shal Abu Ali ibn Sino bo'lsa...

Puchuq mushrif Beruniyning kinoyasiga tushunmagan bo'lib, Malik ul-sharobga yuzlandi:

– Siz ham taniysiz?

– Bilmam. Kamina Abu Shilqim ibn Shahvoni degan bir kimsani taniymen, xolos!

– Ibn Shahvoni?

– Balli, janobi mushrif! Yaqinda G'aznayi munavvarada Abu Shilqim ibn Shahvoni degan bir firibgar paydo bo'lgan edi, faqir o'shal firibgarni taniymen, xolos!

Puchuq mushrif «bu odamning aqli joyidami», degan ma'noda qovog'ini uyib, Beruniyga bir qarab oldi-da, qo'lini qilichining bandiga qo'ydi.

– Bu ishda qanday sir-asror bo'lmasin, kamidan boshqa biror tirik jon bilmasligi darkor! Bil'aks, boshingiz ketadur! Neki sir-sinoat bo'lsa, dorus-saltanatga borgach, devoni davlatda so'zlab berursiz. Hozir esa shu narsa yodingizda bo'lsin:

mavlono Beruniy hazrat Ibn Sino bilan birga soya-bon aravada ketadilar. Siz esa... navkarlar bilan birga bo'lasiz! Farmoni humoyun shu erur!

Beruniy jimgina bosh egdi. Malik ul-sharob bir nima demoqchi edi, puchuq mushrif «gap tamom», degan ma'noda qo'lini ko'tardi.

– Farmoni oliy – hukmi Xudodur! Tamom, vas-salom!

Kun choshgohdan oshib, oftob nayza bo'yi ko'tarilganda, bekat minoralaridan «Ko'rindi! Ko'rindi!» degan sadolar eshitildi.

Sal o'tmay ufqda, bir-biriga tutashib ketgan ko'm-ko'k adirlar ortida katta oq bulut ko'rindi. Bu – ot-aravalar ko'targan chang-to'zon edi. Zum o'tmay, to'zon orasidan otilib chiqqan bir guruh suvorilar ko'zga chalindi.

Rabot oldidagi katta yo'lni puchuq mushrif boshliq navkarlar egallagan, yo'l chetida otboqarlar yigirma chog'li otlarni shay qilib turishar, ularning orqasida esa suv to'la meshlarini orqalab olgan meshkobchilar ko'rinardi.

Beruniy bilan Malik ul-sharob qo'rg'on darvozasi oldida, negadir rangi o'chib, dir-dir titrab turgan bekat nazoratchisi yonidan joy olishdi.

Meshdagi mayni ichib tugatgan Malik ul-sharobning kayfi chog' edi. U goh o'zicha sekin xirgoyi qilar, goh: «O, kazzob! O, quzgun!» deb so'kinib qo'yardi. Beruniy esa... Beruniy hamon o'sha g'alati holatda edi. Xatlibegim bilan Malik ul-sharobning gapidan keyin ko'nglida uyg'on-gan g'alayon endi junbishga kelgan, uzoqdagi oq bulut yaqinlashgan sayin uning dilidagi g'alayon ham tobora ortib borardi.

Ana, ufqdagi oq to'zon orasida bir guruh navkarlar, navkarlardan keyin sariq ipak mato bilan yopilgan soyabon arava ko'rindi. Uzoqdan katta chodirni eslatgan bu arava to'rt tomonidan o'ttiz-qirq nafar suvori bilan qurshab olingan, go'yo soyabon aravada Ibn Sino otli hakim emas, butun ro'yi zaminni tiz-cho'ktirgan jahongir suron solib kelardi!..

Ana, aravani qurshab olgan suvorilar aniqroq ko'rindi. Oldinda qora terga tushgan ko'k qashqa arg'umog'ini yeldirib, o'sha, Abu Shilqim ibn Shahvoniyini Teginobodga kuzatib borgan cho'tir mushrif kelardi. Mushrifning qoramtir cho'tir yuzi bo'g'riqqan, ko'zlari chaqchaygan, go'yo bekat oldidagi katta yo'lda amir al-mo'minning elchilari emas, yovuz qaroqchilari yig'ilgan edi!

Nihoyat, aravani qurshab olgan sarbozlar ta-sir-tusur ot surib yetib kelishdi. Ular katta yo'lni to'sib turgan navkarlarga besh-o'n qadam yetmay to'xtashdi. Shu zahotiyoy oldinda kelayotgan cho'tir mushrif uzangiga oyoqlarini tirab, egar ustida qad-dini rosladi-yu, bo'g'iq, tahdidli ovozda:

– Bekat begi! – deb qichqirdi. – Charchagan otlar darhol almashtirilsin! Qolganlariga suv va yem berilsin!

Cho'tir mushrif so'zini tugatmagan ham ediki, soyabon aravaga yopilgan ipak mato g'imirlab, tuynuk ochildi-da, boshiga kulohsimon ko'k qalpoqcha kiyib, ustidan oppoq simobiy salla o'rab olgan bir kimsa ko'rindi.

Uzunchoq xushsurat yuzi issiqdan bo'g'riqqan, kaltagina mosh-guruch soqoli o'ziga yarashgan bu ulamonamo kimsa ko'zlari xushnud charaqlab, tevarak-atrofga qiziqsinib qaradi, qaradi-yu, to'satdan:



– Malik ul-sharob! – deb qichqirib yubordi.

Malik ul-sharob negadir sarosimaga tushib, Beruniyga yuzlandi.

– O'sha! Xuddi o'zi! Abu Shilqim ibn Shahvoniy!

– Malik ul-sharob! – xushnud qichqirdi arava-dagi kimsa. – Ofarin! Faqirday hakimi davronga peshvoz chiqqan shoiri zamon Malik ul-sharob dunyo turguncha tursinlar!

Malik ul-sharob Beruniyning biqiniga turtib, qiqirlab kuldi.

– Mast! G'irt mast, muttaham!

Ibn Shahvoniy qo'lini ko'tarib yana bir narsa demoqchi bo'ldi, biroq kimdir uning oyog'idan ushlab qattiq tortdi chamasi, qo'lini ko'targanicha soyabon arava ichiga gumdon bo'ldi-yu, ochilgan tuynuk qayta yopildi.

Bir zum tildan ayrilib, gung bo'lib qolgan olo-mon orasida piq-piq kulgu va g'ala-g'ovur ko'tarildi. Bu g'ala-g'ovur Beruniyni boshlab kelgan puchuq mushrifni hushiga keltirdi chog'i, u ostida yer depsingan otini cho'tir mushrif tomon niqtadi.

– Janob mushrif! Ul oftobi olamning farmo-ni oliylari shulkim, bu allomayi davron... Ibn Sino hazratlarini kaminaning tasarrufiga topshirg'aysiz!

– Qani o'shal farmoni humoyun?

– Mana! – mushrif boshidagi kokilli dubulg'asi tagidan to'rt buklangan zarhal qog'ozni olib havoda silkitdi, lekin uni cho'tir mushrifga topshirish o'rni-ga to'satdan qilichni shartta qinidan sug'urib:

– Bo'shat yo'lni! – deb amr qildi.

– Labbay? Bunday farmoni oliydan faqirda yuztasi bor! – cho'tir mushrif ham qilichni shart-

ta qinidan sug'urdi. Mushriflar bilan barobar ikki tomondagi navkarlar ham qilich sug'urdilar-u bir-birlariga tashlandilar. Jang hidini sezgan arg'umoqlar achchiq kishnab osmonga sapchidi, olamni vahshiy qiyqiriq va qilichlarning sharaq-shurug'i tutdi.

– Bo'shat yo'lni!

– O'zing bo'shat!

– Bos!

– Ur!

– Ur, ha, ur! Sur, ha, sur!

Shundan keyin nima bo'ldi – buni hech kim bilolmay qoldi. Katta yo'l bo'yidagi qirg'in qanchalik tez boshlansa, shunchalik tez tugadi. Beruniy, hatto, hushini yig'ib ham ololmadi.

U: «To'xtang! Bu ne qabohat? O'rtadagi nizoni aql-idrok bilan yechmoq darkor!» demoqchi bo'ldi, hatto, o'zini otlar tagiga tashlab bo'lsa ham qirg'inni to'xtatmoqchi edi. Lekin buning o'rniga negadir Malik ul-sharobni quchoqlaganicha joyida qotib qoldi. Hushiga kelganida esa qirg'in tugagan, teginobodlik cho'tir mushrif Xatlibegimning puchuq mushrifini chopib tashlagan, uning navkarlaridan faqat bir nechtasigina omon qolgan, ular ham uzoqdagi adirlar tomon lapanglab qochib ketmoqda edi.

O'z raqibini chopib tashlagan cho'tir mushrif qonga botgan qilichini qiniga solib, osmonga sapchigan ko'k qashqa arg'umog'ini katta yo'lga burarkan, yonidagi suvoriga Beruniy bilan Malik ul-sharob tomon ishora qilib bir nima dedi. Shu zahotiyuq bir nechta suvori ot choptirib kelib, Malik ul-sharobga tarmashishdi, uning oyoq-qo'llarini bog'lab, arava tomon sudrab ketishdi.

Hamon karaxt bo'lib turgan Beruniy shundagina hushiga keldi-yu, cho'tir mushrif tomon intildi.

– Janob mushrif! Bu darvesh – faqir bir shoir! Sultoni salotinning farmoni bor! Daxlsizdur ul!

Cho'tir mushrif Beruniyga qayrilib ham qaramadi. Qon hidi va jang suronidan quturib, hamon osmonga sapchigan qora arg'umog'iga qamchi urib:

– Ketdik! – deb xirilladi-da, otining jilovini qo'ydi. Uning orqasidan boshqalar ham tasir-tusur ot surishdi.

Beruniy bekat darvozasiga suyanganicha joyida qotib qoldi.

## YIGIRMA IKKINCHI BOB

### 1

«Bugun subhi sodiq chodirdan chiqib ketgan shayx peshindan keyin xachir yetaklab olgan sersoqol bir mo'ysafidni boshlab keldi. Shayx g'ayritabiiy bir hayajonda edi. U sersoqol kimsani chodirda qoldirib, kaminani chodir ortidagi tepaga boshlab chiqdi, egnidagi chakmonini giyohlar ustiga yozib, yonboshladi. Men uning so'ziga muntazir bo'lib, yoniga cho'nqaydim.

Shayx ko'zlari yumuq, uzoq xayolga tolib o'tirdi, so'ngra:

– Hamadondan darak yo'qmi? – deb so'radi.

– Darak yo'q, – dedim.

– Hamadondan ot-ulov, oziq-ovqat kelsa... Isfahonga yo'l olurmiz... – dedi shayx.

Ajab gap! Kuni kecha Isfahondan amir Mas'ud elchilari kelganini eshitib, Hamadondan pinhona

qochib chiqqan shayx, bugun endi Isfahonga yoʻl olurmish!..

– Isfahonda... qora oʻlat kezib yurgan emish, – dedi shayx. – Uyma-uy, koʻchama-koʻcha, daha-ma-daha qora oʻlat kezib yurgan emish!..

Boshimga bir xum sovuq suv quyilganday vujudimni qaltiroq bosdi.

– Qora oʻlat kezib yurgan shaharga borib, oʻzini shamga urgan kapalak holiga tushmaylik, ustod, – dedim.

Shayxning nigohida sovuq qahr, lablarida kinoyali tabassum zohir boʻldi.

– Balli, oʻglim! Isfahonda qora oʻlat charx ursin! Ahli mardum boshiga ogʻir musibat tushsin, «hakimi davron» nomini olgan faqir esam, jon shirin, boshimni olib qochay! Balli, azizim!

Oʻylamay soʻzlaganimdan qattiq oʻsal boʻldim. Boz ustiga, shayxning Isfahonda qolgan inisi Abu Mahmud yodimga tushib, qora terga tushdim. Soʻz nishabini boshqa tomonga burish murodida shayxdan vabo va qora oʻlat yangligʻ baloyi ofatlarning sababini soʻradim.

– Sababini oʻlat xuruj qilgan shaharning oʻziga borib aniqlamoq darkor, – dedi shayx. – Va lekin, Buqrot hakim, Jolinus, Abubakir ar-Roziy kabi tabiblar, qadimiy Rum, Qohira, Hind va Chin tarixchilarining guvohlik berishicha, jang-u jadal-lar sabab Isfahonday gavjum shaharlar qamalda qolib, ochlik, yalangʻochlik xuruj qilgan chogʻlarida vabo yangligʻ baloyi ofatlar avj olgʻusidir. Ul moʻtabar allomaning kitoblarida zikr qilinishicha, bunday musibatli kunlarda yer qaʻridagi barcha ins-u jins yuzaga chiqib, oʻlat yeyishga tutuna-

dur, o'lat hidi va o'lat qonini uyma-uy tashiydur. Bilasen: kasal borki, yuqmaydi, kasal borki, kishidan kishiga o'tadi. Qora o'lat ham sichqon va kalamushlar bilan uydan uyga o'tib, o'lim sudrab yurguvchi nuqs ofatdur. Ajab emaski, Isfahon boshiga tushgan bu qora kunlarni o'shal maxluqlar boshlab kelgan bo'lsa!

Zarrinrud daryosining chap sohili yodimga tushdi. Shahristondan chiqib, daryodan o'tish bilan yo'qsillar dahasi boshlanadi. Qing'ir-qiyshiq ko'chalar, kulbayi vanronalar, bostirmalar, g'arib karvonsaroylar, temirchilar, chilangarlar, taqachilar, beshiksozlar, egarchi va sangtaroshlar, tobutsoz va pichoqchilarning xaroba do'konlari nigohim oldiga keldi. Nazarimda, hamma yoqda murdalar qalashib yotganday, ular orasida daydi itlar, och mushuklar, sichqon-u kalamushlar izg'ib yurganday bo'lib, jismim muzlab ketdi.

– Bilmam, – dedi shayx, – qo'rqqanga qo'sha ko'rinur, deydilar. Goho ofat keltiruvchi boshqa kasalliklarni «vabo» deb vahimaga tushadilar. Bilmam, agar bu yo'lovchining «qora o'lat», degani rost bo'lsa – uning davosi ham mushkuldir. Borib ko'rganda ayon bo'lur. Ammo neki dori-darmon, neki dorivor giyoh bo'lsa – hammasini sandiqlarga joylamoq darkor, hammasini olib ketmoq darkor! Shokalon degan anov yo'lovchi senga yordam beradi.

– Bu yo'lovchi kim? Isfahonlikmi? – deb so'radim.

Bu savolimdan shayx g'alati ahvolga tushdi.

– Yo'q, bu yo'lovchi Isfahondan emas, Buxoroyi sharifdan, – dedi shayx. – Kamina tavallud topgan Afshonadan. Bolalik chog'larimizda bir dahada bir-

ga yong'oq o'ynab katta bo'lganmiz. Kamina Buxorodan ketganimdan keyin bu sho'rlikning boshiga ham ko'p savdolar tushibdi. – Shayx shunday deb, ajab bir sevgi hangomasini so'zlab berdi.

Afshonalik sersoqol yo'lovchining zurriyoti bilan Isfahonga, amir Mas'ud saroyiga in'om qilib yuborilgan turkiy sanam o'rtasidagi bu ishq hangamasi shayxni nechundir qattiq iztirobga solgan edi.

– Men bu sho'rlik yigitni ko'rmog'im darkor, – dedi shayx. – Albatta, ko'rmog'im darkor!.. Yosh-san, o'g'lim, muhabbat jafosi boshingga tushmagan. Muhabbat jafosini tortmabsen, bu foniy dunyoga kelmabsen!

Kamina: «Bu ne jafo ekan, so'zlab bering, ustod» deb kulgan edim, shayx ma'yus bosh chayqab: «Yo'q, ishq dostonini so'zlab bo'lmas, – dedi. – Bu dostonni yozmoq mumkin, nazmga solib kuylamoq mumkin, ammo uni birovga so'zlab bo'lmas, kimki so'zlasa qadrini yerga urar, azizim!»

Shayx shunday deb, uzoq o'yga toldi. Men ustodning mahzun chehrasiga qarab dilidan nelar kechganini, yuragida ne dardlar borligini o'yladim. Shayx yoshligida bo'y-basti kelishgan, bag'oyat xushsurat yigit bo'lgan. Ne-ne sanamlar uning vasli orzusida oh chekib o'tganlar. Jurjon hokimi Qobus ibn Vushmagirning qizi Zarrinabonu shayxga shaharlar orasidagi masofalarni o'lchash usuli haqida kitob yozdirish bahonasida uni lutfan saroyga taklif etgan. Shayx Zarrinabonu aytgan risolani yozib bergan, bonu esa risola buyoqda qolib, shayxning o'ziga muhabbat izhor qilgan. Ray hokimasi malikayi Saida ham shu

ahvolga tushgan. U shayxni molixuliya<sup>1</sup> dardiga muhtalo bo'lgan o'g'lini davolatish matlubida chaqirtirgan. Ammo shayxni ko'rib, o'zi oshiq bo'lib qolgan. Shayx yoshi bir joyga borgan bu malikaning izhori ishqidan zo'r-bazo'r qochib qutulgan. Zotan, shayx ayol zotining dardini ham, ko'nglini ham bag'oyat chuqur tuyadi. Men buni bundan besh-olti yil muqaddam «Al-Qonun»ning oltinchi jildi bitilganda bildim. Bu jildning bir necha fasli<sup>2</sup> ojizalarning kasallari va ularni davolashga bag'ishlangan.

Shayx bu fasllarda ayollar jismi, ularning olatidagi eng qaltis kasalliklar, yomon shishlar, hayz ko'rish va ko'rmaslik, farzand bo'lish va bo'lmaslik sabablari haqida, bu kasalliklarni davolash yo'llari, alxusus, bu ishda jarrohiya usullarini qo'llash to'g'risida shunday bilimdonlik va shunday nozik tafsilotlar bilan bayon qilgankim, kamina o'qib lol qoldim, toki bu faslni yozmoq uchun og'ir dardga chalingan necha-necha ojizalarni ko'rmoq va ularni davolamoq lozimdur. Boz ustiga, bu shunday dardki, Azroil alayhissalom eshikdan kirib kelmaguncha ayol zoti tabibga ko'rinmaydilar. Bir safar Isfahonda badavlat bir savdogar o'z mahbubini behush holda tun yarmidan oshganda olib kelgani yodimda. Shayx buni bilgani uchun bu ishni katta odob va ibo bilan qilar edi, shu boisdan ko'plar unga pinhona murojaat qilar edilar.

«Al-Qonun» kitobining yana bir fasli – oshiqlar vujudi va ularning sevgi aloqalariga bag'ishlan-

---

<sup>1</sup> Molixuliya – asab kasalligi.

<sup>2</sup> Fasl – bob ma'nosida.

gan. Shayx bu nozik masalada ham ajib zukkolik va mayinlik bilan fikr yuritgankim, mahbublarning shayxga bu yo'sin mehr qo'yishining boisini kamina shu faslni o'qiganimda angladim. Shayx uqtiradiki, sevgida ruh bilan vujudni bir-biridan ajratib bo'lmas, oshiq-ma'shuqlar visol onlarida bag'oyat muloyim bo'lmoqlari lozim, alxusus er, toki mahbub jismi shunday yaralganki, ul mayinlikka tashnadur. Shayx bu nozik muammolarni shunday sharm-u hayo va ibo bilan bayon etadiki, uning dilnavozligi va nazokatiga tahsinlar o'qidim.

Shayx xanuz mahzun o'ylar og'ushida edi. U mening betoqat bo'lganimni sezib: «Men ul sho'rlikni, amir Ma'sudga in'om qilib yuborilgan ul baxtiqaro ojizani ko'rmog'im lozim», – deb qattiq uf tortdi.

Men shayxdan: «Ul sho'rlikni taniysizmi», deb so'radim. «Yo'q, men ul bechoraning onasini tanir edim», dedi shayx. Men boshqa savol berishga jur'at etmadim.

Kun botib, qosh qorayganda chodirga qaytdik. Xufton namozidan keyin shayx chodirga sham yoqtirib, qog'oz-qalam so'radi. Men shayxning ko'ngli nazm va navo ishqida ekanini angladim.

Shayx kuy va nazm bobida qalam tebratishga ahd qilsa, tanholikni ko'ngli tusab qoladi. Ilm bobida bir narsa yozishga jahd qilganida esa bil'aks, shogirdlarini yig'adi, o'zi aytib turib, ularga yozdirishni yaxshi ko'radi, ammo she'r ishqida yongan chog'larida tanholikka mayl bildiradi.

Bu safar ham shunday bo'ldi. Men shayxning xayol og'ushida asta tebranib, lablari pichirlab o'tirganini ko'rdim-da, uning xayolini hurkitishdan iymanib, bir chekkaga joy solib yotib oldim.





Qattiq uyquga ketibmen, bir mahal qulog'imga hazin bir ovoz kirganday bo'ldi. Kimdir yurakni ezib, suv qilib yuborguvchi bir tovushda nola qilalar, dard-u hasratlarini aytib yig'lar edi. Uyg'onib ketdim.

Shayx chodirning to'rida boshini xam qilib, o'zi yasagan gijjakda mungli bir kuyni chalib o'ltirardi. Uning yonida Shokalon degan boyagi sersoqol munsafid bolishga yonboshlab yotardi. Yonib bo'layozgan sham shu'lasida shayxning mijjalari-da yosh tomchilari simob zarralariday miltirab turardi. Bildim – shayx hozir chodirda emas, xayolan o'zi chalayotgan hazin kuy qanotlarida boshqa bir olamda parvoz qilib yuribdi.

Kuy tindi.

Shayx mijjalaridagi yosh tomchilarini kafti bilan artib, hamshahariga qarab jilmaydi.

– Qariganda ko'ngli bo'sh bo'lib qolar ekan kishi, Shokalon!

– Ayb qarilikda emas, asli kishini yig'latadigan kuy bo'libdi, – dedi Shokalon, – bitgan bayting ham yurakni tilka-pora qiladi, bastalagan kuying ham. Yana bir o'qi, Abu Ali!..

Shayx bir xo'rsinib oldi-da, ko'zlarini yumib sekin o'qidi:

*Dilimda ona yurt dog'i, bu dardning*

*bormi davosi,*

*Eram bog'idan afzaldir ona yurtingni sahrosi.*

*Ko'zimga to'tiyo qilgum agar bir kun*

*guzar etsam,*

*Musofir xirqasin tashlab diyorum*

*vasliga yetsam.*

– Hayhot! – dedi shayx boshini sarak-sarak qilib. Musofir bo‘lmay, musulmon bo‘lmas, daganlari rost ekan. Judolik ne, tug‘ilgan yurtidan ayrilib musofir bo‘lmoq ne, faqirdan so‘r, Shokalon! Ko‘zimni bir daqiqa yumsam... nigohim oldiga Afshona qirlari keladi, bolalikda cho‘milgan ariqlar va buloqlar keladi. Ko‘zim uyquga ketsa... Buxoro ko‘chalari, Juyi Muliyon dahasi tushimga kiradi. Uyg‘onib ketib tong otguncha to‘lg‘anib chiqamen...

– Abu Ali! Abu Ali! – dedi Shokalon uf tortib.  
– Afshona ham, Buxoro ham sen bilgan Afshona-yu sen bilgan Buxoro emas!..

– Ne chora? – dedi shayx, – ne chora, Shokalon! Sening so‘zlaringga inonmay ilojim yo‘q. Ammo... ne bo‘lmasin, ko‘zimni bir on yumsam, nigohim oldiga bolalik chog‘larim keladi. O‘shal bog‘lar, o‘shal qirlar, o‘shal suvlar esimga tushadi. Qarigan chog‘imda bir ko‘rsam, Afshona bog‘larini bir kezsam, Buxoro ko‘chalaridan bir o‘tsam, padarim qabrini bir ziyorat qilsam, shundan boshqa tilagim yo‘q, Shokalon...

– Inshoollo, tilaging qabul bo‘lg‘ay, Abu Ali! – dedi Shokalon.

– Mayli, – dedi shayx, – sen yotib damingni ol, mening uyqum qochdi, dalaga chiqib, bir aylanib kelamen...

Shayx shamlarni o‘chirib chodirdan chiqdi. Er-tasiga Hamadondan keladigan yuklar yetib keldi. Biz rabotni tark etib, Isfahon tomon yo‘l oldik».

*(Abu Ubayd al-Juzjoni xotiralaridan.)*

## 2

Sipohsolor<sup>1</sup> Abu Tohir tong chog'i ot choptirib kelganida butun saroy oyoqqa turgan, hovlidagi toshfonuslar, qandillardagi shamlar yoqilgan, qilichlarini sharaq-shuruq qilgan navkarlar, ranglari quv o'chgan haram bekalari, tasbeh o'g'irgan ulamolar va yana allaqanday qora ko'lagalar u yoqdan-bu yoqqa izg'ib yurar, sham shulasi yoritolmagan g'ira-shira burchaklardan: «Simob! Simob! – degan shivir-shivir ovozlar eshiltildi. – Buxoro sanami amirning qulog'iga simob quyinish!»

Ikkinchi oshyonadagi salomxonada, tabiblar bo'lsa kerak, uzun oq yaktakli uch-to'rt odam qaqshab-qaltirab turar, to'rdagi shabiston eshigi berk, ichkaridan sekin ingragan bo'g'iq ovoz eshiltildi.

Salomxonaga shitob bilan kirib kelgan Abu Tohir shitob bilan yurib borib eshikni ochdi. Ichkaridan kelayotgan bo'g'iq nola eshik ochilganda qattiqroq eshitildi-yu, eshik yopilishi bilan so'ndi.

Amir Mas'ud, ne-ne janglarda yovga ayovsiz qiron keltirgan, Hindiston chakalakzorlarida qurturgan yo'lbarslar bilan yakkama-yakka olishgan amir Mas'ud, boshini zarbof to'nning etagiga o'rab, yerda yumalab yotar, uning alamli ingrashi ulkan chorburchak xonaning qubbasimon shiftida aks sado berib, sovuq yangrardi. Amirning tepasida qo'rquvdan qo'lidagi kosasi dir-dir titragan notanish bir tabib bilan rangida rang qolmagan eshik og'asi turardi.

Abu Tohir tez yurib borib amirning yoniga tizza bukdi.

---

<sup>1</sup> Sipohsolor – bosh qo'mondon.

– Valine’mat.

Amir tuzoqqa tushgan qushday pitir-pitir qilib, zarbof to’ni etagidan boshini soqit qildi. Xuddi otasining ko’zlariday qiyg’os ko’zlari qontalashgan, yonoqlari bo’rtib chiqqan cho’yanday qop-qora yuzi allaqanday ko’karib ketgan.

– Abu Tohir! – dedi amir Mas’ud, to’satdan ko’zlarida o’t chaqnab. – Ul makkor sahronishin Alitegin padari buzrukvorim uchun kaminadan o’ch olmoqqa qasd qilibdi! In’om etgan fohishasi simob quydi qulog’imga, simob!.. Qani farishta niqobidagi ul jodugar? – dedi amir, qontalashgan ko’zlarini eshik og’asiga qadab.

Eshik og’asi ikki bukilib ta’zim qildi.

– Ul jodugar aqlidan ozmish, amiri kalon!

– Aqlidan ozgan bo’lsa... tiriklayin go’rga tiqmoq lozim ul yosumanni! Hmm... – Amir yana qulog’ini changalladi-yu, yuztuban tushib boshi bilan yer suzishga kirishdi.

Abu Tohir betoqat bo’lib:

– Inshoollo, shifo topasiz, valine’mat! – deb xitob qildi. Faqir amirimga ajab bir xabar topib keldim! Tobariston darvozasining darvoza boni... darvesh kiyimida uch nafar noma’lum kimsalarni tutibdur.

– Noma’lum kimsalar? Men ajaldan so’zlasam, sen noma’lum kimsadan so’zlaysen!..

– Amiri kalon! – dedi Abu Tohir zorlanib. – So’zimning «berdi»sini eshiting. Bu darveshlarining biri o’zini... hazrat Ibn Sino deb atarmish!..

– Hazrat Ibn Sino?

– Baayni shunday!

– E, Yaratgan Egam! Valine’mat padari buzrukvorim bo’yi barobar oltin va’da qilganida ham

borishdan bosh tortib, qochib yurgan xazrat Ibn Sino endi darvesh qiyofasida o'z oyog'i bilan yurib kelmish! – Amir, qontalashgan qisiq ko'zlarini lo'q qilib, boshini likillatdi, likillatganda bir on tinchi-gan og'riq qayta xuruj qildi chog'i, quloqlarini shap ushlab:

– Ibn Sino bo'lsa qayda? – deb ingradi. – Olib kel uni darhol! Yo, xalloq! Shoyad bu hakimi hoziq sabab o'zining bergan bu dardi bedavoni o'zing daf qilsang!

Abu Tohir apil-tapil o'rindan turib, tashqariga otildi.

Bu payt Ibn Sino bilan Abu Ubayd saroyning bog' tomonidagi hovlida, bir mahallar havzi kavсар nomini olgan marmar hovuz bo'yida o'tirishar edi.

Hali kun chiqmagan, biroq hovlidagi chinor va sadalar nafis lolarang shu'laga chulg'angan, oftobni sog'ingan qushlarning kuyi avjiga chiqqan. Tong yeli ovloq qir giyohlarining sal taxir, o'tkir hidlarini ufurardi. Qayerdandir yaqindan qilich-qalqonlarning sharaq-shurug'i, «Hah, ur! Hah, chop!» degan bo'g'i q xitoblar eshitilar, aftidan, saroy ortidagi hovlida sarbozlar mashq qilishmoqda edi.

Ibn Sino g'alati bir holatda edi.

U kecha namozi asrda Abu Ubayd va Shokalon bilan birga Tabariston darvozasiga yetib kelganida kimligini oshkor qilmoqchi emas edi. U o'z sheriklari bilan darvesh qiyofasida darvozadan o'tib, shaharni dahama-daha, ko'chama-ko'cha aylanib chiqmoqchi, qora o'lat to'g'risidagi mudhish gaplarning rost-yolg'onligini so'rab-surishtirmoqchi va shunga qarab biror tadbir ko'rmoqchi

edi. Keyin hovlisiga o'tib, inisi Abu Mahmuddan xabar olish niyatida edi. Uning hovlisi saroydan yiroq emas, Zarrinrud daryosining mashriq tomonida, Shahrison masjidining ortidagi Quyi Gunbaz dahasida, serdaraxt, sersoya, osoyishtagina bir ko'chada.

Buxoroga o'xshash Isfahonning ham o'n ikki darvozasi bo'lar, ustiga tog'da yuk ortilgan fil-lar ham bemalol o'ta oladigan bu darvozalar-dagi hamma darvozabonlar uni yaxshi tanir edi. Agar Tobariston darvozasida ilgarigi darvozabon bo'lganida «Ibn Sino» degan kalimaning o'zi ki-foya qilardi, biroq amir Mas'ud tayinlagan yangi darvozabonlar «Ibn Sino» degan nomni eshitgan-larida ham pinaklarini buzishmadi, yo ishonish-madi, yo ishonishsa ham parvo qilishmay, ke-chasi bilan ushlab o'tirishdi. Faqat tong chog'i og'iz-burnini qora mato bilan bog'lab olgan bir sardor borib, ularni otga mindirib olib ketdi.

Shahar hali uyqudami yo barcha mardumi mo'min uni tark etganmi, qal'a uzra qandaydir sovuq sukunat hokim edi. G'ira-shira ko'chalar, chorrahalar, guzarlarda qandaydir qora soyalar, yo'q, soya emas, o'lik yig'ib yurgan sarbozlar ko'zga chalinardi... Ha, Ibn Sino yanglishmadi, ustlariga qora libos kiyib, og'iz-burunlarini qora mato bilan o'rab olgan sarbozlar, qo'llarida pan-shaxa, ko'chama-ko'cha o'lik yig'ib yurishardi...

Ular daryo sohilidagi guzarlar, tor ko'chalar, xaroba kulbalar bo'sagasida cho'zilib yotgan mur-dalarni xuddi to'nkani tepgandek tepib ko'rishar, so'ng qo'llaridagi panshaxani yerda cho'zilib yot-gan murdaga pichanga sanchigandek sanchib,

dast ko'tarishardi-yu, orqalaridan kelayotgan aravaga otishardi.

Nimqorong'i ko'chalarda o'lik yig'ib yurgan qora soyalar, ayniqsa, Puli Shahrison ko'prigidan o'tib, Naqshi jahon mandoniga yaqinlashganlarida ko'payib ketdi.

Vo darig! Shokalon aytgan mash'um gaplar rost chiqdi, rost!..

Ibn Sino, yuragi tinimsiz zirqirab, bir-ikki joyda to'xtamoqchi bo'ldi. Biroq ularni boshlab borayotgan sardor, qamchi o'qtalib to'xtashni qat'iy man qildi.

Naqshi jahon maydonidan o'tishlari bilan o'ng qo'lda, daryoning u yuzida «Hisor» kutubxonasi-ning yuksak peshtoqlari ko'zga chalindi.

Suyukli maskan! So'nggi yillarda ruhiga safo ko'ngliga tasalli berib kelgan birdan-bir oromgoh! Allomalar, shoirlar, tolibi ilmlar qarorgohi!.. Ibn Sinoning o'z hovlisi ham kutubxonaga yaqin. Quyi Gunbaz dahasi kutubxona ortidagi guzardan boshlanadi. Lekin bu ne? Kutubxonaning baland tillakori gumbazi o'pirilib tushgan, atrof-dagi do'kon va rastalarga o't ketgan bo'lsa kerak, ulkan kultepaga aylangan edi!

Ibn Sino yuragi qattiq siqilib, otining boshini beixtiyor o'ngga burdi, biroq oldinda ketayotgan sardor yana qahr bilan burilib: «Orqamdan qolma!» deb ishora qildi... yana ozgina yursa hovli-joyini, yor-u birodarlarini ko'rardi, inisi Abu Mahmud tirikmi, yo'qmi boxabar bo'lardi. Ne chora? Ko'rolmadi. Bilolmadi!

Mana endi, ko'ngli xufton saroy hovlisida, marmar sarhovuz sohilidagi marmar supada o'tirib-

di. Ro‘paradagi ikki oshyonalik havorang marmar saroy moviy osmondan tiniq yarqiraydi, bog‘da bulbullar sayraydi, dala giyohlari nozik atir ufuradi, issiq non va qovurilgan go‘sht hidi dimoqqa gup-gup uradi, go‘yo shaharda na qora o‘lat bor, na ochlik-yalang‘ochlik!

Ibn Sino ichida achchiq kulimsirab, ko‘zini yumdi!

Ha, nechun bunga ajablanasen, Abu Ali? O‘zing bilgan Shamsuddavla davrida ham, bu shaharda ko‘p yillar hokimlik qilgan Alouddavla chog‘larida ham shu ahvol emasmidi? Mana shu baland devorning u tomonida birov och bo‘lsa, birov to‘q, birovning usti but bo‘lsa, birov yalang‘och emasmidi? Bu tomonida esa mana shu sarhovuz o‘rtasidagi ana u gumbazli shiypon tagida har oqshom misli ko‘rilmagan bazmi jamshidlar bo‘lardi. Bu yerga barcha arkoni harb va arkoni davlat yig‘ilar, tiniq, xushbo‘y sharob favvoralardan oqqan suvday oqar, eng mashhur sozanda va navozandalar o‘ltirish ahlining ko‘nglini xushlar, gohi-gohida esa hovuzning u chekkasidagi so‘ri oldiga harir parda tutilib, unga yosh, go‘zal kanizlar taklif qilinar, ular yarim-yalang‘och bo‘lib raqsga tushishar edi...

Hamadonda-chi? Alouddavladan avval Shamsuddavla hokimlik qilgan chog‘larda-chi?

Bir kun sog‘bo‘lsa, o‘n kun xasta, bir kun hushyor bo‘lsa, o‘n kun sarmast – Shamsuddavla meshday qornini mayga to‘lg‘azib, telba-teskari ishlar qilar, junbushga kelgan chog‘larida o‘zini ulug‘ sarkarda deb his etar, faqat qo‘shni shahar va qo‘shni davlatlar emas, mashriqda sulton G‘aznaviy, mag‘rib-



da Rungacha zabt etish haqida aql bovar qilmas rejalar tuzardi. Saroyga yig'ilgan a'yon-u boyonlar esa qo'llarida limmo-lim qadah mast-alast hokimga hamd-u sanolar o'qishar, o'zini amir al-mo'minin, deb atagan sahnoshin sulton G'aznaviyni kalaka qilishib, tentak Shamsuddavlani ko'klarga ko'tarib maqtashardi, uni birda fotihi muzaffar deyishsa, birda bo'lg'usi amir al-muslimin, deb ayyuhannos ko'tarishardi...

Shon-shuhrat orzusida yongan telba hokim esa bu madhiyalardan battar shishar, shu on, shu daqiqa qo'shin tortishga chog'lanardi. Ha, u tungi bazmi jamshidlarda jo'shib junbishga kelar, ertalab esa meshday qornini changallab, dod-faryod chekar, kechagi «fotihi muzaffar» ertalab kuchala yegan itdek tirishib, iltijo to'la ko'zlari bilan Ibn Sinoning ko'zlariga mo'ltirab qarardi. Uni birda «hazratim», desa birda «taqsiri olam», deb chaqirar, uning aytganini tarki vojib qilmasdi. Ibn Sino esa sababi yoshlik, adolatli shoh haqidagi ko'nglidagi ezgu orzusini ro'yobga chiqarish istagi bilan yonar, o'lim dahshatidan qo'yday yuvosh bo'lib, ko'zlari mo'ltirab yotgan «fotihi muzaffar»ni insofli va diyonatli hokimga «aylantirish»ga tutinardi. Shu niyatda telba hokimga har kuni huqna qilar, og'ziga doru quysa, suyulgan miyasiga ezgu istaklar, adolatli shohlar haqidagi ertak va rivoyatlar, buyuk allomalarning buyuk orzularini «quyishga» tutinardi. Shunda yana bir ajab hol sodir bo'lar, Ibn Sino dorularidan yengil tortgan go'dakfe'l, telba hokim uning ezgu o'ylarini, yetimparvar, gadoparvar shohlar haqidagi ertak va rivoyatlarni jon qulog'i bilan eshitardi.

«Hazratim»ning har bir soʻzini maʼqullardi, nogahon yopishgan bu bedavo darddan davo topsa, inshoollo, oʻzi ham shunday ezgu ishlar qilishga qasam ichardi. Ibn Sino esa yana sababi yoshlik, oqkoʻngillik, meshqorin Shamsuddavlaning bergan vaʼdalari, ichgan qasamlariga oppa-oston inonardi. Inongani uchun ham unga vazir boʻlishga rozilik bergan, keyin vazirlik mansabiga suyanib, devoni lashkarga ajratilgan pullarni devoni davlat ixtiyoriga oʻtkazgan, qoʻshin sonini kamaytirib, madrasalar, karvonsaroylar qurish, ariqlar qazib, dashti biyobonlarga suv chiqarish rejalari-ni tuzgan edi. Lekin, e voh! Uning rejalari amirlar qilichini qinidan chiqargan, insofga yuz tutgan «odil shoh!» esa... qornidagi ogʻriq sal pasayib, kechalari koʻziga koʻringan Azroil alayhissalom daf boʻlishi bilan hazrat Ibn Sinoga bergan vaʼdalari ham yodidan chiqardi! Vaʼdalar oʻrniga Hamadon bogʻidagi xuddi mana shunday gumbazli shiypon tagida yana ilgarigi bazmi jamshidlar boshlanar, yana may va sharob favvoralardan oqqan suvday oqar, yana sozanda va xonandalarning kuy va qoʻshiqlari osmoni falakka koʻtarilar, yana burungiday hamd-u sanolar oʻqilib, kechagina igna yutgan itday ingrab yotgan «oddiy shoh» yana jahonni tiz choʻktirish orzusi bilan yonar edi! Bu hol necha marta takrorlandi! E voh, faqat amir Shamsuddavlaning puch orzulari emas, Ibn Sinoning maʼrifat va ezgulik haqidagi orzulari ham – hamma-hammasi puch xayol boʻlib chiqdi!

Ibn Sinoning xayolini:

– Hazratim? – degan ovoz boʻldi.

Hovuzning oldida sipohsolor Abu Tohir qoʻl qovushtirib turardi.



– Marhamat! Amiri kalon lutfan ko'rhoq istaydur sizni! – Abu Tohir Abu Ubaydning egnidagi quroq jandasiga shubha bilan qarab qo'ydi. Buni payqagan Ibn Sino:

– Bu yigit shogirdim bo'lar, – dedi. – Kaminaga yordam berur. Yo'l boshlang, janobi sardor!

Tanish koshonaning behisob shamlar zo'rg'a yoritgan tor va uzun yo'laklari kimsasiz edi. Ikki yonda saf tortgan ikki tavaqali behisob o'ymakor eshiklar berk, marmar zinalardagi gilamlar yig'ishtirib olingan, yo'lak shipshiydam va ko'rimsiz edi.

Ikkinchi qavatdagi ulkan salomxonaning burchagida bir guruh oq jubbali ulamolar g'uj bo'lib turishar, ularning ko'zlarida qo'rquv va tashvish aks etardi.

Abu Tohir bilan kirib kelgan ikki darveshni ko'rganda ular «gur» etib, bir qo'zg'alib olishdi-yu, yana jim bo'lib qolishdi. O'rtaga cho'kkan jimlikda:

«Ibn Sino darvesh qiyofasida? Voy tavba! Qay biri Ibn Sino?» – degan shivir-shivir ovozlar eshitildi.

Abu Tohir ikki tavaqali naqshinkor eshikni asta ochib, Ibn Sino bilan Abu Ubaydga yo'l berdi.

Shifti va devorlari nozik pushtirang koshinlar bilan ziyatlangan keng, biroq allaqanday fayzsiz xona g'ira-shira edi.

Boya Abu Tohir kirganda gilam ustida yumalab yotgan amir Mas'ud bir mahallar Shamsuddavla, keyin Alouddavla o'tirgan serjilo oltin kursida o'tirar, u o'ng qulog'ini mahkam ushlab olgan, ko'zlari yumuq, ko'kimtir keng yuzida cheksiz bir iztirob muhrlangan edi.

Amir, Abu Tohirning «Valine'mat!» deb shivirlaganini eshitib, ko'zini ochdi-yu, eshikda ta'zim

bajo keltirib turgan ikki qalandarga uzoq qadalib qoldi. Uning ko'kimtir yuzidagi iztirob taajjub bilan, taajjub shubha bilan almashdi.

– Hazrat Ibn Sino?.. O'zini Ibn Sino deb da'vo qilg'on kim?

– Faqir, davlatpanoh!

– Vo ajabo! – dedi amir. – Sen o'shal... hakimi davron Ibn Sino bo'lsang... u amir al-mo'minin elchi yuborganida nechun yashirinding? Nechun mening mushriflarim borganda Hamadonni tark etib, bosh olib qochding? Nechun qochding-u, nechun endi o'z oyog'ing bilan yurib kelding?

Ibn Sinoning lablariga bilinar-bilinmas tabas-sum yugurdi.

– Agar amiri kalon kaminadan norozi bo'lsalar, Isfahonni darhol tark etishga hozirmen, davlatpanoh!

– Yo'q-Yo'q! Men tashrifing sababini so'radim, xolos!

Ibn Sino chuqur xo'rsinib, boshini pastroq egdi.

– Amiri kalon! Kaminani Isfahonga olib kelgan birdan-bir sabab – vabodur!

– Vabo?

– Ma'zur ko'rasiz, amirim, vabomi yo kav-susmi<sup>1</sup>, hozir bir narsa deyishga ojizmen. Va lekin, shaharda uyma-uy qora o'lat kezib yurmish, degan mash'um xabar qulog'imga yetib bordi. Bu mash'um xabar...

– Shaharda qora o'lat kezib yurgan bo'lsa... in-chunin, hukmi Alloh shu erur! – dedi amir, dedi-yu, to'satdan yuzi qattiq bujmayib, o'ng qulog'ini changallab oldi.

---

<sup>1</sup> Kavsus – tif.

– Simob! Makkor Alitegin yuborgan jodugar simob quyinish qulog'imga. Simob!

«Makkor Alitegin yuborgan jodugar?» – Ibn Sino yuragida ko'tarilgan g'alayonni zo'rg'a bosib, taxtga yaqinlashdi.

– Simob? Qanday simob?

– Ul fribgar Alitegin...

– Avval og'riqdan so'zlang, amirim! Beto'xtov og'riydimi yo?..

– Yo'q-yo'q... dam og'rib, dam to'xtaydur. Bigiz suqqanday bezillab og'riydur!

– To'xtaganda-chi? Darhol to'xtaydurmi yo og'riq davom etadurmi?

– Darhol to'xtaydur, darhol! Mana, to'xtadi, Allohga shukur, to'xtadi... Yo'q-yo'q, tag'in boshlandi. Miyamga o'tdi. Quloq pardamni teshib miyamga o'tdi! Simobning o'zi emas, og'u qo'shilgan simob bu, og'u! E, Yaratgan Egam! Yozug'im ne mening, yozug'im?

«O, qattol! Berahm-beshafqat qattol! Sen keltirgan bu qatl-u qirg'in, bu ochlik-yalang'ochlik, bu ofat – yozug'ing emasmi, dajjol?»

Ibn Sino bo'g'ziga kelgan alamni zo'rg'a ichiga yutib:

– Kamina ul kanizni ko'rmog'im darkor, – dedi.  
– Ul kaniz...

– Ko'rmog'i darkor! Subhonollo! Avval bu azobdan qutqar meni! Agar chindan o'shal hakimi davron... hazrat Ibn Sino bo'lsang, bu baloyi nogahoniydan qutqar avval! Keyin... kerak desang, hasmingga ol ul jodugarni!

– Ko'nglingiz to'q bo'lsin, qulog'ingizni davolaymen, amirim. Ammo... davolashdan avval sizga bir arzim bor...

– Avval davola, soʻngra aytasen arzingni!

– Sabr qiling, amiri kalon! Arzim shulki, shahar darvozalari darhol ochilmogʻi darkor. Bu baloyi ofat ogʻushida qolgan shoʻrlik ahli mardum qir-adirlarga chiqib, bahor giyohlaridan bahramand boʻlmogʻi lozim. Shu bugun barcha jarchi va barcha tabiblarni saroyga yigʻmoq joiz! Faqir dorivor giyohlar nomini aytib beramen. Jarchilar va tabiblar jar solib, bu giyohlarni mardumi moʻminga aytmoqlari lozim! Guzarlarda doshqozonlar qurdirmoq darkor. Dorivor giyohlarni qaynatib, suvini uyma-uy ulashmoq lozim. Bilʼaks barcha ahli moʻmin qirilib ketur, amiri kalon!

– E xalloq! – amir qoʻlini qulogʻidan olib, qontalashgan koʻzlarini Abu Tohirga qadadi. – Sen... qay goʻrdan topib kelding, bu telba darveshni? – dedi u, qaltiroq bosib, lekin bir daqiqa tingan ogʻriq qayta xuruj qildi chamasi, kursidan sekin sidirilib tushib, yerdagi gilamga yuztuban yotib oldi. – Hakimi hoziq Ibn Sino emas, makkor bir shayton bu! Bilʼaks... neki arzi boʻlsa, avval davolab, keyin aytsa oʻlurmu bu xunrez?

– Hozir davolaymen, amirim, hozir... Faqat faqirning sharti yodingizda boʻlsin! – Ibn Sino shunday dedi-da, Abu Tohirga yuzlandi. – Uchinchi sherigim qayda? Darhol toping uni! Tuyada dori-darmon solingan sandiqlar bor. Farmon bering. Darhol keltirsinlar!..

– Darhol! – dedi amir ingrab. – Darhol!

Abu Tohir apil-tapil yurib xonadan chiqdi, Ibn Sino oyoq uchida yurib, Abu Ubaydning yoniga bordi.

– Sen hovliga tushib, qizil sandiqni och!..

Abu Ubayd uning so'zini eshitishga sabri yetmay:

– Ustad! – deb shivirladi. – Ustad! Chindan amirning qulog'iga simob quyilganmu?

Ibn Sino kaftini og'ziga qo'ydi.

– Yo'q, chamasi, qulog'i yiringlab, qurt tushgan...

Abu Ubaydning ko'zlaridagi qo'rquv vahimaga aylandi.

– Qurt?

– Hmm! – ingradi amir. – Qaydasen, hakimi hoziq? Daf qil bu baloyi ofatni! Bo'ying barobar oltin beramen, oltin!

Ibn Sino amirga javob bermay, Abu Ubaydga yuzlandi.

– Qizil sandiqni ochsang, ko'k shishachada misr boqilasining shirasini ko'rasen. Uning yonidagi qora xaltada yanchilgan kust, sariq xaltada nazli o'ti bor. To'xta! Nafarmon shishachada kovul urug'ining qaynatmasi ham bor. Chopib tushib, hammasini olib kel!

– Darhol! – dedi amir, boshi bilan yer suzib. – Hoy, kim bor? Saroybon? Darhol keltir dorularni, darhol!..

### 3

Amir Mas'ud uyqudan uyg'onsa ham qimir etishga qo'rqib to'shagida uzoq yotdi. U qattiq uxlagan bo'lsa kerak, oftob mashriqdan mag'ribga ko'chgan, xilvatxonaning kungay tomonini qoplagan sheroziy gilamlar, faqat gilam emas, butun xona – nozik lojuvard koshinlar bilan ziy-

natlangan shift, shiftdagi jimjimador billur qandil, qandilga terilgan shamdonlar, devorlarga osilgan qilich va qalqonlar – hammasi go‘yo qonga bo‘yalganday tiniq qirmizi rangga kirgan edi.

Amirning qulog‘iga qadalgan sanchiq taqa-taq to‘xtagan, xayoli ravshan, horg‘in jismi ajib bir orom va farog‘atda edi. U ko‘pdan beri vujudida bunday rohat-farog‘at sezmagani, faqat bolalik chog‘larida, kechalari suyukli ammasi Xatlibegimning quchog‘ida yotib, uning mayin siynasini o‘ynab erkalangan ma‘sum bolalik chog‘laridagina shunga o‘xshash ajib bir holatda bo‘lardi, xolos.

«Yo, karim! Bu ko‘rsatganingga ming qatla shukur! Osiy bandangdan o‘z inoyatingni darig‘ tutmading. Yomonlar yo‘llagan baloyi ofatni o‘zing daf etding!..»

Ha, kechasi quloq-miyasiga nishtarday sanchilgan og‘riqdan uyg‘onib ketganida, amir bu foniy dunyo bilan vidolashish onlari keldi, deb o‘ylagan edi. Yo‘q, Allohning mehri karamiga qarangi, Ibn Sino timsolida bu hakimi balogardonni yetkazdi!

Bu hakimi hoziq safro rangli uch-to‘rt tomchi malham tomizib, mayizdekkina bir narsani ichirdi hamki, amir ko‘zi uyquga ketganini o‘zi ham bilmay qoldi... Mana, endi, toliqqan vujudida g‘alati orom, xayoli oftobday munavvar, osuda xilvatxonada yolg‘iz yotibdi.

Ajab savdo! Nahot, egniga quroq janda, boshiga eski quloh kiyib olgan bu kekxa qalandar chindan ham hakimi davron atalmish hazrat Ibn Sino bo‘lsa?.. Agar chindan ham o‘shal Ibn Sino bo‘lsa... nechun darvesh kiyimida keldi? Nechun



ermish! O'z ixtiyorim bilan kelishimga sabab – shaharda uyma-uy kezib yurgan qora o'lat demadimi bu darvesh? Vabomi – kavsusmi, xullas kalom, ahli mardumning boshiga tushgan baloyi ofat sabab rahm qilib keldim, demadimi u? Ha, shunday dedi! Shahardagi barcha jarchi, barcha tabiblarni chaqirmoq kerak, dedi. Dorivor giyohlarim bor, daha-dahalarga doshqozonlar o'rnatmoq lozim, bu dorivor giyohlarni qaynatib, ahli mo'minga ulashmoq darkor, dedi. Shahar darvozalarini ochib, mardumi mo'minni qir va adirlarga chiqarmoq lozim, toki men aytgan dorivor giyohlarni terib yesinlar, dedi.

Vabo! Qora o'lat!

Mana, bir oydan oshdiki, bu baloyi azimdan amirning o'zi ham qattiq vasvasada. U saroy darvozalarini taqa-taq yoptirgan. Odam bolasi uyoqda tursin, pashsha ham kirolmaydi. Lekin pashsha kirolmasa ham bir-biridan sovuq xabarlar qulog'iga yetib kelmoqda. Uyma-uy kezib yurgan qora o'lat to'g'risida, ochlikdan it, mushuk va, hatto, kalamushlarni yeya boshlagan yo'qsillar to'g'risidagi mudhish mishmishlar amirni ham vahimaga solmoqda, kechalari kafanga o'ralgan o'liklar, juldur chopon gadolar, qoqsuyak tilamchilar tushlariga kirib, oromini buzmoqda. Shu boisdan ham dovrug'i olamga ketgan bu allomayi zamonning o'z oyog'i bilan kirib kelgani yaxshi bo'ldi. Yaxshi bo'ldi-yu, biroq uning kelishi bilan boshqa bir g'oyat nozik va g'oyat qaltis muammo tug'ildi. Agar darvesh qiyofasidagi bu kimsa chindan ham o'shal hakimi davron Ibn Sino bo'lsa, amir uni darhol, shu bugunoh dorus-saltanatga, padari buzrukvorining

huzuriga jo'natmog'i lozim! Chunki hazrat Ibn Sino Isfahonga, amir Mas'ud saroyiga tashrif buyurgani to'g'risidagi bu xabar G'aznayi munavvaraga yetib borsa, davosiz dard otashida qovrilib yotgan valine'mati ne deydi? Usiz ham o'z pushtikamaridan bo'lgan farzandidan hadiksirab, uni toj-u taxtdan mosuvo qilish niyatida yurgan otasi qahr qilichini yalang'ochlamasmikin? Yalang'ochlaydi! Bas! Bu xabar ovoza bo'lmasligi darkor, uni hech kim, alxusus, taniydigan odamlar ko'rmasligi joiz! Agar lozim bo'lsa boshqa tabib va jarchilar jar solsinlar, doshqozonlarda dorivor giyohlarni qaynatib, fuqaroga ulashsinlar, Ibn Sino esa... Yo'q, uni hech kim ko'rmasligi ma'qul, saroyda turganini hech kim bilmasligi darkor!

Amir shu to'xtamga keldi-yu, yostig'i ostidan shaqildog'ini olib shaqillatdi. Eshik og'asi yo'q bo'lsa kerak, Abu Tohir kirib, amirning qarshisiga tizza bukdi, bukarkan:

– Allohga shukur! – deb kulimsiradi u. – Rang-ro'yingiz yaxshi, amiri buzrukvor!

Amir qovog'ini uyib:

– Anov... Darvesh qiyofasidagi tabib qayda! – deb so'radi.

– Tabib... Ijozatingiz bilan hamadonlik jodugarni ko'rgani ketdi, valine'mat.

– Hmm... – amir, parqu yostiqlarini qo'ltig'iga tortib, oyoqlarini ko'rpachaga uzatdi. U ham otasiga o'xshab, eng yaqin nadimlariga oyoq uqalashni yaxshi ko'rardi.

Buni bilgan Abu Tohir beixtiyor amirning oyoq tomoniga siljidi. Lekin shu payt eshik beruxsat ochildi-yu, eshik og'asi kirib, ta'zim qildi:



– Bir qoshiq qonimdan kechgaysiz, amirim, divsuvor!

– Qaydan?

– Dorus-saltanatdan, amiri kalon! Ul mehri daryo Xatlibegimdan maktub keltirmish!

Amir shitob bilan o'rnidan turdi-da, to'rdagi yo'lbars terisi bilan qoplangan naqshinkor kursiga borib o'tirdi.

– Ijzat et, kirsin!

Eshik og'asi chiqishi bilan bo'sag'ada boshida divsuvorlar nishoni qadalgan qunduz telpak, eg-nida qalin jun chakmon, belini kumush kamar bilan bog'lab olgan, ko'zlari uyqusizlikdan qontalashgan bir navkar kirib, poygakka tiz cho'kdi-da, lom-mim demay qamchisining dastasini burashga kirishdi.

– Maktub!

Divsuvor hamon indamay qamchisining dastasini burar edi. To'satdan, dastaning bosh tomoni ajralib, qolgan qismida ingichka kavak ko'rin-di. Divsuvor kavakdan naycha qilib o'ralgan bir qog'ozni olib amir o'tirgan kursi tomon emaklab kela boshladi.

– Kimxob to'n!

Amir qaltiroq qo'llari bilan naysimon maktubni yozib, o'qishga kirishdi. Uning qiyg'os ko'zlari qog'oz sathidagi chumoli izi yanglig' mayda satrlar ustida yugurarkan, hayajondan bo'g'riqqan qoramtir yuzida taajjub alomati zohir bo'ldi, taajjub hayrat bilan almashdi-yu:

– Subhonollo! – deb o'rnidan turib ketdi.

Abu Tohir rangi o'chib:

– Ne mujda bor? – deb so'radi. – Ul valine'mat amir al-mo'minin, inshoollo, salomatdurlar?

– Salomat! Inshoollo, salomat! – Amir to‘satdan asabiy xaxolab kuldi. – Ul hakimi davron... hazrat Ibn Sino dorus-saltanatda... emish!

– Yo, tavba! Hazrat Ibn Sino dorus-saltanatda?

– Ha, hakimi davron Ibn Sino G‘aznayi munavvarada paydo bo‘lgan emish! Uni o‘sha, ikki oy muqaddam kelib ketgan ariz Abulvafo Sariq Teginoboddan topib borgan emish. Vaziri a‘zam Ali G‘arib bilan anov... hezbachcha Abul Hasanak as‘asa-yu dabdaba bilan kutib olgan emish hazratlarini!

– Vallohu a‘lam! – dedi Abu Tohir yoqasini ushlab.

– Sen ersa... bu darveshga inonib yuribsen!

– Amiri kalon! Davlatpanoh! – Abu Tohir kimning oldida turgani yodidan chiqib yoqasini ushlaganicha u yoqdan-bu yoqqa yurdi. – Yo‘q, yo‘q, bu so‘zga inonmang, valine‘mat! Ya‘niki, dorus-saltanatda paydo bo‘lgan ul Ibn Sino... chin Ibn Sino emas, yolg‘on Ibn Sino!

Amirdan sado chiqmadi. U to‘rdagi kursiga suyanganicha uzoq o‘yga toldi. Tuynukdan quyilgan qizg‘ish shu‘lada uning otasining yuziday dag‘al keng yuzi niqobday sovuq, siyrak qoshlari qattiq chimirilgan, taqasimon murti tagidagi yupqa lablari allanimalarni pichirlar, u go‘yo o‘z-o‘zi bilan gaplashar edi.

– Yolg‘on Ibn Sino nechun kerak u ikki korchalonga?

– Nechun? – dedi Abu Tohir, kinoyali kulimsirab. – Harqalay, yaxshi niyat uchun emasdur, amirim!

– Inchunin?



– Inchunin amir al-mo‘mininning ishonchini qozonmoq, so‘ng davolash bahonasida shu soxta Ibn Sino qo‘li bilan..? – Abu Tohir o‘z gumonidan o‘zi qo‘rqib ketib «yalt» etib amirga qaradi.

Amir, qisiq ko‘zlari battar qisilib, unga tikan-day qadalib turardi.

– Qo‘li bilan ne? «Xudo»sini aytding, «berdi»sini ham ayt, Abu Tohir!

– Valine‘mat, siz aytgan ul ikki makkor hech narsadan qaytmaydi! Ul soxta hakim qo‘li bilan og‘u berishdan ham qaytmaydi ul ikki shayton!

Amir belidagi egri qilichni ko‘zguday yaltiragan etigiga shaq-shaq urib, u yoqdan-bu yoqqa yura boshladi. Uning tor peshonasi tirishib, yuzida ko‘pdan beri yuragini kemirayotgan chuqur bir iztirob aks etdi.

Abu Tohir haq! Suyukli ammasidan kelgan xuyfiya maktubda ham shunga o‘xshash bir fikrning shabadasi bor. Xatlibegim ishonchli divsuvorga ham uncha inonmagan bo‘lsa kerak, buni ochiq aytmagan, lekin baribir, maktubida shu gapga ishora bor. Amir esa.. yo‘q, amir o‘z padariga yomonlikni ravo ko‘rmaydi... Ammo... vallamat padari buzrukvorining bu mislsiz adolatsizligi!

To‘ng‘ich zurriyoti, shar‘iy valiahd shahzoda Mas‘ud turganda anov telba kenjatoyini valiahd deb ovoza qilgani!..

«Yo‘q, yolg‘iz otasi emas, anov ikki vazir, shaytonni avrab o‘z nog‘orasiga o‘ynatgan anov ikki quzg‘un aybdor bu xo‘rlik, bu haqorat, bu adolatsizlikka! Keksa padarini ilonday chirmab olgan o‘shal ikki iblis aybdor hamma baloga! Bas, bul hazrat Ibn Sinoni yuborib ko‘zini ochmoq darkor

padarining, ko'zini ochib, po'stini shilmoq lozim anov ikki battolning! Po'stini!»

– So'zimga quloq sol! – dedi amir, to'satdan yurishdan to'xtab. – Sen shunga iqrorsankim, dorus-saltanatda paydo bo'lgan ul Ibn Sino, chin Ibn Sino emas, bul Ibn Sino – chin Ibn Sinodur!

– Shunday, amirim!

– Agar bu so'zga iymoning komil bo'lsa, ne qilmoq darkor, Abu Tohir?

– O'ylab ko'rmoq darkor, valine'mat!

– O'ylab ko'rmoq ermish! Hozir, shu bugun eng chopqir otlar bilan o'n nafar navkar shaylagaysen! Oziq-ovqat, kiyim-kechak – hammasi taxt bo'lsin! Subhi sodiq hazrat Ibn Sinoni shul navkarlar bilan G'aznayi munavvaraga yo'llaysen! Shundaykim, ko'pi bilan ikki haftada dorus-saltanatda hozir-u nozir bo'lg'ay! So'zim ayonmu, Abu Tohir?

Abu Tohir lom-mim demay bosh egdi:

– Ayon, amiri kalon!

## YIGIRMA UCHINCHI BOB

Mana, ikki kundirki, vaziri a'zam Ali G'arib Osmon malikasi saroyining salomxonasida sulton huzuriga kirolmay sarg'ayib o'tiripti.

«Hazrat Ibn Sino» ya'niki Hirotdan dabdaba va as'asa bilan olib kelingan Abu Shilqim ibn Shahvoniy ikki kundan beri sulton huzuridan chiqmaydi.

Ali G'arib «hakimi davron» hazratlarini faqat bir marotaba, Teginoboddan kelib saroy oldida soyabon aravadan tushayotganida ko'rdi, xolos.

Aravadan tushgan «hazratlari» darvoza oldida turgan xo'rozday qip-qizil, yum-yumaloq vaziri

a'zam bilan bosh irg'abgina ko'rishdi-da, uning yonida turgan xushqad, xushsurat a'yonga murojaat qildi:

– Ma'zur tutasiz, agar yanglishmasam, janoblari... vaziri buzrukvor Abul Hasanak ibn...

Abul Hasanak miyig'ida kulimsirab Ali G'aribga ishora qildi:

– Vaziri buzrukvor janoblari – bu kishi bo'ladilar.

Lekin «hazratlari» bosh vazirga qayrilib ham qaramadi. Uning mastona suzilgan ko'zlari Osmon malikasining yuksak marmar peshtoqlarida edi.

Bosh vazirga «hazratlari»ning mana shu qilig'i, uni tanib tanimaganlikka olgani, ayniqsa, alam qildi. Vo darig'! Uning oldida tunov kungi qo'rquvdan dir-dir qaltiragan soxta «hakimi davron» emas, go'yo chin hazrat Ibn Sinoning o'zi, balki undan ham serviqor, undan ham basavlat bir kimsa turardi!

– Bilishimcha, – dedi bu kimsa, ovozi vazmin do'rillab. – Bilishimcha, ul oftobi olam faqirni shu qasri benazirda kutmoqdalar. Qani, boshlang vaziri a'zam! – «hazratlari» boshidagi simobiy dastori va egnidagi oppoq ridosini to'g'rilab, saroy tomon yo'l oldi. Uning og'zidan «gup» etib may hidi keldi. Buni sezgan Ali G'arib yalt etib ariz Abulvafo Sariqqa qaradi. Naynov Abulvafo ikki bukilib ta'zim qildi:

– Ne chora, taqsirim? «Hazratlari» aytdilarkim, yaxshi may yaxshi doru emish..

Vaziri a'zam Abulvafo Sariqning gapidagi kinoyani ichiga yutdi-da, «hazratlari»ni hammomga solib, yangi liboslar kiydirishlarini buyurdi. Uning «hakimi zamon»ga oid bergan bitta-yu bitta buyrug'i shu bo'ldi. Chunki hammomdan yangi liboslar

kiyib chiqqan Abu Shilqim ibn Shahvoniy vaziri buzrukvorning yonidan viqor bilan yurib o'tdi-da, salomxonaga nozik mushk-anbar atrini sepib, sultonning shabistoniga kirib ketdi. Hammomga uni Abul Hasanak olib kirgan edi, sultonning huzuriga ham Abul Hasanak olib kirib ketdi. Ikki qarg'a topishdi. U esa bu ishga bosh-qosh bo'lgan vaziri a'zam esa mana ikki kundirki, salomxonada, ikki ko'zi shabistonning dur va sadaflar bilan ziynatlangan naqshinkor eshigida amir al-mo'minning bir og'iz so'ziga zor bo'lib o'tiribdi...

Kechadan beri xilvatxonaga kimlar kirib, kimlar chiqmadi! Ayniqsa, xazinadorlar bilan bakovullar serqatnov bo'lib qolishdi. Xazinadorlar barkash-barkash oltin dinorlar, yoqalariga inju, yoqut va marvarid qadalgan zarbof to'nlari ko'tarib o'tishar, bakovullar esa nozik dorivor giyohlar atrini sochgan tog'-tog' bedana kaboblar, archa ko'mirida pishirilgan barra qo'zilar va yana ming xil nozik taomlarni betinim tashishar, shafaqrang sharob solingan billur idishlarni ko'tarib o'tishardi... Bir necha oydan beri go'riston sukunatiga cho'mib, ulkan maqbaraga o'xshab qolgan Osmon malikasiga to'satdan jon kirib, ari uyasiday g'uvillab qoldi. Kalondimog' eshik og'alari, chaqqon, serharakat yosh mahramlar, bakovullar, rang-barang kapalaklarday lip-lip uchib yurguvchi haram bekalarining yuzlariga tabassum, lablariga kulgu yugurgan, hammaning og'zida oftobi olamga shifo keltirgan «hakimi hoziq Ibn Sino hazratlari»ning muborak nomi, allomayi zamon»ning mo'jizakor doru darmonlari, ajalni daf etguvchi sehrgar muolajalari!..





Goho-goho ikki tavaqli o'ymakor eshik asta ochilib, Abul Hasanakning boshi ko'rinar, shunda ostonada amr-u farmon kutib qo'l qovushtirib turgan xazinadorlar, bakovullar, vazirning so'zini imo-ishorasidanoq ilg'ab olguvchi sodiq mahramlar unga qarab talpinishar edi. Chetroqdagi yumshoq kursida o'tirgan vaziri azam ham shosha-pisha o'rindan turar, u ham Abul Hasanak tomon umid bilan talpinar edi. Lekin Abul Hasanak qovog'ini solib, haqoratomuz bir harakat bilan uni to'xtatadi-da, xazinador va bakovullarga beradigan farmonini berib, asta orqasiga qaytadi. Bosh vazirning sultonning salomatligi to'g'risidagi savoliga esa:

– Alhamdulillah, yaxshi, alhamdulillah! – deb doimo bir xil va doimo noaniq javob qaytaradi.

Vaziri a'zam kecha shu tariqa namozi asrgacha o'tirdi, keyin shabistonga kirishdan umidini uzib, Ko'shki ma'murga qaytishga majbur bo'ldi, so'ng kechasi, saroy uyquga ketganda, shaxsiy ayg'oqchisi bo'lmish bosh bakovulni oldirib, bo'layotgan ishlarni surishtirdi.

Bosh bakovulning aytishicha, «hakimi davron»ning poyqadami yoqqan, sultonning vujudidagi sanchiq to'xtab, ancha yengil tortgan. Shu sababdan davlatpanoh «hakimi zamon»ga bir necha bar-kash oltin in'om etgan, boz ustiga, xilvatxona bilan mashvaratxona o'rtasidan «hakimi davron»ga alohida bir xona ajratilgan. Poshshoyi olam ko'zi ilingan chog'larida «hakimi hoziq» bilan Abul Hasanak shu xonada istirohat qilishar emish.

Vaziri a'zam xufiyaning so'zini eshitib, tong otguncha mijja qoqmadi, xuddi qavat-qavat shoyi

ko'rpalarda emas, tikanda yotgandek ag'anab chiqdi.

Yo'q, Ali G'arib hech qachon Xudovandi karimning qudratiga shak keltirgan emas. Va lekin, o'zini kimsan «hazrati Ibn Sino» deb, ahli mo'minni chalg'itib yurgan bu firibgar tabibning dorulari sultonning davosiz dardiga davo bo'lishi! Bu dorulardan shifo topgan oftobi olamning u makkorga barkash-barkash oltin-u javohirlar in'om qilib, ustiga zarbof to'nlar yopishi! Bu bat-tol tabibni topgan Ali G'arib chetda qolib, barcha ehsonlarni Yaratgan Egam jamol berib, aql bermagan anov hezalak vazirning olishi! Darhaqiqat, teskari dunyo deganlari rost ekan bu dunyoni!

Bugun peshinda salomxonaga to'satdan Xatlibegim kirib keldi. Egnida uzun qora baxmal ko'ylak va tugma o'rniga nijular qadalgan qora duxoba mursak, boshida zar sochilgan qora ipak ro'mol, Xatlibegim chekkadagi yumshoq kursida o'tirgan Ali G'aribga bir o'qrayib qaradi-da, uning salomiga alik ham olmasdan, shabiston tomon yo'naldi. Biroq eshikda turgan ikki mahram aql bovar qilmas bir betakalluflik bilan begimning yo'lini to'sishdi.

Xatlibegiminig upa surtilgan qoramtir yuzidan qoni qochib, surma tortgan qisiq ko'zlari charaqlab ketdi.

– Meni tanidinglarmu itbachchalar yo ko'zlarining ko'rmu?

– Tanidik, oliyhimmat ona begim, tanidik. Va lekin... ijozat yo'q, ona begim...

– Ijozat bo'lmasa kirib arz qil!..

– Arz qilib bo'lmas, ona begim!



– Kim bor xilvatxonada? Darhol xabar ber: of-tobi olamdan hol so'rgani Xatlibegim qadam ran-jida qilmish, deb ayt, itbachcha!

Nimasi bilandur Abul Hasanakka o'xshab ketadigan xushsurat eshik og'asi rangi oqargani-cha xilvatxonaga kirib ketdi. Xatlibegim esa kes-kin burilib, vaziri a'zamga qaradi, go'yo uni endi-gina ko'rganday, shitob bilan yurib, oldiga bordi.

Ali G'arib salomxonaning to'ridagi kichkinagina o'ymakor eshik tomon chekinib, chog'roq xonaga kirdi. Orqasidan Xatlibegim ham kirdi, eshikni zich yopib, bosh vazirning ko'zlariga tik qaradi:

– Bu saroyda... bu saltanatda ne yumushlar sodir bo'lmoqda, janobi vaziri a'zam?

– Faqir... faqir ham hayron-u hayratdamen, begim!

– Hayratdasen! Hamma baloga bosh bo'lib, endi hayratdasen, vaziri a'zam! Kim bor xilvat-xonada?

– Anov... Abul Hasanak.

– Abul Hasanak? Anov xotinchalish hezalak vazir? Tag'in kim?

– Tag'in... hakimi davron... hazrat Ibn Sino!

– Ibn Sinomi yo... o'zini Ibn Sino deb, ahli mo'minni chalg'itib yurgan bir muttahammi?

– Ona begim! Oliyhimmat begim! – dedi Ali G'arib zorli iltijo bilan. – Avvalambor, Yaratgan Egam, qolaversa, shu hakimi davronning muo-lajasi sabab oftobi olamga yopishgan baloyi ofat, inshoollo, daf bo'lmish. Amir al-mo'mininning ahvoli ruhiyasi yaxshi, ko'ngli ravshan topmish. Inshoollo...

– Yaxshi bo'lsa... nechun bu it emgan qul-bachchalar yo'limni to'sadi? Yo, Xatlibegim bilan

sulton Mahmud bir qursoqdan tushmaganmu? Yaminuddavla amir Sabuqteginning pushtikamaridan bo'lgan zurriyot emasmu Xatlibegim?

– Begim! Oliyhimmat begim!..

– Oliyhimmat! – dedi Xatlibegim masxarao-muz. – Agar bu tabib o'sha... hammaga ma'lum va mashhur Ibn Sino hazratlari bo'lsa... nechun uni ahli mardumdan pinhon tutasiz?

– Begim!

– Nechun mavlono Abu Rayhon Beruniydan yashirdingiz uni? Yo, bu ikki alloma do'st-u bi-rodar ekanidan xabarlarini yo'qmu janoblarining?

– Alloh shohid! – dedi bosh vazir munchoq ko'zlarini shiftdagi tuynukka tikib. – O'limdan xabarim bor va lekin, bundan xabarim yo'q, begim.

– Malik ul-sharob qayda?

– Malik ul-sharob? – Bosh vazir javob berib ul-gurmadi, shu payt eshik ochilib, bo'sag'ada rangi oqargan eshik og'asi paydo bo'ldi.

– Oliyhimmat begim, afv etsinlar. Kirishga ijozat bo'lmadi!

Xatlibegim, xuddi bexosdan zarb yegan odam-day, turgan joyida chayqalib ketdi-yu, yumshoq kursining naqshinkor suyanchig'ini changallab oldi. Aftidan, eshik og'asining so'zi umrida rad javobini eshitmagan bu shaddod xotinga malomat toshidan ham qattiq tekkan edi. Begimning tirnoqlariga xina qo'yilgan uzun qoramtir barmoqlari kursi suyanchig'ida dir-dir titrar, yupqa lablari xuddi yaralangan qush qanotlariday pirpirab uchardi.

– Bu so'zni kim aytdi senga, eshik og'asi? Anov hez... hezbachcha vazirmi yo...

– Har ikkovi, begim. Vazir ham, ul hakimi zamon... hazrat Ibn Sino ham! Olampanohning o'zlari ham begimni ko'rishga ro'yxushlik bermagan emishlar!

– Yolg'on! Yolg'on so'z bu, eshik og'asi! Daf bo'l ko'zimdan! – Xatlibegim shartta burilib, vaziri a'zamga qaradi. Burilganda bo'ynidagi qat-qat zebigardon va marvarid shodalari, quloqlaridagi yoqut ko'zli oltin sirg'alari nafis jaranglab ketdi-yu, yuksak qubbasimon shiftga g'alati aks-sado berdi.

– Vaziri a'zam! – dedi Xatlibegim. Uning ovozi birdan o'zgarib, vazmin va sovuq ohang kasb etdi. – Ul hezalak vazir bilan sening baxtingga amir almo'minin shifo topg'ay! Agar mabodo bu qabih yumushlaring, bu hiylayi nayranglaring sabab... bir falokat yuz bersa!..

– Ona begim! – Ali G'arib qo'llarini ko'kka cho'zib to'satdan yerga tiz cho'kdi. – Sizning qahringiz faqirni cho'chitadi, begim! Alloh taolo o'zi yetkazgan bu najot farishtasini makkorga chiqarib, faqirni nayrangboz deysiz! Yozug'im ne mening? Yozug'im yeti iqlimni oyoqqa turg'azib, chopar ustiga chopar, elchi yo'llab toptirib kelganimmi bu hakimi hoziqni?

Eshikka borgan Xatlibegim keskin o'girilib qaradi:

– Shu so'zlaring rost bo'lsa... kalomulloyi sharifni o'pib qasamyod qilasen!

– Yo, jabbor! Yo, xalloq! – dedi Ali G'arib, hamon ko'kka qo'l cho'zib. – Qasamyod qilamen!

– Qasamyod qilsang... ertaga mavlono Abu Rayhonni saroyga yo'llaymen. Mavlono bu hakimi davron bilan suhbat qurib, izhori ixlos qilajak!

Men og'amning, bir qursoqdan tushgan yolg'iz og'amning ahvoli ruhiyasini bilmog'im darkor, uning diydorini ko'rmog'im lozim.

Xatlibegim, qora ro'mol o'ralgan takabbur boshini baland ko'targanicha, shitob bilan yurib xonadan chiqdi. Vaziri a'zam esa o'rnidan turishga majoli yetmay, o'tirgan joyida o'tirib qoldi. Bu o'ktam, erkakshoda xotin uni yomon ko'rishini, uning bitta-yu bitta maqsadi og'asi o'rniga suyukli jiyani amir Mas'udni taxtga ko'tarish ekanini vaziri a'zam yaxshi biladi. Amir Sabuqteginning, – Alloh uning gunohlarini kechirgay! – yolg'iz qizi, sultoni salotinning suyukli singlisi bo'lmish bu takabbur begimning bosh suqmagan ishi yo'q, saroyda sohibi devon Abu Nasr Mishkan kabi o'z odamlari, arkoni harb va arkoni davlat orasida o'z tarafdorlari, o'z xufiyalari bor. Vaziri a'zam buni biladi, juda yaxshi biladi, biroq shunday bo'lsa ham, uning bunchalik qahri qattiq ekanini birinchi ko'rishi!

Mavlono Abu Rayhonni yuborar emish! Topgan so'zini qarang bu farishtasiz alvastining!

Ali G'arib biladi: bu zanjibashara alvasti bilan o'sha dahriy mavlono Beruniy orasida pinhoni bir sir bor. U takabbur allomaning boshiga mushkul tushsa, bas, bu jodugar darhol hozir-u nozir bo'ladi, darhol uni o'z panohiga oladi. Mana, yaqinda ul betavfiq mavlono sultonning g'azabiga duchor bo'lib, «Qal'ayi qahr»ga tushganida ham uni shu yosuman qutqarib oldi, qo'lga farmon tutqazib, malfiy mushrif bilan «hakimi davron»ni qarshi olgani jo'natdi. Yolg'iz Beruniy emas, anov shakkok shoir Malik ul-sharobni ham qo'lga oldi.

«Mitti tulki», deb nom chiqargan bosh devon sohibi Abu Nasr Mishkanni ishga solib, u mayparast shoirni zindondan chiqardi va Abu Rayhonning orqasidan yugurtirdi!

Yaxshiyamki, vaziri a'zamning xufiyalari bu jodugarning xufiyalaridan chapdastroq ekan, hamma ishning oldini olishga muvaffaq bo'lishdi. «Hakimi davron» atalmish bu soxta Ibn Sinoni tanib qolishi mumkin bo'lgan odam borki, hammasining qayta hibsga soldi. Endi bu «hakimi zamon»ni taniydigan birdan-bir olam qoldi, u ham bo'lsa mana shu alvasti aytgan iymonsiz Beruniy!

«Osiy bandangni o'zing kechirgaysen, e Yaratgan Egam! Ali G'arib ne qilmasin, sening yerdagi soyang bo'lmish amir al-musliminga mehr-u sadoqat azmida qildi. Mana hozir ham izhori ixlos ahdida uning ostonasida tiz cho'kib o'tiribdi. Faqirdan faqat yaxshilik ko'rgan bu ko'rnamaklar esa uni xor qilib, ustiga chiqib oldilar! Axir bu ne haqorat? Ne ko'rgulik? Qaysi gunohlari uchun bu intiqomni ravo ko'rasen, e Xudovandi karim?..»

Vaziri a'zam yaqinlashayotgan oyoq tovushlarini eshitib apil-tapil o'rnidan turdi. Eshikda, ko'zlari hadik bilan javdirab... Abul Hasanak turardi.

– Anov... qari yosuman daf bo'ldimu?

– Daf bo'ldi.

– Xayriyat! – Abul Hasanakning lablariga al-laqanday istehzo aralash sho'x kulgu yugurdi. – Faqirni kechirgaysiz, taqsirim! Ul hakimi davron, «Ibn Sino hazratlari»ning xohishi shu edi!

– Kaminaga «hakimi davron» emas, oftobi olamdan so'zlang, janob vazir!

– Oftobi olam otdaydurlar!

– Otday?

– Shundaykim, ko'ngillari may va moh<sup>1</sup> tilamish! Hozir mashvaratxonaga qirq gulidan bir guli ochilmagan sohibjamollar, sozanda va navozandalar yig'ilur!

– Sozanda va navozandalar? Hazil-mutoyibaning o'rni emas, janob...

– Hazil-mutoyiba? – Abul Hasanak mastona qiqirlab kuldi-da, eshikni yopib shivir-shivirga o'tdi. – Bu hakimi hoziq siz topgan soxta Ibn Sino emas, o'shal, olamga mashhur va ma'lum chin Ibn Sinoning o'zginasidur, taqsiri olam. Shundaykim, bu allomayi zamon ming bir dardga davo topg'usidir, hattokim, (Alloh o'zi afv etgay!) o'likni tiriltirmoqqa qodirdurlar. Inonmasangiz orqamdan yuring, taqsirim!

Abul Hasanak bilan Ali G'arib salomxonaga, salomxonadan xilvatxonaga, undan mashvaratxonaga o'tdilar.

Baland qubbasimon shiftiga behisob billur qandillar osilgan o'rdaday keng, muazzam mashvaratxonaning to'ridagi serjilo oltin taxt o'ringa ulkan so'ri o'rnatilib, unga lolarang ipak gilamlar, gilamlar ustiga qat-qat shoyi ko'rpachalar yozilgan edi. Bu ko'rpachalarda... oftobi olam oq parqu yostiqlarga yonboshlab yotardi... Sultonning o'ng tomonida egnida banoras to'n, boshida mo'risimon ko'k duxoba taqya ustidan simobiy salla o'rab olgan «hakimi davron»... Ibn Shahvoniy chordana qurib o'tirar, chap tomondan esa shoir Unsuriy joy olgan. Ularning oldidagi dasturxonda nozik giyohlar bo'yini taratgan qip-qizil

---

<sup>1</sup> Oy yuzli malak ma'nosida.



bedana kaboblar, archa hidi ufurgan qovurmalar, nafis yoqut va firuza likopchalarda oltinday tovlangan shinnilar, guldor chiniy taqsimchalarda yuz xil shirinliklar, shafaqrang may, gulob va sharbatlar to'la billur idishlar saf tortgan.

Mashvaratxonaning to'rt burchagidagi to'rtta yoqutkosalardan harir ko'kimtir tutun ko'tarilar, tutun bilan birga mushk-anbar, archa, kiyik o'ti, rayhon va yana qandaydir dorivor giyohlarning o'tkir va xushbo'y hidi dimoqqa gup-gup urardi.

Sulton, eshikda paydo bo'lgan bosh vazirni ko'rib, favqulodda chaqqon harakat bilan qaddini rostlab o'tirdi, qovoqlari shishgan kipriksiz ko'zlari allaqanday suzilib:

– Ofarin senday vaziri a'zamga! – deb zaharxanda qildi. – Senga o'xshash suyangan tog'larim kaminaga go'r qazib, kafan bichib yurgan edinglar. Mana Yaratgan Egam o'z inoyatini darig' tutmay, hakimi davron... Ibn Sino hazratlarini yetkazdi...

Sultonning rang-ro'yi uncha o'zgarmasa ham, qurigan terakday qoqsuyak gavdasida qandaydir pinhoniylar bir kuch, kishini tahlikaga solguvchi avvalgi shiddat paydo bo'lgan, kuni kechagina pili-gi pasaytirilgan chirog'day miltirab turgan qisq ko'zlari bugun qayta chaqnab charaqlab ketgandi.

Ali G'arib, vujudini sovuq ter bosib, so'ri oldiga cho'kkaladi.

– Oftobi olam! Inshoollo, arzi ixlosingiz yaratganning qudrat qulog'iga borib yetgay! Hazrat Ibn Sinoni yetkazgan ul sarvari koinot sizday amir al-musliminni o'z hifzi himoyatiga olib, barcha baloyi nahslarni daf qilg'ay! Umri saodatingizga

saodat qo'shg'ay! G'animlaringiz kuyib, xesh-u aqrabolaringiz xushnud bo'lg'ay! Ilohi omin...

– Omin!.. O'rningdan tur, Ali G'arib! Faqirga o'z sadoqatingni izhor qiladurg'on saodatli onlar keldi!

Ali G'arib, qo'li ko'ksida, jur'atsizgina o'rnidan turib, shoyi ko'rpachalar to'shalgan so'ri chekkasiga omonatgina o'tirdi. O'tirarkan, shoir Unsuriyning lablarida bilinar-bilinmas tabassum jilva qilganini ko'rib qoldi. Soqol-mo'ylovini qaychilab, allaqanday yasharib ketgan Unsuriy Abul Hasanak bilan negadir o'g'rincha ko'z urishtirib oldi.

«Yo, Rab! Bu ne imo-ishora! Ne savdo?»

– Sadoqati zohir qulingiz toabad xizmatingizga muntazirmen, olampanoh!

– Muntazir bo'lsang... bir xizmat borkim, uni sidqidildan otqarsang toabad minnatdor bo'lamen. U dunyo bu dunyo bu yaxshiligingni unutmeymen.

– Bosh ustiga, davlatpanoh!

– Bosh ustiga bo'lsa... ul ne'mat, ya'niki malikul kalom Unsuriy aytgan ne'mati ilohiy yodingdami, Ali G'arib?

– Ne'mati ilohiy?

– Ha, mana bu kitobda bitilgan ne'mati ilohiy!  
– shoir Unsuriy xontaxta ostidan ko'k saxtiyon jildli og'ir kitobni qo'liga olib Ali G'aribga yuzlandi. – Yodingizda bormi, bundan bir oy muqaddam shu masalada mashvarat chaqirilgan edi. Hech bir alloma bu jumboqqa javob topmagan, anov allomayi gumroh Abu Rayhon esa bu kitobda bitilgan so'zlarni cho'pchakka chiqargan edi...

– Cho'pchak? Hazar, alhazar! – Boyadan beri qandaydir ulug'vor sukutga cho'mib o'tirgan

«hakimi davron» o'ychan nigohini yerdan uzib, shiftga tikdi. – Hindlar yurtida necha yil yurib, ul «ne'mati ilohiy» qaydayligi bilmasa? Hazar, alhazar unday allomayi zamonga!

Mittigina chiniy piyolaga «qult-qult» sharob quyayotgan Abul Hasanak yalt etib «hakimi davron»ga qaradi.

– Chaqirmoq kerak uni! Chaqirib adabini bermoq darkor uning!

– Yo'q-yo'q, – dedi «hakimi davron», nimadandir hadiksirab. – Kamina unday gumrohlar bilan yuz ko'rishishdan hazar qilamen! Yodingizda bo'lsin, janobi vazir! Ul «ne'mati ilohiy» Ko'hi Sarandipda o'sadur! Ha, o'shal, Odam Ato bilan Momo Havo jannatdan keyin makon qilgan Ko'hi Sarandipda o'sadur!.. Ko'hi Sarandip esa Hindiston bilan Chin o'rtasidadur. Ya'nikim, Hindiston sarhadidan o'tgach, hamisha mashriqqa yuz tutib, otda qirq kecha-yu qirq kunduz yurasiz. Qirq shahar, qirq nahr va qirq tog'dan oshib tushasiz. Shunda nigohingiz oldida bir ummon namoyon bo'lurkim, kemaga tushib, yana qirq kun suzasiz. So'ng ko'z oldingizda qirq orol namoyon bo'lur. Qirq orolning o'rtasida go'zallikda tengsiz bir orol, orolda esa odam alayhissalom makon qurgan Ko'hi Sarandip zuhur bo'lurkim, unda o'shal mo'jiza daraxt, ya'niki ul sarvari koinotning qudrati bilan yaralgan «ne'mati ilohiy» o'sadur!

– Otda qirq kun, kemada qirq kun – hech vaqo emas! – Abul Hasanak qo'lidagi piyolani bo'shatib, shoir Unsuriyga yer ostida o'g'rincha bir qarab qo'ydi. – Vaziri a'zam janoblari bunday safarlarga o'rganib qolgandurlar!

– Balli! – dedi shoir Unsuriy. – Toj-u tax-timizning shon-u shavkati, dinul islomning dasti shamshiri, saltanatning faxri iftixori oftobi olamning salomatligi yo'lida chekilgan har qancha zahmat har bir sadoqati boqiy mahram uchun rohat-u farog'atdur!

«Vo darig'! Nechun men bu shirinzabon to'tiqushning shakar tilini o'z vaqtida sug'urib olmadim, sug'urib olib, itlarga tashlamadim! Nechun?»

«Hakimi davron» hazratlari viqor va salobat bilan o'tirgan joyida bir tebranib:

– Ofarin sizga, malikul kalom! – deb xitob qildi. – Bahodirlig-u dilovalikda yagona bo'lmish oftobi olamning sihati yo'lida har qancha g'urbat cheksak – oz! Zeroki, ul ne'mati ilohiy shundaykim...

– O'likni tiriltiradur!..

– Yo'q!.. – dedi Abu Shilqim ibn Shahvoniy asta bosh tebratib. Uning allaqanday viqorli, xushsurat chehrasida sokin va xiyol g'amgin bir ifoda zuhur bo'ldi. – O'lim – hukmi Allohdur! Va lekin, tuproqdan loy qorib Odam Atoni yaratgan, so'ng nafasidan ufurib jon ato qilgan Xudovandi karim shunday ne'mat ham yaratmishkim, bu ne'mati boqiyini qirq kun har laylu nahor iste'mol qilgan bandasi... xasta bo'lsa ming bir dardiga davo topadur, keksa bo'lsa qirchillama yigitga aylanadur.

Shoir Unsuriy negadir ko'ziga yosh olib:

– Ofarin sizga, Ibn Sino hazratlari! – deb xitob qildi.

– Oftobi olam! – dedi Abul Hasanak, – qirq yashar chog'ingiz yodingizdamu?

– Faqirning yodida! – shoir Unsuriy o'rnidan turib, ta'zim bajo keltirdi. – Qirq yoshida olampa-

noh Hindistonni zabt etib, Xuroson va Movarounnahrni tiz cho'ktirganlar!

Abul Hasanakning mastona suzilgan ko'zlarida sho'x uchqunlar jilva qildi:

– Hindiston emas, hind parivashlarining qalblarini zabt etganlar! Xuroson emas, Xurosonning ohu ko'zli sohibjamollarini, Movarounnahr emas, Movarounnahrning bodomqovoq huriliqolarini rom qilganlar deng, malikul kalom!..

Vaziri a'zam ko'z ostidan sultonga o'g'rincha nazar tashladi. Sulton, siyrak mo'ylovining uchlari pastga osilib, ko'zlari suzilib yotar, bir qarashda behol yiqilib qolgan shirakayf odamga o'xshardi.

Ali G'aribning o'g'rincha nazar tashlaganini ko'rib qolgan «hakimi davron» negadir bezovtalanib, banoras to'nining cho'ntagidan to'rt buklangan zarvaraq qog'oz olib yozdi-da, undan mayizdekkin bir narsani olib, sultonga uzatdi.

– Baniyati shifo, davlatpanoh! Yaxshi niyat qilib, bu doruni ichib yuboring. Inchunin, bu doru «ne'mati ilohiy»ning ayni o'zi bo'lmasa ham, uning inisidur!

«Yo, tavba, dorumi bu yo afyunmi?»

Sulton Abul Hasanak tutgan bir piyola sharbat bilan dorini ichib yubordi-da, bir necha daqiqa ko'zlarini yumib qimir etmay o'tirdi. Sulton bilan birga «hakimi davron» ham unga tikilganicha qotib qoldi. Nihoyat, sultonning ko'kimtir sarg'ish yuziga sezilar-sezilmas qizillik yugurdi. Buni ko'rgan Ibn Shahvoniy yengil tortib, Abul Hasanakka qaradi. Abul Hasanak ham «ofarin sizga» degandek unga qarab bir jilmayib qo'ydi.

Nihoyat, sulton qisiq ko'zlarini ochdi. U xuddi boshqa bir olamga parvoz qilib qaytgan odamdek

atrofiga allaqanday hadik va qo'rquv bilan qaradi-yu, ko'zi vaziri a'zamga tushib:

– Ha! – dedi nimanidir eslab. – Senga uch kun muhlat, qari tulki! Istagan g'ulom, istagan ot-ulov, istagan ganjingni ol! Devoni davlatning nomidan barcha viloyat va muzofot hokimlariga farmoni oliy yo'lla! Ko'hi Sarandipga borib ul ne'mati ilohiyini olib kelmoq uchun neki yordam darkor bo'lsa – barini muhayyo qilsinlar senga! So'zim ayonmu?

– Ayon, valine'mat!..

«E, Xudo! Iblisni jilovlab mingan bu battol tabibni qay go'rdan topdim? Bir baloyi nogahondan qutulamen deb, boshimga ming baloyi nogahon orttirdim.

– Ayon bo'lsa, darhol yo'lga chiq! Qirq kecha-yu qirq kunduz u yoqqa, qirq kecha-yu qirq kunduz bu yoqqa, jamiki sakson kunda hakimi davron hazratlari aytgan ne'mati ilohiyini dasturxonim ustiga qo'yasen!

Vaziri a'zam, tili lol, qulog'i kar, haykalday qotib qoldi. U to'satdan tiz cho'kib yolvorgisi, ne'mati ilohiy haqidagi bu gaplargina emas, ro'parada savlat to'kib o'tirgan «hakimi davron»ning o'zi ham avomni chalg'itib yurgan soxta tabib ekanini aytgisi, buning hammasini o'zi o'ylab topganiga iqror bo'lgisi keldi. Lekin bu fikr xayoliga qanchalik tez kelgan bo'lsa, shunchalik tez daf bo'ldi. E voh, endi bu gaplarni gapirmoq tugul uchini ham chiqarib bo'lmas edi!..

To'satdan, sulton yostig'i tagidan tilla shaqildog'ini olib shaqillatdi:

– Tag'in bir barkash oltin, tag'in bir zarbof to'n! Ali G'aribning vujudini zirqiratgan og'riq xiyol

tarqadi. U umrida ko'p zarbof to'nlar kiygan, behisob oltinlar olgan, biroq har safar, oftobi olamning tabarruk qo'llaridan yangi to'n kiyib, yangi in'omlar olganida a'zoyi badani yayrab, ko'zidan yosh chiqib ketardi...

Zum o'tmay, eshik og'asi yelkasida zarbof to'n, qo'lida bir barkash oltin, ta'zim qilib kirib keldi. Buni ko'rgan vaziri a'zam vujudiga issiq haya-jon yugurib o'rnidan turdi, turdi-yu, keltirilgan in'omlar unga emas, «hakimi davron»ga atalgani-ni sezib, suratday qotib qoldi.

Abul Hasanak, o'rnidan sakrab turib, eshik og'asining qo'lidan zarbof to'nni oldi-da, ta'zim bilan «hakimi davron»ga tutdi. Shoir Unsuriy esa xuddi kumush barkashda oltin emas, «ne'mati ilohiy» uyib qo'yilganday tamshana-tamshana laganni qo'lga oldi.

– Oltin muborak, hazratim!

– Sarupo muborak, hazratim!

Ibn Shahvoniy yelkasiga tashlangan zarbof to'nni to'g'rilab, oltin barkashni olarkan, hamon o'sha viqor va o'sha salobat bilan bosh egdi.

– Toabad minnatdormen, olampanoh!

– Tashakkur, hazratim! Xasta jismimga yopishgan bu baloyi nahsdan forig' bo'lgan kunim oltin-u javohirga ko'mamen sizni! Zero, itingizning to-vog'igacha oltin bo'lsin! Tag'in ne tilagingiz bor, so'zlang, hazratim, hammasi muhayyo bo'lur!

«Hakimi davron» sirli jilmayib, sipolik bilan bosh egdi:

– Faqir... siz oftobi olamning salomatligidan boshqa tilagim yo'qdur, olampanoh. Va lekin, bani odamning salomatligi yolg'iz uning jismi

emas, ruhiga ham bog'liqdur, valine'mat! Inchinin, ko'ngil nechog'liq ravshan, dil nechog'liq safo bo'lsa, jism ham shunchalik tetik bo'lg'usidir. Shu boisdan faqir-u haqir istar edimki, bu qasri oliyda hech bir g'am-anduh makon qurmasa! Bil'aks, G'aznayi munavvarada neki mashhur va ma'lum xonanda va sozanda bo'lsa, barchasi shu dargohi muazzamga yig'ilsa! Soz chalib, siz olampanohning ko'nglini xushlasa! Haramingizda neki yosh kanizlar bo'lsa, bu davran saodatda gul-gul yashnab, xiromon aylasa! Toki, ularning chehrayi shamslarini ko'rib, qalbingizda yigitlik istagi jo'sh ursa! Tomirlaringizdagi qoningiz ko'pirib, vaslingiz ishqida yongan ul ofatijonlarga saodat ato qilsangiz!

Abul Hasanak shirakayf ko'zlarini suzib:

– Ofarin, hakimi davron! – deb xitob qildi. Unga shoir Unsuriy jo'r bo'ldi:

– Tasanno sizga, hakimi hoziq! Faqat ilmi hikmat bobida emas, shakarguftorlik bobida ham faqir sizdan mot bo'ldim, mot!

Ali G'arib sultonga yana o'g'rincha nazar soldi. Sulton, ko'zlari suzilib, sirli ishshayib o'tirar, aftidan, boyagi mayizdekkina narsa uni g'alati bir holga solib qo'yg'an edi. «E, Yaratgan Egam! Bu ne hol, ne hodisa! Men aqlimdan ozdimmi yo g'af-lat tuzog'iga tushgan bu telbalar aqli hushlaridan ayrilib, g'irt tentak bo'ldimi?»

– Darhaqiqat, may va mahlubda sir ko'p! – «Hakimi davron» ko'zlari hayrat va ilhom bilan porlab sultonga yuzlandi: – Oftobi olam ijizat bersalar, ibratli bir rivoyat so'zlab bersam. Inchunin, bundan besh-olti yil muqaddam eski



g'animingiz, Buxoro hokimi Alitegin fisqi fasod gaplarga inonib, kaminani zindonga tashladi. Zindonkim, unga qirq zina bilan tushiladi! Sadoqatli qulingiz bu jahannamda qirq kun ilon-u chayonlarga yem bo'lib yotdim. Ammo Alloh taolo faqirga rahm qildi. Ya'niki, qirq kun deganda ul sahronegin amir shunday bir davosiz dardga chalindikim, noiloj tag'in kaminayi kamtaringa yolvorib keldi! Shunda faqir unga shart qo'ydim: zindonga tushadurg'on qirq zinaning har birida onasi o'pmagan bir sohibjamol tursin! Va har birining qo'lida bir piyola may bo'lsin! Ne chora, davosiz dard sabab ul battol faqirning shartlarini rad qilish chorasini topmadi. Kamina esa qirq kunda adoyi tamom bo'lg'on kamina esa... qirq zinaning har pillapoyasida bir to'xtadim, sohibjamol tutgan maydan bir ho'plab, gulg'uncha lablaridan bir bo'sa oldim. Va shu yo'sin may va bo'sa yordamida zinama-zina ko'tarildim. Sizga yolg'on, Allohga chin, olampanoh, qirq ho'plam may bilan gul yuzli nozaninlar labidan olgan qirq bo'sa sabab behol jismimga shunday bir quvvat ato bo'ldikim, qirqinchi pillapoyaga yetganimda otday bo'lib, zindondan o'zim sakrab chiqib ketdim, olampanoh!

– Aqli shuurlariga tasanno hazratimning! – Abul Hasanak bilan shoir Unsuriyning ketma-ket xitoblari mashvaratxonani yangratib yubordi.

Sulton ham o'rnidan qo'zg'alib:

– Qani o'shal ofatijon nozaninlar? – deb so'radi, so'radi-yu, nigohi bosh vazirga tushib, qiyg'os ko'zlari to'satdan cheksiz bir quvonch bilan charaqlab ketdi.

– Keldingmi, vaziri a'zam? Olib keldingmi ul ne'mati ilohiyini?

Hamma barobar burilib sultonga qaradi, hammaning, hatto, shirakayf Abul Hasanakning ko'zlarida ham qo'rquv va sarosima aks etdi. Mashvaratxonaga birdan jimlik cho'kdi, bu jimlikda eshik orqasidan childirmaning darang-durungi, setor va g'ijjklarning g'it-g'iti eshitildi, ayollarning piq-piq kulgusi, zebi ziynatlarning nozik jarangi quloqqa chalindi.

Vaziri a'zam, tirnoqlarigacha muzlab, yerga tiz cho'kdi.

– Olampanoh! Bir qoshiq qonimdan keching, olampapoh!

– Hanuz topib kelmadingmi ul ne'mati ilohiy-ni? Hanuz ivirsib yuribsenmi bu yerda? Yo'qol! Daf bo'l ko'zimdan, battol!

Abul Hasanak o'rnidan sakrab turdi-da, gilamda yumalab yotgan vaziri a'zamning ketiga bir tepdi.

– Daf bo'l, makkor!

– Daf bo'l!..

Vaziri a'zam, ko'zida yosh, apil-tapil o'rnidan turib, eshik tomon pildiradi. Salomxonada childirmaning gijbangi avjga chiqmoqda, dutor va setorlarning darang-durungi, raqqosalarning sho'x kulgusi yangrardi.

## YIGIRMA TO'RTINCHI BOB

### 1

«Amir Mas'ud farmon qilganidek uch hafta emas, to'rtinchi haftaning chorshanba kuni namozi asrda G'azna yaqinidagi bir bekatga kelib tushdik. Aytishlaricha, G'aznaga yarim kun-

lik yo'l qolgan emish. Har kungidek, ertaga subhi sodiq yo'lga chiqsak, peshinga qolmay G'aznayi munavvaraga kirib borar ekanmiz.

Yopiray! Bosib o'tgan yo'lni o'ylasam... hayratdan yoqamni ushlaymen. Salkam to'rt hafta tun-u kun babbarobar ot suribmiz. Baxtimizga, fasli bahor yaxshi keldi, Allohning inoyati bilan kunlar iliq bo'ldi. Faqat g'uriylar yurtining chuqur daralar va qorli tog'laridan o'tish chog'ida ko'p aziyat chekdik.

Bu tog'lar-u tubsiz daralarda qor ketmagan ekan, shunday joylar bo'ldiki, otlar qorinlarigacha qorga botib qoldi. Agar navkarlar g'ayratli, otlar yaramli bo'lmaganda, ehtimol, jismimiz bu tog'-u toshlar orasida yaxlab, ruhimiz u boqiy dunyoga parpoz qilardi. Ammo oyning yarmi qorong'u bo'lsa, yarmi yorug' deganlaricha bor ekan. Bu uqubatlar evaziga uzoq yo'lda shunday fusunkor joylar uchradiki, bu ko'm-ko'k qirlar, chaman gullagan bog'-u rog'lar, hadsiz-hududsiz yaylovlarni ko'rib, bu foniy dunyoning ko'rk-u jamoliga lol qoldik. Alxusus, Hirot tevaraklari go'zallikda benazir ekan. Bu muzofotning mashriq tomonidagi Bog'dis vodiysidan hisobsiz sersuv tiniq daryochalar oqib o'tar ekan. Bu daryochalar oralig'idagi o'tloqlarni ko'rib ko'zingiz to'ymaydi, bog'lar, tokzorlar, ekinzorlar bir-biriga tutashib ketgan, hamma yoq ko'm-ko'k, musaffo, har qadamda zilol chashma. Shundaykim, bu tiniq chashmalarga havzi kavsar ham teng kelolmas.

Boya g'uriylar yurtining qorli tog'larini aytдим. Darhaqiqat, bu tog'lar bizga ko'p azob berdi. Ammo osmoni falakka tiralgan bu tog'lar ora-

lig'ida Bomiyon degan bir voaha bor ekankim, uni bamisoli bog'i firdavs deysiz.

Vohaning uzunligi nari borsa uch-to'rt farsang, kengligi ko'p bo'lsa bir farsang kelar. Biroq uning qoq o'rtasidan sersuv daryo sharqirab oqib yotar ekan, daryoning ikki qirg'og'i go'zallikda tengsiz, bepoyon bir bog'kim, kirsangiz chiqqingiz kelmaydi. Bu ko'rkam bog'larga shunday tartib berilgankim, unda shaftolizordan xurmozorga, xurmozordan bodomzorga, bodomzordan uzumzorga o'tasiz. Hammayoqda bulbullar xonish qiladi, har qadamda rang-barang, g'aroyib qushlar pir-pir uchadi, har bir daraxt tepasida laylaklar qo'nib o'tiribdi.

Bu vohaning yana bir g'alati tomoni shundakim, daryoning ikki yonidagi xarsangtoshlarga Buddha degan hindlar ma'budining ikki bahaybat haykali o'yib yasalgan. Birining bo'yi kamida yuz gaz keladi, ikkinchisining 60–70 gaz. Toshga o'yilgan bu ma'budlarning yonlarida behisob g'orlar bo'lib, ular ham g'aroyib suratlar bilan bezatilgan.

Xullas kalom, yo'l azobi evaziga ko'p ajoyib narsalarni ko'rishga muyassar bo'ldik.

Aytishlaricha, sultonning eng chopqir divsuvorlari har kuni yigirma-o'ttiz farsang<sup>1</sup> yo'l bosib, G'aznadan Isfahonga ikki haftaga qolmay kirib borar emishlar. Ular tezchopar otlarining yoniga yana bir sara otni shatakka olib, ularni navbatma-navbat minar ekan, bekatlarda esa divsuvorlar uchun maxsus otlar shay turar ekanmi, yetib borishlari bilan otlar almashinar ekan.

Bizga ham shu tartib joriy etildi. Tartib shunday edikim, bizdan oldin ketgan divsuvorlar

---

<sup>1</sup> 150-180 kilometr ga to'g'ri keladi.

bekatlarda eng sara otlarni shay qilib, kutib turar edilar. Biz yetib borishimiz bilan charchagan otlarni topshirib, yangi otlarga minar edik. Bir necha muzofotlarda esa ot o'rniga yuguruk tuyalar berdilar. Shayx yuguruk tuyalarga ilgari ham mingan ekan, kamina minmagan edim, bu ajab holni qarangki, yuguruk tuyalar yugurmoqqa kirishsa eng chopqir bedovlarni ham ortda qoldirib ketar ekan. Bedov charchasa charchar ekanki, yuguruk tuya charchamas ekan. Ammo, sababi keksalik, yuguruk tuyalar bu safar shayxga to'g'ri kelmadi. Zotan bu olis, sermashaqqat yo'l shayxni qattiq qiynab, tamom holdan toydirdi.

Garchand, shayx uchun ot va tuyalarga maxsus kajava va maofa<sup>1</sup> o'rnatib bersalar ham, garchand, yo'lning bir qismini soyabon aravalarda o'tsa ham, sababi keksalik, ustod ko'p aziyat chekdi. Boz, vujud qiynog'iga ruhiy azob qo'shilib, shayx ko'p qiynaldi.

Darhaqiqat, yaxshilikka yomonlik, degan ko'hna matal rost ekan. Bil'aks, shayxning muolijasidan shifo topgan noinsof amir Mas'ud loaqal uyiga borib, inisi Abu Mahmud tirikmi, yo'qmi, xabar olishga ijozat bermasmidi? Na inisi bilan diydor ko'rishishga ijozat etdi, na simob quydi, degan tuhmat bilan zindonga tashlangan Buxoro malagini ko'rishga ruxsat berdi!..

Bu yerda ne sir-asror bor – hanuz bilmaymen, ammo bu sho'rlik sanamni ko'rishga ijozat bo'lmagani shayxga, ayniqsa, qattiq tegdi. Isfahondan G'aznaga ketadigan kuni kechasi shayx mijja qoqmay tor hujrada yurib chiqdi. Sub-

---

<sup>1</sup>Maofa – charmdan yasalgan kursiga o'xshash o'rindiq.

hi sodiq o'n nafar navkarlar qurshovida yo'lga chiqdik. Puli Shahrison ko'prigidan o'tib, Hirot darvozasi tomon yo'l oldik. Kimsasiz ko'chalarda hanuz qora o'lat sharpasi hokim edi. Yuzlari va og'izlarini qora mato bilan o'rab olgan qora ko'lagalardan boshqa tirik bir jon ko'rinmas edi, ular har joy-har joyda yumalab yotgan murdalarni aravalarga ortib yurar edilar...

Biz Puli Shahrison ko'prigidan o'tib, o'ng qo'lga burilganimizda Quyi Gunbaz guzarining masjidi va masjid orqasidagi «Hisor» kutubxonasining muazzam binosi ko'rindi. Kutubxonaning yumaloq gumbazi o'pirilib tushgan, shahar ko'rkiga ko'rk qo'shib turgan muhtasham binoning faqat baland peshtoqlari omon qolgan edi, xolos.

Shayx, ikki ko'zi guzarda, otining jilovini tortib to'xtatdi. Uning hovlisi kutubxonaning orqasida, Quyi Gunbaz guzarining boshida, qo'l cho'zsa tegadigan joyda edi. Biroq oldinda borayotgan chag'irko'z shopmo'ylov mushrif shayxning to'xtaganini ko'rib, uning yoniga bostirib keldi-da, otining sag'risiga ust-ustiga qamchi urdi. Shayx mushrifga lom-mim demadi, ammo bu mash'um voqeadan keyin bir haftagacha og'ziga talqon solib oldi, go'yo chag'irko'z mushrifning qamchisi zarbidan tili soqov, qulog'i kar bo'lib qoldi. Faqat o'n kunlar o'tib, Hirot tog'lari va g'uriylar darasidan chiqib olganimizdan keyingina, chehrasi xiyol yorishdi. Kechalari keng sayhonliklarda yoxud ulkan bekat chekkalarida to'xtab, gulxan yoqib picha hordiq chiqargan chog'larimizda, uncha-muncha gaplashadigan bo'ldi.

Biz har kuni kamida yigirma farsang yo'l bosar edik, ammo qancha yo'l yurib, qayerga yetib

qo'nmaylik, o'shal joyga bizdan oldin uzunquloq gap yetib borar edi. Shundaykim, biz yetib borgan joyda bir qancha xastalar, mayib-majruhlar paydo bo'lib qolar edi. Ular shayxning kelayotganini qaydan bildi, bu sir-asrorni kimdan eshitdi – bu narsa yolg'iz Allohga ayon, ammo davosiz dardga mubtalo bo'lgan bu sho'rliklar dod-faryod bilan shayxning oyog'iga yiqilib, najot so'rar, navkarlar urib-so'ksalar ham ketmas edilar. Shunda shayx navkarlarni to'xtatib, ularni davolashga kirishar edi.

Zotan, shayx safar chog'ida ham orom ne, hordiq ne – bilmadi, bir zum imkon bo'lsa, bas, yo'lda uchragan dasht giyohlarini yig'ar, parranda va darrandalarni kuzatar, gohida ko'nglidagi g'am-anduh xiyol tarqab, dili ravshan tortgan chog'larida yo'ldagi tog' va daralar haqida fikr yuritar, chamamda, bu og'ir yo'lda ham u bo'lg'usi kitoblarini o'ylar edi!

Darhaqiqat, shayx, hatto, raqiblar ig'vosi bilan «Faraj» qal'asiga qamalganida ham fursatni bekor o'tkazmagan, tun-u kun mutolaa va mushohada bilan band bo'lgan edi.

Qal'a begi Ibn Yaqzon insofli, adolatli, diyonatli odam edi.

U shayxga «Faraj» qal'asidagi eng tinch, eng osuda xonani bo'shatib berib, osh-suvidan xabar olib turgan, qog'oz-qalam – hammasini muhayyo qilib bergan edi. Kamina har bomdod qalam-qog'ozlarni olib shayxning huzuriga kirar edim. Shayx aytib turar, men esa yozib olar edim, shu yo'sin to'rt oy bu qal'ada yotganimizda shayx o'zining eng barkamol she'riy va nasriy asarlarini yozib tugatgan edi. «Hay ibn Yaqzon», «Qushlar

risolasi» va «Salomon va Ibsol» degan qissalarini, ko'p she'rlari, musiqa bobidagi risolasining bosh qismi va mantiqqa oid bir qancha asarlarini shayx o'sha qal'ada, mahbuslikda bitgan edi. Keyinchalik shayx: «Bu dunyoda bir yomonlikning bir yaxshiligi ham bo'ladi, raqiblarim ig'vosi sabab «Faraj» qal'asiga qamalmaganimda, ehtimol, bu asarlarim yozilmas edi», deb kulib yurgan edi!..

Lekin «Faraj» qal'asida mahbus bo'lib yotganida, shayx bir daqiqa ham g'am-anduh chekman edi. U mahalda shayx hali yosh edi. Har subhi sodih boshlanadigan suhbatlarimiz goho tun yarmigacha, goho tong otguncha davom etar, kunlar qanday o'tganini bilmas edik. Endi esa shayx qattiq iztirobda edi. Uning yuragini allaqanday pinhoniylar bir alam, hech kimga aytib bo'lmaydurg'on intihosiz bir dard tun-u kun kalamushday kemirar edi.

Bu pinhoniylar dard sirlarini ehtimol hamshahari Shokalon bilsa, biroq Shokalon Isfahonda qolib ketdi, shayx qancha yalinib-yolvormasin, Shokalonni birga olib ketishga ijozat bo'lmadi.

Har oqshom, sahroda to'xtab, gulxan yoqib dam olishga chog'langan paytlarimizda, shayx yiroq-yiroqlarga ketadi-da, tanho uzoq aylanib yuradi.

Shayxga orom bermagan bu g'am-anduhlarining sababi ne? Buni men ko'p yillardan keyin bildim. Ma'lum bo'lishicha, shayx yoshlik chog'larida amir Mas'udga in'om qilib yuborilgan buxorolik malakning onasiga muhabbat qo'yan ekan. Ammo taqdiri azal sabab sevgilisi bilan qovusha olmagan ekan. Shu boisdan ham Isfahon-



da, amir Mas'ud zindonida qolgan sho'rlik qizning qismati unga orom bermay ko'p qiynalgan ekan.

Shoyad endi shayxning omadi kelib, sulton sihat topsa! Shayx esa yuzi yorug' bo'lsa! Shunda sulton ham, ehtimol, lutfi ehson ko'rsatib, tila tilagingni der, shayx esa ul baxtiqaro malakning jonini tilab olar!.. Shoyad shunday bo'lsa!..

Shayx qattiq charchagan edi, bekatga kelib qo'nishimiz bilan o'z hujrasiga kirib yotib qoldi, men taom tayyorlashga kirishdim».

*(Abu Ubayd al-Juzjoniy xotiralaridan.)*

## 2

Yo'l azobi – go'r azobi, deganlari bejiz emas ekan. Boz ustiga, Isfahondan chiqqandan beri yuragini qiymalagan notinch o'ylar, Shokalon aytgan gaplar, amir Mas'ud zindonida qolgan Bo'tako'zbekim qizining taqdiri – buning hammasi diliga bir zum orom bermay tamom holdan toydirgan ekan, Ibn Sino hujraga kirib cho'zildi-yu, ko'zi uyquga ketdi. Biroq bu ne? Ko'zi ilinishi bilan quloqlari ostida mungli kuyday hazin bir ovoz yangradi:

«Men sho'rlikni kechirgaysiz, hakim hazratlari! Ko'z yoshimga rahm qiladigan, zorimni eshitadigan bir kimsani topolmay, tag'in sizga bo'zlab keldim!»

«Yo, tavba! Bo'tako'zbekim! Kamina seni olamdan o'tgan desam!..»

«Ha, men olamdan o'tganmen, hazratim. Suyagim Oloy tog'larining etagiga qo'yilmish, O'g'uz tog'ining bag'riga ko'milmish!»

«Yo, Rab! O'lgan odam tirilib kelsa! Bo'taday bo'zlab yursa!»

«Ne qilay? Yolg'iz qizimning boshiga tushgan musibatni bilursiz. Onayizor, bu musibatni eshitib, go'rimda tinch yotolmadim, oh chekib, Allohga iltijo qildim. Bilmam, ohim arshi a'loga borib yetdimi yo toshni eritgan ko'z yoshlarim ko'kni ham eritdimi, Yaratgan Egam qayta jon ato qildi. Go'rimdan chiqdim-u bo'tasidan ayrilgan oq tuyaday bo'zlab, qizimni izlab Isfahonga bordim. Biroq dodimni eshitadigan tirik bir jon topmadim. Shu-shu, dilim vayron, ko'zim giryon, tag'in ortingizdan quvlab keldim, hazratim. Men uni Allohdan tilab olgan edim. Sizning pushtikamaringizdan bo'lmasa ham, sizdan bo'lganday suyar edim uni!»

«Aytmasang ham angladim buni. O'zing bilgan Shokalon aytdi. Ammo ne chora, begim?»

«Ne chora? O'shal mash'um firoq onlari ham «ne chora», deb noligan edingiz, bugun yana noliysiz. Bu ne badbaxt dunyo ekanki, yomonlikka chora bo'lmasa? Men g'aribning boshidan nelar kechganini hech bir kimsa bilmasa?»

«Sen ham bilmaysen, begim!..»

«Yo'q, bilamen. Men sho'rlikni ko'nglingizdan o'chirib, o'rniga kitoblar bitdingiz. Hakimi davron, degan nom chiqardingiz. Men g'arib esam... Dunyoda Oloy tog'lariday ulkan tog'lar yo'q ekan. Uning qorlariday oppoq qorlar ko'rmadim, suvlariday shirin suvlar ichmadim, Oloy yaylovlari-day ko'rkam yaylovlar yo'q ekan olamda! Men esam... ko'zim yo'lda, xayolim Afshona qirlarida, erta ko'klam siz bilan ot surib o'ynagan lolazor



dashtlar ishqida oy-yillarim o'tdi, oy-yillarim o'tdi!  
Kunduz ko'zim to'rt: karvon yo'llariga tikildim,  
tunlarda unsiz bo'zlab tong ottirdim, siz esa...»

«Sen yozgan kitoblarimni sanaysen, orttirgan shon-shuhratimni so'zlaysen. Men esam... seni bir ko'rmoq uchun yozgan barcha kitoblarim, orttirgan barcha shon-shuhratimdan voz kechar edim! Bir daqiqa ikkilanmay hammasidan voz kechar edim, begim, azizim, ko'z ochib ko'rgan sevgilim!»

«Sevgilim dedingiz! Shu so'zingiz rost bo'lsa... Allohdan tilab olgan yolg'izimni sizga topshirdim! Mana, sulton Mahmudni davolash murodida G'aznaga yo'l olibsiz. Men ham ortingizdan bo'zlab keldim. Omadingiz yurib, sulton shifo topsa, dodimni unga yetkazgaysiz! Yodingizda bo'lsin: sizning pushtikamaringizdan bo'lmasa ham, sizdan bo'lganday sevar edim uni! Agar qizim bir narsa bo'lsa... suyagim Oloy tog'larida, arvohim qarg'ish tekkan Isfahonda, toabad bo'zlab o'tamen, hazratim, bo'zlab o'tamen!..»

Ibn Sino allaqanday bosinqirab uyg'onib ketdi. U devorlariga qizil ipak gilamlar tutilgan serhasham hujrada yotar, tokchalardagi shamlarning aksari o'chirilgan, hujra g'ira-shira, faqat shiftdagi do'ppidekkina tuynukdan oppoq yorug' yulduzlar charaqlab turardi.

Yo, tavba! Bu ne? Tushimi, o'ngimi?

Ibn Sino tush ko'rish hodisasi haqida ko'p o'ylagan, uning sirlarini o'rganishga ko'p urinagan. Ammo... yo'q, bu tush emas, nazarida, u hozir tirik begimni ko'rgan, uning alam to'la tanish, muloyim ovozi eshitgan edi!..

...Ha, o'sha kuni, Isfahonga kelib, amir Mas'udning qulog'ini davolagan kuni, u Bo'tako'zbeginning qizini ko'rish umidida edi. Og'riq azobidan qutulgan amir uyquga ketishdan avval zindon qilingan sho'rlik malakni ko'rishga ijozat bergan ham edi. Biroq zindonbon uni ko'rsatish uchun amirning muhri bosilgan farmoni oliy talab qildi, biroq amir uyqudan uyg'onib, bu farmon olinguncha saroyda qandaydir bir voqea sodir bo'ldi, chamasi, hibsdan yotgan Qorako'zbeginni ko'rsatish u yoqda tursin, uning o'zini hibsga olishdi. Bir kecha hibsdan saqlab, ertasiga tong qorong'usida... qo'l-oyoqlarini bog'lamasalar ham, bog'lagandan beshbattar qilib buyoqqa olib kelishdi!

Ibn Sino yuragi qattiq siqilganini sezib, yostiqaqqa yonboshladi-da, asta ko'zini yumdi. Yumishi bilan nechundir nigohi oldiga yana Afshona ortidagi yam-yashil qirlar keldi. Qir ustida ulkan oq o'tov. Pastda, qir atrofida esa boshqa kichikroq o'tovlar, oq, qizil, qora o'tovlar... Bahor. Dalalar, dalalargina emas, hatto, jonsiz qumliklarga ham jon bitgan, hamma yoq tillarang chuchmomalar, bo'ztikanlar, baxmalday mayin yovshan va shuvoqlar bilan qoplangan, tiniq qo'zigullar, ravoch va xushbo'y kiyik o'tlari, mitti chitirgul va sariqbosh gullar orasida behisob lolaqizg'aldoqlar cho'g'day yonadi, o'tovlar yonida boshlaridagi qizil qalpoqchalariga ukki patlari qadalgan xipchabel, bodomqovoq qiz-kelinchaklar sochlariga taqilgan kumush tangalarni mayin jiringlatishib, chopqillashib yurishadi.

Kechalari, tiniq, seryulduz Afshona kechalari, behisob o'tovlar oldida gulxanlar yonadi, qaror-

gohdan yiroqda, poyonsiz dashtning xilvat joylarida qiz-yigitlar yig'ilishadi, so'ng birda sho'x, birda xiyol ma'yus qo'shiq va laparlar cheksiz-chegara-siz dasht uzra sokin daryoday ohista oqadi.

Yosh Abu Ali bu hazin laparlarni eshitib, qir bag'rida yonboshlab yotarkan, nazarida, qandaydir ulkan kemaga tushib, boshqa bir go'zal olamga suzib ketayotganday bo'ladi. To'satdan, uning qo'liga kimningdir mayin, iliq kafti asta tegadi, go'yo muloyim bir qushcha kelib qo'ngandek tuyuladi.

– Taqsir, bekam yo'qlaydur sizni!

Bodomqovoq, qiyg'osko'z kaniz mitti qushchaday muloyim qo'lini Abu Alining qo'lidan uzmay uni qayoqqadir boshlaydi. Atrof zim-ziyo. Abu Ali hech narsani ko'rmaydi, biroq abjir kaniz hech narsaga qoqinmay qalin saksovluzor tomon boshlaydi-da, qayoqqadir yetaklab ketadi.

Ana, yuqorida, yulduz to'la osmonga qo'shilib ketgan qir ustida ulkan oq o'tov ko'zga chalinadi.

O'tovga yaqin qolganda tanish bo'ribosarlarning vahimali irillashi eshitaladi-yu, zimiston tun qa'ridan ikki yasovul chiqib keladi.

– Bu kim tun yarmida sang'ib yurgan?

– Hakim hazratlari! – deydi kaniz. – Hakim hazratlarini bekam yo'qlamishlar!..

Abjir kaniz Abu Ali sekin turtib, o'tov tomon yo'llaydi.

O'tovning qanotiga osilgan qandilda bita-yu bitta moychiroq miltiraydi. Uning zaifgina shu'lasida o'tov burchagiga tutilgan chimildiq ko'rinadi.

Abu Ali kirishi bilan chimildiqning bir che-ti ko'tarilib, go'yo oqqushning bo'yniday oppoq

nozik qo'llar ko'rinadi-yu, betoqat harakat qiladi: «Beri keling!»

Abu Ali yuragi tuzoqqa tushgan qushday pitir-lab, chimildiqqa yaqinlashadi. Shu payt chimildiq ochilib oppoq nozik qo'llar uning bo'ynidan qu-chib, pastga tortadi.

– Hazratim!

Yerga tiz cho'kkan Abu Ali yuzida Bo'tako'zbe-gimning cho'g'day issiq yuzini, hayajonli nafasini his etadi. Begimning sochlaridan dala giyohlari-ning xushbo'y nozik bo'ylari, lablaridan allaqan-day totli va sho'rtang ta'm keladi...

– Ustad!

Ibn Sino, xayol og'ushidan zo'rg'a qutulib, ro'parasida qo'l qovushtirib turgan shogirdi Abu Ubaydga qaradi.

– Ovqat keltiraymi, ustod?

– Tashakkur, azizim.

– Sizga ne bo'ldi, ustod? Kun bo'yi tuz tot-madingiz!..

– Zarari yo'q, tabobatda goho ochlik to'qlikdan foydaliroqdur, – Ibn Sino shunday deb bir kulim-sirab qo'ydi-yu, shogirdining yo'l azobidan kirta-yib qolgan ko'zlaridagi tashvishni ko'rib, ko'ngli xiyol yumshadi.

– Mayli, azizim, kamina hovliga chiqib, bir-pas nafas olib kelay. Keyin ovqatni birga baham ko'ramiz.

Kecha oysiz, biroq seryulduz edi. Bekat hali uyg'oq, behisob hujralarning darichalari behisob mitti yulduzlarday miltiraydi, biroq hovlida odam siyrak, faqat qayerdadir olisda, darvoza tomon-da gulxan yonar, u yerdan g'ala-g'ovur ovozlari,



asabiy xitoblar, gohi-gohida esa «gur-gur» kulgu eshitilardi.

Ibn Sino bir-bir bosib gulxan tomon yurarkan, davradan kelayotgan ovozlar qulog'iga chalindi:

– Topib bo'libsen adolatni, xomkalla! Bu dunyo tugul, u dunyodan ham topolmaysen uni!

– Hamma barobar emas, tentak! Aqlli poshsholar ham o'tgan bu dunyoda!

– Aqlli poshshoni o'z ko'zing bilan ko'rdingmi, nodon?

– O'zing nodon!

G'ala-g'ovur, kulgu, asabiy xitoblar avjiga chiqdi. Ibn Sino ichida kulimsiraganicha qadamini jadallatdi, shu payt orqasida qandaydir soya paydo bo'lib:

– Hazratim! – deb shivirladi. – Bormang uyoqqa, betavfiq qarmatiylar yig'ilgan u yerda!

Biroq Ibn Sino to'xtash o'rniga qadamini tezlatdi-da, gulxanga yaqinroq joyda yumalab yotgan to'nkaga ko'zi tushib, unga cho'nqaydi. Uni ta'qib etgan soya to'xtab orqaga chekindi va cho'kka tushib kavsh qaytarayotgan tuyalar panasiga o'zini oldi.

Ibn Sino to'nkaga cho'nqaygan zahoti gulxan yonida yonboshlab yotgan, egniga ko'k chakmon, boshiga ko'k kuloh kiygan, bo'y-basti kelishgan, faqat o'ng qoshining ustida katta chandig'i bor bir qalandar:

– Hoy, mo'minlar! – deb xitob qildi. – Kamina bu jumboqni yechib berguvchi bir rivoyat eshitganmen. Kimki bu rivoyatni tinglamoqni istasa... bir tanga-yarim tanga sadaqa qilsin!

Davrada piq-piq kulgu eshitildi.

- Rivoyatni ham aqchaga sotasenmu, noinsof!
- Oxir zamon kelganidan nishona bu!
- Ko‘p valdiramay, aqchang bo‘lsa ber – eshitaylik rivoyatni!

Ibn Sino peshonasi chandiq bu xushqad barvasta qalandarni qayerdadir ko‘rganday bo‘ldi, biroq harchand urinmasin, qayerda ko‘rganini eslay olmadi-yu, cho‘ntagidan uch-to‘rt dirham topib, uning kulohiga tashladi.

Qalandar chandiq peshonasini silab, unga bir zum tikilib qaradi-da, yig‘ilgan xayr-ehsonni belbog‘iga tugib, hikoyasini boshladi:

– Shundaykim, bir poshsho kunlardan bir kun tush ko‘rmish. Tushida yetti oriq ho‘kiz yetti semiz ho‘kizni yeb qo‘ymish. Uyqudan uyg‘onib ketgan poshsho qo‘rqqanidan darhol donishmandlarni yig‘ib, ulardan tushining ta‘birini so‘rmish. Shunda eng kekxa bir donishmand aytibdiki, mamlakatda yetti yil to‘qchilik bo‘ladi, odamlar farovon turmush kechiradi, so‘ng qattiq qurg‘oqchilik boshlanib, yetti yil ko‘z ko‘rmagan, quloq eshitmagan ochlik va qahatchilik yuz beradi.

– Bunga qarshi ne chora ko‘rmoq darkor? – deb so‘rabdi poshsho.

– Boshda bo‘ladurg‘on yetti yil farovonlik chog‘ida keyin keladurg‘on yetti yillik qahatchilikka yetadurg‘on don-dun va yetti yillik suv g‘am-lamoq darkor!

Alqissa, donishmandning ta‘biri ro‘yobga chiqib, yetti yil obi havo yaxshi kelmish. Ham-mayoq to‘kin-sochin, mamlakat obod bo‘lmish. Shundaykim, donishmandning ta‘biri, hatto, xotirdan ko‘tarilmish. Bir kun poshshoyi olam



donishmandni chaqirib: taqdir, ta'bingiz rost bo'lsa siz aytgan ochlik va qurg'oqchilik qayda? – deb ta'na qilibdi.

Shunda donishmand:

– Shoshmang, poshshoyi olam, – debdi, – bir kun uyqudan qattiq qorningiz ochib uyg'onasiz. Shu kuni men aytgan qurg'oqchilik boshlanib, mamlakat ochlik va qahatchilikka yuz tutadi.

Filhaqiqat, ertasiga poshsho uyqudan qattiq qorni ochib uyg'onibdi. Shu-shu, qattiq qurg'oqchilik kelib, ochlik va qahatchilik boshlanibdi. Bu baxtsizlik yetti yil davom etmish. Yo'g'onlar cho'zilib, ingichkalar uzilmish. Agar to'qchilik yillari donishmand aytgan suv va g'al-la g'amlanmaganda, barcha ahli mo'min qirilib ketar ekan. Shunda poshshoyi olam yana kekxa donishmandni chaqirib, qachon bu qurg'oqchilik va qahatchilik tugaydi, deb so'rabdi. Donishmand aytibdiki, poshshoyi olam, bir hafta sabr qilgaysiz. Bir haftadan keyin qurg'oqchilik tugab, qattiq yomg'ir yog'adi. Ammo, demish donishmand, barcha ahli mo'minga xabar qilgaysiz. Birinchi yomg'ir suvini hech kim ichmasin, toki kimki uni ichsa, aqldan ozadur!

Poshsho jarchilarga farmon berib, donishmandning so'zini elga yetkazibdi. Lekin bu gapga quloq solguvchi bir kimsa bo'lmabdi. Poshshodan boshqa hamma yomg'ir suvini ichib, hamma bab-barobar aqldan ozibdi. Shu-shu, hech kim poshshoning amri farmonlariga itoat etmaydigan bo'libdi. Shunda poshshoyi olam kekxa donishmandni uchinchi bor chaqirtirib, bu baloga qarshi ne chora ko'rmoq darkor, deb maslahat so'rabdi. Donishmand javob

bermishki, bu baloning birdan-bir chorasi – siz ham o’shal suvdan ichasiz, fuqaro shundagina amri oliylaringizga itoat qiladur, debdi.

Chorasiz qolgan poshshoyi olam ham o’sha yomg’ir suvidan ichib, o’ziyam aqldan ozibdi. Aqldan ozib, telba-teskari farmonlar bera boshlabdi. Shunda telba fuqaro telba poshshodan mamnun bo’lib, uning telba-teskari farmonlariga jon-dildan itoat etadigan, amr-u farmonlarini shak keltirmay vojib qiladigan bo’libdi.

Qalandarning so’nggi gaplari zo’r qahqaha va zaharxanda xitoblar ostida ko’milib ketdi:

– O, ho, ho! Baayni G’aznadagi ishlardan so’zlading, darvesh!

– Balli! Agar biz ham nodon bo’lmasak qilichidan qon tomgan bu telba sultonga qulluq qilib yurarmidik?

G’ala-govur va qiyqiriq battar avjiga chiqdi. Shu payt gulxan ortidagi zim-ziyo qorong’ilikdan:

– Ushlang bu qarmatiylarni! – degan tahdidli xitob yangradi. – Bu karvonsaroy bedinlar uyasi-ga aylanmish! Dahriylar-u qarmatiylar yig’ilmish bu uyaga! Ushlang bu murtadlarni!

Cho’kka tushgan tuyalar panasidan, go’yo shu tahdidli ovozni poylab turganday, qilich yalang’ochlagan besh-o’n nafar navkar yopirilib chiqdi.

Ibn Sino uyog’i nima bo’lganini yaxshi anglamay qoldi. Chamasi, gulxan tevaragida o’tirgan gadolar sapchib turdilar-u «qoch!» degan xitob bilan o’zlarini har tomonga urishdi. Ibn Sino ham sakrab o’rnidan turdi, biroq hali joyidan jilmagan ham ediki, kimdir kelib, uning qo’lidan ushladi.

– Bu shakkok qarmatiylar sizga ne kerak, hazratim? Hujrangizga kirib dam oling! Subhi sodiq yo'lga chiqamiz!

Ibn Sino indamay orqasiga qaytdi. To's-to'polonni eshitgan Abu Ubayd ham hujradan yugurib chiqqan edi, birgalashib hujraga qaytdi.

Ajabo! Dorus-saltanat ostonasida qarmatiylar to'g'risidagi bu gaplar! Peshonasi chandiq bu xushqad, barvasta qalandar va uning g'alati rivo-yati!..

Ibn Sino uni qayerdadir ko'rgan, ehtimol davolagan. Salkam qirq yil tabiblik qilib, u minglarcha, balki o'n minglarcha xastalarni davolagan. Shunday bo'lsa ham, odatda, davolagan kishisi yodida turar edi. Bu qalandarni ham eslaganday bo'ldi, uni qayerdadir davolagani aniq, ammo qayerda? Gurganjdami, Jurjondami yoxud Hamadon va Raydami? Qayerda?.. Qayerda? Qayerda?..

Ibn Sino ko'zi ilindimi, yo'qmi – o'zi ham bilmay qoldi. Qulog'iga yana allaqanday shov-shuv, qilichlarning sharaq-shurug'i, kimlarningdir ingragan, so'kingan ovozi, ot tuyoqlarining dupuri eshitinganday bo'ldi, so'ng zulfinlar sharaqlab, hujraning ikki tavaqali o'ymakor eshigi taraqlab ochildi. Bo'sag'ada... qo'rquvdan dag'dag' titragan Abu Ubayd, Abu Ubaydning orqasida esa boshiga ag'darma telpak, egniga ko'k chakmon kiyib, beliga egri qilich taqib olgan norg'ul bir yigit ko'rindi.

– Ustod! – Abu Ubayd, negadir, ko'ziga yosh olib Ibn Sinoni quchoqlab oldi. Norg'ul yigit esa tavoze bilan bosh egib, salom berdi.

– Qo‘rqmang, hazratim! Bizning lashkarimiz... «haq va adolat» lashkaridur, taqsirim!

Ibn Sino hayrat bilan yigitning shiddatli qoram-tir yuziga tikildi.

«Donishlar va allomalar tilidagi bu muqaddas so‘zlarni qaydan biladi bu yigit?»

– Hozir bekatni bosgan ham shu... «haq va adolat» lashkarimi, o‘g‘lim?

– Yo‘q! – yigit boshini mag‘rur ko‘tardi. – Biz karvonsaroyini emas, sulton Mahmud sarbozlarini bosdik, taqsir! Matlabimiz – bu mustabid sultonni taxtdan ag‘darib, yurtda haq va adolat tiklamoqdir! – Yigit shunday deb, yana qo‘l qovushtirib ta‘zim qildi. – Sizdan iltimos: «Ko‘shki qasos» atalmish qarorgohimizga tashrif buyurgaysiz! Kaminaning so‘zi emas, «haq va adolat» lashkarining sardori imom Ismoil G‘oziy hazratlarining iltimosidur bu!

– Imom Ismoil G‘oziy?

– Shunday, hazratim!

Norg‘ul yigit Ibn Sinoning javobini kutmay, orqasiga o‘girildi-da:

– Otlar qayda? – deb qichqirdi. Qayerdandir yaqindan:

– Otlar shay, sardor! – degan ovoz eshitildi.

Tong otgan, ufqdagi qorli cho‘qqilarning tepasi oqarib qolgan, artilgan shishaday tiniq moziy osmonning u yer-bu yerida so‘nggi yulduzlar so‘nayotgan shamday zaif miltirardi.

Qo‘rg‘on o‘rtasida, kechasi gulxan yongan joyda, qo‘llari orqasiga bog‘langan bir nechta isfahonlik sarbozlar yotar, biroq ular orasida shopmo‘ylov mushrif ko‘rinmas, darvoza oldida esa «haq va ado-



lat» lashkarining suvorilari bo'lsa kerak, boshlariga ko'k yoping'ich tashlab, egnilariga ko'k chakmon kiygan besh-o'nta otliqlar ko'zga chalinardi.

Sardor aytgan «Ko'shki qasos» bekatdan bir-ikki farsang yiroqda, kichikroq soy yoqasidagi qalin archazor orasida ekan. Ibn Sino bir guruh suvorilar qurshovida o'rmonday qalin chakalakzor va qamishzorlar orasidan otini yeldirib borarkan, miyasida hamon o'sha notinch o'ylar g'ujg'on urardi.

«Haq va adolat» lashkari!.. Boshlariga ko'k yoping'ich tashlab, ustlariga ko'k chakmon kiyib olgan bu suvorilar qarmatiylar ekani endi unga ayon! Ammo... imom Ismoil G'oziy kim? Ismoil G'oziy... Ismoil G'oziy Isfahonda, telba amir Shamsuddavla davrida, «Yaratguvchi oldida shoh-u gado barobar», deb chiqqan va bu davosi uchun masjidi jomeda o'qilgan xutbada «shaytoni lain» deb qoralanib, yuz darra yegan, devqomat bir qalandar bo'lardi. Agar Ibn Sino yanglishmasa, uning ismi ham Ismoil, ha, imom Ismoil edi!

«Yo'q, Isfahon qayda-yu, G'azna qayda? Imom Ismoil dorus-saltanat ostonasida ne qiladi?»

Ana, oldinda o't o'ynatib borayotgan suvorilar chuqur jarlikdan ot surib o'tishdi-yu, o'ng tomondagi archazorga sho'ng'ib ketishdi. Sal yurmasdan, archazor siyraklashib, oldinda qator ko'k chodirlar, hisobsiz qamish kapa va bir necha o'tov tikilgan ko'kalamzor maydon ko'rindi.

Maydonning har joy-har joyida sarbozlar to'p-to'p bo'lishib qilichbozlik va nayzabozlikdan mashq qilishar, daraxtlarga kamonlardan o'q uzishib, kurash tushishar, o'tovlar ortidagi

o'choqlardan pag'a-pag'a bug' va tutun ko'tarilar, aftidan, u yerda ovqat pishirilardi.

Ibn Sinoni boshlab kelgan sardor orqasiga o'girilib, «ketimdan yuring!» degan ma'noda imo qildi-da, otining boshini mashriq tarafdagi katta ko'k chodir tomon burdi. Ko'k chodirning ikki yonida ikki sarboz qilich yalang'ochlab turardi. Sardor shartta yoqasini ochib, bo'ynidagi uch-burchak ko'k tumorchasini ko'rsatdi-da, ichkariga kirib ketdi. Zum o'tmay, chodirdan qaytib chiqib, otda o'tirgan Ibn Sinoga ta'zim qildi:

– Piri murshid sizni so'raydur. Marhamat qilg'aysiz, hazratim!

Ibn Sino Abu Ubayd yordamida otdan tushdi, chodir bo'sag'asida bir lahza to'xtab, ust-boshini tuzatdi, so'ng negadir yuragi gurs-gurs urib, ichkariga kirdi.

Tagiga bo'yra to'shalgan katta saropardaning to'rida chap qo'lini ko'k mato bilan o'rab, bo'yniga osib olgan novcha bir qalandar qiblaga qarab cho'kkalab o'tirardi. Qalandarning oldida ko'k joynamoz, orqasidagi ilgakda ko'k chakmon va ko'k yoping'ich osig'liq turar, ularning yonida qilich-qalqon va kamon o'qlari terilgan ko'k charm sadoq ko'rinardi.

Ibn Sino poygakda to'xtab, joynamozda cho'kkalab o'tirgan sersoqol qalandarga tikilib qaradi-yu, beixtiyor yuragi «shig'» etdi.

Ko'zlarini yumib, qiblaga qarab tilovat qilib o'tirgan bu barvasta qalandar... yo, Rab!.. kechasi g'alati cho'pchak aytib, hammani kuldirgan, bundan o'n yil muqaddam esa Isfahon masjidida ulamoyi kiromlar la'natiga uchragan... qop-qora,

barvasta qalandar imom Ismoil G'oziy edi! U, af-tidan, bomdod namozini o'qib bo'lib, tasbeh o'gi-rib o'tirar, boshida ko'k salla, egnida ko'k bo'z ko'ylak, chuqur xayolga tolgan edi.

Ibn Sino hamon tili lol, namoz o'qib o'tirgan imomga jimgina tikilib turarkan, ko'z oldiga Puli Shahrison ko'prigining ortidagi chilangarlar da-hasi keldi.

Oysiz, zimiston kecha. Ibn Sinoni boshlab bor-gan odamlar uni torgina bir hovliga, hovlidani kichkinagina, zax hujraga boshlab kirishadi. Tok-chadagi moychiroq shu'lasida Ibn Sino hujraning to'rida uzala tushib yotgan yarim-yalang'och bir kimsani ko'radi, kimsaning qamchidan tilim-tilim bo'lgan taqir boshi, yuzi, bo'yni, yelkalari qop-qo-ra qon, ko'zlari yumuq.

Ibn Sino behush kimsaga yaqinroq borib, bo'yraga tiz cho'kadi-yu, o'shandan uch-to'rt kun avval masjidi jomedagi xutbadan keyin yuz darra yegan novcha qalandarni taniydi.

Darhaqiqat, bu o'sha, «yaratganning oldida shoh-u gado barobar», deb chiqqan va bu da'vosi uchun xutbada la'natlanib, ayovsiz kaltaklangan qop-qora barvasta qalandar edi!..

Ibn Sino o'shanda behush yotgan bu qalan-darni bir oy pinhona davolab oyoqqa turg'azgan, ammo undan keyin qismati ne bo'ldi, bundan bexabar edi!

Dunyoning ishlari g'alati ekan. Mana, taqdiri azal ularni yana duch qildi! Kelib-kelib G'aznaye munavvara ostonasida duch qildi!

Imom Ismoil joynamozini yig'ishtirib, tavoze bilan qo'l qovushtirdi:

– Faqir kulbamizga xush kelibsiz, hakim hazratlari, qadamlariga hasanot, marhamat, to‘rga o‘tsinlar!

Ibn Sino imom ko‘rsatgan joyga o‘tib o‘tirarkan, uning sinovchan tikilib qolganini payqab, yana boyagiday g‘alati bo‘lib ketdi. Imomning peshonasi va o‘ng qoshi ustidagi chandig‘i, sal qisilgan ko‘zlari, o‘ziga yarashgan soqol-mo‘ylovi, butun vajohatidan allaqanday sehrlil bir kuch va pinhoni bir iqtidor yog‘ilib turar, har bir harakatida o‘ziga ishonch va qat‘iyat sezilardi.

Boshiga ko‘k yoping‘ich yopingan bir navkar kirib, o‘rtaga bo‘z dasturxon yozdi, dasturxonga sopol ko‘za bilan ikki sopol piyola va ikkita arpanon qo‘ydi-da, orqasi bilan yurib chiqib ketdi.

Imom Ismoil sog‘ qo‘li bilan sopol ko‘zadan arpag‘o‘ja quyib Ibn Sinoga uzatarkan, bilinar-bilinmas kulimsiradi:

– Chamamda, hazratlari tunda kaminani tanimadilar?

– Tunda tanimagan edim, ammo...

– Tanimaganingiz ajablanarli hol emas, hazratim. Isfahonda kechgan ul voqealarga salkam o‘n yil bo‘lmish. Ammo faqirni bir oy pinhona davolab, jonsiz jismimga qayta jon ato qilganingiz toabad yodimdudur, hazratim!

– Tashakkur! – dedi Ibn Sino va imomning ko‘k mato bilan o‘rab, bo‘yniga osib olgan qo‘liga zimdan ko‘z tashladi. – Chamamda, taqsim yana muolajaga muhtojdurlar!

– Ha, – dedi imom, o‘ng qo‘li bilan yarador qo‘lini asta silab. – Ming taassuf, tundagi to‘qnashuvda bir necha yigitlarimiz jarohatlandilar.



– Marhamat, yordam bermoq lozim bo'lsa – kamina xizmatlariga hozirmen!

– Minnatdormen, taqsir. Ammo sizning yordamingizdan ham zarur bir gap bor. – Imom to'satdan qovog'ini uyib, Ibn Sinoga sinovchan tikildi. – So'zimga quloq soling, hazratim. Biz bu qarorgohdan darhol ketmog'imiz darkor. Sababi – hazratlarini izlab dorus-saltanatdan nogahon lashkar bostirib kelish xavfi bor! Bas, hazratimdan bir narsani so'rab olmog'im lozim.

– Bosh ustiga!

– Kamina eshitgan edimki, hazratlari bu be-rahm mustabid sultonga xizmat qilishdan toabad bosh tortib, qochib yurmishlar deb! Bu so'z rost bo'lsa... nechun bu ahdingizdan qaytib, uni davolagani keldingiz, taqsir?

Imomning xiyol bo'g'iq ovozi allaqanday norozi va tahdidli ohanglar yangradi.

– Ne chora, – dedi Ibn Sino chuqur xo'rsinib. – Biz hakimlar uchun shoh-u gado barobardur. Xasta borki, xoh shoh bo'lsin, xoh gado – uni davolamoq biz uchun ham farz, ham qarzdur, taqsir! Ammo...

– Bilmam, hazratim. Bu betavfiq sultonga yopishgan bu dard-u bedavo... taqdiri azalning xayrli hukmi emasmu? Qirq yillik qatl-u qirg'inlari, jabr-u sitamlari, to'kkan daryo-daryo qonlari uchun ko'k yuborgan intiqom emasmu? Bas, bunday beshafqat mustabid shohni davolamoq gunohi kabir emasmu, hazratim?

Ibn Sino imomning allaqanday qahr va ilhom bilan porlagan ko'zlaridan ko'zini olib qochdi. Ajabo! Qahrli ko'zlaridan o't chaqnab turgan bu

imomning soʻzlarida domishmandlarga xos bir mantiq va adolat bor edi!

Imom Ismoil goʻyo uning oʻylarini ilgʻab olganday:

– Ha, – deb xitob qildi. – «Haq va adolat» lashkarining gʻoziyolari bugun-erta gʻazovat tugʻi ostida birlashib, yurtimiz tuprogʻini bul mustabid shoh zulmidan forigʻ etmoq azmidadur!

«Gʻazovat tugʻi? Yo, tavba! Agar «haq va adolat» lashkari degan soʻz rost boʻlsa... nechun bu kurash gʻazovat tugʻi ostida boshlanadur?» – dedi Ibn Sino ichida. Lekin darhol bundan oʻn-oʻn besh yil muqaddam Misrda, imom az-Zohir boshchiligida boʻlib oʻtgan zanjilar isyoni lop etib yodiga tushdi. Bu zanji qullar isyoni ham gʻazovat tugʻi ostida oʻtganini Ibn Sino yaxshi bilar edi. Biroq yaxshi bilsa ham, shafqatsiz qon nafasi sovuq shabbdoda boʻlib tegdi-yu, koʻnglini yoritib turgan iliq nur soʻndi-qoldi. Imom esa buni sezmay:

– Tasanno! – dedi chehrasi ochilib. – Sukut – alo-mati rizo! Agar kaminaning soʻziga rozi boʻlsangiz, bizning lashkarimizga qoʻshilgaysiz, hazratim!

Ibn Sino bazoʻr hushini yigʻib:

– Tashakkur, – deb qoʻlini koʻksiga qoʻydi. – Ammo... taqsirimning lashkari sulton Mahmud lashkariga teng kelurmu?

– Sultonning tayanchi – behisob lashkar boʻlsa, bizning tayanchimiz haq va adolstdur! Makonimiz osmon barobar togʻlardur! Bas! Fursat ziq, hazratim, yo «ha» degaysiz, yo «yoʻq!»

Ibn Sino hamon nima deyishini bilmas edi. Uning koʻz oldiga yaqindagina ne mashaqqatlar bilan bosib oʻtgan togʻ va daralar keldi, keldi-yu, bir zum imomning soʻziga kirgisi, uning lashkari-

ga qo'shilib, «hay-yu hayt», deb o'sha tog'larga, sulton qo'shinlari, uning mash'um xufiyalari va mushriflari yetolmaydigan cho'qqilarga chiqib ketgisi keldi. Ammo...

– Taassuflar bo'lsinkim, kamina sarboz bo'lib tug'ilgan emasmen...

– Sarboz bo'lib tug'ilmasangiz ham sarboz-u sarkardalardan yuz chandon ortiq izzat-u ikromda bo'lasiz, hazratim.

– Toabad minnatdormen. Va lekin... Kamina butun fikri zikrim ilmi hikmatdadur. O'ylab qo'yan asarlarim, boshlab qo'yan kitoblarim bor – shularni nihoyasiga yetkazsam...

– Kitobmi yo odil shohlar haqida cho'pchakmi? – dedi imom Ismoil, chandiq qoshlari asabiy pirlirab. – Men siz allomalarga hayronmen! Odil shohlarni qo'nsab va yomon hokimlarni la'natlab yostiqday-yostiqday kitoblar bitasiz. O'zlaring esa... sulton Mahmud yanglig' mustabid shohlar xizmatida qulluq qilib yurasiz.

– Ne chora? – dedi Ibn Sino va imomning ko'zlari sovuq chaqnaganini ko'rib, boshini egdi. – Boz ustiga, Isfahon qora o'lat iskanjasida qolgan. Umidim – tezroq qaytib bormoq, qaytib borib sho'rlik mardumi mo'minning xizmatida bo'lmoq...

– Bas! – Imom G'oziy sog' qo'lini bir siltab o'rni-dan turdi. – Sizga ijozat, hazratim.

– Ruxsat etsalar jarohatlangan qo'llarini ko'rsam...

– Tashakkur! – dedi imom G'oziy, xuddi arazlagan boladay chandiq yuzini ters burib. – Qo'lim singanmi, yo'qmi, shuni aytib bersangiz bas!

Ibn Sino imomning qo'lidagi qalin bo'z lattani asta yechdi. Imomning bilagini qilich kesgan, uzun va chuqur yarasiga nimadir sepilgan, lekin qon hanuz to'xtamagan edi.

Ibn Sino imomning shishib ketgan bilagini asta-asta ushlab ko'rdi. Imom, rangi devor, tishini tishiga qo'yganicha, jimgina bosh egib turardi.

Ibn Sino yarani avaylab artib, qayta bog'ladi.

– Xayriyat, suyak omon...

– Xayriyat, – dedi imom ham.

– Ammo yarangiz xavfli. Faqirga bir odam qo'shib berasiz. O'qilon zahri bilan achchiq bodom yog'idan yasalgan doru beramen. Uni har kuni ikki mahal surtasiz!

– Tashakkur! – dedi imom Ismoil, hamon qovog'i ochilmay. – Sizga ruxsat, hazratim! Mening sarbozlarim sizni rabotga eltib qo'yadilar. Va lekin, yodingizda bo'lsin: mabodo, hazratlari biror yordamga muhtoj bo'lib qolsalar... G'aznada Malik ul-sharob degan bir shoir bor. Uni dorus-saltanatda tanimagan odam yo'q. O'shal bandayi mo'minga xabar qilg'aysiz. Xayr, sulton sarbozlari bostirib kelguncha bekatga yetib oling. Omon bo'ling, hazratim!

Imom G'oziy shitob bilan yurib chodirdan chiqdi.

Ibn Sino chodirda yolg'iz qoldi. U imom G'oziyning iltimosini rad etib, to'g'ri qildimi, yo noto'g'rimi – buni o'zi ham bilmas edi.

## YIGIRMA BESHINCHI BOB

Kechasi Osmon malikasi saroyida o'tgan tongotar bazmi jamshiddan so'ng mast uyquga ketgan vazir Abul Hasanak kimningdir turtkisidan

bazo'r ko'zini ochdi. Tepasida, qo'lida dir-dir titragan sham, «nazm bo'stonining bog'boni» shoir Unsuriy turardi.

Xona bo'm-bo'sh, o'rtada turgan xontaxta chetga surilgan, unda yeyilmay qolgan bir lagan qovurdoq, may to'la billur idishlar, yoqut va firuza piyolalar betartib yumalab yotar, yonidagi to'shak esa bo'm-bo'sh, kechasi «hazrat Ibn Sino» bilan bo'lgan mayxo'rlikdan so'ng yonida qolgan haram bekasi uni tark etgan, to'g'rirog'i, beka emas, vazir janoblarning o'zi uni behayo-besharm bir so'zi uchun betiga tepib, haydab yuborgan edi!..

– Xo'sh, sabab tun yarmida ajinaday tentirab yuribsen? – dedi Abul Hasanak, qayta joyiga cho'zilib. – Na o'zing uxlaysen, na boshqalarga uyqu berasen!..

Shoir Unsuriy, qo'lidagi sham battar titrab, to'shak yoniga cho'kkaladi.

– Mash'um xabar, valine'mat!

– Mash'um xabar? – Abul Hasanak ustidagi shoyi ko'rpani otib yuborib, qaddini rostlab o'tirdi. – Oftobi olam?..

– Oftobi olam, Allohga shukur, salomatlar, – dedi Unsuriy shoshib. – Ammo... G'aznaga hazrat Ibn Sino kelmish!

– Qochmish? – dedi Abul Hasanak talmovsira. – Qayoqqa qochmish?

– Qochmish emas, kelmish! Isfahonlik chin hazrat Ibn Sino kelmish! Shundaykim, go'yo saroydagi bu Ibn Sino emas, amir Mas'ud yo'llagan o'shal Ibn Sino – chin hazrat Ibn Sino emish!..

Abul Hasanak aftini bujmaytirib, zaharxanda qildi:

– Bul Ibn Sino, ul Ibn Sino! Taqsirim qaydan topdilar bu xabarni?

– Kamina bu xabarni Piri Bukriydan eshitdim. Bu makkor bukri esa xabaringiz bor, bilmagan sir-asrori yo‘qdur. Piri Bukriyning aytishicha, Xatlibegim boshliq bir guruh amirlar Isfahondan kelgan ul Ibn Sinoni erta-indin as‘asa-yu dabdaba bilan qarshi olmoqqa chog‘langanlar. Chog‘langanlar orasida anov mutakabbir alloma Abu Rayhon Beruniy ham bor emish. Bu ishga, hattokim, qadrdon xeshingiz... vaziri a‘zam Ali G‘arib ham bosh qo‘shgan emish!..

– Ali G‘arib? – Abul Hasanak o‘rnidan sapchib turib, xontaxta yoniga bordi. Itoatsiz qo‘llari bilan yoqut piyolani to‘ldirib may quydi-da, bir ko‘tarishda bo‘shatib, xonani aylanishga tutindi.

«Bul Ibn Sino, ul Ibn Sino! Chin Ibn Sino, yolg‘on Ibn Sino!»

Ajabo! Bir-ikki hafta muqaddam «hazrat Ibn Sino» atalmish bu kimsa saroyda paydo bo‘lgandan buyon bu gaplar uning xayolidan tamom ko‘tarilgan edi. Anov iymonsiz Ali G‘arib qayerdandir topib kelgan bu iblis soxta Ibn Sino ekani-ni, olamda hakimi davron atalmish chin Ibn Sino borligi, u qayerdadir yiroqlarda, amir Mas‘ud turgan Isfahon tomonlarda qochib yurgani vazir janoblarining xayolidan batamom ko‘tarilgan edi!

O‘zini «hazrat Ibn Sino» deb atagan bu kimsa dorus-saltanatga qadam qo‘ydi hamki, saroyda g‘alati ishlar boshlanib ketdi. Hamma uning hukmi va sehriga maftun bo‘lib, go‘yo aqli hushidan ayrilib qoldi. Avvalambor, so‘nggi bir necha oydan buyon saroyda, nayinki saroy, butun saltanatda



hukm surgan tavahhum va tahluka qaygadir daf bo'lib, hamma yengil nafas oldi, motam kayfiyati tarqab, qandaydir yengil, xushnud, safoli kunlar boshlandi, go'yo osmonni qoplagan qora bulutlar tarqab ketdi-yu, yarqirab oftob chiqdi. Motam libosini kiygan haram bekalari, bakovullar, xazinadorlar, xonanda va sozandalarga jon kirdi, shu-shu, serlazzat bazmi jamshidlar, kayfi safo, musiqa va mushoiralar bir-biriga ulanib ketdi. Bu kayfiyat, bu xushnudlikning bosh sababi esa birlamchi, Allohning inoyati, ikkilamchi, «hakim hazratlari»ning muolijasi bo'ldi. Shu muolija sabab jar yoqasiga borib qolgan amir al-mo'minin kundan-kunga «beri qaray» boshladi. Bir-ikki haftadayoq diliga orom, beliga quvvat kirdi, shundaykim, bundan bir kecha kun muqaddam, dorus-saltanat ahliga ko'rinib, mardumi mo'minlarga o'z chehrayi shamslarini namoyon etib, ularni baxtiyor qilish ishtiyoqi tug'ildi. Shu boisdan, G'aznayi munavvara ko'chalari supurilib-sidirildi, maydon va guzarlarga suv sepilib, daraxtlardagi changlar yuvildi, hovuzlarga suv quyilib, favvoralar ishga tushirildi, do'kon va rashta peshtoqlariga qimmatbaho ipak va shoyi matolar tutildi, bozorlar va karvonsaroylarda neki shubhali kimsalar, gadolar, qalang'i-qasang'ilar, neki iprindi-siprindi yo'qsillar bo'lsa, hammasi shahar tashqarisiga haydaldi. Kecha, nihoyat, hamma ishlar intihosiga yetdi. Saroy oldidagi maydonda sultoni salotinning shaxsiy g'ulomlari bo'lmish yetti yuz suvori saf tortdi. Ularning hammasi egnilariga bir xilda qizil chakmon, boshlariga qizil popukli mis dubulg'alar kiygan, hammasi

birday qilich yalang'ochlab, hammasi birday oq bedov mingan. Faqat har yuz suvorining boshida turgan yasovullargina egnilariga ko'k baxmal to'n kiyib, hammasi bir xil qora arg'umoq mingan, qo'llarida esa yalang'och qilich o'rniga ko'k tug' ushlagan.

Peshinga yaqin Osmon malikasi qasri oldidagi keng maydonga ot o'ynatgan amir-u umaro, kimxob va zarbof to'nlarga o'rangan arkoni davlat, hammasi bir xil safrorang jubba kiygan ulamoyi kiromlar yig'ilishibdi. So'ng, qasr burjlarida o'nlaracha nog'oralar gumburlab, o'nlaracha karnaylarning payvast na'rasi osmon-u falakni zir titratdi-yu, saroydan... bir yonida imom Sayid, bir yonida Abul Hasanak bilan «hazrat Ibn Sino», amir al-mo'minin chiqib keldi. Sul-tonning boshida... uchiga injular qadalgan qunduz telpak, egnida tilla tasmalar bilan ziynatlanib, tugma o'rniga dur va yoqut qadalgan qizil zarbof to'n, belida besh yuz misqollik tilla kamar, oyog'ida poshnalariga kumush tepki qoqilgan qizil charm etik. Uning yonoqlari turtib chiqqan, keng, suyakdor yuzi hamon mumday sarg'ish, ammo chuqur botgan ko'zlari tungi alangaday charaqlab turar, qadam tashlashlari bardam va shiddatli edi. Sul-ton darvozadan chiqishi bilan unga tuyoqlaridagi taqalaridan tortib egar jabduqlarigacha sof qizil tilladan yasalgan, peshonasiga zar popildiriqlar taqilgan sevimli qora qashqa bedovini ro'para qilishdi. Biroq amir al-mo'minin otga minishdan avval maydonda bab-barobar ta'zim bajo keltirib turgan minglarcha, yo'q, o'n minglarcha sadoqati zohir ayon-u bayonlarga, qilich yalang'ochla-



ganlaricha serrayib qolgan suvorilar va ko'k tug' ushlagan yasovullarga uzoq va sinovchan tikilib turdi, keyin qo'ltig'idan olgan nadimlarni siltab tashlab, uzangiga oyoq qo'ydi, qo'ydi-yu, o'n ming olomonning jo'r va hayratomuz xitobi ostida o'zini egarga oldi!

Nog'oralar gumburi va karnaylar sadosi yana osmoni falakka chiqdi. Shu muzaffar sadolar ostida behisob arkoni harb va arkoni davlat qurshovida, qilich yalang'ochlagan yetti yuz suvori va ko'k tug'larini hilpiratgan yuzlarcha yasovullar davrasida amir al-mo'minin dorus-saltanat ko'chalaridan, suv sepilib yog' tushsa yalagudek qilib qo'yilgan chorraha va guzarlardan, kumush favvoralar o'rnatilgan maydonlardan, ko'k, qizil, sariq matolar bilan bezatilgan rasta va do'konlar oldidan qora qashqa bedovini o'ynatib o'tdi. Xachir minib, xurjunlarini kumush va tilla tangalarga to'ldirib olgan xazinadorlar ko'chalar va guzarlarni to'ldirgan olomonning boshiga hovuch-hovuch pul sochdi. Shu yo'sin, yerga sochilgan tangalarning jarang-jurungi, bu tangalarni talashib mushtlashgan olomonning hayqirig'i va otlar dupuri ostida sulton Ko'shki davlat ro'parasidagi masjidi jomega yetib bordi.

Yuksak peshtoqlari osmoni falakka sanchilgan, lojuvard tillakori gumbazlari oftobda kama-lak rangida tovlangan bu muhtasham masjidning yuz ming namozxonga mo'ljallangan marmar maydoniga qizil guldor paloslar to'shalgan edi. Amir al-mo'minin shu masjid ayvonida, hamma-si bir xil safrorang jubba kiygan minglarcha ulamoyi zabardastlar davrasida, maydonga yig'ilgan

yuz ming namozxon ishtirokida peshin namozini o'qidi. Namozdan keyin imom Sayid masjid mehrobidan turib va'z aytdi, barcha mo'minlarning to'kkan ko'z yoshlari va qilgan duoyi jonlari ko'kka yetib borganini, Yaratgan Egam o'z marhamatini darig' tutmay, «hazrati Ibn Sino»ni yetkazib, o'zi bergan dardini o'zi daf etganini so'zladi va ko'ziga yosh olib, duoga qo'l ochdi: iloyo jafong yukini tortmoqqa toqat va muhabbating mehnatini chekmoqqa bardosh ato qilgaysen. Omin!

Imomning va'zi va butun dorus-saltanatni larzaga keltirgan yuz ming kishining jo'r «ilohi omin»idan keyin eng mo'tabar martabadorlar, amirlar, devon beklari Bog'i Firuzga lutfan taklif etildi.

Bog'i Firuzning qoq o'rtasiga, gumbazli shiypon yonidagi marmar hovuz tevaragiga rang-barang hind gilamlari to'shalib, besh yuz kishiga dasturxon tuzatilgan edi.

Osmon beg'ubor, tiniq, o'ftob seli go'dak kulgusiday yoqimtoy edi. Ko'm-ko'k yassi qirlar bag'ridagi behudud Bog'i Firuz jannatday go'zal, hamma yoq yam-yashil, tiniq, musaffo, har bir daraxt, har bir gul tagida bulbullar sayrar, qovurilayotgan go'sht, qalampir va piyozning o'tkir hidiga hovuz bo'ylaridagi rayhon hidi, qir giyohlarining sal taxir nozik bo'ylari qo'shilib, havoni allaqanday betakror xushbo'y atir nafasi to'ldirgan edi. Hovuzning ikki yonidagi ikki supani xonanda va sozandalar egallagan, sozlarning kuyi bog'dagi bulbullar ovozigga qo'shilib, yuraklarda shirin orzular va allaqanday xayoliy go'zal hislar uyg'otardi.

Amir al-mo'minin, bir yonida Abul Hasanak, bir yonida «hazrat Ibn Sino», ko'k gumbazli shiy-

ponga chiqib, suyanchiqlari yoqut va javohirlar bilan ziynatlangan, ustiga sher terisi tashlangan yumshoq kursiga o'tirdi, qolgan martabadorlar esa hovuz tevaragidagi shoyi ko'rpachalardan joy olishdi.

Nozik havorang koshinlar bilan qoplangan hovuz suviga bir kun avval besh ming kallaqand tashlangan, istagan kishi o'tirgan joyida piyolasini cho'zib, sharbatga aylangan bu suvdan to'ygunicha sipqarishi mumkin edi!

Ziyofat yana «hakimi davron hazratlari»ni ulug'lashdan boshlandi. Amir al-mo'minin unga o'z qo'li bilan og'ziga siqquncha oltin oshatib, egniga boshdan-oyoq yangi sarupo yopdi, so'ng nazm bo'stonining bog'boni shoir Unsuriy avval sultoni salotinga, keyin «hazratlari»ga bag'ishlangan ikki yangi qasidasini o'qib berdi. Yangi qasida yangi kuy-larga, kuylar qadahlar jarangiga ulanib ketdi-yu, bazmi jamshid avjiga chiqdi. May daryo bo'lib oqdi, somsapazlar barra qo'zi go'shtiga dorivor giyohlar qo'shilgan issiq somsalarini ko'z-ko'z qilishdi, kabobpazlar archa cho'g'larida jizg'inak qilingan va archa bo'yi taralgan dumba aralash jigar kaboblarini namoyish etishdi, kabobdan keyin yoqut kosalarda kiyik o'ti, rayhon va qora murch solingan sho'rvayi sher, sho'rvayi sherdan keyin qisq ko'z nozaninlar surati solingan chiniy laganlarda bedana go'shtli qizil palov tortildi.

Sulton boshda xiyol xomush edi. O'qilgan qasidalar, chalingan kuylar, dunyo turguncha turishini tilab aytilgan hamd-u sanolarga jimgina quloq solib, birda kinoyali kulimsirab, birda go'yo tinimsiz o'qilayotgan bu madhiyalarni xushlama-

ganday allaqanday mahzun xayollarga cho'mib o'tirdi.

Bazm qizib, palov tortilgan mahalda «hakimi hoziq hazratlari» amir al-mo'mininga bir piyola may tutdi. Sulton bu mayni ichdi-yu, go'yo ichiga olov kirganday banogoh sergak tortdi. Beldagi besh yuz misqollik oltin kamarini olib, bir chekkaga otdi, tugma o'ringa behisob javohirlar qadalgan zarbof to'nini ham yechib o'rnidan dast turdi-da, xodaday uzun, qoqsuyak qo'llarini mashshoqlar tomon uzatib:

– Bas! – dedi qisiq ko'zlari cho'g'day yonib. – Bas, bu qo'shiq, bu hamd-u sanolar!

Hovuz bo'yidagi g'ala-g'ovur, supalardagi mashshoqlarning ting'ir-ting'iri tinib, oraga sovuq, tahdidli sukunat cho'kdi. Qizargan, bo'g'riqqan yuzlar oqarib, mastona suzilgan ko'zlar gumbazli shiypon tomon hadik va qo'rquv bilan tikildi.

– Dunyo turguncha turg'aysiz! Fayzi ilohiy toabad yor bo'lg'ay! – dedi sulton kesatib. – Bazm ustida madhiya o'qimoq oson, ammo vafodor nading bo'lmoq mushkul bu dunyoda! Ha, hamma-ning ichini ko'rib turibdi sulton Mahmud! Dillaringda ne o'y, ko'ngillaringda ne g'araz, kallalaringda ne fisqi fujur – barini ko'rib turibdi sulton G'aznaviy! Bugun kaminaga hamd-u sano o'qigan a'yon-u boyonlar... kecha unga o'lim tilagan edi dillarida! – sulton shunday deb, bir qadam oldinga yurdi, yurishi bilan pastda, dasturxon atrofida o'tirganlar bir gaz orqaga tisarilishdi.

– Ha, kimki vafo qilsa vafo, jafu qilsa jafu topg'usidir bu dunyoda! Kimki sulton G'aznaviy-

ga choh kavlagan bo'lsa, o'zi shu chohga qulagusidir! Sulton Mahmud esa dini islom yo'lida hamisha kamarbasta, yaqin kelgusida mashriqda Kashmir, mag'ribda qaysari Rum, qo'yingki, poyqadamim yetmagan joy qolmas!..

Shoir Unsuriy pildirab kelib, shiypon zinasiga tiz cho'kdi-da, ko'ziga yosh olib:

– Ilohi omin! – deb xitob qildi.

Mastona ovozlari bir-biriga qovushmay zaifroq yangradi:

– Ilohi omin!

– Ammo... kimki, tili shakar, dili zahar bo'lib yomonlik tilasa, toabad eslarida saqlasinlar! – sulton shunday deb, shiypon ustunini quchoqladi-da, pastga, yemish to'la xontaxtalar orqasida g'ujanak bo'lib o'tirgan martabadorlarga qadalib-qadalib qaradi, go'yo ular orasidan eng ashaddiy dushmanini qidirayotganday uzoq tikilib turdi-da, to'satdan:

– Anov iblisi layn... vaziri a'zam qayda? – deb so'radi.

Abul Hasanak shosha-pisha ta'zim bajo keltirdi.

– Olampanohning munavvar xotiralarida bo'lsa, ul mug'ambir tulkini hakim hazratlari aytgan «ne'mati ilohiy»ni topib kelmoq uchun Ko'hi Sarandipga yo'llagan edik, davlatpanoh!

– Hanuz qaytmadimi ul makkor?

– Yaqinda qaytmog'i darkor, olampanoh!

– Hmm! – dedi sulton ko'zini yumib. – Sharbat!

Hovuz tevaragidagi a'yon-u boyonlar naqshinkor ustunni quchoqlab turgan sultondan ko'zlarini uzolmas, ular go'yo ilon sehriga ilingan baqalarday joy-joylarida serrayib qolishgan edi.

Sulton Abul Hasanak tutgan mayni asta va uzoq simirib, piyolani qaytarib berdi-da, yana hovuz atrofida baqalarday ko'zlari chaqchayib o'tirgan a'yonlariga qaradi, go'yo ularning orasidan yana bir ashaddiy dushmanni qidirmoqqa kirishdi.

– Ha, aytganday, anov shakkok shoir... Malik ul-sharob qayda? – to'satdan so'radi sulton. So'rashi bilan hovuz bo'yidagi saroy ahli bab-barobar «uf», deb, yengil nafas oldi.

– Ul shakkok shoir... – dedi Abul Hasanak, nechundir talvasaga tushib. – Xabarim yo'q, davlatpanoh! Iprindi mayxonasida qusug'iga belanib yotgandir, ul betavfiq!

– Farmon ber, darhol topib kelsinlar ul iymon-sizni! O'ziga umr tilash o'rniga sultonga o'lim tilagan g'alamislardan biri o'shal quzg'un edi! Chaqir – holini ko'rsin sultoni salotinning!..

Amir al-mo'minin shunday deb joyiga borib o'tirdi. O'tirishi bilan nimadandir bezovtalanib, allaqanday pitirlab qolgan Ibn Shahvoniy yonini kavlashtirib, zarhal qog'ozga o'ralgan moshdek-kina safrorang bir dori oldi-da, sultonga uzatdi.

Bir ho'plam sharbat bilan ichib yuboring, davlatpanoh. Belingizga quvvat, dilingizga surur bag'ishlaydi bu doru!

Darhaqiqat, doridan keyin chorak soat ham o'tmadiki, sultonning qiyg'os ko'zlari artilgan dinorday yarqirab, yupqa lablariga kulgu yugurdi-yu, to'satdan amir Aliteginning kenja xotinini ko'rish istagini bildirdi.

Abul Hasanak ichida «hakim hazratlari»ga yana bir bor tahsinlar o'qib, darhol taxtiravon-

ni ro'baro' qildi! So'ng, «Ibn Sino hazratlari» bilan sultonni saroyga eltib, maxfiy go'shaga kiritdi-da, Osmon malikasi qasrining behisob xonalaridan birida Ibn Shahvoniy bilan birga ayshni davom ettirdi!..

Yo, xalloq! Hamma, hamma ishlar yaxshi keta-yotgan bir mahalda... bu mash'um xabar! Go'yo sultonni davolagan bu «hakimi davron» Ibn Sino emas, Xatlibegim bilan anov battol Ali G'arib topgan ul Ibn Sino – chin Ibn Sino emish!.. Boz ustiga, burgaga tuzoq qo'ygan bu vaziri a'zam yaqin-yaqinlargacha Xatlibegim bilan amir Mas'udni ko'rarga ko'zi, otishga o'qi yo'q edi. Endi esa ular bilan til topishgan emish! O'zi topgan «hazrat Ibn Sino»dan aynib, boshqa Ibn Sinoni topgan emish!.. Hay attang! Agar Abul Hasanak eski raqibining bu qadar qabihligini bilganida tunov kuni uni «ne'mati ilohiy»ni topib kelish uchun Ko'hi Sarandipga emas, to'ppa-to'g'ri asfalasofilinga jo'natib qo'ya qolar edi!

Abul Hasanak bilar, sultonning farmoni bilan Ko'hi Sarandipga jo'natilgan bosh vazir Gardiz tog'lari orasidagi Ko'handiz qal'asida yashirib yotardi. Toshga o'yilgan ming pillapoyalik bu maxfiy qal'ada eng ashaddiy g'animlar saqlanar, shunday bo'lsa ham, darg'azab sultonning ko'zidan yiroq bo'lishni istagan bosh vazir o'sha qal'aga maxsus joy qildirib, kalamushday berkinib olgan, chamasi, qayoqqa yashiringanini hech kim bilmaydi, deb o'ylardi. Lekin Abul Hasanak buni bilar, bosh vazir Ko'handiz qal'asi tugul, yetti qavat yerning tagiga kirib ketsa ham bilgan bo'lardi. U faqat fursat poylar, «ne'mati ilohiy»ni

topib kelishga ketadigan sakson kun o'tgach, uni yoqasidan ushlab, yashirinib yotgan kapagidan sudrab chiqishni rejalab qo'ygani edi! Ammo bu rejani tuzarkan, Abul Hasanak uni Ko'handiz qal'asida tavbasiga tayanib yotibdi, deb o'ylagan edi! Burgaga tuzoq qo'ygani bu qari tulki esa tavbasiga tayanmoq uyoqda tursin, anov yosuman Xatlibegim tarafiga o'tipti, o'tgani ham mayli, amir Mas'ud yuborgan chin Ibn Sinoni sultonga ro'baro' qilmoqchi bo'lganlar bilan til biriktiribdi! Bas, bu quzgu'n bosh qo'shgan ishdan qo'rqmoq darkor! Harqalay, ehtiyot shart. Qayerdadir aysh qilib yotgan «hakimi davron» hazratlarini topib, uni bu gapdan ogoh qilib qo'ymoq lozim!

Abul Hasanak hamon ro'parasida titrab-qaqshab turgan Unsuriyga qarab kinoyali kulimsiradi:

– Yo'l boshlang, nazm bo'stonining bog'boni!  
«Ibn Sino hazratlari»ni topib bu xushxabarlarni unga yetkazmoq darkor!

Saroy mast uyquda, boshdan-oyoq mayin ipak gilamlar to'shalgan uzun yo'lak kimsasiz edi. Tokchalardagi oltin shamdonlar va shiftga osilgan chambarak qandillarda bitta-yarimtagina sham yonar, ularning xira shu'lasida nimqorong'i yo'lak allaqanday sirli va sovuq tuyulardi.

Abul Hasanak bilan shoir Unsuriy, qo'llarida sham, ikki yondagi turnaqator o'ymakor eshiklarni bitta-bitta ochib, yo'lakning oxirigacha borishdi.

Biri katta, biri o'rtamiyona, biri chog'roq, lekin hammasi birday qimmatbaho jihozlar – g'aroyib suratlar solingan rang-barang paloslar, hind ibodatxonalarining oltin ma'budalari, serjilo billur idishlar, yoqut va zabarjad kosalar, fil suyagidan



yasalgan haykalchalar, tilla barkashlar bilan ziyoratlangan bu xonalarning hammasi bo'm-bo'sh; go'yo kutilmagan bir ofat ro'y bergan-u, saroy ahli hamma boylik, hamma buyumlarni tashlab, bosh olib qochgan...

Abul Hasanak yo'lak oxiriga yetgach, qayoqqa yurishni bilmay, bir lahza hang-mang bo'lib turib qoldi.

Kechasi sultonni pinhoniyo go'shasiga eltib qo'rganlaridan keyin Abul Hasanak «hazrat Ibn Sino» bilan birga boyagi xonaga kirib, mayxo'rlikni davom ettirgan, so'ng haram bekalaridan birini chaqirib, ikkita kaniz keltirishni buyurgan edi.

Haram bekasi yoshgina bir kanizni boshlab keldi-da, o'zi ham davraga qo'shildi. Uning maqsadiga tushungan «hakim hazratlari» yosh kanizni tanladi, chekiga haram bekasi chiqqan Abul Hasanak esa unga g'ashi kelib, qumaloq solishni taklif qildi. Ammo omadi yurishmadi. Qumaloq solinganda chekiga yosh kaniz chiqqan «hakimi davron» kanizni boshlab chiqib ketdi-yu, Abul Hasanak haram bekasi bilan qoldi.

Haram bekasi ham durkungina, ko'hlikkina juvon edi. Abul Hasanak taqdiridan nolimay, unga bir piyola may tutib quchog'iga olmoqchi bo'ldi. Biroq beka Abul Hasanakka taqlid qilib, may to'la piyolani bir ko'tarishda bo'shatdi-da, oppoq, momiq qo'llari bilan vazir janoblarning yuzini silarkan:

- Voy tavba! - deb kuldi.
  - Xo'sh, nechun ajablanasiz, bekam?
  - Qosh-ko'zlaringizga! - dedi kaniz erkalanib.
- Xudo sizga shunday qosh-ko'z in'om qilgan-u ishq hunarida.

– Xo‘sh, xo‘sh?

– Ishq hunarini... anov hakim hazratlariga in‘om etgan!

Abul Hasanak qah-qah otib kuldi:

– Avval kaminani bu ishda bir sinab ko‘ring, keyin so‘zlaysiz, bekam!

– Yo‘q! – xaram bekasi erkalanib uning yuziga sekin shapati urdi. – Urinib yurmang, janoblari, baribir, bu ishda hakim hazratlariga teng kelolmaysiz!

Shundan keyin nima bo‘ldi, – avval tarsaki tushirdimi yoxud oldin bir tepib, keyin tarsaki tushirdimi – buni Abul Hasanakning o‘zi ham bilmay qoldi, faqat uchib ketgan bekaning dod solib o‘zini eshikka urgani esida qoldi, xolos.

Mana, hozir ham bekaning masxaraomuz gapi yodiga tushgan vazir janoblarining ko‘nglida hasad aralash raqobat tuyg‘usi alanga oldi-yu, yo‘lak oxiridagi marmar zinalardan ikkinchi qavatga ko‘tarila boshladi.

Bu yerda ham ikki tomon turnaqator eshiklar bo‘lib, sultonning mashhur maxfiy go‘shasi yo‘lakning eng oxirida edi. Bu yerdagi shamlarning deyarli hammasi o‘chirilgan, faqat eng tupkarida bitta-yu bitta sham miltirar, qorong‘i yo‘lak tubsiz g‘orday sirli va behudud tuyulardi.

Abul Hasanak, rangi o‘chib, dir-dir titray boshlagan shoirga bir qarab qo‘ydi-da, oyoq uchida odimlab, yana eshiklarni birin-ketin ocha boshladi. Shoir Unsuriy uning orqasida arvohtay ergashib borar, mo‘ralab qarashga ham jur‘at etmas edi.

U avval lablari unsiz pichirlab, ochib-yopilgan eshiklarni sanab bordi, keyin pinhoniyligini go‘shaga

yaqinlashgan sayin qo'rquv va hayajondan sanoqni ham unutib qo'ydi. Mana, maxfiy go'shaga bittagina xona qoldi. Abul Hasanak bu xonaning fil suyagidan jilo berilgan eshigini asta ochib ichkariga kirdi, kirdi-yu, go'yo xonada mudhish bir narsani ko'rganday dahshat bilan orqaga tisarildi:

– Olampanoh!

– Olampanoh? – Unsuriy vazir janoblarning vahimali shivirlashidan dahshatga tushib, orqaga chekindi. – T-tirikmilar, olampanoh!

– Tirik! Mast uyqudalar! Ammo... anov battol hakim qayda? – Abul Hasanak chiroyli serkiprik ko'zlarini pirqipirib, shoirga bir zum tikilib turdi, so'ng shitob bilan yurib borib, maxfiy go'shaning tilla tasmalar qoqilgan zalvarli eshigini yulqib ochdi!..

Xona charog'on edi. Undan tushgan yorug'nur Abul Hasanak bilan Unsuriyning ko'zini qamashtirib yubordi.

– Vo darig'!

Devor va shiftlariga yalang'och erkak va ayollarning ishqiy holatlarini tasvirlovchi hayosiz suratlar solingan o'rdaday keng xonaning to'rida, qavat-qavat shoyi to'shak ustida, tanasi hayosizlarcha ochilib qolgan bir kanizni quchoqlab... «hakimi davron hazratlari» dong qotib uxlab yotardi!

Abul Hasanak yalt etib Unsuriyga qaradi. Shoir Unsuriy, bir devorlardagi behayo suratlariga, bir to'rdagi oppoq ipak to'shakda chirmashib yotgan «oshiq-ma'shuqlar»ga tikilganicha, bo'sag'ada g'alati tamshanib turardi!

Abul Hasanak zaharxanda bilan qo'lidagi shamni «puf» etib o'chirdi-da, qahr bilan yurib

borib, «hakimi hazratlari»ning maymunday sertuk ketiga bir tepdi.

«Hakimi davron» cho‘chib ko‘zini ochdi-yu, apil-tapil o‘rnidan turdi. Uni tepganda uyg‘onib ketgan kaniz tepasida qaqqayib turgan vazir janoblarini ko‘rib, qichqirib yubordi. Bu o‘sha, kechasi uni ishq hunarida ojizsiz deb, masxara qilib kulgan haram bekasi edi!

– Yo‘qol ko‘zimdan, behayo fohisha!

Abul Hasanak bekani ham tepishga chog‘landi, biroq yalang‘och beka abjirlik bilan yerdagi oq ro‘jaga yopinib, o‘zini eshikka urdi.

Sal hushiga kelgan «hakimi davron» ham shosha-pisha keng ipak shalvarini kiyib, egniga to‘nini yopdi.

Abul Hasanak oyoqlarini kerib, uning tepasida chang solishga hozir turardi.

– Xo‘sh, g‘alamis? Olampanohning bu tabarruk go‘shasini harom qilmoqqa kim ijizat berdi senga?

– Olampanoh... o‘zlari ijizat etdilar, janobi vazir!

– Olampanoh! Manov behayo haram bekasini ham qo‘yningga olampanoh soldimi, battol?

– Shunday, taqsiri olam, o‘z... o‘zlari ijizat etdilar!

– Iblis! – dedi Abul Hasanak, yana hasad alan-gasida yonib, – hammani avrab, nog‘orangga o‘ynatib bo‘lding! Endi kuning bitdi sen quzg‘uning! Chin Ibn Sinoga yuzma-yuz bo‘lasan shu bugun!

– Chin... chin Ibn Sino?

– Ha, chin hazrat Ibn Sino kelmish G‘aznaga! Amir Mas‘ud shahri Isfahondan topib yubormish uni!

– Amir Mas‘ud yubormish! – «Hakimi davron» Abu Shilqim ibn Shahvoniy hayosiz suratlar



solingan devorni paypaslab, asta o'rnidan turdi. Dir-dir titragan qo'llari bilan yuz-ko'zlarini ishqab: – Ajabo! – deb, yoqasini ushladi. – Nahot, sizday dono vazir bu yolg'on gaplarga inonsalar?

– Yolg'on?

– Yolg'on bo'lmasa... ul valine'mat amir al-mo'mininni bu dardi bedavodan forig' qilgan kim? Faqirmi yoxud... amir Mas'ud topgan ul soxta Ibn Sinomi? – Abu Shilqim ibn Shahvoniy oxirgi so'zlarini allaqanday o'ksib aytdi-yu, boshini egib jim qoldi.

Abul Hasanakning ko'zlaridagi boyagi qahr hayrat va umid bilan almashdi. «Hakim hazratlari» buni payqadi chog'i:

– Mayli! – dedi birdan dadillanib. – Agar vazir janoblari faqirdan shubha qilgan bo'lsalar... shifo topgan kimsa, ya'niki amir al-mo'minin o'zlari aytsinlar – kim chin hazrat Ibn Sino, kim soxta?! Sultoni salotin o'zlari yechsinlar bu jumboqni!

Eshikda hanuz tamshanib turgan Unsuruiy bu so'zni eshitib:

– Ofarin sizga, hazrat Ibn Sino! – deb chapak chalib yubordi. Ibn Shahvoniy esa uchlari qaychilangan mosh-guruch mo'ylovini silab kulimsiradi:

– Haram bekasini bekor haydadingiz, janobi vazir! Chaqiring uni! Men sizga shunday bir doru beraykim, ishq hunarida kaminadan yuz chandon o'zib ketasiz! – «Hakimi davron» mastona qah-qah otib kuldi. – Yo'q, yo'q, haq so'z bu, valine'mat! Sultoni salotin peshingacha uyqudan uyg'onmaydilar! Haram bekasini chaqirtiring. Suluv kanizlardan keltirsinlar! Anov kekxa shoir ham bu dunyoga kelibdi – noumid ketmasin! Bizga qo'shilib bu jannatda bir davri davron sursin, sho'rlik!

## YIGIRMA OLTINCHI BOB

Gʻaznayi munavvarada chin hazrat Ibn Sino paydo boʻlgani haqidagi xabarni shoir Unsuriyga Piri Bukriy yetkazgan boʻlsa, Beruniyga sohibi devon Abu Nasr Mishkan janoblari yetkazdi.

Beruniy soʻnggi bir-ikki hafta rasadxonada boʻlib, shom chogʻi shahar hovlisiga qaytgan edi. Qaytishi bilan sohibi devon ham kirib keldi.

Xudo boʻy-bastdan urib qolgan boʻlsa ham, aql-zakovatdan benasib qilmagan, oʻzini hamisha vazmin va basavlat tutadigan bu odam hozir allaqanday besabr va betoqat edi. U Beruniyning iltifotlariga quloq solmay, Sabhuga «chiqib tur!» deb imo qildi-da, eshikni zich yopib, hayajon bilan shivirladi:

– Darhol kiyining, mavlono! Birodari azizingiz... hazrat Ibn Sino poytaxtimizga qadam ranjida qilmishlar!

«Ibn Sino» nomini eshitganda Beruniyning yuragi beixtiyor «shigʻ» etdi, biroq shu zahotiyiq bir oydan beri boʻlayotgan mojarolar, dorus-saltanatda yurgan hayratomuz mish-mishlar yodiga tushib, labiga kulgu yugurdi.

– Olampanohga qancha Ibn Sino kerak? Bir soxta Ibn Sino yetmaydimi? Ikkinchi soxta Ibn Sino ne kerak, taqsirim?

Sohibi devon rad ifodasida oppoq sallador boshini chayqadi:

– Yoʻq-yoʻq, bu Ibn Sino soxta emas, chin Ibn Sinodur, mavlono! Isfahonda turgan amir Masʻud oʻzi yoʻllagandur hazratlarini!



– Inshoollo so‘zingiz rost bo‘lsin! Ammo... amir Mas‘ud yo‘llagan bu Ibn Sino chin Ibn Sino bo‘lsa, saroydagi anov «Ibn Sino»ni ne qilasiz, taqsim?

– Fosh qilamiz! Yolg‘iz uni emas, anov hezbachcha vazir... Abul Hasanakni ham qo‘shib fosh qilamiz, mavlono!

Beruniyning lablaridagi tabassum achchiq kulguga aylandi.

– Bilmam, taqsim, siz aytgan ul soxta Ibn Sining dorulari sultonga sihat keltirib, davosiz dardini daf etgan emish!

– Yolg‘on!

– Yolg‘onmi, chinmi, kecha amir al-mo‘mininni o‘z ko‘zingiz bilan ko‘rdingiz. Masjidi jomeda siz aytgan ul battol hakimga o‘qilgan hamd-u sanolarni o‘z qulog‘ingiz bilan eshitdingiz...

– Eshitdim... ammo... baribir inonmaymen! Ul makkor kimsa hakim emas, ilonning yog‘ini yalab, qonini so‘rgan bir firibgardur! O, mavlono, mavlono! – dedi sohibi devon, oppoq boshini alam bilan tebratib. – Shaytondan tarqagan bu shayton saroyda nelar qilib, ne o‘yinlar ko‘rsatmoqda – hech birini bilmaysiz! Ul mug‘ambir afsungar jodu va afyun bilan sultonni aql-u hushidan ayirmish. Davlatpanohning ko‘zini ochmoqchi bo‘lgan xesh-u aqrabolar esa – quvg‘indadur! Hatto, bu firibgarni topgan vaziri a‘zam Ali G‘aribning o‘zi ham olampanohning qahriga yo‘liqqandur!

– Siz esa... ul firibgarni fosh qilamen, deb chiranasiz!

– Men emas, siz bilan chin hazrat Ibn Sino fosh qilmog‘i darkor ul qallobni! Hamma umid siz ikkovlaringda, mavlono! Toki, o‘zini chin Ibn Sino

deb, olampanohni o'z sehriга ilintirgan bu g'alamisning soxta hakim ekanini fosh qiladurg'on boshqa bir qimsa yo'qdur, mavlono!

– Yo'q, uni biladurg'on yana bir kimsa bor!

– Kim ul?

– Shoir Malik ul-sharob! Ul sho'rlikning birdan-bir gunohi – bu makkor jodugarni tanigani-dur! Tanigani uchun bir zindondan ikkinchi zindonga tashlanur, siz esa...

– Hmm... – sohibi devon Beruniyга qarashdan uyalganday nigohini chetga oldi, so'ng miti jussasiga mos tushmagan bir qat'iyat bilan: – Xo'p! – dedi, kichkinagina mushtini tugib. – Malik ul-sharobni zindondan chiqarmoq chorasini ko'ramiz! Ammo shu narsa yodingizda bo'lsin, mavlono, dorus-saltanatga tashrif buyurgan birodaringiz chin Ibn Sino ham hozir Malik ul-sharob kabi xatar ostidadur!

«Xatar» so'zi Beruniyга xuddi sarmast odamning boshiga quyilgan bir paqir sovuq suvday ta'sir etdi. U birdan hushyor tortib:

– Hazrat Ibn Sino qayda hozir? – deb so'radi.

– Rasadxonada! Hakim hazratlarini anov betavfiq Abul Hasanak xufiyalaridan ehtiyot qilmoq niyatida rasadxonaga tushirmoqni lozim topdik. Rasadxonada o'zlaridan boshqa hech kim bo'lmas. Hazratlari olampanohning chehrayi shamslarini ko'rishga muyassar bo'lgunlaricha birodaringiz bilan birga bo'lursiz, mavlono?

Beruniy sohibi devonning gapiga endigina ishondi-yu, yana boyagiday yuragi gurs-gurs urib, jimgina bosh egdi.

– Sukut – alomati rizo! Darhol kiyining, mavlono!





Mashriq tomondagi tog'lar ustida quchoqqa sig'mas to'lin oy go'yo sof tilladan yasalgan oltin jomday yarqirab turar, olam uning allaqanday osuda, tiniq shu'lasiga g'arq bo'lgan, ko'chalar, maydonlar, chorrahalar yorug' va xiyol sirli edi.

Bir necha oy sovuq tahluka qo'ynida yotgan shahar kechagi tantanalardan keyin sal iliganga o'xshar, tun yarmidan oshib qolgan bo'lsa ham, karvonsaroylardan musiqa ovozlari eshitilar, guzarlarda gulxan yoqib o'tirgan qorovullar ko'zga chalinardi.

Beruniyning qurshab olgan o'n nafar suvori shahardan chiqqach, pastqam archazor qirlar osha otlarining boshini mag'rib tomon burishdi. Sutday tiniq oy shu'lasida olisdagi qorli cho'qqilar elas-elas ko'zga chalinardi. Cho'qqilar tomondan g'ir-g'ir shabada esar, archa va yovvoyi giyohlarning arlash-quralash nozik atri dimoqqa gup-gup urardi.

Beruniyning saman yo'rg'asini «chuh-chuh»-lashning hojati yo'q, u boshqa otlar qurshovida bir me'yorda beozor yo'rg'alab borar, zotan, Beruniy qanday va qayoqqa ketayotganlarini o'ylamas, uning butun fikri zikri bo'lg'usi uchrashuvda edi. Bu uchrashuv, ajabo, uning xayolida bir-biriga zid, notinch o'ylar, dilida esa xijolat aralash pushaymon uyg'otmoqda edi.

Shak yo'q: Abu Alining kelgani yaxshi! Ular Gurganj sarhadida vidolashibdiki, Abu Rayhon uni bir ko'rishga intiq-intizor! U bilan olam haqida, tabiat sirlari haqida, o'lim va hayotga bog'liq yechilmas jumboqlar haqida to'yib-to'yib suhbatlashish, boshlaridan o'tgan yaxshi-yomon gaplar,

kechgan kechmishlar to'g'risida yotib dardlashish oralaridan o'tgan nizo-nifoqlar uchun kechirim so'rab, ko'ngil tugunlarini yozish orzusida yurardi! Mana, orzusiga ham yetdi hisob! Lekin orzusiga yetgan bir mahalda bu mash'um ishlarning boshlanishi! O'zini Ibn Sino deb e'lon qilgan bu firibgarning paydo bo'lishi! Uning aql bovar qilmas nayranglari-yu, bu nayranglar sabab saroydagi fitna-fasodlarning avj olishi!..

Bundan bir oy muqaddam, aql bovar qilmas bu mash'um ishlar boshlanganda Beruniy sal o'tmasdanoq ularning misini chiqib, haq qaror topishiga inongan edi. Yo'q, aksi bo'ldi! Shaytonga saboq bergan bu mug'ambir qanday dorular ishlatgani hammaga qorong'u, ammo haqiqat shuki, bir necha oydan beri og'ir dard otashida qovurilib yotgan amir al-mo'minin «hazratlari»ning muolijasidan shifo topib, oyoqqa turdi. Shaharda tarqalgan sovuq mishmishlarga barham berish niyatida sulton kecha birinchi marta ko'chaga chiqdi, misli ko'rilmagan as'asa-yu dabdaba bilan dorus-saltanat guzarlari va maydonlaridan ot surib o'tdi, masjidi jomeda yuz ming namozxon ishtirokida besh rakaat namoz o'qib, Bog'i Firuzda besh yuz kishiga ziyofat berdi!..

Bas, bu og'ir, notinch vaziyatda aziz birodarining ahvoli ne bo'ladi? Yigirma yil bu mustabid shohga xizmat qilishdan bosh tortib qochib yurgan allomayi zamon, nahot endi telba taqdirning teskari o'yinlari sabab g'ururini poymol etib, katta boshini kichik qilib chin Ibn Sino ekanini isbot qilishga majbur bo'lsa? Bu ham mayli, soxta Ibn Sino tevaragida boshlangan bu mashmasha,



Xatlibegim bilan vazir-u vuzaro va amir-u umaro o'rtasida tobora avj olayotgan berahm, beshafqat kurash orasiga tushib qolsa nima bo'ladi?

Ana, o'ngda Gardiz qal'asining qo'rg'oni ko'rin-di. Qo'rg'ondan o'tish bilan yo'l birdan o'rlab ketdi-yu, oldinda, to'lin oy shu'lasida olmosday yarqiragan qorli tog' o'rkachida rasadxona binosi ko'zga chalindi. Binoning ikkinchi oshyonasidagi do'ng'alak darichalari so'nayotgan yulduzlarday ojiz miltirar, aftidan, kekxa munajjim mavlono Abu Tolib Farruxiy hanuz uyg'oq edi.

Odatdagiga xilof, rasadxona qo'rg'oni oldi-da... qo'llarida tig' ushlagan ikki navkar turardi. Beruniyni boshlab kelgan navkarlar uni otdan tushirib, orqalariga qaytishdi. Beruniy uvishib qolgan oyoqlarini uqalay-uqalay, hovliga kirdi. Katta bog'ni eslatuvchi serdaraxt hovli kimsasiz, rasadxona jimjit edi. Uning qo'sh tavaqali zal-varli eshigi berk edi. Beruniy, go'yo Ibn Sinoni uyg'otib yuborishdan qo'rqqanday, eshikning ul-kan mis halqalaridan tutib asta taqillatdi. Dar-hol ichkarida yengil oyoq sharpasi eshitilib, eshik asta ochildi. Bo'sag'ada, qo'lida toshfonus, yosh muarrix Abulfazl Bayhakiy turardi. Oyog'ida ka-vush, egnida yo'l-yo'l bo'z yaktak, Abulfazl Be-runiyni ko'rib:

– Ustod! – deb shivirladi allaqanday vahima bilan. – Rasadxonaga... Hazrat Ibn Sino tashrif buyurdilar! Soxta emas, chin Ibn Sino, ustod! Yonlarida shogirdlari ham bor!

Beruniy beixtiyor kulimsirab:

– Hazratlari qaydalar? – deb so'radi. – Istiro-hatdalarimu?

– Yo‘q, ustod. Shogirdlari pastda, istirohatdalar. O‘zlari yuqorida, rasad<sup>1</sup> bilan mashg‘uldurlar!

– Rasad bilan?

– Shunday, ustod! Olatlar yordamida Dubbi akbar burjlarini o‘lchash bilan banddurlar!

Beruniy bir-bir bosib qarshisidagi marmar zina tomon yurdi, biroq zina pillapoyalariga oyoq qo‘yarkan, negadir to‘satdan bir mahallar Abu Aliga yozgan xatlari, to‘g‘rirog‘i, xatlardagi zaruratsiz gustohliklari esiga tushib, yana boyagiday xijolat aralash pushaymon tuyg‘usi quyilib keldi. Bunga dorus-saltanatda bo‘layotgan mojarolarni aytish tashvishi qo‘shildi-yu, Beruniy, zina tutqichlariga suyanganicha, uzoq turib qoldi.

Yo‘q, na maktublardagi gustohliklari uchun uzr so‘rashga zarurat tug‘ildi, na dorus-saltanatda sodir bo‘layotgan mudhish voqealari izohlab o‘tirishga! To‘g‘rirog‘i, uzr ham so‘radi, mudhish voqealarni aytib ham berdi, lekin buning hammasi keyin bir necha kun davom etgan tongotar suhbatlar chog‘ida, Beruniy orzu qilgan «yotib dardlashishlar» vaqtida aytili. Abu Ali esa go‘yo shunday bo‘lishini oldindan bilganday bu gaplarni kulib eshitdi, faqat kulgusi allaqanday ma‘yus va dardli chiqdi. Biroq bu gaplar keyin bo‘ldi. Hozir esa...

Beruniy kirganda xonaning o‘rtasidagi yoysimon sudsi faxri<sup>2</sup> yonida, shiftdagi katta tuyenukning tagida, odatda Beruniy o‘tiradigan suyanchig‘i baland yumshoq kursida... boshiga mo‘risimon ko‘k qalpoq, egniga ko‘k kimxob to‘n ustidan yengsiz oq yaktak kiygan bir mo‘ysafid kallasini osiltirib o‘tirardi!

<sup>1</sup> Rasad – falakni kuzatish.

<sup>2</sup> Sudsi faxri – sekstant.



Beruniy oyoq uchida yurib, kursining yoniga bordi.

Mo'ysafidning tizzasidagi ipak qog'ozda Dubbi akbar yulduzlarining sudsi faxrida aks etgan burjlari chizilgan bo'lib, tagiga bir necha satr izohlar yozilgan, lekin bu izohlarni yozgan qalam gilam ustida yumalab yotar, Ibn Sino pinakka ketgan edi!

Yopiray! Ulkan boshini horg'in osiltirib kursida uxlab yotgan bu mo'ysafid... nahot o'sha Abu Ali ibn Sino bo'lsa? Beruniy bilgan Abu Aliga ham o'xshar, ham o'xshamas edi! Beruniy bilgan Ibn Sinoning soqol-mo'ylovlari saqichday qop-qora va bejirim edi, bu horg'in mo'ysafidning mosh-guruch soqoli esa ko'ksiga tushgan! Beruniy bilgan Ibn Sinoning cho'zinchoq xushsurat chehrasida bitta ham ajin yo'q edi, kursida beholgina uxlab yotgan bu mo'ysafidning oftob va shamollarda qoraygan yuzi silliq bo'lsa ham, yumuq ko'zlarining tegrasiga, lablarining chetlariga chuqur izlar tushgan, horg'in chehrasida qandaydir tizginsiz alamlar muhri bosilgan edi! Faqat sham shu'lasida mis barkashday yaltiragan katta do'ng peshonasi-yu, uzun qiyg'ir burni Beruniy bilgan bu-rungi Ibn Sinoni eslatardi, xolos!

Beruniy, yuragi allaqanday achishib, sekin orqaga qayta boshladi, biroq shu payt, kursidagi mo'ysafid uyg'onib ketdi-yu, asta o'rnidan turdi. Uning horg'in chehrasida, chuqur botgan tiniq ko'kimtir ko'zlarida taajjub aralash hayrat aks etdi, so'ng bu hayrat yoshiga mos tushmagan muloyim bir tabassum bilan almashdi.

– Assalomu alaykum, ustod!

Yo, tavba! Bu sal bo'g'iq, osoyishta ovoz, mu-loyim kulimsirab turgan bu ko'kimtir ko'zlar, bu katta do'ng peshona – hamma, hammasi tanish, aziz, qadrdon edi!

– Vaalaykum assalom, Abu Ali!

Beruniy Ibn Sinoning novcha, nazarida, burungidan ham novcharoq, ozg'in qaddini bag'riga bosarkan:

– Vo darig'! – deb «qult» etib yutindi. – Seni ko'radurg'on kun ham bor ekan, Abu Ali!

Ular, go'yo diydor ko'rishganlariga hanuz ishonolmay, bir-biriga qayta-qayta tikilib qarashar va qayta-qayta quchoqlashib ko'rishishar edi. Nihoyat, kursilarini surib, yuzma-yuz o'tirisharkan, Ibn Sino xiyol g'amgin kulimsirab:

– Tangriga shukur, – dedi ko'zini Beruniydan uzmay. – Hanuz burungiday bardam, burungiday salomat ko'rdim sizni, ustod.

– E voh! Sen bilgan Abu Rayhon emasmen. Umrning eng nurlil onlari o'tib ketdi, Abu Ali!

– Ne chora? Taqdiri azalning qonuni shu ekan, ustod!

– Nahot, senday hakimi davron ham bu qonunni o'zgartira olmasa, Abu Ali!

Ibn Sino horg'in ko'zlarini yumib, yana mahzun kuldi:

– Yoshlikda, shubha neligin bilmay yurgan aql zaif chog'larda nayinki bu qonun, hatto, ajalni ham daf etishga inonar edik! Mana endi, keksalik manziliga yetib, oq-u qaroni taniganimizda ayon bo'ldiki, olam sirlarini yechishga ojiz bir banda ekanmiz, ustod!

– Qariganda endi aqlimiz kirdi de, Abu Ali!

– Bilmam, ustod!.. Faqir aqlim kirdimi, yo'qmi – buni aytolmaymen. Ammo... buyuk alloma Suqrot aytganidek, shuni bildimki, hanuz hech narsani bilmas ekanmen, ustod!

Ibn Sinoning o'z ustidan xiyol kulib, xiyol kinoya bilan gapirishlari Beruniyga, ayniqsa, xush yoqdi-yu mehr bilan tikilib:

– Kaminani uyaltirma, Abu Ali! – dedi yolvorib.  
– «Al-Qonun»dan buyuk asar yaratib, «shayx urrais» nomini olgan senday allomayi zamon faqirni «ustod» deyishing yarashmas, bil'aks, men seni «ustod», desam yarashadur, Abu Ali!

– Kamtarlik – inson ziynatidur, bilamen. Ammo... siz ham meni uyaltirmang, ustod!

– Mayli! Gap bir-birimizni ulug'lashda emas, Abu Ali!

– Shunday, ustod!

Ular, go'yo bu lutf-u iltifotlardan xijolat chek-kandan, bir zum jim qolishdi. Beruniy yuragini chulg'ab olgan hayajon bilan hanuz olishib:

– Faqir seni o'ylaganimda, nechundir doim Gurganjda, vidolashuv kechasida aytgan so'zlar-ring yodinga tushardi, Abu Ali, – dedi.

– Ha, vido kechasi mening ham yodimda, ustod. Beruniy miyig'ida bir kulib qo'ydi:

– Qalay, orzu qilgan odil shohlarni topdingmu, Abu Ali?

– Topdim, – Ibn Sino ham horg'in ko'zlarini yu-mib, g'amgin kulimsiradi. – Qayga bormay hamma joyda «odil shohlarga» duch keldim, ustod. Shundaykim oxir pirovardida ulardan yashirinishga joy topolmay qoldim. Jurjonda Qobus ibn Vushmagirning «adolatidan» zo'rg'a qochib qu-tuldim. Rayda o'zingiz bilgan malikayi Saida!..

«Malikayi Saida» nomini eshitishi bilan negadir Xatlibegim bilan boʻlgan uchrashuv yodiga tushdi-yu, Beruniyning koʻzlarida shoʻx uchqunlar chaqnadi.

– Eshitishimcha... oshini oshab, yoshini yashab boʻlgan ul malikayi gulruxsor senga oshiq-u beqaror boʻlgan emish. Bu soʻz haqiqatmu, Abu Ali?

– Ne chora! Taqdirning bu oʻyinini ham koʻrdik, ustod! – kuldi Ibn Sino. – Shundaykim, ul malikayi gulruxsorning mehri adolatidan sichqonning ini ming tanga boʻldi. Ammo, e voh, yomgʻirdan qochib doʻlga, yaʼniki malikayi Saidadan qochib Shamsuddavlaga tutildim. Bunisi undan ham mehribon, undan ham adolatli edi, ustod!

– Bir-biridan mehribon, bir-biridan adolatli de?

– Shunday, ustod. Siz-chi? Siz ham bu tomonlarga adolat qidirib kelgan edingiz...

– Ha, adolat deganda boyoʻgʻli toʻgʻrisidagi rivoyat yodimga tushadir, Abu Ali! Gʻaznani koʻra oldingmu?

– Oz-oz koʻrdim, ustod. Haqiqatan, goʻzallikda benazir bir shahri muazzam boʻlibdi! Ammo... bu goʻzallik, bu masjid-u minoralar, koʻshk-u saroylar kimlar va nelar hisobiga...

– Bilamen, Abu Ali! Oʻz yurtini obod qilmoq uchun boshqa yurt, boshqa shaharlarni zer-zabar qilmoq – gunohi azimdur. Hammasini bilamen, Abu Ali. Dorus-saltanatda qurilgan muhtasham saroylar, koʻrkam qasrlar masjid-u minoralar uchun hindlar yurtidagi oʻnlab shaharlar talon-taroj boʻlganini oʻz koʻzim bilan koʻrdim. Va lekin... hozir oʻzing iqror boʻlding! Biri biridan «odil», biri biridan «oqil» deding! Bas, sulton Mahmud



xizmatida bo'lmasam Shamsuddavla xizmatida bo'lur edim. Shamsuddavla bo'lmasa, malikayi Saida xizmatida bo'lur edim. Ne chora, Abu Ali? – Beruniyning tovushi nogahon cheksiz g'am-anduh bilan yangrab ketdi-yu, Ibn Sino beixtiyor yuragi uvishib:

– Ustod! – dedi qo'lini Beruniyning tizzasiga qo'yib. – Yo'q, ustod, sulton Mahmud xizmatiga kelganingiz uchun sizni ayblamoqqa haqqim yo'q. Bilamen – kelishdan bosh tortsangiz, sizni ham faqir kabi oyoq-qo'llaringizdan bog'lab olib kelur edilar. Ilgari bo'lmasa ham endi bir narsaga aqlim yetdi, ustod: bu dunyoda hamma narsa, yaxshilik ham, yomonlik ham nisbiy ekan. Kim bilsin, agar siz bu mustabid shoh xizmatiga kelishdan bosh tortganingizda... ehtimol, bu muazam rasadxona bunyod bo'lmas edi!

Beruniy birdan chehrasi yorishib, bir qubbador shiftdagi ulkan maxsus tuynukka, bir pastdagi sudsi faxriga, bir devorlardagi jadvallarga qaradi.

– Ha, bu rasadxona kamina uchun bir taskin-u tasalli dargohi bo'ldi, Abu Ali! Sen kabi men ham dunyo ko'zimga qorong'u ko'ringan onlarda shu dargohga kelib ilm bilan, mutolaa va mushohada bilan o'zimni ovutamen. Bu tuynukdan ko'ringan anov sitoralar oldida odam umrining o'tkinchiligi haqida o'ylab, tassalli olamen. So'ng, bu olam, bu falakiyot sirlarini o'rganish uchun allanechuk bir rag'bat va quvvat topamen bu rasadxonada! Nasib qilsa yaratgan taqvimlarim chizgan jadvallarim – hammasini ko'rsatamen, Abu Ali!

Ibn Sino ustodning dilidagi dardlarini butun vujudi bilan his etganday unga hayrat va mehr bilan termilib:

– Hindiston-chi? – deb so‘radi. Hindiston haqida katta kitob bitgan emishsiz. Uni xattotlarga berib ko‘chirtirgandursiz, ustod?

Beruniy sekin uf tortdi:

– Uni xattotlarga bermoq uchun avval sulton Mahmudga ko‘rsatmog‘im darkor, Abu Ali!

– Nechun, ustod?

– Nechun? Nahot, «odil shohlar» odatini bilmay-sen, Abu Ali? «Hindiston» deganda sulton Mahmud uning muzaffar yurishlari to‘g‘risida yozilgan bir qasida, uning qatl-u qirg‘inlarini sharaf-lab, nomini bashariyat tarixida qoldirguvchi bir asar deb o‘ylaydi! «Hindiston» esa bu buyuk va mazlum elga faqirning yuragida tug‘ilgan ulug‘ ehtiromdan bir tomchidir, Abu Ali!

Ibn Sino ko‘zlari yosh tolibi ilmning ko‘zlariday hayrat bilan porlab:

– Loqaqal bir nusxasi tayyordur, ustod? – deb so‘radi. – Tayyor bo‘lsa, bir necha kunga bo‘lsa ham berarsiz!

Beruniy ko‘zini qisib kuldi:

– Marhamat, agar sen «al-Qonun»dan bir nusxa bersang, men ham «Hindiston»dan bir nusxa beramen!

– Boshma-bosh deng?

– Boshma-bosh!

Suhbat goh ilmi hikmat, yozilgan va yozish orzusida ko‘ngillariga tugib qo‘ygan kitoblar haqida bo‘lar, goh boshdan kechgan umr savdolariga o‘tardi. Ilm va kitoblar haqida gap ketganda

suhbatga qandaydir jon kirar, ikkisi ham ko'zlari chaq nab, yuzlariga qon yugurar, umr savdosiga o'tganida esa suhbat sokin, ammo allaqanday hazin bir nur bilan yo'g'rilar edi.

Ikkisi ham bir-birlarining dilida qat-qat bo'lib yotgan dard-u hasratlarni, boshlaridan o'tgan musibatlarni bir-biriga aytishdan iymanar, bu g'am-anduhlarni chuqur his etganlari holda, yuraklarida chandiq bo'lib qolgan eski yaralarni tirnashni istamas, to'g'rirog'i, tirnash befoyda ekanini yaxshi anglar, shuning uchun ham telba taqdirning telba o'yinlari haqidagi gaplarni chetlab o'tishga harakat qilishar, bunga iloj bo'lmaganida esa gap ohangi yengil, ammo sal mungli hazil-mutoyibaga burilar edi.

Suhbat shu yo'sin tong otguncha davom etdi.

## **YIGIRMA YETTINCHI BOB**

Vaziri a'zam Ali G'arib Xatlibegimning amri bilan o'z ko'shkiga qaytib kelganida tun yarimdan oshgan edi.

Xatlibegimning maxfiy maktubini vaziri a'zamga Piri Bukriy yetkazdi. Maktub bilan birga u saroyda bo'layotgan hamma mojarolardan bosh vazirni voqif qildi. Bu gaplardan keyin Piri Bukriy vaziri a'zamga o'z dard-u hasratlari, o'z iltimoslarini izhor qilmoqchi edi. Lekin Xatlibegimning maktubini o'qib chiqqan vaziri a'zam shunday hayajonga tushdiki, Piri Bukriyning gaplarini chala-chulpa eshitdi-da, iltimoslarini tinglashga sabri yetmay darhol otga mindi. Ko'shkka bosh vazirdan avval yetib kelgan mushriflar eshik

og'asini ogoh qilib qo'ygan ekan, u vaziri a'zam bilan Piri Bukriyni darvoza oldida kutib olib, to'g'ri ko'shkka boshladi. Biroq ko'shkka kiringach, odatdagidek, ikkinchi qavatga emas, pastga, birinchi qavatning tagidagi yerto'laga o'xshash maxfiy xonalarga boshladi.

Bu yerda bir-biriga tutash ikki xona bo'lib, birinchisida bitta-yu bitta eski kursi turar, ikkinchi xona ham, garchi jihozlari g'aribgina bo'lsa-da, harqalay, tagiga katta qizil yumshoq palos to'shalib, o'rtaga noz-ne'matlar to'la xontaxta qo'yilgandi.

Vaziri a'zam egnidagi odmigina olacha to'nini yechib qoziqqa ildi, boshidagi eskiroq suvsar tepagini olib, shaftoli gulli gilam do'ppisini to'g'rilab kiydi-da, qo'llarini orqasiga qilib, xayol og'ushida keng, chorburchak xonani aylanishga tutindi.

Piri Bukriy, munchoqday ko'zlari sadoqat va umid bilan javdirab, poygakda qo'l qovushtirib turar, u xuddi xo'jasidan suyak kutayotgan kuchukka o'xshar, biroq xo'jasi, o'z g'ami, o'z o'ylari bilan band, vafodor kuchugiga qaramas edi.

Vaziri a'zam so'nggi bir-ikki haftada o'zini juda oldirib qo'ygan, naqsh olmaday qip-qizil, lo'ppi yuzlari so'lib-sarg'ayib, munchoq ko'zlari ichiga botib ketgan, kalta, yo'g'on bo'yni ingichka tortib, tomoq ostlari qari tustovuqning tomog'iday osilib qolgan edi.

Vaziri a'zamning ahvolini ko'rgan Piri Bukriy ko'nglidagi dard-u hasratlarini aytishini ham, aytmasligini ham bilolmay hang-mang bo'lib turgan edi, nogahon tashqarida tap-tap oyoq tovushlari eshitildi-da, eshik shitob bilan ochilib, xonaga... Xatlibegim kirib keldi.



Egnida odatdagi qora ipak ko'ylak o'rniga to'pig'iga tushgan qizil baxmal ko'ylak, yoqasi va yenglariga sariq ipak shokilalar tikilgan qizil mursak, oyog'ida saqichdek yaltillagan uchi egik bejirim qizil etikcha Xatlibegim, yuziga tutilgan shaffof shoyi durrasini orqasiga tashlab, bir to'rdan bosh egib turgan vaziri a'zamga, bir poygakda tosh bo'lib qotib qolgan Piri Bukriyga qaradi-yu, yupqa lablarini himarib:

– Hi, kuyovto'ra! – deb kuldi. – G'unajinni no'xtalay oldilarmi yo hanuz no'xta sololmay ovoralarmu?

Begimning hazili zaharli qamchiday tegsa ham, Piri Bukriy allaqanday qiyshanglab kuldi:

– O'zingizdan qolar gap yo'q, begim. Yosh narsa...

– Chaynalmay, chinini ayta bering, kuyovto'ram! Agar jilovlay olmagan bo'lsalar haram bekasini yuboram, o'zlari jilovlab mindirib qo'yadilar!

– Toabad minnatdormen, begim! – Piri Bukriy hamon hirlinglab kulganicha qo'yniga qo'l soldi. – Oliyhimmat begimga atalgan bir sovg'am bor edi, fursatdan foydalanib...

Xatlibegim keskin harakat bilan Piri Bukriyni to'xtatdi:

– Hozir sovg'a-salomning fursati emas. Undan yuz chandon zarur gap bor! Daf bo'lsinlar, kuyovto'ram!

– Qulluq, begim, qulluq! – Piri Bukriy shoshapisha orqasiga tisarilib, xonadan chiqdi. U oldin eshikni zich yopmoqchi edi, keyin xayoliga allaqanday bir fikr kelib, qiya ochiq qoldirdi-da, birdan holsizlanib, devorga suyandi, suyanishi

bilan ichkaridan Xatlibegimning odatdagiday o'ktam, qahrli tovushi eshitildi:

– Hamma qilgulikni qilib qo'yib, endi nechun pistirmalarda pusib yuribdilar, taqsirim? Suf siz-day vaziri a'zamga!..

Ali G'arib bir nimalar deb g'udrandi, biroq uning so'zlarini yana Xatlibegimning betoqat, darg'azab ovozi bo'ldi:

– Bas! Nolayi fig'oningizni yig'ishtiring, janob vazir! Bu makkor soxta Ibn Sinoni topgan men emas, uni topgan taqsirimning o'zlaridur! Hay at-tang! Mana endi bilindi Xo'ja Ahmad<sup>1</sup> hazratlari-ning qadri! Barcha arkoni harb va arkoni davlat-ning qahriga yo'liqqan bir hezalakni daf qilishga aqlingiz yetmasa... vaziri a'zam bo'lib ne qilasiz, taqsirim?

– Soyaboni marhamat, begim! Devorning ham qulog'i bor! – Ali G'arib hadiksirab kelib eshikni zich yopdi chog'i, ovozlari eshitilmay qoldi.

Piri Bukriy, odatda, qulog'ini devorga qadab bo'lsa ham, bunday pinhoniylar gaplarni bilib olish-ga urinar edi, hozir esa ko'ngli g'ash, yuragida in-tihosiz bir alam, beholgina sudralib borib, chet-roqda turgan eski kursiga asta cho'kdi.

Ajabo: uning ko'z oldida hamon Xatlibegim-ning kinoyali tabassumi turar, quloqlari ostida zaharli gaplari yangrar edi! Bu gaplardan uning yuragi og'rimasdan kimning yuragi og'riydi?

Mana, bir oydan oshdiki, Xatlibegimning navkarlari kimsan Horun ar-Rashidning beba-ho javohiri evaziga Sadafbibini uning qo'liga olib borib topshirishdi.

---

<sup>1</sup> Xo'ja Ahmad Maymandiy – sulton Mahmudning ko'p yillik bosh vaziri.



Bibining sharafiga Piri Bukriy o'z do'koniga tutash bir hovli-joyini sotib olib, gulday yasatib qo'ygan edi. Bibini vaziri a'zam ko'shkidan qolishmaydigan shu ko'rkam hovli-joyiga tushirdi, xizmatiga kekxa oqsoch yollab, o'zini noyob zarrin liboslarga o'rab tashladi, yerto'lasidagi eng yashirin sandiqlarini ochib bo'yniga eng qimmatbaho marjonlar, quloqlariga oltin sirg'alar, qo'llariga tilla bilaguzuklar, hatto, oyoqlariga oltin xolxollar taqib, boshidan la'l va injular sochdi. Ammo ne foyda? Sadafbibi hanuz uni ko'rsa bo'rini ko'rgan qo'zichoqday qaltiraydi, qaltirasa ham mayli, yumaloq kulcha yuzidan qoni qochib ko'zlari hazar aralash allaqanday nafrat bilan chaqnaydi... Kechalari esa yoniga yo'latmaydi, na uning ohu faryodlariga quloq soladi, na kekxa oqsochning pand-u nasihatlarini-yu do'q-pisandalariga!..

Ko'p yillardan beri Piri Bukriyning xizmatida yurgan kekxa oqsoch bir necha marta unga Sadafbibini haydab yuborishni, egnidagi bebaho liboslarini yechib olib, o'zini quljallobga pullashni maslahat berdi, agar shunday qilsa, undan ming chapdon ko'hlik, ming chandon muloyim, bezabon kanizlarni topib berishni va'da qildi. Biroq... ne chora? Poshshoning ishqiqurbaqaga tushmish, degandek, ko'ngilga amr qilib bo'lmas ekan. Piri Bukriy, harchand urinmasin, o'z hislarini jilovlay olmadi.

Piri Bukriy garchi majruh bo'lsa ham, garchi yoshi payg'ambar yoshiga yaqinlashib qolgan bo'lsa ham bir yigit tengi kuchi bor. Xatlibegim aytmasdanoq Sadafbibini hech kimning yordamsiz o'z kuchi bilan no'xtalab olishga bir necha bor

urinib ham ko'rdi. Biroq Sadafbibi ham, jussasi chog'roq, nozik qiz bo'lsa-da, urishqoq mushukday olishib, Piri Bukriyga bo'y bermadi, shundaykim, har safar u qizning go'shasidan soqollari yulinib, yuzlari tiralib chiqdi!

Yo'q, agar Piri Bukriy istasa, Xatlibegim aytganidek, uni allaqachon no'xtalab olardi. O'zining kuchi yetmasa, itday vafodor oqsochining yordamida, oyoq-qo'llarini bog'lab bo'lsa ham no'xtalab olardi. Biroq bibining ko'zlaridagi bu cheksiz nafrat, kulcha yuzlaridagi bu jirkanish!.. Yo'q, kishining nafsoniyatini poymol qiluvchi bu nafratga toqat qilish qiyin! Qiyin, biroq u toqat qilib yuribdi, tishini tishiga qo'yib bo'lsa ham, alamdan yuragi qon-qaqshasa ham chidab kelmoqda.

E, Yaratgan Egam! Bu ne ko'rgulik? Piri Bukriy umrida ikki marta shunday xor bo'ldi. Biri Qiyotda, otasining qadrtoni bo'lmish nasroniy savdogarning beva Rayhonabonuga ishqi tushganida, biri endi, Sadafbibiga duch bo'lganida! Boz bu telba taqdirning telba o'yinini qarangi, har ikki safar ham uning muhabbatiga pand bergan odam Abu Rayhon Beruniy bo'ldi. Taqdir nechun ularni bir-biriga raqib qilib qo'ydi? Rayhonabonu sabab Qiyotda qirpichoq bo'lib, yo'llari ajrashib ketgan ikki raqib, nechun salkam qirq yildan keyin yana bu shaharda duch kelishdi, nechun taqdir yana oralariga bu malakni soldi? Piri Bukriy bu jumboqni yechishdan ojiz. U faqat bir narsani biladi: gar ayovsiz qismat uni Abu Rayhonga ro'baro' qilmaganida uning hayoti o'zgacha yo'ldan ketardi! Shak yo'q – o'zgacha bo'lardi! Yoshlik chog'larida Rayhonabonu visoliga yeta olmasa ham, bu sa-





far Sadafbibining visoliga yetardi! Hozir esa... Piri Bukriy Sadafbibining go'shasiga kirishga o'z, uning bo'sag'asida o'z yog'iga o'zi qovurilib yotarkan, har kecha uning: «Ustod! Ustod!» degan nidolarini eshitadi-yu, qulog'iga qizning faryodi emas, bamisoli og'u quyilganday, vujud-vujudlarigacha achishib ketadi!

Yo, Rab! Yozug'i ne uning? Qaysi gunohlari uchun uni bu noraso dunyodagi eng katta saodat – muhabbat saodatidan mosuvo qilding? Gunohi mayib-majruhligimi? Ammo... uni mayib-majruh qilgan kim? Gunohkor bandangni o'zing kechirgaysen, va lekin, uni majruh qilib, bandalaringga kalaka qilgan ham o'zing emasmu, Parvardigori olam.

Ha, bundan qirq yil muqaddam, yo'q, qirq besh yil muqaddam, kichkinagina, qop-qoragina Abu Rayhon Qiyot bozorlarini supurib, do'kondorlar xizmatini qilib yurgan chog'larida, Piri Bukriy o'n besh yoshlar chamasidagi nozikkina xushsurat bir o'spirin edi! O'zi sal rangpar, kasalmand bo'lsa ham, yelkasidagi bukradan asar ham yo'q edi! Hazar<sup>1</sup> tomonlardan kelib, Qiyotda katta do'kon ochgan otasi esa Alloh uning gunohini kechirgay, – nasroniy dinidagi mashhur savdogarning qizi Rayhonani unga olib berib, boyligiga boylilik, dovruq'iga dovruq qo'shmoq orzusida yurardi.

Lekin... e voh! Balo qayda? Bossang, oyog'ing ostida, deganlari rost ekan!

U bir haftagina betob bo'ldi. Ammo dard uni shunday iskanjaga oldiki, azaldan kasalmand, nozik-nihol o'spirin, baloyi otash ichida qovurilib,

---

<sup>1</sup> Hazar – hozirgi Kaspiy dengizi.

bir hafta hushini bilmay yotdi. Hushiga kelganda esa... tepasida yig'lab o'tirgan otasini ko'rdi. Ota-sining yonida hakimlar kiyimida allomanamo bir kimsa o'tirardi.

Piri Bukriyning ko'krak qafaslariga sovutga o'xshash bir narsa kiydirgan, sovutning ichi esa nazarida, issiq loyga o'xshash qattiq va yoqimli bir narsa bilan to'ldirilgan edi.

Bir oydan keyin allomanamo kimsa unga kiydirilgan «sovut»ni yechib, tanasini qora loydan soqit qildi-da, qo'ltig'idan suyab, o'rnidan turg'azdi.

U hakim yordamida o'rnidan turishga turdi-yu, faryod chekib, qayta o'zini to'shakka otdi. Uning nozik-nimjon bo'lsa ham novchagina bo'y-basti kamida bir qarich kichraygan, zaif ko'kragi bo'rtib chiqqan, yelkasida esa... kallaqantday xunuk, bedavo bir o'rkach paydo bo'lgandi!..

Baloyi nogahon bo'lib yopishgan shu o'rkach tufayli u bir yilgacha odamlarning ko'ziga ko'rinmay, o'z do'konlari tagidagi yerto'lada ko'ksini zaxga berib yotdi. Dunyo ko'ziga qorong'u ko'rinib, ko'kka nola qilib yotdi, hatto, ota-onasini ko'rishga ham toqati bo'lmadi. Uning dard-u alamlarini tushunadigan, cheksiz hasratlariga hamdard bo'ladigan bitta-yu bitta do'sti qoldi, u ham bo'lsa... ikki qarichgina qamish nay edi!

U ochilmasdan xazon bo'lgan umri, ko'ngil faryodlari-yu barbod bo'lgan sevgisi – hamma-hammasini shu hamdard do'stiga so'zlar, yurak-bag'ri qon, ko'zlarida shashqator yosh, tun-u kun tinimsiz bo'zlar edi!

Lekin uning ko'ngliga taskin-u tasalli berguvchi bu do'st, nimqorong'i yerto'lada kecha-yu

kunduz yangragan bu nolayi faryod undan burun ota-onasini adoyi tamom qildi. Avval onayizori yiqildi, keyin otasi. O'limidan uch-to'rt kun avval otasi uni yerto'la tepasidagi o'z xosxonasiga chaqirtirib oldi.

– Gunohkor padaringni kechir, bolam, – dedi sho'rlik ota boshini yostiqdan arang ko'tarib. – Bilamen, sen mening gunohlarim uchun kuyding, bolam. Allohning xohishi shu ekan, ne chora, bo'tam? So'zimga inon, o'g'lim, bir yildan beri gunohkor otangni yolg'iz bir g'am, bir tashvish qiynaydi: bu o'tkinchi dunyodan ko'z yum-sam nogiron zurriyotimning holi ne bo'lur, degan qayg'u ko'nglimga orom bermaydi, bolam! Yodingda bo'lsin: bani odam och qashqirdan yomon – kim ojiz, kim nogiron – avvalambor shularni yeydi! Va lekin, shuni ham bilib qo'y, jigirim. Bani odamning qudrati uning husni jamoli va bo'y-bastida emas, orttirgan boyligida! Poshsholarning kuchi ham boshidagi tojida emas, xazinasidagi ganjida!

Padari poki, – Alloh unga ravzayi rizvondan joy ato qilg'ay! – shunday deb, unga qarshidagi tokchaning pastki g'ishtlarini ko'chirishni buyurdi. G'isht tagida o'ra bo'lib, undan ikkita katta xum chiqdi. Xumlarning biri oltin zeb-ziynatlarga to'la edi, ikkinchisi nodir toshlarga!

– Yodingda bo'lsin, bolam, – dedi otasi, soqolini ko'z yoshi bilan yuvib. – Faqirga bobongdan bir xum ganj tekkan edi, men uni senga ikki xum qilib topshiramen. Bu boyligni ko'z qorachig'ingday asragaysen, toki, u sening qora kunlaringga ham, mas'ul damlaringga ham yarag'usidir!

Hayhot! Ota soʻzlarining faqat birinchi qismigina haqiqat boʻlib chiqdi. Padari qoldirgan gʻanjlar haqiqatan ham Piri Bukriyning qora kunlariga yaradi. Masʼud damlar esa... e voh! Piri Bukriy otasidan qolgan ikki xum ganjni oʻn barobar koʻpaytirdi, ammo oʻn barobar oshgan boylik ham otasi aytgan baxt-u saodatni inʼom etolmadil.. Padari pokidan qolgan ganjlarga ishonib, avval Rayhonabonuga yopishib koʻrdi, endi Sadafbibi-ga. Lekin, e voh, koʻngliga yaqin na sevikli mah-bub topdi, na bir doʻst!

Piri Bukriyning xayolini yana Xatlibegimning qahrli ovozi boʻlib yubordi. U dik etib oʻrnidan turdi-da, oyoq uchida boʻsagʻaga borib, qulogʻini eshikka tutdi.

Xatlibegim, goʻyo har bir soʻzini qilich bilan kesganday kesib-kesib gapirardi:

– Inongan amirlaringizni ishga soling, vaziri aʼzam! Osmon malikasi saroyiga eng sodiq sarbozlaringizni qoʻying! Shundaykim, chin Ibn Sino hazratlari bu muborak dargohga qadam ranjida qilganlarida... hech bir kimsa yoʻllarini toʻsmasin!

Piri Bukriy tap-tap oyoq tovushlarini eshitib, darhol oʻzini chetga oldi. Eshik sharaqlab ochilib, ichkaridan Xatlibegim chiqdi. Uning surma tortilgan qiygʻos koʻzlari allaqanday chiroyli chaqnar, upa-elik surtilgan qoramtir yuzi lovillab yonardi.

– Ha, kuyovtoʻra! – dedi Xatlibegim, boʻsagʻada toʻxtab. – Tarki odat – amri mahol, soʻzimizni poylab turibsenmu bu yerda?

– Yoʻq-yoʻq! Faqir-u haqir begimning xizmatlariga muntazirmen! – Piri Bukriy shunday deb,



qo'ltig'iga qo'l soldi-da, eski lattaga o'ralgan yumaloq bir narsani olib, begim tomon yurdi:

– Bag'dod zargarlari yasagan noyob bilaguzuk! Nodir yoqutlar bilan ziynatlangandur, begim!

Xatlibegim sovg'ani olmoqchi bo'lib qo'l cho'zdi-da, darhol qo'lini tortib oldi.

– Bag'dod zargarlari yasagan noyob bilaguzukni o'ragan lattangni qara! Odamning ko'ngli ayniydur! Siz oling, vaziri a'zam! Keyin eltib berasiz! – Xatlibegim ikki bukilib turgan bukriga ijirg'anib tikilib qaradi-da, yana zaharxanda qildi: – Kuyovto'ra degan sal qaddini rostlab yuradi, azizim! Qaddingizni tuting! Erta-buruskun haram bekasini yuboramen: erka g'unajiningizga kuchingiz yetmasa, o'zi jilovlab, ustiga mindirib qo'yadi!

Begim shunday dedi-da, hanuz kinoyali kulimsiraganicha, xonadan chiqdi.

## **YIGIRMA SAKKIZINCHI BOB**

### **1**

Xatlibegimning xufiyalari to'rtinchi kuni xuftonda kelishdi. Bu paytda hazrat Ibn Sinoning Isfahondan G'aznaga nima maqsadda keltirilgani ikki allomaning ham eslaridan chiqqan, zotan, uzluksiz va allaqanday intiq-intizor suhbat bilan bo'lib, butun olam xotiralaridan ko'tarilgan edi!

Odatda, ertalabki nonushta vaqtida boshlanadigan bu suhbatlar aksar hollarda tun yarmi-gacha, hatto, tong otguncha davom etar, kunlar tunlarga, tunlar esa kunlarga ulanib ketar, biroq bir-birlarining gapini eshitish ishtiyoqi, ha-

yot, olam va tabiat haqidagi fikrlarini bilish istagi, muloqot chanqoqligi soʻnish uyoqda tursin, bilʼaks, tobora ortib borardi.

Beruniy, garchi bir mahallar tabiat muammolari toʻgʻrisida, xususan oftob nurlarining hayotiy kuchi, issiqlik va sovuqlik taʼsirida jismlarning kengayishi, torayishi va, nihoyat, shaharlar oraligʻidagi masofalarni oʻlchash usullari borasida Ibn Sino bilan ancha munozara qilgan, hatto, bu masalalarga bagʻishlangan maktublarida al-loma degan nomga nomunosib gustohlikka borgan boʻlsa ham, Ibn Sinoning yetuk salohiyatiga, ayniqsa, tibbiyot bobidagi isteʼdodiga hech qachon shubha qilgan emas. Lekin, u endigina, rasadxonaning tinch, osuda xonalarida oʻtirib, «Al-Qonun» va «Ash-Shifo» kitoblarining mazmunini, nazm, musiqa va falsafaga oid asarlarini oʻz ogʻzidan eshitganidagina uning naqadar buyukligi va olamshumul shuhrati sabablarini anglab olgandek boʻldi.

Birinchi suhbadayoq negadir tibbiyot masalalari qoʻzgʻaldi. Ibn Sino Beruniyning iltimosi bilan suhbatni «ilmi tashriq»dan boshlab, undan inson aʼzolariga xos kasalliklarga, kasalliklardan davolash usullariga, yaʼniki nabotot olamiga oʻtdi, soʻng yarim hazil, yarim chin tarzda Beruniyning tomirini ushlab, uning dardlarini va, hatto, bu dardlarni qoʻzgʻagan sabablarni aytib berdi va shu yerning oʻzidayoq doru hozirlashga kirishdi. Garchi, suhbat ustida ikkovidan boshqa hech kim boʻlsa, yosh-u qari, xasta-yu sogʻ – hamma hakimi davronga bir koʻrinib qolish orzusini izhor eta boshladi.



Ibn Sino, odatda, «kasal»ning dardini so'rab-surishtirib ham o'tirmas, ko'z qorachiqclarini, burun kataklari, og'zi va tomog'ini ko'zdan kechirar, lozim bo'lsa yechintirib ko'rar, keyin boshini xam qilganicha, qo'lidan ushlab, tomir urishlariga jimgina quloq solardi-da, xastaning dardini o'ziga gapirib berardi. Hakimi davronning topqirligidan lol qolgan betob o'zini yo'qotib qo'yar, Ibn Sino esa shogirdi Abu Ubaydni chaqirib, darhol doru hozirlashni buyurardi.

Beruniy ulug' donishmandlarda chuqur ilm va o'tkir zakovatdan tashqari qandaydir nozik, ilohiy bir tuyg'u bo'lishini bilardi. Ibn Sinoda bu ilohiy va noyob tuyg'u, ayniqsa, kuchli ekanini Beruniy birinchi daqiqalardan oq sezdi. Nazarida, Ibn Sino ko'zini yumganicha, xastaning bilagini ushlab, uzoq sukutga tolarkan, faqatgina betobning tomir urishlari emas, balki o'z dilidagi ilohiy tuyg'ularga ham quloq solar, bu tuyg'ular esa uni sira «aldamas» edi! Uning gap-so'zlari, muomalasi, fikr-mulohazalarida ham xuddi shunday o'zgacha bir salohiyat va chuqur insoniy nazokat sezilib turardi.

Ibn Sinoning har bir so'zida, chehrasida, horg'in ko'kimtir ko'zlarining allaqanday sokin boqishida hayotda ko'p musibatlarni boshidan kechirgan dono odamlardagina bo'ladigan xiyol ma'yus bir joziba, kishini o'ziga darhol rom qilib olguvchi bir mehriyoyo bor edi!.. Shu boisdan, ular bir-birining dilini, gap-so'zlarini, dardlarini imo-ishoralardan oq ilg'ab olishardi. Ular endi yoshlik chog'laridagiday ko'p munozara va mubohasa qilishmas, bil'aks, bir-birlarining

fikr-mulohazalariga chuqur e'tibor bilan quloq solishar, faqat bir masaladagina ko'p tortishardi: Beruniy ko'proq Ibn Sinoni so'zlatgisi kelar, uning kitoblari, olam va tabiat haqidagi o'ylarini ko'proq bilgisi kelar, Ibn Sino esa aksincha, Beruniyni ko'proq gapirtirishni istardi, ayniqsa, Hindistonni ko'p surishtirar, bu yurtning iqlimi, tog'-u toshlari, daryo va ko'llari, ummonlari, shaharlari, kuy va qo'shiqlari, o'tmish va hoziri, ertak va rivoyatlari – hamma-hammasini bilgisi kelardi. Kechalari esa shiftdagi maxsus tuynuk tagida o'tirib, sudsi faxri va boshqa olatlar yordamida yulduzlar holatini kuzatishar, jadval va tavqimlarga aniqliklar kiritishar edi.

Ibn Sino o'zi ham bir mahallar Rayda, malikayi Saida iltimosiga ko'ra, rasadxona qurgan edi. Biroq u qurgan rasadxona bu rasadxona oldida ancha g'arib, olatlar ham Beruniy yaratgan olatlarga tenglasha olmas edi. Chunki Beruniy bu rasadxonani qurishda faqat arab va rum munajjimlari emas, hind allomalarining falakiyot bobidagi mashhur asarlaridan ham foydalangan, ko'p olatlarni ham Hindistondan olib kelgan.

Osmon to'la yulduzlarning sirli miltirashi, sayyoralarning olatlar sathidagi aksi ikki allo-maning xayolini yana yechilmas muammolar, olam va koinot haqidagi azaliy va serjumboq savollarga burardi. Zotan, ularni, ayniqsa, yaqinlashtirgan narsa ham shu serjumboq savollar, ikkisini ham ko'pdan beri qiynab kelayotgan teran falsafiy o'ylar bo'ldi: olam ne? Hayot ne? Yaratguvchi ne?



Ajabo: bu yechilmas falsafiy muammolarga yondashishda ularning o'ylari ham, dardlari ham juda-juda o'xshash edi. Beruniy bu masalada ikki javhar<sup>1</sup>ni tan olar, ya'niki borliqning ibtidosi moddiy va ruhiy javhar, deb bilardi. Ibn Sino uning fikriga qo'shildi, faqat yaratganning mavjudligini ham tan olmoq lozim, deb qo'shib qo'ydi. Zotan, u ham Beruniy kabi olamni yaxlit va murakkab borliq, deb tushunar, hamma mavjud narsalarni ikkiga, ya'ni zaruriy vujud va imkoniy vujudga bo'lar, ularning o'zaro munosabati esa sabab va oqibat munosabatidir, degan e'tiqodda edi. Beruniy uning gaplarini jon qulog'i bilan eshitar, chunki bu fikrlar uning o'z fikrlari, uni ko'p qiynab, kechalari uyqu bermay yurgan pinhoni o'ylari va pinhoni dardlari bilan hamohang edi! Lekin, e voh, olam haqidagi o'ylari qanchalik hamohang bo'lmasin, bu o'ylar oxir-pirovardida tag'in o'sha ma'yus fikrlarga, mavjud borliqning boqiyli va bani bashar umrining o'tkinchiligi, tabiatning mukammalligi va inson hayotining mislsiz norasoligi haqidagi g'amgin xayollar borib taqalardi. Xayollar esa dillarida tosh bo'lib yotgan «Nechun shunday? Nechun?» degan eski va alamli savollarni tug'dirardi.

Darhaqiqat, nechun shunday? Nechun metin zarurat asosiga qurilgan bu olam, bu cheksiz koinot, bu sayyoralar harakati va tabiat hodisalarida buyuk bir qonuniyat va aql-zakovat mavjud? Bani bashar esa... tirik mavjudotlar mukammali bo'l-mish bani bashar esa... xurofot, nechun zulm va adolatsizlik tutqunidan chiqolmaydi? Nechun?..

---

<sup>1</sup> Substansiya.

Rost, olam bino bo'ptiki, hech bir donishmand bu jumboqni yecholmagan. Ular buni bilishadi, bilishgani uchun ham bu to'g'rida kam gaplashadilar, dillarida armon bo'lib yotgan dard-u hasratlarini qo'zg'amaslik uchun bu mavzuni ehtiyotkorlik bilan chetlab o'tishga urinadilar, lekin qancha harakat qilishmasin, bu so'nmas dard, haq va adolat haqidagi bu intihosiz armon bot-bot qayta yopirilib keladi-yu, mungli kuyday ko'ngillarini qayta-qayta vayron qiladi.

Ibn Sino birinchi kuni kechasi Isfahonda bo'lgan voqealarni, noyob kutubxonasi yong'in-ga uchraganini, yolg'iz inisi Abu Mahmudni esa hatto, daraklash imkoni ham bo'lmaganini gapirib bergan, kuyunib, yonib gapirib bergan edi. Shu boisdan Beruniy bu gaplarni uning ko'nglidan chiqarishga, diliga ozor beradigan narsalardan uni avaylashga ko'p urindi. Shu boisdan saroydagi mojarolar, xususan, o'zini Ibn Sino deb, sultonning ustiga minib olgan anov makkor hakim haqidagi gaplarni aytgisi kel-madi, nazarida, bu gaplar aziz birodarini qattiq haqorat qilib, diliga chuqur ozor beradigan-dek tuyuldi. Biroq pastda, xattotlar va shoirlar davrasida istiqomat qilayotgan Abu Ubayd bu mishmishlardan ogoh bo'lib, ustoziga yetkazgan ekan, Ibn Sino o'zi shu to'g'rida so'z ochib qoldi. Beruniy ehtiyotkorlik bilan bo'lsa ham, ba'zi gaplarni gapirib berishga majbur bo'ldi. Ibn Sino soxta «hakimi davron» to'g'risidagi g'alati hangomani eshitarkan, avval ma'yus jilmayib o'tirdi, oxirida esa qah-qah otib kulib yubordi.



– Baayni ko'ngildagi ish bo'libdi! – dedi u ko'z yoshlarini artib. – Soxta Ibn Sinomi, chin Ibn Sinomi – sultonni davolabdimi – marra o'shaniki! Ofarin va tasanno! Endi, ijizat bersalar – kamina Isfahonga qaytib ketar edim, ustod!..

Beruniy ich-ichidan kuyunib: «O, azizim, azizim! – dedi ichida. – Qani endi sening qayti-shingga ijizat olmoq oson bo'lsa!.. Nomi rasadxona, hibsga tushganingdan bexabarsen, azizim! Bu tuzoqdan salomat chiqib ketgaysen, ishqilib!»

...Bugun rasadxonada shamlar yoqilib, odatdagidek, yulduzlarni kuzatishga kirishishlaridan oldin, Beruniy, yarim hazil-yarim chin, zoyicha tuzib, Ibn Sinoning taqdirini aytib berishga ahd qildi. Munajjimlar qoidasi bo'yicha u peshin chog'ida quyoshning holatini belgilab oldi, kechasi zoyicha soniyalarini hisoblab chiqdi, jadval tuzdi, so'ng Mirrix va Mushtariy yulduzlarining burjlarini aniqladi... Zoyichada shu narsa ayon bo'ldiki, Ibn Sino uchun yaqin kunlarda saodatli onlar boshlanar, uning yulduzi yorug', taqdiri baland edi!...

Beruniy, garchi zoyichaga ishonmasa ham, bu gapni xushnud kulib gapira boshlagan edi, eshik beruxsat ochilib, sallasiga nishon qadalgan baland bo'yli, zanjidek qop-qora bir sarboz kirib keldi. Bu – soxta hakimni boshlab kelgan va Raboti Sangin yonida Xatlibegimning xufiyalarini chopib tashlagan cho'tir mushrif edi! Bu safar u nechundir saroyga Ibn Sino bilan Beruniyni chaqirib kelibdi.

Beruniy hayajon ichida Ibn Sinoga yuzlandi:

– Shoyad hozir zoyichada ko‘ringan saodat yulduzi – istiqbolning xayrli foli bo‘lsa, azizim?

Ibn Sino indamadi. U, odatdagidek, kinoya aralash g‘amgin kulimsirab, o‘rnidan turdi.

## 2

«Hakimi davron» Abu Shilqim ibn Shahvoniylar G‘aznaga chin Ibn Sino hazratlari kelganini birinchi bor eshitganida pinagini buzmagan bo‘lsa ham, keyinroq astoydil taraddudga tusha boshladi. Taraddudga tushishining boisi esa sultonning salomatligida edi.

Ibn Shahvoniylar, garchi tavakkalning tagi tosh ekanini bilsa ham, ishni boshda tavakkaldan boshlagan, sultonni davolashga kirisharkan, dorularining qudratidan ham ko‘ra umri bino bo‘ptiki, uni hech qachon tark etmagan omadga, qolaversa, afyuni a‘loning sehriga inongan edi! Shu boisdan ham sulton uning muolijasi sabab tez kundayoq, shifo topib, o‘rnidan turib ketganida, Ibn Shahvoniylarning o‘zi ham hayratdan yoqasini ushlagan edi! Zero, sultonning burchalik tez sihat topishining sir-sinoati ne? «Hazrat Ibn Sino» degan nomning sehrimi yoki «Al-Qonun»dan olingan dorularning kuchimi, yoxud afyuni a‘loning qudratimi – buni Ibn Shahvoniylarning o‘zi ham bilmas edi! Shu sababdan birinchi kunlari bu mo‘jizadan o‘zi ham lol qolib, toleyiga shukrona bildirgan edi. Lekin so‘nggi kunlarda, xususan, G‘aznaga chin hazrat Ibn Sino tashrif buyurgani haqida gap tarqalgandan beri nima ham bo‘ldi-yu, sultonning sihati xiyol orqaga keta



boshladi. Buning sababi ne? Dorularning kuchi ketdimi yo afyuni a'loning ta'siri susaydimi, yoxud hazrat Ibn Sino uzoqdan turiboq sehr qildimi – Ibn Shahvoniyy bu sir-asrorning ham tagiga yetolmay garang. Boz ustiga, so'nggi paytlarda nechundir juda pitirlab qolgan Abul Hasanak bugun har kungidan ham noxushroq bir xabar keltirdi. Go'yo sultonning suyuqli singlisi Xatlibegim Ko'handiz qal'asida yashiriniy yotgan anov qari quzg'un Ali G'aribni chaqirtirib olgan emish. «Bu makkor tabibni o'zing topib, o'zing sultonning qahriga duchor bo'lgan eding, endi uni o'zing daf etmog'ing lozim», deb ul shaytonni ham gijgijlagan emish! Xatlibegimdan madad olgan Ali G'arib esa amir-u umaroni ishga solib, Abul Hasanakning odamlarini chetlatayotgan emish, hatto, saroy darvozalariga ham o'z nadimlari va o'z sardorlarini qo'yan emish. Shundaykim, shu bugun Xatlibegim Isfahondan kelgan hazrat Ibn Sinoni sultonga ro'baro' qilib, ularni fosh etmoq niyatida emish!..

Abul Hasanak bu gaplarni shunday bir sovuq vahima bilan gapirdiki, Ibn Shahvoniyyning xayoliga kelgan birinchi fikr qochmoq bo'ldi! Biroq qandaydir ichki bir tuyg'u, eng xatarli onlarda uni qaltis yo'lardan hamisha asrab kelgan ichki bir tuyg'u bu safar ham yordamga keldi-yu, tiliga kelgan gapni ichiga yutdi.

– Davlatpanohning ahvoli qalay! – dedi Abu Shilqim ibn Shahvoniyy, yuragini chulg'ab olgan sovuq tahlikani jilovlashga urinib.

– Olampanoh hanuz uyqudalar. Kechasi bergan dorungiz...

– Uyqu – salomatlik garovidir! – dedi Ibn Shahvoniy vazirning soʻzini boʻlib. – Anov yosuman... Xatlibegim qachon keladi?

– Barcha xufiya ishlar saroyda tunda boʻladi! Kechasi, xuftondan keyin kelmogʻi darkor, hazratim.

– Bir oʻzimi yo isfahonlik anov makkor... oʻzini Ibn Sino deb yurgan anov makkor tabibni ham boshlab kelurmi?

«Ul Ibn Sino yolgʻon emish! Ul yolgʻon-u, bu battol chin Ibn Sino emish! Ofarin!»

Abul Hasanak alam bilan bosh chayqab:

– Qani endi... yolgʻon Ibn Sino yolgʻiz boʻlsa? – dedi. – Yonida guvohi ham bor!

– Guvohi?

– Ha, Gʻaznada Abu Rayhon Beruniy degan bir allomayi betavfiq borkim, bu kimsa chin Ibn Sino tanir emish!

– Chin Ibn Sino! – dedi Ibn Shahvoniy, toʻsatdan koʻzlari chaqnab. – Chamamda, Xatlibegim topgan bu makkor hakimning chin Ibn Sino ekaniga vazir janoblari ham inonib qolganga oʻxshaydurlar?

– Yoʻq-Yoʻq, kamina...

Ibn Shahvoniy betoqat qoʻl siltab, Abul Hasanakning gapini boʻldi:

– Avval taom, baʼdaz kalom! Sharob va taom, janobi vazir! – buyurdi u va eshikka borib qolgan Abul Hasanakni toʻxtatdi. – Ha, yodimda borida aytib qoʻyay: olampanoh bugun namozi asrgacha uxlaydilar. Uygʻongan zahoti mana bu doruni bergaysiz!

– Oftobi olam uygʻongan zahoti siz hazratimni yoʻqlaydilar.

– Yo'qlasalar, bir bahona topgaysiz! Kamina namozi asrdan keyin olampanohning huzurlarida hozir bo'lamen. Ungacha... eng yaxshi sharoblardan toptiring! Lozim bo'lsa... anov iymonsiz Malik ul-sharobga odam yuboring! Eng ko'hna, eng a'lo maylaridan oldiring! Yodingizda bo'lsin, janob vazir: bugun bizning qismatimiz olampanohning ahvoli ruhiyatiga bog'liqdur! Bas! Olgan dorularingizni o'z vaqtida berib, ortidan yaxshi may tuting! Qolganiga kamina o'zim yo'l topamen. Inshoollo, ishimiz o'ngidan kelur!.. Ha, to'xtang, tag'in bir so'z! – Ibn Shahvoniy shundan deb, Abul Hasanakni yana to'xtatdi. – Basharti... omad yor bo'lib amir al-mo'minin ul firibgarni... o'zini Ibn Sino deb, yurtni to'nab yurgan ul bat-tol hakimni tark etsalar... uni darhol yo'qotmoq darkor!

Ibn Shahvoniy vazir janoblari chiqib ketguncha kutib turdi-da, yerga to'shalgan mayin ipak gilamlarni bir-bir bosib, o'z xosxonasini bir aylanib chiqdi.

U G'aznaga hazrat Ibn Sino kelganini eshitganidan beri oyog'i tagidan chiqqan bu «baloyi nogahon»ga qarshi chora qidirar, biroq qancha qidirmasin, xayoliga biror tuzuk fikr kelmas edi. Hozir ham nima qilishini bilmas, o'ktamlikda sultondan qolishmaydigan uning shaddod singlisi Xatlibegim hazrat Ibn Sinoni boshlab kelganida nima tadbir ko'rishini tasavvur etolmas edi.

Lekin bakovullar keltirgan sharobdan bir kosa ichib, issiq bedana kaboblardan yeb, kimsasiz, osuda xosxonani asta aylanarkan, to'satdan miyasiga g'aroyib bir fikr keldi-yu, yana xontaxtadagi may

to'la ko'zaga qo'l cho'zdi. Uning miyasiga kelgan bu fikr shunday noyob va shunday g'alati ediki, Abu Shilqim ibn Shahvoniy ust-ustiga yana bir necha kosa may ichib, to'rdagi banoras ko'rpachalarga yonboshladi. U kallasida yulduzday «yarq» etgan bu fikrga sayqal berib, xayolida uni obdan «pishitmoqchi» edi, biroq so'nggi kunlardagi tashvish-u tahlikalar tamom holdan toydirgan ekan, miyasida hamon o'sha o'y, o'sha tashvish, pinakka ketganini o'zi ham sezmay qoldi.

U kimningdir turtkisidan uyg'ondi. Tokchadagi kumush shamdonlarga terilgan shamlar yoqilgan, xona kunduzgiday yorug' edi. Tepasida vazir janoblari qo'l qovushtirib turar, uning horg'in yuzidagi kunduzgi tashvish, bir kundayoq kirtayib qolgan ko'zlaridagi kunduzgi qo'rquv hanuz so'nmagan edi.

– Tursinlar, hazratim, davlatpanoh yo'qlaydur sizni.

– Kayfiyatlari qalay, olampanohning?

– Kayflari chog', ammo... hozir Xatlibegim anov... hazrat Ibn Sinoni boshlab keladur...

Ibn Shahvoniy go'yo tanasiga ilon tekkanday bir sapchib tushdi, biroq shu zahotiyoc kunduz miyasiga kelgan g'aroyib fikr-yodiga tushdi-yu, miyig'ida kulimsiraganicha, o'rnidan turdi.

Chor atrofi parqu yostiqlar bilan o'ralgan sulton pinhoni ishratxona yonidagi shabistonning to'rida yonboshlab yotar, uning oldidagi sakkiz qirrali o'ymakor xontaxta odatdagiday noz-ne'matlarga to'la, may solingan billur idishlar, barkash-bar-kash somsalar, lagan-lagan parranda go'shtlari, shinni va sharbat quyilgan guldor piyola va taq-



simchalar dasturxonga sig'mas, faqat xonanda va sozandalar yetishmas edi, xolos.

Sulton, nechundir, yorug'ni ko'p xushlamas, shiftdagi ulkan chamberak qandilga terilgan shamlarning uchdan birigina yoqilgan, shabiston nimqorong'i, shuning uchun ham sultonning yuzi yaxshi ko'rinmas edi.

Abu Shilqim ibn Shahvoniy tavoze bilan salom berib, xontaxtaning ro'parasiga cho'nqaymoqchi edi, sulton kulimsirab yonidan joy ko'rsatdi. Ibn Shahvoniy itoatkorlik bilan sulton ko'rsatgan joyga o'tib o'tirarkan, yer ostidan amir al-mo'minninga bir qarab oldi-yu, darhol yengil tortdi. Mayga qo'shib berilgan afyuni a'lo yaxshi ta'sir etgan chog'i, sultonning lablarida kulgu, chuqur botgan qisiq ko'zlarida xushnud tabassum o'ynardi.

– Ajab hol, hakim hazratlari bugun o'z odatlariga xilof xiyol xomush ko'rinadilar? Kun bo'yi qayda edilar, hazratim?

– Kamina... kun bo'yi siz valine'matimga doru tayyorlash bilan band bo'ldim, oftobi olam!

– Tashakkur va tasanno! – dedi sulton, siyrak mosh-guruch soqolini silab. – Yaratgan egamga shukur, mana, avvalambor, Xudovandi karim, ikkilamchi, siz hazratimning duoyi jonlari va muolajalari sabab men ham bugun dilim xush, jismim osoyish, o'ttiribmen kuy va musiqa ishqida!.. Ammo siz... siz qattiq charchabsiz, hazratim. Oling, bir piyola may sipqaring, toki charchoqlaringiz daf bo'lib, ko'nglingiz yayrasin!

Ibn Shahvoniy mahzun bosh chayqab, sekin uf tortdi.

– Nechun oh chekasiz? Sizga ne bo'ldi, hazratim?

Ibn Shahvoniy yana ovozi g'amgin titrab:

– Oftobi olam! – deb xitob qildi. – Bu bevafo dunyoda neki g‘am-anduh bo‘lsa bizday faqir-u haqirlar boshiga tushgay. Sizday oftobi olam esa...

– Yo‘q! – dedi sulton mamnun kulimsirab. – Dilingizda ne anduh bor – to‘king barini!..

– Agar olampanoh bir qoshiq qonimdan kechsalar...

– So‘zlang, hazratim!

– So‘zlasam... – Ibn Shahvoniy nafasi bo‘g‘ilib, bir zum duduqlanib qoldi. – Bugun kechasi... kamina yomon tush ko‘ribmen, uni aytishdan ham qo‘rqamen, davlatpanoh!

– Yomon tush? – sulton, negadir, «hazratlari»-dan nariroq surilib o‘tirdi.

– Xo‘sh? Xo‘sh?

– Tushim shundaykim, siz valine‘mat «ne‘mati ilohiy»ga yo‘llagan anov bevafo vaziri a‘zam Ko‘hi Sarandipdan qaytib kelgan emish.

Sulton allaqanday rangi o‘chib:

– Xo‘sh? – dedi. Olib kelibdimi ul «ne‘mati ilohiy»ni?

Ibn Shahvoniy alam bilan bosh chayqab:

– Siz ham ul betavfiqdan shu so‘zni so‘rar emishsiz, olampanoh!

– Xo‘sh? – dedi sulton betoqat bo‘lib. – Ul betavfiq ne dedi?

– Ul betavfiq oyoqlaringiz ostiga yiqilib, «ne‘mati ilohiy»ni topmaganini arz qilar emish.

– Hmm...

– Va lekin, dermishkim, olampanoh bir qoshiq qonimdan kechsinlar, «ne‘mati ilohiy» o‘rniga hazrat Ibn Sinoni topib keldim! – der emish ul quzg‘un.



– Hazrat Ibn Sino?

– Shunday, valine'mat! Ul quzg'un hazrat Ibn Sino deb shunday bir kimsani boshlab kelgan emishkim, ul kimsa kaminaga go'yo egizak qo'ziday o'xshar emish!

– Ajab tush! – sulton Ibn Shahvoniyning so'zini oxirigacha eshitmay, oldindagi may to'la yoqut piyolani olib asta sipqardi-da, yoshli ko'zlarini artidi.

– Darhaqiqat, ajab tush? Xo'sh, xo'sh? Uyog'i ne bo'ldi?

– Uyog'i... siz olampanoh ul qallobdan so'rar emishsizkim: sen topib kelgan bu kimsa hazrat Ibn Sino bo'lsa, bu kim, deb kaminayi kamtarin-ga ishora qilar emishsiz, davlatpanoh!

– Xo'sh, xo'sh?

– Ul kazzob esa... ul kazzob faqirni ko'rsatib: «Oftobi olam! – deb faryod chekarmish. – Siz inonib yurgan bu makkor chin Ibn Sino emas, o'zini Ibn Sino deb el-ulusni to'nab yurgan bir battol, chin hazrat Ibn Sinoni men topib keldim, olampanoh», deb o'zi boshlab kelgan kimsani ko'rsatar emish!

– Yo, tavba, bu ne tush? – sultonning labidagi kulgu asta so'nib, go'yo yuziga yana sovuq niqob kiyib oldi.

– Bas! Oxiri ne bo'ldi bu tushning? Oxirini so'zlang, hazratim!

– Oxiri... – Ibn Shahvoni y tomog'i g'ip bo'g'ilib, «qult» etib yutindi. – Oxiri... Hayhot! Siz olampanoh ham ul quzg'unning so'ziga inonib, faqirni jalloklar qo'liga topshirdingiz!..

– Siz esa... bu tushga ishonib, anduh chekib o'tiribsiz! – sulton allaqanday bo'g'iq tovushda

qah-qah otib kuldi. – G‘am yemang, hazratim. Donolar aytmoqchi, suv aksiga oqmaydi, ammo tush yaksiga yuradur!

Sultonning so‘zi og‘zida qoldi. Nogahon eshik beruxsat ochilib, xonaga... Xatlibegim kirib keldi.

Ibn Shahvoniy bu xotin to‘g‘risida juda ko‘p eshitgan bo‘lsa ham, o‘zini birinchi ko‘rishi edi, beixtiyor seskanib, a‘zoyi badanidan qora ter chiqib ketdi.

Egnida odatdagidek to‘pig‘iga tushgan qora shoyi ko‘ylak, boshida zar sochilgan qora shoyi ro‘mol, yuzida harir qora durra, Xatlibegim, poygakda to‘xtab, sulton bilan Ibn Shahvoniyga bir zum unsiz tikilib qoldi, so‘ng qushday talpinib borib, sultonning oyog‘iga cho‘kkaladi.

– Og‘ajonim! Mehriboni soyabonim, og‘ajonim!..

Sulton, qovog‘i soliq, qoqsuyak qo‘lini singlisining yig‘idan titragan ozg‘in yelkasiga qo‘ydi.

– Tun yarmida bu ne yurish? Kim chorladi seni, oppog‘im?

– Og‘ajon! – dedi Xatlibegim to‘satdan faryod chekib. – Besh vaqt namozni kanda qilmay shukur qoidasini bajo keltirib yurgan sizday amir almo‘minin!.. Endilikda bu may, bu rindona kayfiyatlar!.. Sizni hidoyat yo‘lidan urgan bu firibgar afsungarni qaydan topdingiz, og‘ajon?

Sulton, xuddi kaftiga cho‘g‘ tekanday, qo‘lini singlisining titroq yelkasidan tortib oldi.

– Bu ne so‘z, ne qiliq, Xatli? O‘lim to‘shagida yotgan og‘angga sihat keltirgan, dong‘i olamga ketgan hakimi davronni firibgar demoq!..

– So‘zimga inoning, og‘ajon! – Xatlibegim yuzidagi durrasini jahl bilan yelkasiga otib, yosh bi-



lan yuvilgan yuzini ochdi. – O'zini «hakimi davron» deb yurgan bu quzg'un, chin Ibn Sino emas, yolg'on Ibn Sino, og'ajon, yolg'on Ibn Sino! Chin hazrat Ibn Sino endi kelmish, og'ajon! So'zimga inoning – endi kelmish!

Ibn Shahvoni yalt etib sultonga qaradi.

– Yopiray! Tushimmu bu, o'ngimmu?

Xatlibegim uning so'ziga e'tibor bermay o'rnidan sakrab turdi-da, shitob bilan yurib borib, eshikni ochdi:

– Taqsarim! Hakimi davron... Ibn Sino hazratlari! Marhamat qilgaysiz!..

O'tirgan joyida haykalday qotib qolgan Abu Shilqim ibn Shahvoni, nogahon allaqanday pitir-pitir qilib o'rnidan turmoqchi bo'lgan edi, sulton, sovuq kulimsiraganicha, uning tizzasiga qo'lini qo'yib, to'xtatda.

Eshikda... Abu Ali ibn Sino ko'rindi. Egni-da yangi kimxob to'n ustidan kiyilgan yangi oq rido, boshida ko'k taqya ustidan o'ralgan oppoq simobiy salla, u poygakda to'xtab, bosh egib salom berdi, salom berarkan, avval sultonga, so'ng uning yonida o'tirgan Abu Shilqim ibn Shahvoni-ga zimdan bir qarab oldi.

«Qoradori! – Ibn Sino eshikdan kirib sultonga ko'zi tushishi bilanoq bu fikr xayolida chaqmoq-day chaqnadi. – Bundan chiqdi tabib kiyimida-gi bu odam... Yo, tavba! Nimasi bilandir unga o'xshab ketadigan bu qirg'iy burun, xushsurat odamni qayerdadir ko'rgan edi u! Lekin qayerda? Qachon?..»

O'rtaga cho'kkan mudhish jimlikda Abu Shilqim ibn Shahvoni-ning:

– Subhonollo! – deb shivirlagan hayajonli tit-roq ovozi eshitildi. – Yo, tavba! Tushim! Xuddi tushimda koʻrganlarim, olampanoh!

Xatlibegim bir toʻrda allanimalarni pichirlab oʻtirgan Ibn Shahvoniya, bir eshikda hamon bosh egib turgan Ibn Sinoga qaradi-yu, yana boyagiday: «Ogʻajon!» deb xitob qildi. Biroq sulton qoʻlini koʻtarib singlisini toʻxtatdi. U ham avval poygakda qoʻl qovushtirib turgan Ibn Sinoga, soʻng oʻng tomonida allanimalarni pichirlab oʻtirgan Abu Shilqim ibn Shahvoniya uzoq tikilib qaradi-da, siyrak murtini silab, kinoyaomuz kulimsiradi.

– Ajab hol! Bir joyda, bir mahalda ikki Ibn Sino! Ikki hakimi davron!.. Bu gʻalati jumboqni kim yechadi? – sulton shunday deb, eshikda hamon jimgina bosh egib turgan Ibn Sinoga qaradi.

– Ogʻajon!

– Shoshma, Xatli! Hazratlari soʻzlasin avval!

Ibn Sino yer ostidan toʻrda oʻtirgan kimsaga yana bir qarab oldi. Kimsa, rangi devor, hanuz aqlidan ozgan odamday allanimalarni pichirlab oʻtirardi.

«Yoʻq, Ibn Sino yanglishmadi, u bu odamni qayerdadir koʻrgan! Koʻrgan! Biroq... qayerda? Qachon? Vo darigʻ! Nahot, bu... bu oʻsha, yoshlik chogʻlarida Buxoroyi sharifda, Juyi Moʻliyon dahasida birga oʻsgan Abu Halim ibn Faysal... yoʻq-yoʻq, Abu Halim emas, shilqimligi va fohishabozligi uchun Abu Shilqim ibn Shahvoniya, deb chiqargan erkatoy boyvachcha boʻlsa? Ha, oʻsha! Xuddi oʻzi!! Yo, tavba!»

Sulton esa... may va afyundan qisiq koʻzlari nosogʻlom chaq nab oʻtirgan bu sarmast, qoq-



suyak odam Ibn Sino tasavvur etgan sulton Mahmud G'aznaviyga, qirq yil olamni titratib turgan fotihi muzaffarga ham o'xshar, ham o'xshamas edi! Uning qurigan terakday uzun, qoqsuyak gavdasida, butun qahrli vajohatida sahronishin hokimlarga xos pinhoni bir kuch sezilib turar, biroq ajal muhri bosilgan yalpoq sarg'ish yuzida, qisiq ko'zlarining nosog'lom chaqnashida kishini cho'chitadigan telbanamo bir vahima bor edi!..

Ibn Sinoning xayolini sultonning sovuq zaharxandasi bo'ldi.

– Ha, nechun og'izlariga talqon solib oldilar. – So'zlasinlar, hazratim!

Ibn Sino ta'zim bajo keltirib:

– Olampanoh kechirgaylar! – dedi bilinar-bilinmas kulimsirab. – Shu bugungacha faqir Abu Ali ibn Sino ekanimga ishtiboh qilmas edim. Va lekin endi, huzurlarida bu hazratlarini ko'rib, o'zimga-o'zim inonmay qoldim, poshshoyi olam!

Abu Shilqim ibn Shahvoni sultonning qu-log'iga egilib:

– Yo, tavba! – deb shivirladi. – Tushim! Xuddi tushimda ko'rganlarim, olampanoh!

«Tush» so'zini eshitgan sulton to'satdan qisiq ko'zlari yarq etib ochilib ketdi.

– Seni bu dargohga kim yo'lladi, kim seni hakimi davron Ibn Sino deb dong taratdi, ey osiy banda? «Ne'mati ilohiy»ga ketgan anov quzg'un... vaziri a'zam qayda?

Xatlibegim yana sultonning yoniga tiz cho'kib, uning katta, qoqsuyak qo'llarini o'pdi.

– Oftobi olam! Ibn Sino hazratlarini topib kelgan vaziri a'zam emas! Bu zoti sharifni siz olam-

panohga sadoqati boqiy farzandingiz shahzoda Mas'ud yo'llagandur, og'ajon!

Shahzoda Mas'ud nomini eshitgan sulton kutilmaganda qaltiroq bosib, sovuq kuldi:

– Agar amir Mas'ud yo'llagan bo'lsa, hazratlariga inonmoq darkor!

– Og'ajon! – Xatlibegim sultonning qo'lini qo'yib yubormay qayta-qayta o'pdi. – Nechun inonmay-siz, og'ajon? Hazratlarini taniydurg'on odamlar bor. Mavlono Abu Rayhon Beruniy bor!

– Mavlono Beruniy ne kerak bu ishda? Kim chin Ibn Sino, kim yolg'on – bu jumboqin hozir o'zim yechamen! Sulton qo'lini singlisining qo'li-dan tortib olib qaddini rostlab o'tirdi. – Ul «ne'mati ilohiy» qayda o'sadi? Kimki chin Ibn Sino bo'lsa – buni bilmog'i darkor! Bu ilohiy doru uning yonida bo'lmog'i darkor! So'zim to'g'rimu, hazratim?

Ibn Shahvoniy birdan yuziga qon yugurib:

– Tasanno, oftobi olam! – deb yubordi. – Buyuk donolikning nishonasidur bu so'z!

Ibn Sinoning yodiga «ne'mati ilohiy» to'g'risidagi Beruniyning hikoyasi tushdi-yu, labidagi kulguni yashirish uchun boshini pastroq egdi. U dorus-saltanatda bo'layotgan g'aroyib hango-malarning bir chekkasini eshitgan bo'lsa ham, bunday hiyla-yu nayrangga duch kelishini tasavvur etmagan edi. Uni, ayniqsa, sulton lol qoldirdi. U davosiz dard bani odamni har ko'yga solishini bilsa ham, bu qaysar hokimi mutlaqni bunday ayanchli va junun holda ko'raman, deb o'ylamagan edi. Uning o'zi-chi? Kelib-kelib qarigan chog'ida, bu berahm, mustabid shoh saroyida «ne'mati ilohiy» haqidagi jumboqni yecholmay



«soxta Ibn Sinoga aylanishini» tasavvur etganmidi? Darhaqiqat, bu teskari dunyoning telba o'yinlarini anglab bo'lmas ekan!

Ibn Sino hamon o'ygga tolib, poygakda bosh egib turar, uning dilidagi hislar quyunday charx urar, alam zaharxandaga, zaharxanda achchiq alamga aylanar edi.

– Xo'sh, nechun hazratlari tili lol, qulog'i kar bo'lib qoldilar? Chin Ibn Sino bo'lsalar, jumboqni yechsinlar, hazratim!

Ibn Sino lablaridagi alamli kulguni yashirishga urinib:

– Oftobi olam bir qoshiq qonimdan kechgaylar!  
– dedi ohista. – Faqir shu bugungacha o'zimni Ibn Sino deb yurgan edim, ammo endi Ibn Sino emasligimga inondim, zero, olampanohning bu savolini yechishga ojizmen!

Sulton yostig'ining tagidan oltin shaqildog'ini olib shaqillatmoqchi bo'ldi. Biroq Ibn Sino kutilmagan bir qat'iyat bilan qo'lini ko'tarib uni to'xtatdi. Uning ko'kka moyil katta-katta ko'zlari-da, qalin qoshlarining chimirilishida, talvasasiz, mag'rur va vazmin turishida kishini o'ziga rom qiluvchi shunday bir kuch bor ediki, sulton bu zohiriy kuchga beixtiyor taslim shaqildog'ini ko'targanicha qotib qoldi.

– Hakimlar hech qachon, hech kimga, hatto, o'z g'animlariga ham, alxusus, ular betob bo'lsa, – dedi Ibn Sino har bir so'zini chertib-chertib, – yomonlik tilagan emas. Kamina sizga ham sihat tilaymen, amir al-mo'minin! Hakim hazratlariga esa... – Ibn Sino sultonning yonida hamon pitir-lab o'tirgan Ibn Shahvoniya qarab, miyig'ida

kuldi. – Janob Abu Shilqim ibn Shahvoniyni esa hazrat Ibn Sino boʻlganlari bilan chin qalbidan qutlaymen!

Ibn Shahvoniyl shitob bilan oʻrnidan turib:

– Farmoni oliy – amri Xudodur! – deb baqirdi. – Daf qil bu mugʻambirni, Abul Hasanak!

– Ogʻajon! – Xatlibegim, koʻzida yosh, sultonning tizzasidan quchdi, biroq sultonning sharob toʻla idishga qoʻl choʻzganini koʻrib, oʻrnidan sakrab turdi-da, oʻzini tashqariga urdi. Zum oʻtmay yoʻlakdan uning:

– Hazratlarini qoʻyib yubor, hezbachcha! – degan boʻgʻiq, oʻktam ovozi eshitildi.

## YIGIRMA TOʻQQIZINCHI BOB

### 1

Yo, tavba! Yo, alhazar! «Al-Qonun» va «Ash-Shifo»ni yaratib, dongʻi butun olamga ketgan, hakimi davron va, hattoki, shayx ur-rahis nomini olgan hazrat Ibn Sino yolgʻonga chiqib, ikki makkor vazir firib niyatda «oʻylab» topgan bir iblis chin Ibn Sino deb topilmish! Buyuk alloma va pok inson haqoratomuz soʻzlar bilan saroydan haydalib, Ibn Sinoning nomini bulgʻab ahli moʻminni toʻnab yurgan bir shaytoni layn boʻyi barobar ganjga koʻmilmish!.. O, bu telba dunyo, telba dunyo!

Beruniy hech qachon bunchalik figʻoni chiqmagan, hech qachon bunchalik dargʻazab boʻlmagan edi. Nazarida, Ibn Sinoni emas, uning oʻzini mislsiz tahqir qilishgan, Abu Alini emas, uni soxta

Beruniyga chiqarib, saroydan haydashgan edi..

U yuragini o'rtagan ichki alamdanda cho'zinchoq qoramag'iz yuzi battar qorayib, rasadxonaning keng, osuda xonasini tinimsiz aylanar, goh oyoq ostidagi olatlar va kursilarga qoqilar, goh rasad tuynugi oldida to'xtab, ko'kdagi yulduzlarga tikilganicha alamli sukutga tolar, biroq zum o'tmay mash'um voqea qayta esiga tushardi-yu, «O, mal'unlar, mal'unlar!» deganicha yana asabiy holatda rasadxonani aylanishga kirishar edi.

Ibn Sino esa aksincha, odatdagidan ham vazmin ko'rinar, lablarida, horg'in ko'zlarida xiyol mahzun tabassum, Beruniyni tinchitishga urinar, dam badam kulib:

– Kuyunmang, ustod! – deb yolvorardi. – Bani odam bino bo'ptiki donolar g'urbatda, nodonlar izzatda emasmu? Nechun ajablanasiz, ustod?

Beruniy yurishdan to'xtadi, ko'zini yumib, qattiq uf tortdi.

– Yo'q, men ajablanmaymen, Abu Ali! Sen aytgan achchiq haqiqatni faqir ham bilamen. Va lekin, bilsam ham toqat qilolmaymen. Har safar bu mash'um haqiqat yuragimni tilka-pora qiladi, illo men qornimga emas, qadrimga yig'laymen. Senday allomalarning qadriga yig'laymen, azizim Abu Ali!

– Ne chora, ustod? O'zingiz bilasiz, donolar far-yodi ko'kka borib yeta bermas ekan! To'g'risini aytsam, kamina taqdirining bu o'ynidan, hatto, minnatdormen! Mening yolg'iz istagim – tezroq, iloj bo'lsa bugun-ertadan qolmay bu yerdan ketmoq!

Beruniy yana yurishdan to'xtab, tasdiq ishorasida boshini egdi.

– Ha, ha, sen ketmog‘ing darkor, azizim. Bu notinch shahardan tezroq ketganing ma‘qul. Ammo... qanday ketasen? Senga ot-ulov kerak, oziq-ovqat kerak, yo‘l ko‘rsatadigan odamlar kerak!..

Ibn Sino bolalarcha bir samimiyat bilan ko‘zini qisib kuldi:

– Siz sarbozlar qurshovida qolgan bu rasadxonadan olib chiqa olsangiz bas, uyog‘iga kamina o‘zim yo‘l topamen, ustod.

– Yo‘q, yo‘l topish sen o‘ylagancha oson emas, Abu Ali. Sen sulton Mahmud ayg‘oqchilarini tasavvur ham qilolmaysen!

– Tasavvur qilamen, ustod. Ammo G‘aznada Malik ul-sharob degan bir darvesh bo‘lmog‘i darkor. O‘shal darveshga yo‘l topib bersangiz bas...

Beruniy ko‘zlarini katta ochib:

– Malik ul-sharob? – deb xitob qildi. – Sen... sen ul darveshni qaydan bilasen, Abu Ali?

Ibn Sino o‘ziga yarashgan mosh-guruch soqolini silab, xushnud kuldi:

– Faqir bilmagan sir-asror yo‘q, ustod! Malik ul-sharob uyoqda tursin, hatto, bu yurtda sulton Mahmudga qarshi qilich charxlagan bahodirlarni ham bilamen!

– Yopiray! Kim ekan ul bahodirlar?

Ibn Sino eshikka bir qarab oldi.

– Imom... Ismoil G‘oziy!..

Beruniy ham beixtiyor eshikka ko‘z tashladi.

– Imom Ismoil?

– Balli, ustod! Ahvolimdan Malik ul-sharob xabar topsa bas, ul imomga yetkazadi. Alqissa, bu tutqundan pinhona qutulub chiqsak, uyog‘i

imom Ismoilga havola. Faqat Malik ul-sharobni topib, uni bu ishdan ogoh qilmoq lozim, xolos!

Malik ul-sharob hibsdan ozod bo'ldimi, yo'qmi – Beruniy bundan bexabar edi. Lekin uning xayoliga kelgan bu fikrni boshqa o'y, boshqa savollar surib chiqdi: G'aznadan uch yuz farsang yiroqda yurgan Abu Ali Malik ul-sharobni qaydan biladi? Imom Ismoilni-chi? Nahot, Malik ul-sharob imom bilan pinhoniyo aloqada bo'lsa?

Tog'u toshlar orasiga makon qurib, boy tijorat ahli va man-man degan a'yon-u boyonlarni zir titratib yurgan, lekin hech kimga, hatto, sulton Mahmud lashkarlariga ham tutqich bermay kelayotgan, masjidlarda allaqachon la'natlangan bu isyonkor, dovyurak odamni bilsa-yu, bu sirni undan, qil o'tmas qadrdoni Abu Rayhondan sir tutsa?

Beruniyning chuqur o'yga tolganini ko'rgan Ibn Sino allaqanday hijolat chekib:

– Siz ko'p qayg'ura bermang, ustod! – dedi. – Agar Malik ul-sharob bo'lmasa...

– Malik ul-sharobni so'rab-surishtiramen, – dedi Beruniy. – Ammo... – Uning xayolidan: «Malik ul-sharob hibsdan chiqdimi, yo'qmi – buni o'zim ham bilmaymen!» degan fikr o'tdi-yu, bu fikrni ichiga yutib, takrorladi. – Darhol surishtiramen!

– Ammo rasadxona sulton nazoratida! – dedi Ibn Sino, go'yo uning fikrini ilg'ab olib. – Kami-nani mana shu narsa tashvishga solmoqda. Chunki... imom Ismoil navkarlari bostirib kelsa qon to'kilishi muqarrar. Faqir esam... qon to'kilishini istamaymen!..

– Uning ham chorasi topilur! – dedi Beruniy. –

Rasadxonaning ostida tog' ortiga olib chiqadigan lahim<sup>1</sup> bor! Ehtiyot shart deb, sulton o'zi qurdirgan bu lahimni!..

Ibn Sino yalt etib Beruniyga qaradi.

– Kamina bu lahimdan chiqib qochsam... sizning ahvolingiz ne bo'lor? Boshingiz baloga qolmasmu, ustod?

Beruniy betoqat bosh chayqab, uning so'zini bo'ldi.

– Bu bosh ne musibatlarni ko'rmagan bosh, Abu Ali! Boshga tushganini ko'z ko'rar, deydilar! Kaminani bu tashvish emas, noraso dunyoning nopok ishlari kuydiradi, Abu Ali!

– Ne chora, ustod?

Yo'q, ko'hna olamning bu teskari o'yinlari ikkalasi uchun ham yangilik emas. Ikkisi ham bu azaliy adolatsizliklardan nola qilish befoyda ekanini nozik his etadi, shu boisdan ham ko'p musibatlarni boshlaridan kechirib, ko'nikib ketgan allomalarga xos bir donolik bilan dam xiyol kulimsirab gapirishar, dam mahzun o'ylarga ketishar edi. Biroq tirik odam, goho-goho, alamli o'ylar xuruj qilib kelganda, xususan Beruniy, to'satdan portlab ketganini o'zi ham sezmay qolardi.

Bu safar Beruniy qo'llarini ko'ksida qovushtirganicha, osmonga tikilib uzoq sukutga toldi, so'ng qahrli bo'g'iq ovozi allaqanday samimiy va o'ychan ohang kasb etib, tiniq yangradi:

– Yo, tavba! Bu go'zal olam, bu musaffo osmon, bu yorug' yulduzlar, qo'yingki, bu mukammal olamni bunyod etgan Xudovandi karim, nechun o'z bandasini bundayin nomukammal qilib yarat-

---

<sup>1</sup> Lahim – yer osti yo'li.



di? Agar bu foniyl dunyo, Abu Ali, sen aytganday buyuk zarurat va yetuk aql-idrok asosiga qurilgan bo'lsa, nechun bu ulug' qonuniyat bani bashar hayotiga kelganda o'z kuchini yo'qotdi?

– Osiy bandangni o'zing kechirgaysen, e Yaratgan Egam! Va lekin... agar bandangni loydan yaratib, unga o'z nafasingdan ufurib jon ato qilganing rost bo'lsa, nechun bu jon bilan birga unga jaholat va qalloblik, xudbinlik va razolat yanglig' tuban istaklarni qo'shib berding? Nechun unga boshqa hech bir tirik zotga ato qilmagan o'tkir tafakkur va yetuk aql-zakovat in'om etib, bu aql-zakovatni tubanlik, razolat va qabohat yo'lida ishlatmoqni ravo ko'rding? – Beruniy, go'yo ko'kdan sado kutganday bir nafas sukutga cho'mdi. Ibn Sino go'yo uning mungli kuyday sekin oqqan ovozigaga sehrlanganday boshini osiltirganicha mahzun xayollarga tolgan edi.

– Yo'q! – dedi Beruniy, hamon dard to'la o'sha o'ychan ovozda. – Kamina bid'at va xurofot asirlari bo'lmish ulamoyi zabardastlar aqidasiiga, sening «Irodangsiz pashsha ham bo'lmaydi!» degan g'arib kalomlariga inonmaymen, e sarvari koinot. Kamina ham, azizim Abu Ali kabi bu olam zarurat qonuniga qurilganiga inonamen, bani odam esa sen ato qilgan aql-idrok va insof-u adolat asosida hayot kechirmog'i lozim ekaniga iymon keltiramen! Ammo bu tubanliklarni ko'rib yana o'z o'timda o'zim qovurilamen. Ne chora? Axir o'zing ato qilgan aql-zakovat qayda-yu, bani bashar hayotidagi bu tubanlik va bu razolat qayda? Shu boisdan irodang va qudrating oldida sajda qilgan ojiz banda, sen yaratgan bani bashar hayotida-

gi bu qabohat va jaholatni idrok etishga ojizmen, ojizmen!..

Ibn Sino asta yurib Beruniyning yoniga bordi. Go'yo uning teran o'ylarini hurkitib yuborishdan qo'rqqanday, sekin uning yelkasidan quchdi.

– Behuda iztirob chekasiz, ustod! Zero, siz aytgan bu razolat va jaholat yangilik emasdur bu ko'hna dunyoda!

– Bilamen, Abu Ali! Hammasini bilamen! Ammo... «Al-Qonun»ni yaratgan Ibn Sinoni bunday xor-u zor qilmoq!..

– Qo'ying, ustod! Nahot, bu haqdagi rivoyatni eshitmagan bo'lsangiz?

– Ne rivoyat?

– Shundaykim, buyuk bir donishmand bani basharning nopok istaklari va tuban ehtiroslarini bir uyga qamab qo'yilgan uch maxluq – odam, to'ng'iz va arslonga o'xshatgan ekan. Bani odam deganda u aql-idrokni nazarda tutibdi, to'ng'iz deganda insonning chirkin xohishlarini, arslon deganda esa qahr-u g'azabini nazarda tutibdi. Bu uch maxluqning qaysi biri zo'r chiqsa, qamalgan uyda o'sha ustunlik qilar emish.

– Xo'sh, xo'sh?

– Bu qissadan hissa shulki, to'ng'iz bilan sher, ya'niki tuban ehtiroslar qanchalik zo'r bo'lmasin, bani odam, ya'niki aql-idrok yengusidir!

– Hayhot! – dedi Beruniy asta bosh chayqab.

– Bu ko'hna dunyoni kaminadan yaxshi bilasiz, ustod. Yuz yillar, balki ming yillar o'tar, ammo baribir, oxir-pirovardida hamma narsadan aql-idrok ustun chiqqusidir!

– Ming yillar! – dedi Beruniy. – Ming yillar!.. Donishmand haq: bani odam to'ng'iz bilan sherni



yengadi! Faqir ham bunga ishonamen! Ammo... kamina bugunni o'ylab kuyamen, Abu Ali!

Ibn Sinoning lablarida yana o'sha, kishini o'ziga rom qiluvchi kinoya aralash muloyim tabassum zuhur bo'ldi.

– Bugunning tashvishi o'ziga yetar, ustod!

– Darhaqiqat, hozir falsafiy o'ylarning vaqti emas, Abu Ali! – Beruniy shunday dedi-da, yosh tarixnavis Abulfazl Bayhaqiyni chaqirib, Ibn Sinoni unga topshirdi. O'zi esa lahim orqali rasadxonadan chiqib, shaharga otlandi.

Hali Malik ul-sharobni topish va uning yordamida Ibn Sinoning salomini imom Ismoilga yetkazish kerak, ammo bu ishdan foyda chiqadimi, yo'qmi – buyog'i qorong'i edi.

## 2

Beruniy shahar hovlisiga kirib borganida tong otib qolgan, xira tortgan kemtik oy Mozori kalon ortidagi tog'lar ustida zaifgina miltirab turar, osmon to'la yulduzlar go'yo kemtik oying zaifligidan sevingandan, allaqanday charaqlab ketgandi.

Tong salqin, mayin, orombaxsh edi, dasht giyohlari, barra ko'kat va rayhon hidi dimoqqa gup-gup urardi! Hammayoq jimjit. Darvoza negadir qulflanmagan, katta serdaraxt hovli jimjit, osuda, faqat hovlining etagida ariq asta jildirar, qayerdadir olisda tegirmon novidan quyilgan suvning sokin guvillashi eshitar, goho-goho, uzoq-yaqinda itlar hurar, hanuz mudhish tahlikadan qutulmagan shahar endi uyg'onmoqda edi.

Beruniy, hamon g'amgin o'ylar og'ushida, asta yurib hovlining etagiga bordi, ariq bo'yiga

cho'nqanib, yuzini yuvdi, bo'ylari bir qarich bo'lib qolgan mitti rayhonlarga qo'l urib, hidlab ko'rdi, so'ng bir-bir bosib uy tomon odimladi.

Ajab hol. Sabhu hujrasining darichasi yorug', aftidan, u uyqudan turib, mutolaaga kirishgan edi.

Beruniy oyoq uchida yurib, daricha oldiga bordi. Sabhu hujraning qibla tomonida cho'kka-lab o'tirar, qo'lida qandaydir qizil mato, ko'zlari yumuq, dam boshini yerga urib allanimalarni pichirlar, dam qo'lidagi qizil matoni o'par edi. Tokchadagi xira fonus shu'lasida Sabhuning yuzi ko'rinmas, biroq butun xayoli, butun vujudi bilan ko'kka iltijo etib, ibodat qilayotgani ko'rinib turardi.

Beruniy, ko'ngli allanechuk bo'lib, darichaga yaqinroq bordi-yu, beixtiyor yuragi «shig'» etdi. Sabhuning qo'lidagi qizil mato... Sadafbibining qizil guldor ro'moli edi!

Sabhu goh bu ro'molni o'pib, goh boshini yerga urib, o'z xudolaridan biriga, baxt va omad xudosi Shivagami, yo hayot-mamot xudosi Borahingami, yoxud bosh xudo Vishnagami, kimgadir, iltijo etar, takror-takror sajda qilib, nola chekardi.

Beruniy yuragi qattiq achishib, devorga suyandi, suyangan zahoti negadir hibsdan avval Sadafbibi bilan bo'lgan tungi suhbat esiga tushdi. Qizning uning hujrasiga hurkak kiyikday asta yurib kirib kelgani, qarshisiga tiz cho'kib, yig'lab aytgan so'zlari, bu so'zlar ko'nglida allaqanday shirin umid qo'zg'agani xotirasida joylandi-yu, yuragi vijdon azobidan battar zirqirab ketdi. Nazarida go'yo ikki yoshning boshiga tushgan bu musibat uchun u ham aybdor, go'yo o'sha

daqiqalarda yoshiga nomunosib umidlarga bormay, ularni qovushtirib qo'ygani bu jafodir bo'lmas edi!

Beruniy unga kirishga yuragi dov bermay, asta ko'chaga chiqdi. Shoyad Malik ul-sharob sho'rlik bibidan xabar topgan bo'lsa! Shoyad imom Ismoil vositasida bo'lsa ham qizni qutqarish chorasi topilsa!..

Sangtaroshlar dahasiga kiraverishda o'ziga to'qroq dehqonlar, xorijiy savdogarlar, zargar va misgarlar, bozori chaqqon hunarmandlar rastasi saf tortgan, yo'qsillar, gadolar, mayda kosiblar makoni bo'lmish Malik ul-sharob mahallasiga shu rastalar orqali o'tib borilardi.

Ana, oldinda serdaraxt guzar ko'rindi. Guzar-dagi ilk do'kondorlar; halvofurush va qandolatpazlar, somsapaz va nonvoylar o'z do'konlarini ochishgan, havoda dimoqni qitiqlovchi tandir somsa, holva va kabob hidi tarala boshlagan edi.

Rastalar oldida charm kamzul kiygan meshkobchilar og'ir meshlaridan yerga suv separ, farroshlar uzun supurgilari bilan yo'llarni supurar, chap qo'ldagi katta karvonsaroy hovlisida savdo taraddudiga tushgan tijorat ahli chumoliday g'imirlab qolishgan edi.

Beruniy, gavjum guzardan o'tib, attorlar va zargarlar rastasi bo'ylab ketdi. Bu yerga ham suv sepilgan, farroshlar yog' tomsa yalagudek qilib supurib qo'yishgan edi. Lekin, qiziq, odatda juda barvaqt ochiladigan serhasham do'konlardan birortasi ham ochilmagan, ochilganlari qayta yopilmoqda, nimadandir hayajonga tushgan do'kondorlar shivir-shivir qilishib, rasta oxiridagi bozor tomon shoshilmoqda edi.

Agar Beruniyning yodidan chiqmasa, Piri Bukriyning doʻkoni ham bozor yaqinida edi. Ana, mu-yulishda uning doʻkoni ham koʻrindi. Biroq... bu ne toʻolon? Doʻkon oldi arosat, hamma oʻsha to-monga qarab yugurmoqda edi.

Beruniy ham beixtiyor qadamini tezlashtirar-kan, atrofdan kelayotgan vahimali gap-soʻzlar qulogʻiga chalindi:

– Shoʻrlik Piri Bukriy olamdan oʻtibdi!  
– Xudo rahmat qilgay! Yaxshi odam edi!  
– Tuf de, gumroh! Yaxshi boʻlsa shunday qi-lurmi?

– Ne qilibdi?  
– Oʻzini oʻzi osib qoʻyibdi!  
– Astagʻfirullo!..  
– Bilmay soʻzlama, tentak! Piri Bukriy emas, choʻrisi oʻzini oʻzi osib qoʻyipti!

– Yo, alhazar!

Odam oqimi tobora toshib, doʻkon oldida katta olomonga aylangan edi.

Beruniy, birdan iskanjaga olgan sovuq tuygʻudan yuragi siqilib, ariday gʻuvillagan olomon orasiga kirdi, yakka-kift boʻlib, olomoni bazoʻr yorib oldin-ga oʻtdi. Birovlar uni tanib, birovlar allomalarga xos sipo kiyimiga qarab, yoʻl berishdi. Olomon uzra hamon oʻsha vahimali gap, bir-birini inkor etuvchi oʻsha shivir-shivir hokim edi.

Toʻsatdan, doʻkon eshigi taraqlab ochildi-yu, ichkaridan boshi xumday, pakanagina, chorpahil bir kimsa alpang-talpang yurib, yoʻq, yurib emas, yugurib chiqdi-da, olomoni koʻrib, qoq-qan qoziqday qotib qoldi.

– Yo, tavba! Ichkaridan xuddi Azroildan qoch-ganday qochib chiqqan bu yoqavayron, yalang



oyoq, yalang bosh odam... Piri Bukriy edi!.. Uning soqol-mo'ylvolari yulingan, bo'g'riqqan yuzi, tuk-siz taqir boshi va, hatto, bir kallaqantday yelkasi-da do'ppayib turgan o'rkachigacha – hammayog'i qop-qora qon, ko'zlarida, go'dakning ko'zlariday ma'sum ko'zlarida dahshatli bir ifoda qotib qolgan edi!..

Bukrining vajohati shunday qo'rqinchli ediki, g'ala-g'ovur birdan so'nib, ariday g'uvillagan olo-mon suv quyganday jim bo'lib qoldi.

Piri Bukriy, dahshat muhrlangan moviy ko'zlarini olazarak qilib, biroz angrayib turdi, so'ng xodaday osilib qolgan uzun qo'llarini paxsa qilib:

– Yo'q! – deb qichqirdi. – Bu qiz... bu joriyani men osganim yo'q! O'zini-o'zi osib qo'ydi ul behayo!

Bukri shunday deb, uvvos tortib yig'lashga tutindi-yu, to'satdan, ro'parasida haykalday qotib qolgan Beruniyga ko'zi tushib, yig'idan to'xtadi. Xuddi uni tanib-taniyolmaganday, ko'zlarini katta ochib, bir daqiqa serrayib turdi, so'ng yerga tiz cho'kib, uning oyoqlarini quchoqladi.

– Men badbaxtni kechirgaysen, mavlono, kechirgaysen!

Beruniy, go'yo aqli hushidan ayrilganday, hanuz karaxt bo'lib turardi. U bir o'yida oyoqlari ostida yumalab yotgan bukrini bir tepib, ichkariga kirgisi, sho'rlik qizni ko'rgisi keldi. Biroq sirtmoqda chayqalib turgan qizning jasadini tasavvur qildi-yu, hamon yerda yumalab yotgan bukrining titroq qo'llaridan oyog'ini bazo'r tortib olib... asta orqaga chekindi. Uning yuragi tinimsiz bezillab og'rir, nazarida, kimdir ko'ksiga zanglab qolgan o'tmas pichoq qadagan-u qayta sug'urib olmagan edi.

Vo darigʻ! Qarigan chogʻida bu ne musibat, ne koʻrgulik? Ohuday goʻzal, musichaday begunoh bu qiz uning chiroqsiz hujraday nursiz, shuʻlasiz hayotida milt etib yongan bir sham edi, mana, bu sham ham soʻndi. Yo, tavba! Nahot, boya tong chogʻi qilgan pok niyati, koʻnglidagi xudbin istaklarni jilovlab, shoʻrlik qizni kelin qilish orzulari koʻkka borib yetmadi? Agar borib yetgan boʻlsa, bu ne shafqatsizlik, ne adolatsizlik, e sarvari koinot?

Beruniy, guzarga chiqqach, tanish meshkobchidan bir kosa sovuq suv soʻrab oldi-da, uni ichib, sada tagida uzoq oʻyga tolib oʻtirdi.

### 3

...Hali barvaqt boʻlsa ham, Malik ul-sharob mayxonasining oldida odam gavjum, birovlar mayxona ostonasida boshlarini xam qilib xayolga choʻmib oʻtirar, birovlar u yoqdan-bu yoqqa izgʻib yurardi. «Ajabo! Bu ne? Nechun koʻpchilikning boshi xam? Nechun hamma sukutda? Nahot?»

Boʻsagʻada oʻtirgan mayib-majruhlar jimgina chekinib unga yoʻl berishdi.

Beruniy usiz ham bezillab ogʻrigan yuragi battar uvishib, eshikni jurʻatsizgina ochdi.

Odatdagiday gʻira-shira mayxona boʻm-boʻsh edi. Toʻrdagi tokchada bitgagina moychiroq horgʻin lipillar, tokchanning tagida egniga olacha toʻn kiygan notanish bir kimsa kulohlik boshini osiltirib oʻtirar, u uygʻoqmi, pinakka ketganmi, bilib boʻlmas edi.

«Malik ul-sharob! Xayriyat!»

Poygakda toʻxtagan Beruniy qibla tomondagi burchakda... ustiga oq mato yopilgan jasad-



ga ko'zi tushdi. Jasadning oyoq tomonida kimdir boshini osiltirib o'tirar, u ham Malik ul-sharobga o'xshab chuqur sukutda edi. Beruniyning ko'nglidan: «Nargizabonu» degan fikr o'tib, a'zoyi badani muzlab ketdi.

Malik ul-sharob oyoq sharpalarini eshitib, asta boshini ko'tardi, Beruniyni tanib, o'rnidan turishga harakat qildi, biroq turolmadi. Beruniy tez yetib borib, u bilan ko'rishdi. Keksa darvesh tunov kungidan ham ozib-to'zib, faqat soyasi qolgan edi.

– Qalaysen, azizim? Hibs degan baloyi azimdan omon-eson qutuldingmu?

Malik ul-sharob dag'al barmoqlari bilan tomog'ini silab, «qult» etib yutindi, uning tokchadagi moychiroqday horg'in miltiragan ko'zlari to'satdan jiqqa yoshga to'ldi. – Kamina omon chiqdim, ammo... Bobo Xurmo... Bobo Xurmodan ayrilib qoldik, Abu Rayhon!..

Beruniy yuziga fotiha tortdi-da, burchakka o'tib marhumning yuzini ochib, ko'rmoqchi bo'ldi, biroq Malik ul-sharob:

– Qo'ya ber, Abu Rayhon, – deb uni to'xtatdi. – Gung darvesh qur'on o'qib o'ltiribdi. O'qiy bersin... Sho'rlik Bobo Xurmo! U ko'rgan azoblarni Alloh hech bir bandasining boshiga solmasin! Kecha hibsdan chiqishda chivinday joni halqumida edi, kulbayi vayronamga yetolmay jon taslim qildi, sho'rlik! Peshinga chiqaramiz. Dafn marosimida bo'lasenmu yo...

– Bo'lmasam gunohga botamen, ammo...

– Bilamen. G'aznaga chin hazrat Ibn Sino tashrif buyurgan emish.

– Buni qaydan bilding?

– Yodingda bo‘lsin, Abu Rayhon. Malik ul-sharob bilmagan sir-asror yo‘q. Bu johil sultonning johil nadimlari uni ham ustod Firdavsiy yanglig‘ tahqirlagan emish. Anov firibgar Abu Shilqim ibn Shahvoniyni chin Ibn Sino deb, chin hakimi davronni yolg‘on Ibn Sinoga chiqargan emish! Bu ishga kuyunma, Abu Rayhon. Bil‘aks, bu ham sulton Mahmudga ko‘k yuborgan bir qasosdur!

– Filhaqiqat. Ammo hazrat Ibn Sinoning hayoti xavf ostida, Malik ul-sharob!

– Bilamen. Hammasini bilamen, Abu Rayhon. Men o‘zim odam yubormoqchi edim! – Malik ul-sharob shunday deb, Beruniyning qulog‘iga shivirladi:

– Imom Ismoildan odam kelgan. Bu tabarruk nomdan xabaring bormu?

– Bor. Sen aytmasang ham eshitganmen, Malik ul-sharob!

– Kamina bu gapni shar‘iy zaifam Nargizabonudan ham sir tutamen, Abu Rayhon. Alqissa, hazrat Ibn Sinoga ne yordam kerak? Darhol xat yozib ber. Imomning odami kutib o‘ltiribdi! – Malik ul-sharob shunday deb to‘rdagi tokchadan qog‘oz-qalam olib berdi, so‘ng Beruniy yozgan maktubni nosqovog‘iga yashirib, tashqariga chiqib ketdi-da, darhol qaytib kirdi.

– Kechqurun namozi asrga qolmay javob keldi. Istarsang, kulbayi vayronamda kut, istasang...

U so‘zini tugatolmadi. To‘satdan, mayxonaning eshigi sharaqlab ochildi-da, kimdir ichkariga kirib, bir narsani «gurs» etib yerga tashladi. Malik ul-sharob eshik tomonga yalt etib qaradi-yu:

– Shoir Unsuriy? – deb xitob qildi.



– Xotiralariga tasanno, Malik ul-sharob! Tani-dilar, azizim, tanidilar! E-e, mavlono Beruniy ham shu yerda ekanlar-da! Borakallo, borakallo! – shoir Unsuriy banoras to'ning etagi bilan yer supurganicha alpang-talpang yurib kelib avval Beruniy bilan, keyin Malik ul-sharob bilan ko'rishdi, ko'risharkan, go'yo ko'ngilsiz gapning oldini olmoqchi bo'lganday:

– Faqir Ko'shki davlatdan, oftobi olamning huzurlaridan kelmoqdamen, – dedi, peshona terini artib. – Ya'niki, ul valine'mat amir al-mo'minin-ing bag'oyat zarur topshirig'ini lutfan yetkazgani keldim, azizlar!

Shoir hayajondan entikib, nimqorong'i bur-chakka bir qarab qo'ydi.

– Ul bandayi ojiz Bobo Xurmo qaydadur, azizim Qutlug'qadam?

Malik ul-sharobning uyqusizlikdan kirtaygan ko'zlari yarq etib ochilib ketdi.

– Agar sultoni salotin Bobo Xurmoni yo'qla-gan bo'lsalar... kech yo'qlabdi! Bu foniy dunyoni yetim qopdirib, boqiy dunyoni munavvar qilmish ul bandayi xokisor!

– Alloh rahmat qilg'ay! Qachon?

– Shu bugun! Agar sho'rlik Bobo Xurmo yegan kaltaklarning o'ndan birini yeganlarida janoblari ham hibsdan chiqmasdanoq Bog'i Eramga parvoz qilar edilar!

Unsuriy, go'yo Malik ul-sharobning bu achchiq kinoyasini eshitmaganday, lablarini pichirlatib, yuziga fotiha tortdi-da, yoqasini ushlab:

– E, Yaratgan egam! – deb shivirladi. – Shu bugun ul bandayi ojiz Bobo Xurmo... amir al-mo'minning tushiga kirmish!

– Nechun ajablanasiz, nazm bo‘stonining bog‘boni? – dedi Malik ul-sharob zaharxandalik bilan. – Bobo Xurmo hali ko‘p kiradi sultoni salotinning tushlariga!

Unsuriy, hanuz ko‘zlari yumuq, lablari asta pichirlab, tilovat qilardi.

Sulton uni kecha shom chog‘i o‘z shabistoniga chaqirtirgan edi.

Unsuriy kirganda qandillardagi shamlarning ko‘pchiligi o‘chirilib, shabiston allaqanday sirli ruh kasb etgan edi. Sulton o‘rdaday keng, ammo allaqanday huvillab qolgan bo‘m-bo‘sh xonaning to‘rida, baland shoyi to‘shak ustida chalqancha yotardi. Uning cho‘gir qovunday so‘noq boshi oq parqu yostiqlarga botib ketgan, ko‘zlari yumuq, osmonga qaragan yalpoq yuzi yana ilgarigiday uniqlab, mumday sarg‘ayib qolgandi.

«Hakimi davron» bilan Abul Hasanak qayoqqadir gumdon bo‘lgan, xonada allaqanday vahimali sukunat hokim edi.

Unsuriy, vujudini sovuq ter qoplab, bo‘sag‘ada ancha turdi, keyin o‘zini zo‘rg‘a bosib, sultonning oyoq tomoniga o‘tib o‘tirdi.

Sulton sog‘ paytlarida Unsuriyga oyoq uqalashni yaxshi ko‘rardi. Amir al-mo‘mininning bu odati esiga tushgan Unsuriy ko‘rpa tagidan chiqib turgan qoqsuyak oyoqlarga asta qo‘l cho‘zdi, cho‘zishi bilan sulton cho‘chib ko‘zini ochdi.

Unsuriy, badanidagi tuklari tig‘ bo‘lib, sal orqaga surildi.

– Azizim Unsuriy! – dedi sulton, ovozi bazo‘r eshitilib. – Boya namozi asrda ko‘zim ilingan ekan, anov gado... Bobo Xurmo degan Bog‘i Firu-



zadagi xurmozorning egasi tushimga kirmish. Us-tida kafan yanglig' oq libos, yalang oyoq, yalang bosh, anov eshikdan kirib kelmish. Bir narsalarni so'zlab tahdid qilmish. Ne dedi, so'zini anglama-dim. Sendan so'raymen xazinadordan bir xurjun oltin olib, uni izlab top! Shu oltinlarni berib, uni rozi qil! – sulton quduq tagidagi suvday miltira-gan mungli ko'zlarini shirtga tikib:

– Yo, Parvardigor! – deb xitob qildi. – Osiy ban-dangni o'z hifzi himoyatingga ol! Kimgaki yomon-lik qilgan bo'lsam, yaxshilik qilgum bor! Murodim – faqat yaxshilik qilmoq, endilikda, faqat yaxshi-lik! – sulton kipriklari orasida tirqirab chiqqan ko'z yoshlarini artishdan ojiz qult-qult yutinib Unsuriyga qaradi:

– Anov hazrat Ibn Sino bilan Abul Hasanak qayda? Nahot, «ne'mati ilohiy»dan darak bo'lma-sa! E, Yaratgan Egam! Yozug'im nedur mening?..

... Unsuriy cho'chib ko'zini ochdi.

– Yo, qudratingdan! Amir al-mo'minin Bobo Xurmoning rozi-rizoligini ol, deb bir xurjun oltin yuborgan edi! Bir xurjun oltin!

– Tirikligida xor-u zor qilib, o'lganida iz-zat-ikrom ko'rsatishdan ne foyda? – dedi Malik ul-sharob kuyunib. – Hayhot! Endi bu sho'rlik Bobo Xurmoga oltin ne kerak?

– Shoir Unsuriy to'satdan ko'ziga yosh olib:

– Sho'rlik amir al-mo'minin! – deb hiqilladi. – Bil-mam, necha kunlik umri qoldi olampanohning!

Beruniy ko'nglidan: «Ne'mati ilohiy»ni topib bergan anov muttaham tabib qayda? Yo, bu hakimi davron topgan «ne'mati ilohiy» olampa-nohga shifo keltirmadimi, taqsirim?» degan fikr

o'tdi, biroq Unsuriyning nidosidan sultonning ahvolini tasavvur etdi-yu, gustohlik qilgisi kelmay, bo'g'ziga kelgan achchiq so'zlarni ichiga yutdi.

– Hammasi Allohdan! – shoir Unsuriy shunday deb, eshik tomon yurdi. Biroq eshikdan chiqayotganida Malik ul-sharob:

– To'xtang, janob Unsuriy! – deb uni to'xtatdi.

– Agar amir al-mo'minin bu begunoh gadoning ruhini shod etmoqchi bo'lsa... Bobo Xurmoning o'z yeridan, Bog'i Firuzdan bir parcha joy bersin!.. Biz bu sho'rlikni suyukli xurmozoriga dafn etaylik!

Unsuriy yerdagi xurjanni arang ko'tarib yelkasiga tashlarkan:

– Oftobi olamga yetkazamen bu so'zingizni! – deb g'udrandi.

– Yetkazing! Sultonning javobini namozi asrgacha kutamiz!

Malik ul-sharob «to'g'ri qildimmi, yo'qmi?» deganday, savol nazari bilan Beruniyga qaradi. Biroq Beruniy o'z o'ylari bilan band edi. Ko'ngli notinch, u dam rasadxonada qolgan Ibn Sironi o'ylab bezovta bo'lar, dam yodiga Sadafbibi tushib, tirnoqlarigacha zirqirab ketardi.

Lekin qancha urinmasin, Ibn Sino kelgandan beri, ayniqsa, ko'p ezayotgan o'ylar, telba taqdirning g'alati o'yinlari, bani odam qismatining yechib bo'lmas jumboqlari, o'lim va hayot, insof va adolat haqidagi alamli o'ylar miyasidan chiqmas, biroq o'ylagan sayin o'yining tagi ko'rinmas, bil'aks, xayoli chalkashib borardi. Ajabo: u yoshlik chog'larida «o'lim haq» degan so'zni eshitganida bu so'z juda adolatsiz bo'lib tuyular

edi. Endi esa bu so'zda buyuk bir adolat borligiga inondi. Darhaqiqat, agar amir al-mo'minin atalmish bu mustabid shoh yana ming yil yasha-sa, bani basharning ahvoli ne bo'ur edi? Bas, endilikda bu dunyo ustunlaridan, ya'niki sherlar va shohlardan yiroq yurmoq darkor! Bu yolg'on dunyoda ilmi hikmatdan, mutolaa va mushohadadan katta baxt yo'q ekan! Ishqilib, telba taqdir uni bu so'nggi baxtdan ham mosuvo qilmagay! Ibn Sinoni tutqundan qutqazib, o'zi tutqun bo'lmagay hali!

Namozi asr bo'ldi hamki, sultondan xabar kelmadi.

Bobo Xurmoni «Mozori kalon» go'ristonining bir chekkasiga dafn etishdi.

Osmonni siyrak kulrang bulutlar qoplab, iliq yomg'ir esa boshladi. Biroq yig'ilgan olomon – yuz chog'li gadolar, mulla mirquruq shoirlar, hofiz va mashshoqlar – hech kim joyidan jilmadi.

Gung darvesh qabr tepasida o'tirib, uzoq tilovat qildi. Uning mungli ovozi hali tinmagan ham ediki, qayerdadir, yaqinda, qabriston devorlari ortida, boshqa bir mungli kuy yangradi. Vo ajabo! Bu yuraklarni sel qilg'uvchi nay ovozi edi!..

Tilovatdan keyin o'rnilaridan endi turgan odamlar, ust-boshlari shalabbo bo'lsa ham, bu chashmadan tiniq, hazin kuyni eshitib, joy-joylarida qotib qolishdi.

– Bechora Piri Bukriy! – dedi kimdir.

– Aqldan ozmish, sho'rlik! – dedi ikkinchi birov.

– G'alati dunyo! Aqldan ozsa ham nay chalishni unutmabdi! – dedi uchinchi birov.

Odamlar turnaqator bo'lib, Afshon soy tomon jilishdi. Malik ul-sharob bilan Beruniy qabriston

ortidagi mungli kuy tugaguncha jimgina quloq solib o'tirishdi, so'ng odamlar ketidan yurib, qabristondan chiqishdi.

Iliq yomg'ir hamon maydalab yog'ar, biroq odam yomg'irdan qochgisi kelmas, aksincha, osmonga qarab, asta yog'ayotgan iliq tomchilarga yuzini tutib turgisi kelardi.

Malik ul-sharob yo'lda to'xtab:

– Harqalay, mening unga rahmim keladi, – dedi uf tortib. – Piri Bukriyni aytamen. Ne bo'lganda ham – baxtsiz odam!

U boshidagi kulohini olib, yuzidan yomg'ir tomchilarini artdi-da, qalpog'ining yirtig'idan naycha qilib o'ralgan xat olib berdi. Bu – imom Ismoildan kelgan javob bo'lib, u juda qisqa edi. «Xufton chog'i sarbozlarim sizlarni tayinlagan joyingizda kutadilar. Fursatni boy bermang. Shu kecha Abul Hasanak navkarlari rasadxonani boshish ehtimoli bor!»

Beruniy betoqat bo'lib, Malik ul-sharobga qaradi.

– Imom ne depti? Yaxshi so'zmu?

– Yo'q. Kamina darhol rasadxonaga yetib bormog'im lozim! Ko'lik<sup>1</sup> kerak, Malik ul-sharob!

– Hozir topamiz, azizim! – Malik ul-sharob shunday dedi-da, izma-iz kelayotgan uvada to'nli bir qalandarni chaqirib, qulog'iga allanimalarni shivirladi. Qalandar qabriston tomonga yugurib ketdi-yu, zum o'tmay bo'liq bir jiyron otni boshlab keldi.

– Ming afsus! – dedi Malik ul-sharob kulimsirab. – Shu bugun boshimizga tushgan bu kul-

---

<sup>1</sup> Ot-ulov ma'nosida.



fatlar qaytmasin deb, bir kosadan may ichmoq umidida edim, Abu Rayhon.

– Nasib qilsa icharmiz. Omon bo‘l, Malik ul-sharob!

– Taassuflar bo‘lg‘aykim, kamina shuncha yil hazrat Ibn Sinoni bir ko‘rish orzusida yurardim, nasib etmagan ekan, ko‘rolmadim. Salomim va yaxshi kalomimni yetkazgaysen. Omad yor bo‘lsin, ul zoti sharifga. Omon bo‘l, Abu Rayhon!

Ularning nazarida, ko‘ngillaridagi hamma alam, hamma so‘z aytilib bo‘lganday, aytiladigan dard-u hasrat qolmaganday tuyulardi, biroq vidolashuv onlari yaqinlashgan sayin, izhori ixlos istagi, dardlashish tilagi tobora ortib borar, go‘yo dillari tubidagi eng katta orzu-istaklar, eng hazin tuyg‘ular ifodasi so‘nggi daqiqalarga qolgan edi! Biroq imom Ismoil aytgan xatarli daqiqalar tobora yaqinlashmoqda, fursatni boy berib bo‘lmas, zotan, bu xatardan cho‘chimaganda ham, aytiladigan dard-u hasrat tugamas, buni ikkovi ham yaxshi anglar edi.

Beruniy Abu Aliga o‘z «Hindiston»ining Sabhu ko‘chirgan eng tiniq nusxasini in‘om etdi, Ibn Sino esa «Al-Qonun»ning eng nodir qo‘lyozmasini mehr va ixlos bilan tutdi.

Imom Ismoil sarbozlari, Beruniy aytganday, lahimdan chiqqan joydagi qalin archazor orasida otlarni shay qilib turishardi.

Ikki do‘st, ikki alloma bu onlarning qaytib kelmasligini, endilikda diydor ko‘rishish nasib etmasligini butun vujudlari bilan his etishar, shu boisdan ham, o‘zlarini qanchalik vazmin tutmasin, judolik tuyg‘ulari og‘ushidan chiqolmas edilar.

Beruniy birinchi bo'lib Abu Alini quchib bag'riga bosdi.

– Alvido, azizim. Diydor ko'rishmoq nasib etmasa rozi bo'l, jigarim! Kimki seni xor qilgan bo'lsa, o'zi xor bo'lsin! Seni imom Ismoilga, imomni Allohga topshirdim, Abu Ali!

Ibn Sino ustozini quchib, beixtiyor ko'ziga yosh oldi.

– Kaminadan g'am yemang, ustod! So'zimga inoning: faqir, ko'p jafolarni ko'ra berib ko'sa bo'lganmen, men bugun o'z taqdirim emas, sizni o'ylab qo'rqamen! Siz kaminani bu pinhoniylahimdan qochirib, o'z boshingiz baloga qolmasa deb qo'rqamen, ustod! Ehtimol bir-ikki oy imom Ismoil himoyatida bo'lursiz?

– Agar sen birga bo'lsang...

– E voh! Faqir Isfahonga tezroq yetib bormog'im lozim! Birlamchi, qora o'lat changalida qolgan Isfahon ahliga yordam bermog'im darkor. Ikkilamchi, yozishni orzu qilgan kitoblarim bor!

– Bilamen. Odil shohlar to'g'risida kitob boshlagansen!..

– Mendan kulasiz, ammo odil shohlarni ulug'lab kitob bitmadingizmi, ustod?

– Ne chora? Men ham bitganmen, Abu Ali!

Beruniy, ma'yus kulimsirab, Ibn Sinoni so'ng bor quchoqladi. Ular go'yo bu daqiqalarning betakror ulug'ligini his etganday, uzoq jim qolishdi, so'ng imom Ismoil sarbozlarining betoqat harakatlariga bo'ysunib, quchoqlarini yozdilar.

– Omon bo'ling, ustod. Bu yaxshiligingizni toabad unutmaymen!

Beruniy beixtiyor ko'ziga yosh oldi.

– Oq yo'l! Boshing toshdan bo'lg'ay, azizim!





## XOTIMA

«Bugun to'rt yuz sakson birinchi yil hijriy muharram oyining o'n sakkizi kuni allomalar majlisiga ketgan shayx, namozi asr chog'i, qo'lida al-laqanday maktub, qattiq hayajonda kirib keldi.

G'aznayi munavvaradan qaytgandan beri kamina shayxni bu ahvolda ko'rmagan edim.

Shu yil ko'klamda G'aznayi munavvaradan sog'salomat qaytib kelganimizdan keyin sal o'tmay dorus-saltanatdan, sulton Mahmud olamdan o'tdi, degan, – Alloh uning qabrini yumshoq qilgay! – sovuq xabar kelgan edi. Xabarni yo'llagan Xatlibegimning yozishicha, savr oyining oxirida bu dunyoni yetim qilib, u dunyoni munavvar etgan sulton Bog'i Firuzaga dafn qilinib, saltanatda qirq kecha-yu qirq kunduz motam boshlangan emish.

Bu xabarni eshitgan amir Mas'ud ham boshdan-oyoq oq libos kiyib motam tutgan va ertasi-gayoq qo'shin tortib, G'azna tomon safarga chiqqan edi. Safarga o'tlanarkan, amir, yuzida zohiran qayg'u, botinan quvonch, barcha a'yon-u boyonlarni saroyga taklif qilgan, hatto, shayxni ham chaqirib, hanuz zindonda yotgan Qora-ko'zbegimni ozod etish to'g'risida amr-u farmon bergan edi. Amir Mas'ud Isfahonni tark etgandan beri shaharda osoyishtalik hukm surar, qora o'lat ham daf bo'lib, shayx nodir kutubxonasini tiklash yumushlari bilan band edi. Uni faqat bir narsa qattiq tashvishga solar – ustod Beruniy-

dan hanuz darak yo'q edi!.. Shu boisdan shayxning qo'lidagi maktubni ko'rib, kamina qattiq seskandim. Allohga shukur, ustod Beruniy salomat ekanlar. Maktub ustodning sadoqati boqiy shogirdi, salohiyatli muarrix Abulfazl Bayhakiydan bo'lib, unda amir Mas'ud boshlagan qatl-u qirg'inlar hikoya qilingan ekan.

– Amir, ota farzandi emasmu, dorus-saltanatga yetib bormasdanoq ming-ming kishilarning boshlarini olibdi. Ikkala vazir ham qatl qilinibdi. Ular egilgan boshni qilich kesmas deb, barcha lashkar, barcha ganjni olib, amirga peshvoz chiqsalar ham, uning oyog'ini o'pib yig'lasalar ham, gunohlaridan kechmabdi. Ali G'aribni Nishopurda, o'z inisining uyida, mehmondorchilik chog'da chavaqlab tashlabdilar. Abul Hasanakni esa qarmatdiy deb (taqdirning g'alat o'yinidan qo'rqulik!) Hirot bozorida toshbo'ron qildiribdi! Dahshat! Mana, o'zing o'qib ko'r. Mana bu yerini o'qi! – Shayx shunday deb, qo'lidagi maktubni menga uzatdi.

Kamina ko'p husnixat xattotlarning dastxatini ko'rganmen, ammo Abulfazl Bayhakiyning dastxatiday chiroyli dastxatni ko'rmaganmen.

Suls usulida yozilgan bu maktubda shunday so'zlarni o'qidim.

«Abul Hasanakni dor tagiga, – bunday jazodan o'zing asragaysen, e, Yaratgan Egam! – keltirib, ust-boshini yechishni amr qildilar. Abul Hasanak, shalvarini ko'tarib, belini mahkam bog'ladi, eskirgan, ammo qimmatbaho siyohrang jubbasi va ko'ylagini yechdi va surmarang sallasiga qo'shib bir chekkaga otdi. So'ng yolg'iz ishtonda, kumushday oppoq tanasi va ko'hlik

chehrasini yig'ilgan olomonga namoyon qilib, dor tagida to'xtadi. Olomon, garchi Abul Hasanakdan yaxshilik ko'rmagan bo'lsa ham, uning holiga achinib, yum-yum yig'ladi. Jallodlar uning yuziga tosh tegmasin deb, toki kallasini Bag'dod xalifasiga in'om qilib yuborish niyatida edilar, boshiga temir niqob kiydirdilar.

Shundan keyin olomonga qarab, «toshbo'ron qilinglar bu iymonsizni!» deb amr qildilar. Ammo rahmdil avom, garchi Abul Hasanakni yomon ko'rsa ham, unga tosh otishni istamadi. Olomon orasidan: «Dorga osiladurg'on bir sho'rlikni toshbo'ron qilishning ne hojati bor? Undan ko'ra dorga osinglar, tezroq!» degan xitoblar eshitildi va katta g'alayon boshlandi. Ammo bozor maydonini qurshab olgan suvorilar ot surib kelib, g'alayonni bosdilar. So'ng jallodlar Abul Hasanakning bo'yniga sirtmoq solib, oyoqlari ostidagi kursini tepib yubordilar va yana olomonga qarab toshbo'ron qilishni buyurdilar. Olomon yana sukut qildi.

Shunda gadolarga pul ulashib, Abul Hasanakni toshbo'ron qilishga da'vat etdilar. Ular dorda pitir-lab jon berayotgan Abul Hasanakka tosh otdilar, ammo Abul Hasanak jon taslim qilib bo'lgan edi.

Jallodlar uning boshini tanidan judo qilib, oyog'idan dorga osib qo'ydilar<sup>1</sup>.

Abul Hasanakning Abul Sahl Zavzoniyl degan eski tanishi bo'lg'usi edi. Bu odam o'sha kuni ko'p nufuzli bek va bekdodalarni mehmonga chaqirib, katta ziyofat berdi. May daryoday oqib, ziyofat ayni qizigan chog'da qopqoqlik oltin jom keltirdilar.

---

<sup>1</sup> Abulfazl Bayhakiyning guvoh berishicha, Abul Hasanakning jasadi dorda yetti yil osilib turgan, hech kim uni dordan olib dafn qilmagan.

– Bu yangi pishgan mevalar, – dedi Abul Sahl Zavzoni. – Mazasini tatib ko‘raylik!

– Tatib ko‘raylik! – dedilar mehmonlar ham.

Oltin jomning qopqog‘ini oldilar. Qarasalar, jomda... Abul Hasanakning qonga bo‘yalgan boshi!..

Dahshatga tushgan mehmonlar mehmonxonani tashlab qochdilar...

Qasosli dunyo ekan. Abul Hasanak, – Alloh uning gunohlarini kechirgay! – ahli mo‘min-ga ko‘p jabr qilgan edi, jazosini tortdi. Jazosini tortmagan yolg‘iz anov makkor, o‘zini hazrat Ibn Sino deb, hammani, hatto, sultoni salotinni ham to‘nab, xurjun-xurjun ganjini olib qochgan Abu Shilqim ibn Shahvoni qoldi, xolos. Aytadilarki, burgaga tuzoq qo‘ygan ul firibgar Movarounnahr tomonlarda hanuz o‘zini hazrat Ibn Sino deb, sho‘rlik avomni to‘nab yurgan emish...»

Maktub shu yerga kelganda kamina beixtiyor shayxga qaradim. Shayx xayolga tolib o‘tirgan edi, mening qaraganimni ko‘rib o‘rnidan turdi.

– Donolar haq, – dedi shayx. – Bu ko‘hna dunyoda kimki jafo qilsa, jafo, vafo qilsa, vafo topg‘usidir.

– Abu Shilqim ibn Shahvoni-chi? – dedim men. Shayx uning nomini eshitib, xushnud kuldi.

– Ibn Shahvoni taqdiri azalning ajab jumbog‘i. Bu jumboqni donolar ham yechishga ojizlik qilur! – dedi shayx. – Ustod Beruniy haq. Bu dunyo ustunlaridan yiroq yurmoq darkor. Darhaqiqat, bu olamda mutolaa va mushohada baxtidan ulkan baxt yo‘q ekan. Qo‘lingga qog‘oz-qalam ol, ishga kirishaylik, azizim! – shayx shunday deb, kutubxona eshigini ochdi».

*(Abu Ubayd al-Juzjoni xotiralaridan).*

*Adabiy-badiiy nashr*

ODIL YOQUBOV

**KO'HNA DUNYO**

*Roman*

Muharrir  
Ma'mura QUTLIYEVA

Badiiy muharrir  
Uyg'un SOLIHOV

Musahhih  
Madina MAHMUDOVA

Kompyuterda sahifalovchi  
Sunnat MUSAMEDOV

Texnik muharrir  
Surayyo AHMEDOVA

Litsenziya raqami: AI № 252, 2014-yil 2-oktabrda berilgan.

Bosishga 2015-yil 17.07 da ruxsat etildi.

Bichimi 84x108 1\32.

Bosma tobog'i 15,0. Shartli bosma tobog'i 25,25.

Garnitura «Bookman Old Style». Ofset qog'ozi.

Adadi 5000 nusxa. Buyurtma № 143.

Bahosi kelishilgan narxda.

«Yangi asr avlodi» NMMda tayyorlandi va chop etildi.  
100113. Toshkent, Chilonzor-8, Qatortol ko'chasi, 60.

**Murojaat uchun telefonlar:**

Nashr bo'limi – 278-30-52;

Marketing bo'limi – 128-78-43. faks – 273-00-14;

e-mail: yangiasravlodi@mail.ru

**«Yangi asr avlodi» NMM**  
**«Kamolot kutubxonasi» ruknida**  
**quyidagi yangi kitoblarni nashr etdi:**

**SHUKUR XOLMIRZAYEV**

**«O'n sakkizga kirmagan kim bor»**

**84x108 1/32, 388 bet, qattiq muqova**

Mazkur kitobga O'zbekiston xalq yozuvchisi, iqtidorli adib Shukur Xolmirzayevning eng sara qissa va hikoyalari kiritilgan. Ularda sevgi-muhabbatning o'zgacha talqini, oshiqlik va ojizlik, matonat va razolat, inson ma'naviyati bilan bog'liq bo'lgan ijtimoiy va axloqiy masalalar bayon etiladi.

**O'TKIR HOSHIMOV**

**«Dunyoning ishlari»**

**84x108 1/32, 336 bet, yumshoq muqova**

XX asr o'zbek adabiyotida o'z o'rnini va uslubi-ga ega bo'lgan adib – O'zbekiston xalq yozuvchisi O'tkir Hoshimov, aytish mumkinki, XXI asr o'quvchisining ham sevimli adibi bo'lib qoladi.

Jonli va hayotiy tasvirlar, sof o'zbekona yondashuv va xarakter, qahramonlar o'rtasidagi suhbatlar mutolaasi o'quvchini o'z ta'siriga oladi. Nafaqat millat, balki chin insoniylik tarannumi yozuvchi asarlarida yetakchilik qilishi kitobxon uchun tarbiyaviy va hayotiy saboq bo'ladi. Xoh jiddiy, xoh hajviy bo'lsin O'tkir Hoshimov asarlarida hayot qaynaydi: unda har birimiz o'zimizni, oilamizni, do'st-u yorimizni, hatto hech kimga o'xshamagan onamizni ko'ramiz...

Bir inson umrini qamragan roman bo'lsin, qator novellalardan iborat qissa yoki hikoya bo'lsin, janridan qat'i nazar, O'tkir Hoshimov asarlarida

dunyoning ishlari mujassam. Mutolaa har qanday o'quvchi uchun katta hayotiy xulosa berishiga ishonamiz.

## **JADID ADABIYOTI NAMOYANDALARI**

**«Odob-axloq kitobi»**

**84x108 1/32, 192 bet, yumshoq muqova**

O'tgan asr boshlarida yangi tuzum maktablari-ning tashkil etilishi nafaqat davr farzandlarining, balki millat bolalarining ma'naviyatida tub burilish yasadi, desak xato bo'lmaydi. Zamon ma'rifatparvarlari o'quvchilar uchun qator darsliklar yaratishdi, risolalar chop etishdi, gazeta va jurnallar ochishdi.

Bugungi o'quvchilar aynan o'sha maqolalarni, asarlarni, kitoblarni qayta-qayta o'qishi lozim, chunki ustozlarimizni, boringki, ustozlarimizning ustozlarini ma'rifatga chorlagan, ilmga oshno qilgan, ziyoli qilgan asarlar bugungi davr uchun ham qadrli, ham zarur.

Mazkur kitobda XX asr boshlaridagi adabiyot – ilm va chin insoniylikka chorlovchi asarlar jamlandi.

## **O'LMAS UMARBEOV**

**«Odam bo'lish qiyin»**

**84x108 1/32, 352 bet, yumshoq muqova**

O'tgan asrning ikkinchi yarmidagi o'zbek nasri rivojida yozuvchi O'lmas Umarbekovning o'ziga xos o'rni bor. Uning yoshlar hayoti, ma'naviy-axloqiy muammolar, insonlarning murakkab munosabat-lari haqida yaratilgan roman, qissa va hikoyalari bugungi kunda ham sevib o'qiladigan asarlardir. Adib bolalarning bepoyon orzular olami, yoshlar-

ning goh lazzatli, goh iztirobli muhabbati, vafo, xiyonat, otalar va bolalar, umuman, turfa toifadagi insonlar o'rtasidagi munosabatlarni g'oyat chuqur va samimiy tasvirleydi. Shuning uchun ham adibning asarlari hamon kitobxonlar qalbini rom etib kelmoqda.

**SAID AHMAD**

**«Ufq»**

**84x108 1/32, 912 bet, qattiq muqova**

Said Ahmadning «Ufq» trilogiyasi nafaqat yozuvchi ijodida, balki o'zbek adabiyotida yangi janr hisoblanadi. Ijodining eng sermahsul davrida yozgan ushbu roman-trilogiyada yozuvchi Ikkinchi jahon urushining olovli yillarida o'zbek dehqonlarining front orqasida ko'rsatgan mehnat qahramonliklari haqida hikoya qiladi, urushdan oldingi va keyingi davr muammolari haqida bahs yuritadi.

Davrga xos qiyinchiliklar, mashaqqatlar og'ushida urush va mehnat frontiga safarbar qilingan yoshlar qalbi jo'shqinlik va muhabbat tuyg'ularidan yiroq emas: Azizxon va Lutfinisa, Nizomjon va Dildor, Tursunboy va Zebixon... Asarda o't-olov bo'lib yongan oshiq-ma'shuqlarning hech biriga visol nasib etmaydi. Qiyinchiliklardan keyin qahramonlar yana sevgiga, sadoqatga ro'baro' bo'lishadi, ammo birinchi muhabbat davr va sinovlar qa'riga singib ketadi...

O'quvchi mutolaa davomida nafaqat jonli tasvirlar orqali tarixiy ma'lumotlar bilan tanishadi, balki hayot mashaqqatlaridan saboq chiqarishga, insoniylik va muhabbat aynan qiyinchiliklar ta'sirida toblanishiga amin bo'ladi.